

清代傳記叢刊・綜錄類②
周 駿 富 輯

清史列傳

(三)

卷一七至
卷二四

清國史館原編



明文書局印行

清史列傳 卷十七

大臣畫一傳檔正編十四

杭奕祿

杭奕祿滿洲鑲紅旗人姓完顏氏由閒散考授中書雍正元年正月授額外員外郎三月補監察御史十月遷光祿寺少卿二年十一月充繙譯鄉試副考官三年正月遷光祿寺卿時奉旨蘇州松江長蠲正額錢糧四十五萬杭奕祿疏言聖主施千古未有之殊恩蠲錢糧至四十五萬臣維蠲免之數按田均算其中有田者雖多無田而佃種人田者亦不少有田納賦既邀蠲免定額佃人納租業主亦宜酌減常式俾貧富均沾實惠得旨此奏甚公下九卿詹事科道議尋議減十分之二三如業戶免額一錢則佃戶免租米三升詔如議速行五月擢左副都史仍兼管光祿寺事五年九月以安南國定界事命偕內閣學士任蘭枝往諭國王黎維禔先是原任雲貴總督高其倬查奏安南國界有內地舊境百二十里應加清理於賭咒河立界國王具疏陳辯上命總督鄂爾泰再行確查給還八十里於鉛廠

山下小河內四十里立界國王復疏辯救該國王不必以從前侵占內地爲嫌中心疑懼拳拳申辯至是復命杭奕祿等往諭未至國王奉敕悔罪上表謝鄂爾泰以聞六年正月詔以鄂爾泰所查鉛廠山下四十里地界安南並敕諭杭奕祿等賚往宣讀賜敕曰朕前令守土各官清理疆界原屬行之內地未令清查及於安南也督臣高其倬以職任封疆詳考志書兼訪輿論知開化府與安南分界處當在逢春里之賭咒河於是一面設汛一面奏聞比因該國王陳奏朕特降旨令撤汛另議立界又恐高其倬固執已見復命接任總督鄂爾泰秉公辦理鄂爾泰體朕懷遠之心定界於鉛廠山下小河較舊界已縮減八十里誠爲仁至義盡此皆地方大臣經理疆界職分所當爲朕統馭寰宇凡屬臣服之邦皆隸版籍安南旣列藩封尺地莫非吾土何必較論此區區四十里之地若該國王以至情懇求朕亦何難開恩賜與祇以兩督臣定界時該國王激切奏請過於缺望種種陳訴甚爲不恭該國王旣失事上之道朕亦無從施惠下之仁此天地之常經上下之定體乃王自取非朕初心也頃鄂爾泰將該國王上年十二月內本章呈奏知該國王深感朝廷之仁自悔從前執迷之誤踴躍拜命詞意虔恭朕覽閱之餘甚爲嘉

悅在王既知盡禮在朕便可加恩況此四十里之地在雲南爲朕之內地在安南仍爲朕之外藩一毫無所分別著將此地仍賞賜該國王世守之並遣大臣前往宣諭該國王其知朕意十月杭奕祿等回京奏言臣等於三月自滇起程取道廣西五月至鎮南關安南陪臣范謙益等六員叩迎關門外六月抵貂瑤營國王復遣陪臣迎勞且請儀注欲以其國禮敬行五拜三叩臣等責以天朝定制薄海共遵無得更張乃愧悚聽命臣等渡富良江至彼國長安門國王黎維禡跪迎臣捧敕由中門入維禡率文武陪臣聽宣畢行三跪九叩首禮臣等復宣示皇上中外一視種種恩德嗣後當倍加忠慎戒飭守邊員日毋得滋事階禍維禡聞言以手至額者再四誓世世子孫永矢臣節復送至長安門兼餽饗儀臣等婉辭不受回至鎮南關陪臣吳廷碩等四員賁國王陳謝表章叩乞轉奏臣等伏思安南僻處荒遠久列外藩皇上念其累世恭順不忍以片壤故卽加兵討且鑒其感恩悔罪行賞賜地此誠怙冒鴻慈撫綏至計臣等睹其異地之歡騰識天威之遐暢謹據實奏聞祈宣付史館昭垂萬世疏入上允之是月授刑部左侍郎尋署吏部尙書十一月遣杭奕祿偕副都統覺羅海蘭赴湖南會巡撫王國棟訊逆犯曾靜尋命

提犯來京七年九月授鑲紅旗滿洲副都統仍兼侍郎八年三月奉旨解任回旗辦事四月補禮部左侍郎五月署右翼前鋒統領時準噶爾台吉噶爾丹策凌納青海叛賊羅卜藏丹津久不獻大軍征剿九年二月上慮陝甘二省民或以用兵爲累特命杭奕祿與左都御史史貽直署內務府總管鄭渾寶率同翰林院庶吉士及六部學習人員國子監肄業選拔貢生等往宣諭化導七月諭杭奕祿協辦西安軍需其宣諭化導事交史貽直鄭渾寶分辨十年七月署西安將軍十一月諭曰聞陝西甘涼沿途一帶營伍廢弛總督劉於義事務繁多不能親身查閱著侍郎杭奕祿往來稽查悉心整頓給與欽差大臣關防凡有辦理事宜俱與劉於義酌行山西近邊營伍與陝西相近者亦著杭奕祿一體稽查十一年七月諭曰杭奕祿係朕特差稽查沿邊營伍之大臣理宜體卹弁兵潔已奉公以副委任今聞其沿邊驕奢放縱擾累兵民甚屬溺職尋奉旨在肅州永遠枷號乾隆元年二月召來京授額外內閣學士三月補工部右侍郎時恭修世宗憲皇帝實錄命杭奕祿充副總裁四月遣往西藏駐劄辦事十二月轉工部左侍郎四年四月奏言西藏西南三千里外巴爾布國有三汗一名庫庫木一名顏布一名葉楞雍正十

二年會通貢近三汗交惡臣遣貝勒顏羅爾宣諭罷兵三汗歡欣聽命遣使呈進部落戶口數並金銀絲緞及珊瑚念珠等物報聞六月遵旨還京調刑部左侍郎十二月襲其從兄戶部侍郎申珠渾所遺三等輕車都尉世職五年二月奏言巴塘裏塘土司品秩同所屬地方亦相等歲給養廉巴塘一千兩裏塘祇一百三十五兩請將裏塘土司二員量增養廉詔於裏塘地方征收錢糧內交打箭爐充餉者以四百兩增賞土司用示優卹三月擢左都御史四月兼議政大臣十二月因秋審冊錯擬緩決降二級留任十年十月以老乞休諭曰卿才品優長簡任風紀正資料理著照舊供職十一年閏三月上察其行走艱難命以原官致仕十三年七月卒子哈豐阿襲三等伯及輕車都尉世職現任山西參將

盛安

盛安滿洲鑲黃旗人姓那拉氏康熙二十六年襲其祖聶克色一等輕車都尉兼一雲騎尉三十九年授三等侍衛四十一年擢二等侍衛四十六年授內務府員外郎雍正元年正月內務府官員分別等次引見革退員外郎仍留世職在旗行走五年四月因員外郎任內應賠官銀未交革職十年授內務府主事十一年二

月遷郎中四月升太僕寺卿五月授刑部侍郎十月授滿洲正藍旗副都統十一月署正紅旗都統十二年十一月兼理內務府總管事十三年九月授秦陵總管乾隆二年七月疏言六月末大雨山水陡發易州橋翅間有坍塌七月初一日所用羊隻瓜果僅得無誤伏思朔望並中元致祭典禮至重而每年夏秋之際大雨時行查禮部奏定規制果品冰窖牛羊棚圈在易州西關外往返五十餘里實屬迂遠請改建於夏莊左近並於風水牆內外建橋數座以濟往來部議從之七年四月授滿洲正藍旗都統旋兼管刑部侍郎事七月充考試中書閱卷官十年三月擢刑部尙書議政大臣七月御史萬年茂疏言律載十歲以下殺人者奏聞請旨雍正年中有年僅十四歲毆斃人命一案蒙恩旨寬免減等收贖本年六月有年僅十五歲斃人命一案刑部並未援案聲請嗣後凡遇年未及歲之案法司應覈其情罪較輕者聲明情有可原較重者按律定擬亦於疏內聲敘恭候欽定盛安奏人命至重無辜被殺之命較兇手之命更覺可憫况人年至十五非復十歲以下幼童可比乃十歲以下殺人者猶必擬罪奏取上裁而十五歲以下殺人者竟爲援例請免似未允協若定以十五歲以下殺人免罪之例儻奸徒與人有怨

誘令十五歲以下之人爲之挺身報仇亦非辟以止辟之意雖年未及歲殺人之心均未必情甚可惡然而漸不可長端不可開自仍按律擬抵其中情甚輕而可憫者奏請上裁祇可偶一行之其餘情雖稍輕而未甚可憫者或於秋審時擬以可矜或於特旨清理刑獄時酌議原減在犯者一二年囹圄之苦既有悔心之萌幸而減免或能悛改且常法不爲之宥必俟國家格外之恩減免又可使知法不可輕犯弼教明刑正爲此也若於三法司定案之初卽惜其年齒之尙幼可原而不究其殺人之情罪至大逐案爲之聲明名爲恩出自上實則法弛於下習而生玩且謂十五歲以下殺人不死定例如是豈所以仰體我皇上慎重民命之至意下九卿議行十一年五月調左都御史十二月調滿洲正黃旗都統十二年正月充繙譯鄉試正考官四月御史馮鈐奏司坊官緝案獲不及半者應不准保題盛安等議覆司坊以命盜案爲重緝案無礙保題上以其覆奏含糊著察議尋議降一級留任十三年六月仍授刑部尙書七月議革職知府金文淳罪失常諭曰盛安素喜沽名皇考時教導不悛以致革職朕加恩屢經任用近時刑部尙書一不得熟練之人是以復令辦理乃到任後故智復萌於參革錦州府知府金文淳

雍頭一案刑部遲延不奏朕意伊等必有故遲其罪以待言官之陳奏如此則將啟夤緣朋黨之風所係更大正欲而降諭旨訓飭孰知盛安急又改擬斬候因不進本此案伊在都察院時已經於勾決本內畫題及調任刑部忽又自改前議斬決重案豈可以一人之意見爲輕重況伊補授刑部尙書後召見時卽陳奏此案伊雖畫題似應擬斬監候朕諭以爾與刑部堂官按例定擬朕自加恩伊並不將此旨告之同官惟稱斬決過重遲迴觀望久而不奏及召之面加詰詢伊乃稱孝恭仁皇后大喪內有佐領李斯琦雍頭問擬斬候之案今擬斬決恐人疑其辦理未協等語在伊果見以爲過當卽應於都御史任內未經面奉諭旨之前具奏何獨爲刑部尙書時方爲過重且伊已知朕意在從寬而必不肯令改寬之旨出於朕之特恩而出於彼沽取持平之名歸於一己其心尙可問乎今日面問伊時惟以滿語奏稱曾有是語而不肯漢語承認是於此際猶不肯令漢大臣知朕從寬之意以沽名於衆漢人也又巧謂恐人議其過重於朕名爲不美試思部議重而朕特從輕宥傳之海內爲美名乎爲不美之名乎伊以執法之司不遵明旨不按成法不通知同官而固執私見激朕使怒重治其罪則過在君父而已居美名豈

非巧節之尤者乎卽以金文淳一案與李斯琦一案相較在李斯琦當日不過廢員私自薙頭耳而金文淳由翰林出身官至知府並非冒昧不知大義者可比同城之防禦又曾以滿官皆未薙頭正言規諫而金文淳悍然不顧李斯琦案情同此乎且薙頭一事始於阿里袞之武弁貪婪案內有國服薙頭之一語大學士照例票簽朕謂違國制之罪重而貪婪之罪輕照例票簽非是改令治其違制之罪夫君臣上下之所以相維繫者賴有此名分也視此爲泛常而忽之其所繫者尙小乎朕臨御十三年居心行政海內共知而盛安敢於肆行私意曲法徇庇以爲己德其處心積慮視朕爲何如主耶著拏交刑部從重治罪以爲人臣目無君上巧僞沽名者戒尋議盛安照大臣巧言諫免暗邀人心律擬斬立決得旨從寬改爲斬候十月諭曰見在阿哥書房一時不得其人盛安獲罪之處本無可赦不宜再用但念其一時冒昧所謂愚而可憫者其經經自守猶可在書房效力著於阿哥師傅處行走贖罪十四年四月以病免其行走二十四年六月卒

梅穀成

梅穀成安徽宣城人祖文鼎貢生精天文算學康熙四十一年大學士李光地以

所著書進呈上南巡回鑾召見於德州舟次御書績學參微額以賜俾還籍諭光地曰朕留心數學多年此學今鮮知者如梅文鼎真當世僅見也五十一年上聞穀成能承家學召入內廷於是穀成以生員供奉蒙養齋彙編御製天文樂律算法諸書五十三年欽賜舉人五十四年復賜殿試成進士改庶吉士散館授編修雍正七年改江南道御史命巡視通州漕務八年轉工科給事中九年三月遷光祿寺少卿八月遷通政司參議尋丁母憂服闋補原官乾隆元年擢順天府府丞二年充增修時憲算書館總裁官三年十月順天武鄉試有鹽山縣武生趙大武等因探知外場合式倩人入內場被獲穀成疏言武鄉試外場請照會試例分四圍較閱其合式挑好字及雙好字者皆暗記密送內場以防洩漏又內場點名冊請按圍分造卽令原監試御史點名識認下部議行尋以失察頂冒穀成降一級調用四年補光祿寺少卿總管算學五年疏言舉人會試所領恩給盤費間因患病事故半途而返或到京不能入場者部臣恐其假託冒領概行追繳連年累月追求不已情殊可憫懇自己未科以前概免核追部議查明實係丁憂患病及力不能完者准豁免餘仍追繳六年疏言臣見兩江總督那蘇圖請禁無印硃票一

疏竊思無印之票固宜禁止而印票不銷蠹役持以嚇詐鄉愚流毒更甚請差票事竣卽銷上司時加查察違者揭參部議從之尋遷鴻臚寺卿七年奏言正一真人張遇隆遣人到寺投職名欲隨班恭祝萬壽臣未知真人應否隨班應列何品行查禮部據稱應列左都御史下侍郎前臣思道家濫廁班聯不合典禮似宜釐正查正一真人襲自明初秩視二品隆慶初臣工多言張氏所爲不法世襲宜革遂改爲上清觀提點秩五品厥後黃緣復故號迨至本朝相沿已久祈禳驅邪時有小驗仍而不革可也假以禮貌可也而乃竟入班行儼然與九卿並列殊於觀瞻有礙我皇上聖作明述修禮正樂因太常寺樂員沿明舊例用道士承充特頒諭旨謂二氏異樂不宜用之朝廷今駿奔之選已遵旨改業則舞蹈之班何可仍廁乎其間或言張氏世襲冠帶非同常道殊不知張氏之襲乃假以冠帶約束黃冠亦如僧人之僧錄僧綱雖有品級安得與臣工伍臣請敕部定議嗣後正一真人不必令人班行上是其言下部議行八年疏言外任官自京赴任者例由鴻臚寺引至午門前謝恩載在會典近惟月選官遵例報名其保舉題陞揀選等官臣寺無憑查考請敕吏兵二部一體移會以便稽查九年又言臣前請定候考序班

額並遵會典行學政咨取不許生員赴寺具呈經部議覆准定額而生員具呈謂既有同鄉官印結自無冒濫臣思夤緣請託之弊不可不杜請嚴禁詔並允行十年遷通政司右通政尋擢宗人府府丞十二年四月遷都察院左副都御史十一月疏言前經禮部議覆臣所奏道流濫廁班聯一疏據江西通志內稱真人張繼宗於康熙十九年授光祿大夫署真人張昭麟又於乾隆二年題請承襲彼時臣因封典非鴻臚寺職掌未敢瀆陳今當重修會典何敢緘默查道教本屬異端而符籙更道教旁門正一真人秩視二品原係前明敝政仍而不改已非所宜況又加至光祿大夫官階之極品封及三代錫類之曠典若係特邀異數必降明旨何以不存於檔冊不見於會典我國家於世襲之典尤極慎重其襲替之高卑久暫皆視其功績大小不容絲毫假借張繼宗卽果蒙封典亦必無准其世世承襲之理且以孔子之聖後裔乃襲公爵顏曾思孟所襲不過博士儒林已不勝其榮今張氏所襲遠過大賢幾與聖裔無別可否照提點演法之類給與品級出自聖恩疏下部議正一真人不許援例請封授秩正五品十三年正月疏劾浙江按察使萬國宣於尼僧羅柴氏控貢生陳學愈逼斃三命一案不行詳究反將學愈開釋

經御史沈廷芳參奏特遣刑部郎中德福往審沈冤始雪國宣玩法縱奸草菅民命請交部嚴議諭曰梅穀成據實糾參所奏甚是萬國宣著交部嚴加議處閏七月擢刑部右侍郎八月浙江學政陳其凝署內閱卷生員樊顯自刎命穀成往同巡撫方觀承會鞫得其凝縱子及僕吏串通舞弊狀以聞論罪如律十五年七月疏言科場同考閱卷例分經房請止分房數不必分經可除尋查關節之弊諭曰掣籤分經原以除弊不必更改惟一經之中房考數員內有籍係同省者平居素爲熟習入簾時彼此相通易爲照應朕意不若於定例之中稍示變通之法嗣後房考入闈仍照舊掣籤分經其一經內房考有籍係同省者令主考官酌量對調閱看亦或釐剔弊端之一道著爲令九月擢左都御史十六年穀成劾山東巡撫準泰承審衝突儀仗之房鉉一案不應擅引乾隆十三年諭旨一面具題一面正法請通飭內外法司嗣後不得假借牽引諭曰朕前所降諭旨原爲聚衆抗官爲首之重犯而言尋常立決之案自難比附援擬至房鉉一案平日居鄉狂悖多事又復造言誹謗逆迹昭著深爲地方人心風俗之害較之首惡脅衆者情罪尤重其所犯本不在衝突儀仗亦不在誣告官長該撫準泰先經面奏外間自無由知

卽其摺內所奏亦甚明悉梅穀成未經詳閱遽謂準泰忿其告官故違成例亟欲其死之處實屬深文吹求朕慎重刑章卽尋常案獄皆不憚反覆推求務期平允督撫等孰敢以民命所關竟行率意援引潛移生殺之權者此可信其必無準泰亦何敢出此但梅穀成因事立言恐開挾私洩忿之端意在防微杜漸則所奏亦未可盡非耳特此曉諭中外知之十七年三月以查議宗人府王公等處分一案有意從重交部嚴議革職得旨從寬留任十一月充經筵講官十八年尙書步軍統領舒赫德疏劾巡城給事中特吞岱行止卑污庇賤役子濫捐職銜之劉裕泰爲請於堂官列銜贈額部議穀成降三級調用諭曰特吞岱卑污狼籍乃梅穀成於召見時屢次稱薦且倡議給匾劉裕泰又復自行書寫是此案皆起於梅穀成況伊年已衰老著以原品休致二十二年諭曰左都御史梅穀成自皇祖時以算學效力內廷經朕擢用洊歷正卿今謝事家居年近八十著加恩照原品級在家食俸二十七年上南巡穀成迎駕於清江浦諭曰原任左都御史梅穀成以康熙間舊人服官有年休致在籍今前來接駕雖齒逾八秩而神明不衰居鄉亦復安靜洵屬昇平耆瑞念其家計清素諸子內亦無通籍之人著加恩將伊子梅錢賞

給舉人一體會試以示優眷賜詩曰無欲有精神趨迎清浦濱閉門惟教子下榻不延賓能駐西山日引恬江國春推恩緣念舊皇祖內廷臣二十八年卒遺疏請入籍江寧允之並命照原銜予祭葬如例諡文穆

傅爾丹

傅爾丹滿洲鑲黃旗人追贈信勇公費英東之曾孫父沃赫襲公爵官都統康熙二十年傅爾丹襲三等公兼佐領三十八年授散秩大臣四十二年扈駕西巡駐蹕祁縣鄭家莊上於行宮前閱太原城守兵騎射有卒馬驚突近御仗傅爾丹前止其馬擒之下諭曰馬驚逸漸近御仗諸年少大臣俱效年老大臣旁觀不動惟爾直前勒止之可謂能繼武前人矣特賜爾貂皮掛一領嗣後益加勉力毋以身爲大臣而不思奮力向前也四十三年授正藍旗蒙古都統四十七年調正白旗蒙古都統四十八年授領侍衛內大臣五十四年三月以託疾革領侍衛內大臣職七月命率土默特兵千赴烏蘭固木等處屯田五十六年正月復授領侍衛內大臣奏請增購農具於本年未播種前送軍前並增遣效力廢員佐理屯務議政大臣議如所請三月命爲振武將軍率北路大軍由阿爾台襲擊準噶爾五十七

年疏請與西路靖逆將軍富寧安分路進剿諭議定師期傅爾丹尋請選兵萬二千偕征西將軍祁里德賚百一十日糧於五月啟行富寧安請以兵七千賚四十日糧於閏八月啟行議政大臣等以師期不符令另議傅爾丹奏言由布魯爾直抵額爾齊斯河與富寧安俱定於七月進剿廷議準噶爾現遣使來青海已令傳諭策妄阿喇布坦應暫停俟回奏仍飭兩路繕兵防守先是奉旨於烏蘭固木及科布多築城衛喀爾喀游牧上以傅爾丹等駐北路久稔地形敕相度具奏其設驛與遣往之員外郎保住會同詳議五十八年正月疏言鄂勒齊圖郭勒土肥寒暑與內地同宜築城貯糧保住已從殺虎口至彼詳視宜設站三十六諭曰鄂勒齊圖郭勒居喀爾喀游牧地方之中與大兵駐劄處相隔千里今欲護衛喀爾喀應於阿爾台科布多等處築城遠立哨兵方是傅爾丹等既奏鄂勒齊圖郭勒應築城貯糧或於科布多另築一城駐兵看管充發人等耕種著同保住及喀爾喀王貝勒公等會議尋覆奏科布多隔大河水漲輒阻材木難致近科布多有察罕度爾水草俱距鄂勒齊圖郭勒千里兩地宜各築城一城置屋二千間自鄂勒齊圖郭勒至察罕度爾設十一站允之四月命卽軍中自授章京等官五十九年六

月率兵八千由布拉罕進剿九月疏報大兵抵格爾額爾格準噶爾棄帳械驚潰臣等分兵追擊之斬二百餘級擒宰桑貝坤等百餘盡降其衆又偵烏蘭呼濟爾爲彼屯耕所躪殆盡焚其糧草整隊而還報聞雍正元年命撥兵赴巴里坤以傅爾丹兼統祁里德軍三年率京兵進授內大臣四年授黑龍江將軍五年五月疏言墨爾根城舊有額兵九百並無槍礮船隻請增選漢軍兵百名合爲一千置舟械操演下議政王大臣議行十一月諭曰傅爾丹乃勳舊大臣之裔伊在阿爾台一路將軍任內效力有年因辦理錢糧事務不清以致應賠銀兩甚多此乃管辦錢糧人員不妥故爲所累傅爾丹自署理黑龍江將軍事務以來竭誠辦事效力勤勞伊名下應賠各銀兩俱從寬免六年授吏部尙書賜雙眼孔雀翎七年剿噶爾丹策凌詔以傅爾丹爲靖邊大將軍由北路出師賜御用朝珠及黃帶紫轡銀五千兩尋加少保八年三月噶爾丹策凌奉表請獻叛賊羅卜藏丹津諭傅爾丹暫緩進兵同西路寧遠大將軍岳鍾琪來京會籌軍務十二月還軍營九年二月疏言北路遵旨築城科布多地勢接布魯爾與庫列圖近爲進兵孔道請仍於此築城大學士等公議如所請六月奏言臣統大軍抵科布多據守卡侍衛巴爾善

等擒準噶爾一人曰塔蘇爾海丹巴詢之云噶爾丹策凌發兵三萬令大策凌敦多卜小策凌敦多卜等分領由阿爾台山奇蘭犯我北路今小策凌敦多卜已至察罕哈達而大策凌敦多卜因噶爾丹策凌妹夫羅卜藏策凌向駐阿里嗎圖沙喇壁勒防哈薩克今與噶爾丹策凌隙率三千餘戶來投追者爲所敗以是大策凌敦多卜尙未至臣思賊兵未集當乘其不備襲之選兵一萬輕裝由科布多河西分二隊於六月初九日進剿前鋒統領定壽等領第一隊參贊馬爾薩等領第二隊臣以大兵繼進掩擊令都統袞泰等以兵七千三百築城都統侯陳泰等以兵五千駐科布多河東扼通奇蘭要路又奏定壽等擒賊巴爾喀等十二人於雅克賽河據云距察罕哈達止三日程準噶爾兵不過千人尙未立營臣卽乘夜往襲奏入報聞七月奏言臣等於六月十七日獲準噶爾偵者云博克托嶺有賊二千駝馬萬餘臣遣參贊蘇圖副都統岱豪等以兵三千往剿十八日遣定壽以兵千五百名與賊戰於庫列圖嶺斬四百餘級賊驅駝馬踰嶺遁十九日定壽蘇圖等與臣合二十日賊二萬餘從高阜衝我營督戰殺千餘賊副都統塔爾岱馬爾齊以兵二千奪西山二十一日因賊據險我軍移營於和通呼爾哈諾爾定壽蘇

圖及參贊覺羅海蘭副都統常祿西彌賴據山梁之東塔爾岱馬爾齊據其西副都統承保居中策應參贊馬爾薩由東路公達福岱豪在前副都統舒楞額土默特公沙津達賴等護後營甫移賊犯山梁東西兩軍定壽等力戰殺賊忽大風雨雹被圍臣遣兵救出塔爾岱又遣承保援定壽等會日暮未解二十二日海蘭突圍出定壽蘇圖馬爾齊自盡常祿陣歿西彌賴令索倫兵馳援定壽軍潰亦自盡二十三日賊連犯大營臣督軍力戰斬賊五百餘沙津達賴等及察哈爾兵皆潰惟滿洲兵四千不動二十四日隨印侍郎永圖及海蘭岱豪俱自盡臣等以步兵退方設營護輜重令塔爾岱舒楞額殿承保統右翼馬爾薩統左翼臣與副將軍巴賽查弼納往來巡軍副都統德祿捧敕印行賊衆三萬蜂集我軍且戰且退殺賊千餘達福歿於陣二十八日渡哈爾噶納河賊猶追衝左翼復擊斬五百餘七月朔日臣等還科布多築城處我兵陸續歸營者二千餘臣遣迎未歸諸將惟塔爾岱負創至巴賽查弼納馬爾薩舒楞額皆陣歿臣輕舉妄動以致敗績請立正典刑奏入諭曰此舉損兵敗績雖屬有罪朕因爾等之竭蹙力戰寬恕其罪痛惻難忍不覺淚下將朕親束之帶賜與傅爾丹繫之爾等忿激之下急思報復恐又

妄動賊人雖來不可輕進追擊但能相機堅守卽爾等之功科布多地方若難固守可回至察罕度爾駐劄今已授馬爾賽爲撫遠大將軍領兵前來到時爾等公同商酌辦理八月奏言臣世受國恩復蒙授大將軍重任不能遵奉聖訓妄舉損兵非惟國法不可緩死卽臣心亦難以偷生皇上不卽加誅降旨慰諭復加賞賜實從古未有之鴻慈臣此次進軍失利弁兵被傷於時若不鼓勵將士收軍而回轉使賊人得計乃籌議力衛餘軍轉戰而出至建城處臣安置哨站並傳諭喀爾喀副將軍等運糧固壘乞皇上速遣賢將統率大軍將臣調回與妻子一併正法諭曰朕從前諭旨甚明朕之處事豈肯不持大義以定是非而聊爲目前慰勉之理惟輕信賊言冒險深入中賊詭計是爾之罪至不肯輕生自殺力戰全歸此爾能辨別輕重之處事定之後朕自有辦理之道爾若念慮紛擾以致血氣消耗不能報讐雪恥上損國威下玷家聲罪尤甚焉爾其勉勵勇氣安心靜攝計圖遠大以答朕恩九月奏偵大策凌敦多卜在華額爾齊斯謀必由濟諒蒙古游牧其地與巴里坤甚近詔西路嚴備又言賊犯黃甲舒魯克距科布多城五十餘里臣已將馬匹牲畜收入城固守仍相機擊之命振武將軍順承郡三錫保傳諭傳爾丹

撤兵同駐察罕度爾十月諭傅爾丹曰爾等在科布多地方恃勇輕進墮賊詭計致失地利損兵折將軍前獲罪我朝例所不貸本應執法究治但傅爾丹整頓餘兵回至科布多固守城池賊衆并力來犯復能列陣以待賊人遠遁隨卽遣兵各處截殺奪回被掠馬駝此次擊賊可贖爾等前罪今朕已盡行寬免嗣後須阻勉效力朕自格外加恩是月傅爾丹至察罕度爾軍營命以錫保爲靖邊大將軍傅爾丹仍掌振武將軍印協辦軍務諭大學士等曰爾等可傳諭傅爾丹伊原與順承親王不合王諸事並無過失近日傅爾丹輕進以致虧損官兵若大將軍印務仍命管理非但衆心不服卽傅爾丹心亦不安伊旣失蒙古等之心卽綠旗兵丁亦未必孚信伊所恃者惟數索倫兵耳豈知首先潰敗幾致伊於危殆者非索倫乎順承親王諸事遵朕指示領大兵在察罕度爾賊夷懼其聲威不敢侵擾旋卽敗遁朕今令傅爾丹爲王協理以贖前愆至殲賊立功惟王是賴傅爾丹宜悉心盡力以圖報效若仍執前見妄存私意與王不和不但無益國家傅爾丹恐益增罪戾矣十年七月順承親王錫保奏賊來侵烏遜珠勒傅爾丹等接戰數次敗賊前隊及賊後隊全至衝突我師失利還歸大營諭曰傅爾丹領兵萬餘旣已敗賊

前隊則後隊自宜敗去如何我師遂被衝散回營用兵失機罪在不赦去歲傅爾丹冒昧進剿損傷官兵迨回科布多時尙能整頓軍旅截住賊衆是以特恩寬免其罪理應竭力報效冀雪前恥何以又致僨事偷因賊衆我寡恐有疎失相機回營尙屬可原若係輕躁懦弱以致失機卽應革職嚴加議處著順承親王秉公詳查據實陳奏八月錫保奏傅爾丹並不預籌堵禦輒輕調兵進擊以致有誤軍機詔革領侍衛內大臣振武將軍及公爵十一年二月錫保續參傅爾丹於烏遜珠勒遇賊並未身先督戰致士卒怯走軍機大臣議覆應付三法司定擬時上詢知烏遜珠勒之役錫保奏稱撥兵一萬而所到之兵實僅三千且留傅爾丹於軍營致賊越克爾森齊老遇額駙策凌兵始敗走諭曰烏遜珠勒對壘情形朕曾細問額駙策凌傅爾丹情罪尙有可原著從寬免其治罪留軍營效力贖罪十二年四月北路副將軍額駙策凌入覲傅爾丹隨大將軍平郡王福彭赴科布多總統弁兵十三年八月辦理糧餉額外侍郎伊都立及軍營辦事侍讀學士蘇晉侵蝕分肥事覺詞連傅爾丹婪虐等款命侍郎海望拏解來京並追諭和通呼爾哈諾爾及烏遜珠勒失機罪九月今上御極諭曰傅爾丹除貪婪等輕罪外第一是和通

呼爾哈諾爾所犯之罪甚大伊身係統轄兵丁之大將軍乃既不能收拾衆心復與大臣等不睦且不能約束以致失機將官兵損折皆傅爾丹之罪與岳鍾琪無異著將伊監禁俟該部奏請時再派大臣等審訊十月王大臣等覆鞫依律擬斬決得旨傅爾丹等失誤軍機負恩欺罔之罪不可勝數本應卽正典刑以彰國法但我皇考從前未卽降旨今朕仰體皇考遲回降旨之意著改爲斬監候乾隆四年與岳鍾琪均蒙恩釋放十三年四月特授內大臣護軍統領馳赴金川軍營並命其孫哈寧阿隨往一體馳驛八月署川陝總督同岳鍾琪辦理軍務諭曰川省自瞻對用兵而後繼以金川之役慶復疎縱於前張廣泗怠弛於後曠日持久師老無功朕特起爾等於廢棄之中委以軍機重任今訥親張廣泗俱已召取回京軍中事務聽汝二人辦理事權歸一當合兩人爲一人合兩心爲一心汝二人自思曩受皇考異數殊恩歷膺重寄其後干犯重辟者何事卽釋放家居而敗辱之名終身不能湔洗今棄瑕錄用予以自新之路當如何感激奮勉如何竭力報稱如果能克捷速奏蕩平豈但收之桑榆前恥可雪皇考厚恩向所未能報效者亦足仰酬萬一顯爵厚祿朕何吝焉是惟汝二人之福如其彼此各存意見不能鼓

舞軍心以致公事不能就緒不獨軍法難道將併前罪一體追問非慶復張廣泗可比汝二人當日同獲重罪今又同在一方勝則同其功負則同其咎務期協力和衷同心籌畫迅奏膚功以稱委任十月奏請增調滿漢官兵並言破險摧礮全資利器臣前在北路軍營見滿兵俱用絲棉長甲抵禦槍子頗覺有益又糶粃拉烏槍質輕形短能致遠於山林密箐中背負亦便請多置應用軍機大臣議行時大學士傅恒奉命爲經略奏傅爾丹年近七旬精力就衰惟熟於管理滿兵請令專辦營盤諸務十四年正月命爲參贊會金川酋莎羅奔郎卡乞降傅爾丹辦理納降及班師事宜四月授黑龍江將軍十七年卒諭曰傅爾丹宣力有年今聞溘逝朕心深爲憫惻著加恩賞銀一千兩辦理喪事應得卹典該部察例具奏尋賜祭葬如例諡溫愨子二長兆德次哈達哈相繼襲公爵

岳鍾琪子濬

岳鍾琪四川成都人父昇龍官四川提督諡敏肅康熙五十年鍾琪由捐納同知改武職奉旨以四川遊擊用補松潘鎮中軍遊擊五十七年遷直隸固關參將未任擢四川永寧協副將五十八年準噶爾擾西藏都統法喇督兵出打箭爐招撫

裏塘巴塘番衆以通藏路鍾琪奉檄前驅至裏塘達瓦喇木扎木巴第巴塞卜騰阿住不受撫誅之巴塘喀木布第巴懼獻戶籍乍了察木多察哇番人均乞降五十九年隨定西將軍噶爾弼由拉里進藏準噶爾敗遁六十年二月師還議敘功加十等授左都督五月擢四川提督閏六月賜戴孔雀翎十月命剿郭羅克逆番鍾琪以郭羅克隘口三宜步不宜騎若調內地兵多賊聞得爲備不若以番攻番與總督年羹堯議檄附近郭羅克之雜谷等土兵率往剿至則擊敗伏賊千餘連破下郭羅克二十一寨中郭羅克十九寨擒首惡駿塔榜素布六戈乘勝攻上郭羅克押六等寨首惡假磕亦就擒餘衆悉降上嘉其功下部議敘予騎都尉世職六十一年平羊峒番於其地設南坪營雍正元年青海羅卜藏丹津叛鍾琪率松潘及土司兵防剿撫遠大將軍年羹堯奏授鍾琪參贊大臣由德貴堡分剿上寺東策卜下寺東策卜賊番之助逆者會南川口外郭密九部乘間肆掠而呈庫和爾嘉尤橫移師擣其巢盡平之二年正月授奮威將軍進征青海時西寧東北郭隆寺喇嘛通賊剿之燬其寺二月大軍出邊羅卜藏丹津黨阿喇卜坦溫布等竄伊克喀爾吉追擒之遂由布爾合屯逼額穆納布隆吉爾賊巢三月抵柴達木羅

卜藏丹津以二百餘人遁追至烏蘭白克擒其母並首惡吹喇克諾木齊札什敦多卜等以歸青海平諭曰岳鍾琪奮勇殺賊於十五日內卽能將逆賊剿滅平定殊爲可嘉着授爲三等公尋賜黃帶先是莊浪謝勒蘇番據卓子山碁子山作亂西寧納朱公寺朝天堂加爾多寺諸番應之四月鍾琪率諸將由西寧分十一路進剿凡五十餘日賊番悉平得旨嘉獎六月兼甘肅提督三年二月兼甘肅巡撫四月署川陝總督疏言河州松潘向爲青海蒙古互市所年羹堯奏移那喇薩喇地方查青海王察罕丹津等部落居黃河東距河州松潘近請仍於二處互市郡王額爾德尼額爾克托克托鼐等部落居黃河西距西寧近請移互市於西寧口外丹噶爾寺再蒙古生業全資牲畜請六月後聽不時交易上允之初四川雜谷金川沃日等土司爭界年羹堯以舊屬金川之美同諸寨劃歸沃日致讐殺不已至是鍾琪奉命秉公詳勘美同諸寨仍歸金川而以龍堡三歌地歸沃日各土司悅服詔獎其寧番息事辦理有方七月實授川陝總督八月疏言各省土司承襲例由地方文武官申督撫具題往往勒索陋規封其印信至數年不能管事致番目專恣釀成讐殺請嚴立定限應襲時取具宗圖冊結隣封甘結并原號紙限半

年內具題承襲未經具題之先卽令應襲者署理地方官不得勒封印信至土司嫡長子孫承襲外支族中有循謹能辦事者許本土官詳督撫請旨酌給職銜下本土官各二等分管地方視本土官多則三之一少五之一庶勢相維而情亦相安下部議行九月奏請陞見允之尋加兵部尙書銜十一月疏言打箭爐外裏塘巴乍了察木多雲南之中甸及察木多以外魯隆宗察哇坐爾剛桑噶吹宗袞卓諸部落舊非西藏達賴喇嘛所轄但距打箭爐遠甚遙制不便請宣諭達賴喇嘛給令管理其中甸裏塘巴塘及得爾格特瓦舒霍耳等處並歸內地土司轄又言巴塘舊隸四川中甸舊隸雲南而巴塘所屬之木咱爾祁宗拉普維西等處偏近中甸總會於阿墩子實中甸門戶請改隸雲南與四川之裏塘打箭爐爲犄角王大臣議均如所請十二月疏請移四川松茂道駐茂州四年三月請選西安八旗兵千駐潼關撫民同知改理事同知又請延安所屬州縣丁銀概從下則以二錢爲率減舊額銀萬二千八百有奇九月請移四川重慶府同知駐黔江裁西陽司經歷其雅州天泉二經歷瀘州九姓司吏目改州司以資彈壓十二月又請將陝甘兩省丁銀攤入地畝徵收以雍正五年爲始著爲定例其由衛改縣未經載丁

及原有丁銀者按其額賦均載丁銀至陸續開墾及新開渠閘屯墾之處亦照此糧額一例增載再川省多係以糧載丁間有以人載丁之處應改畫一俱下部議行時四川烏蒙土知府祿萬鐘擾新隸雲南之東川府其黨鎮雄土知府隴慶侯助逆而隸建昌之冕山涼山諸苗爲之羽翼鍾琪遵旨與雲南總督鄂爾泰會剿五年正月擒萬鐘慶侯降烏蒙鎮雄改土歸流冕山涼山亦以次底定諭獎鍾琪調度有方下部議敘八月議覆四川永寧副將張瑛條奏可行者四事一修築松潘鎮城堡一遷雲南東川府之會理州貴州威寧府之永寧縣土目於內地令其民遵漢俗一改永寧縣歸四川轄一設東川義學又奏稱於西寧北川口外之大道川白塔川及策爾圖設鎮營駐守量增官兵三千六百部議均從之時成都有謠言鍾琪以川陝兵謀反者鍾琪疏聞諭曰數年以來在朕前讒譖岳鍾琪者甚多不但謗書一篋而已甚至有謂岳鍾琪係岳飛後裔意欲修宋金之報復者其荒唐悖謬至於此極岳鍾琪懋著功勳朕故任以西陲要地付以川陝重兵而儉險奸邪之徒造作蜚言煽惑人心讒毀大臣其罪可勝誅乎此成都造言之人斷非出於無因着交與黃炳黃廷桂會同嚴審此事關係誣謗國家大臣重案非民

間誣告比也至於川陝兵民向來淳良忠厚且受聖祖仁皇帝六十餘年深仁厚澤淪肌浹體朕卽位以來又屢加恩澤伊等至誠感激西省數年用兵軍民人人踴躍急公其尊君親上之習實衆所共知共聞者今奸民乃云欲從岳鍾琪謀反是不但誣岳鍾琪一人而並誣川陝兵民以叛逆之罪矣黃炳等務將實情審明具奏十月審係湖廣奸民盧宗寄居四川因贖田私事希准狀播造浮言並無主使之入論斬如律六年二月疏陳建昌苗疆善後事宜一建昌土司惟河東河西宣慰二司寧番安撫司地最廣而河東半近涼山半近內地涼山仍歸長官司其近內地者改隸流官至河西寧番近內地悉改歸流其阿都宣撫司阿史安撫司及紐結歪溪等土千百戶共五十六處俱改流近衛者改歸衛轄並擇苗番老成殷實者爲鄉約保長令約束一裁建昌通判改置府設知府經歷建昌衛及左中前三所禮州守禦所改置一縣寧番鹽井二衛改置二縣各設知縣典史會川衛併入會理州移會川營千總分防州屬之會理苦竹者保三寨均隸新設府轄一建昌爲邊疆重地請於越嶲所屬之栢香坪增守備千把總各一冕山貼近乾縣增游擊守備各一千總二把總四移冕山營守備駐寧番衛城寧越營守備改都

司增千總一鹽井衛城遊擊一千總二把總一其原設守備移駐河西會川所屬之披砂建昌增遊擊守備各一千總二把總四再撥建昌鎮標中軍守備移駐建昌東之木托建昌鎮右營遊擊移駐建昌西北之熱水協同該地方原設弁兵防守一苗民頑蠢地方文武官如勒索科派計贓治罪上司失察議處一各衛所漢苗雜處田土交錯多欺隱相訐地方官於農隙履畝親勘俾各守業一漢民每以苗裸爲奴婢地方官查明發還酌價追贖違者治罪一漢番交界每月三交易官選兵役稽查不許漢民短價滋事及兵役藉端勒措其私入夷穴別有勾結者罪之一苗民向化卽與齊民無異該管流官一體編入保甲稽查一嚴禁漢民誘取苗民什物及凶蠻將漢民綁擄一苗民散處該管官編戶冊清住址有事犯者卽於該地方追究一嚴禁苗裸帶刀出入及私藏鳥槍違禁之物一苗民處密箐易逃遇地方失事汛官帶兵巡捕地方官差役嚴拏併移會隣汛協追務獲徇庇疏縱及牽累良苗者分別議處疏下部議如所請定建昌新設府曰寧遠縣曰西昌寧番新設縣曰冕寧鹽井新設縣曰鹽源九月奏言川西因岷州兩土司朋比爲奸番民不安請改歸流十月又言陝甘二屬丁銀偏累向題准攤入地畝徵收但

甘屬河東糧輕而丁多河西糧多而丁少若將河東丁銀攤入河西是兩田糧輕者益輕重者益重請將二屬各自均派河東則丁隨糧辦河西則糧照丁攤較爲便民十一月請陞四川夔州府屬之達州爲直隸州轄東鄉太平二縣又請陞陝西鞏昌府屬之秦階二縣爲直隸州以清水秦安兩當禮縣及新改之徽縣隸秦州文武二縣隸階州七年三月請陞肅州爲直隸州轄高臺縣又請於陝西子午谷隘口增防守官兵四川裏塘巴塘等處設宣撫司安撫司長官司副土官千戶百戶等官照流官例題補俱議行尋奏遣兵平西川不法之雷波士司楊明義得旨嘉獎下部議敘有逆犯曾靜者湖南靖州生員因考劣等憤鬱謀叛潛遣其徒張熙詭名投書於鍾琪勸以同謀舉事鍾琪拘熙訊主使者堅不吐乃誘置密室中許迎聘其師佯與設誓得靜逆狀具以聞上獎鍾琪忠赤命侍郎杭奕祿等至湖南會鞠得靜與呂留良之徒嚴鴻逵往來妄生異心並得留良日記悖逆狀王大臣等合詞請坐靜熙大逆律詔寬宥其罪命杭奕祿帶靜由江寧蘇州至杭州遣人送至湖南巡撫衙門聽其他往至十三年九月今上御極以靜罪不減留良與熙均解京伏誅先是準噶爾台吉噶爾丹策凌匿青海叛賊羅卜藏丹津且謀

擾我藩部喀爾喀至是上命鍾琪爲西路寧遠大將軍率師與北路靖邊大將軍傅爾丹討之加少保鍾琪疏言噶爾丹策凌三世弗庭百夷被虐天怒人怨衆叛親離我聖祖至德洪慈再三寬宥皇上深仁厚澤屢欲矜全終不悛悔若不大彰天討則冠履之分不明番夷之禍不息臣仰承廟謨至周極備約舉王師之十勝決逆酋之必敗一曰主德二曰天時三曰地利四曰人和五曰糗糧之廣備六曰將士之精良七曰車騎營陣之盡善八曰火器兵械之銳利九曰連環迭戰攻守咸宜十曰士馬遠征節制整暇臣得奔走行間竚見長驅直入指日獻俘奏凱報聞八年五月噶爾丹策凌表獻羅卜藏丹津既而不至諭鍾琪來京籌辦軍務十月奏改陝西榆林廳爲府設知府及照磨并設榆林靖邊定邊懷遠四縣隸之各設知縣典史悉汰舊同知巡檢等官從之是月準噶爾乘我西路不備犯科舍圖汛盜駝馬總兵樊廷等擊敗之奪所盜還命鍾琪還軍營九年二月奏軍機事宜十六條諭曰岳鍾琪所奏朕詳細披覽竟無一可採岳鍾琪以輕言長驅直入之說又爲賊夷盜趕駝馬既恥且憤必欲襲擊進剿勉強踐復前說甚未妥協著將朕旨傳諭之六月上又以鍾琪前遣兵赴吐魯番運糧米並未具奏致準噶爾劫

糧屢擾吐魯番鍾琪乃請往援奉旨訓飭七月準噶爾傾衆犯北路傅爾丹禦之於和通呼爾哈諾爾失利鍾琪請督兵襲擊烏魯木齊分賊勢上報可鍾琪尋由巴里坤越木壘渡阿察直抵額爾穆克河分三路擊賊旋奪據山梁斬殺甚衆烏魯木齊附近賊悉遠徙遵旨振旅還營諭曰岳鍾琪此次領兵襲擊賊衆進退遲速俱合機宜甚屬可嘉著交部議敘十年正月奏言臣去年擊賊至木壘見其地勢險要且可屯種請卽彼築城駐兵二萬截賊來路得旨定議舉行二月賊衆三千逼哈密鍾琪遣總兵曹勳等擊敗之於二堡又遣將軍石雲倬等赴南山口梯泉等處截其歸路而雲倬兵遲發一日賊遂由塔呼納呼路竄鍾琪劾之諭曰此次賊夷狂肆昏亂深入重地自投羅網乃坐失機會不但不能屠剿且使賊人由坦途而遁其領兵之石雲倬已降旨治罪至岳鍾琪素諳軍旅緣懷游移之見致乖戰守之宜前車之鑒非止一端嗣後當深悟前非痛自省惕以觀後效尋大學士鄂爾泰等劾鍾琪身爲大將軍專制邊疆賊夷以五六千人由烏克克嶺入卡倫犯哈密鍾琪茫然不知致賊刦牲畜復從塔呼納呼緩騎遁歸智不能料敵於平時勇不能殲敵於臨事玩忽縱賊應議處得旨削公爵及少保降世爵爲三等

侯仍留總督銜護大將軍印戴罪立功七月大軍由巴里坤移駐木壘上因鍾琪辦理軍務未協召還京以副將軍張廣泗護大將軍印廣泗尋劾鍾琪調度乖方各款且言準噶爾賊專資馬力我兵制敵必須馬步兼用而岳鍾琪立意用車自巴里坤至木壘沿途滿塹崎嶇紆繞沙磧用車甚不相宜且木壘四面受敵牧廠運道在在可虞必不可駐大兵詔速撤軍回巴里坤十月諭曰岳鍾琪受朕深恩重加任用西陲討賊之舉伊亦身任不辭是以用爲西路大將軍乃伊秉性粗疏辦事怠忽且賞罰不公號令不一不恤士卒不納善言傲慢不恭剛愎自用以致防禦追擊屢失機宜士氣不振而陳奏者又皆虛假詐僞爲怙過飾非之計誤國負恩罪難悉數著革職交兵部拘禁候議十二年大學士等覆訊擬斬決得旨改斬監候乾隆二年上諭曰岳鍾琪貽誤軍機罪無可宥皇考念其曾經效力是以未將伊正法朕體聖心不忍令久繫囹圄著釋放令其自愧十三年三月大軍剿金川逆酋莎羅奔諭曰岳鍾琪久官西蜀素爲川省所服且夙嫻軍旅熟諳番情伊雖獲罪西陲亦緣準噶爾夷情非所深悉若任以金川之事自屬人地相宜伊三世受國厚恩自必竭力報稱以蓋前愆著調至軍營以總兵銜委用未幾授四

川提督五月鍾琪由黨壩一路進剿賞戴孔雀翎閏七月上以經略訥親總督張廣泗督剿久無功而鍾琪與原任將軍傅爾丹均老成宿將起於廢弁之中親在行間未聞發一謀出一策傳旨詢問八月鍾琪疏劾廣泗言黨壩一路爲逆酋門戶商卡嚴密漢土官兵名爲一萬除守營放卡及分防糧站實止七千餘而土兵多無用漢兵不敷分布臣咨商張廣泗增兵三千廣泗以業經分派十路無兵可撥不肯給又廣泗專主由昔嶺卡撒進攻之策此二處中隔噶拉依距賊巢尙百餘里黨壩至勒烏圍僅五六十里若先破康八達卽可擣巢濟事較速商之廣泗則云不便更易而廣泗反信用新降土舍良爾吉及漢奸王秋等恐生他變會訥親亦訐廣泗糜餉老師各款詔治廣泗罪尋命大學士傅恆代訥親爲經略九月鍾琪疏請卡撒昔嶺進剿別選精兵三萬五千以一萬由黨壩及瀘河水陸並進以一萬由甲索攻奪馬牙岡乃當兩溝與黨壩兵合直攻勒烏圍仍於卡撒留兵八千堵禦俟克勒烏圍後前後夾攻噶拉依再於黨壩留兵二千護糧正地留兵一千防瀘餘四千隨機接應一年之內莎羅奔暨其姪耶卡必就擒臣年雖老請肩斯任詔以所奏交傅恆酌行是月鍾琪由黨壩攻康八達山梁大敗賊衆十二

月復連敗之於塔高山梁諭獎之鍾琪初爲川陝總督時勘金川爭界事甚公且奏給莎羅奔印信號紙莎羅奔甚德之十四年正月經略傅恆抵軍營卽召良爾吉至帳下誅之下令尅期進剿莎羅奔懼遣心腹人至鍾琪軍乞降鍾琪請於傅恆輕騎入勒烏圍賊巢諭順逆大義莎羅奔及郎卡隨赴卡撒大營泥首歸命傅恆以聞詔班師諭曰提督岳鍾琪能承經略大學士忠勇公傅恆指示開誠布信直造賊巢用使番酋弭耳惕息厥角恐後成勞懋著功在諸將右著加太子少保仍交部議敘二月鍾琪疏言莎羅奔郎卡悔罪輸誠蒙皇上天恩網開三面貸以不死自茲畏威懷德必能安靜但防範不可不預查近金川之士司除雜谷地廣人衆綽斯甲布本屬姻親其革什咱巴底巴旺小金川沃日等處勢孤力單從前金川常懷兼并之心恐日久別生事端請於卡撒兵糧盡撤後暫駐小金川諭各土司聯絡和好以杜窺伺上是其言三月諭曰金川平定邊徼救寧大學士忠勇公傅恆凱旋奏番酋歸順全仗天威至歷練戎行信孚蠻部深入賊巢膽勇雄決則岳鍾琪洵爲克副委用此固出於傅恆之推能讓美然岳鍾琪之奮往任事實屬可嘉前已降旨晉階太子少保交部優敘伊前於青海奏捷曾封公爵茲復樹

績蠻方收桑榆之效著再加特恩授兵部尙書銜於本身封爲三等公以昭錄功
懋賞之典俾宣力疆場者知所勸焉十月陛見命紫禁城內騎馬免西征應賠銀
七十餘萬兩子泐滂俱授藍翎侍衛賜公號曰威信御製七言詩賜之曰劍佩歸
來矍鑠翁番巢單騎志何雄功成淮蔡無慙李翼奮澠池不獨馮早建奇勳能鼓
勇重頒上爵特褒忠西南保障資猷略前席敷陳每日中尋命還四川提督任十
五年西藏珠爾默特那木扎勒作亂總督策楞赴藏鍾琪駐打箭爐就近彈壓藏
地旋定十七年雜谷土司蒼旺構逆鍾琪同策楞以兵奪維關直抵賊巢擒蒼旺
誅之分其地歸松岡土司轄下部議敘加三級十九年重慶奸民陳琨等滋事鍾
琪力疾親往督緝還卒於資州賜祭葬如例諡襄勤二十年諭曰原任四川提督
岳鍾琪於皇考時宣力西陲勞績頗著卽如逆犯曾靜遣張熙投遞逆書一事岳
鍾琪與之設誓誘令供出實在姓名卽行參奏居心甚爲誠實其在西路軍營時
驕縱狂妄於辦理軍務亦多錯誤然核其功罪自不相掩至金川之役用爲提督
雖彼時番酋有效順之意而岳鍾琪能直入番巢住宿碉寨曉以順逆示以不疑
亦其忠信素著所致是以加恩特於本身授爲威信公爵今伊已身故雖公爵不

應世襲而其子孫竟無一世職朕甚憫焉岳鍾琪賞給一等輕車都尉令其子孫世襲罔替以示朕追念舊勳之至意尋以鍾琪少子瀚襲四十四年御製懷舊詩列入五功臣中詩曰三朝師武臣鍾琪爲巨擘車騎伐準夷實其算之失設誓誘張熙忠誠天鑒赤家居十餘年命董金川役單騎入賊砦大義示順逆勇而且有謀羣番讐辟易受降遂凱旋實亦資宣力所見綠營多鮮克踵其迹卓有古將風書勳太常冊子五人濬泃泐淳澗長子濬初由廕生授西安同知以父任川陝總督迴避以科道用尋授口北道雍正五年擢山東布政使六年調山西未幾命署山東巡撫七年四月鍾琪剿準噶爾詔濬送至肅州再回原任七月疏請增設兗州督捕同知從之八年鍾琪陛見命濬來京就省尋疏請將兗州莒州沂州二十一州縣一衛一所設分巡道管轄十二年疏言德州衛河回溜頂衝處每雨水驟發直潰東隄請於城北哨馬營濬新河建滾水壩一兩岸各築遙隄酌開涵洞宣洩部議如所請乾隆元年六月疏言堯陵實在濮州城東南六十里古雷澤之東穀林莊明代設建於東平應改建以爲祭告行禮之所仍於陵前設堯母靈臺祠配以堯妃中山夫人其東平陵仍令有司時祭從之八月命勘鄒城蘭山等處水

衝地千三百六十頃有奇應徵地丁麥米得旨全行豁免又請於登州成山汛養魚池增設水師守備十月又請以兗州舊設沂兗海贛同知改隸沂州府沂州舊設鹽捕通判移駐蘭山縣之向城向城巡檢移駐蘭山之青駝寺下部議行十二月調江西巡撫二年請豁南昌府屬浮糧三萬七千餘兩允之三年奏言豐城濱大江當吉南贛袁臨五水之衝惟藉一隄捍禦向派民修築官爲經理並無保固之例隨修隨傾難資捍禦請動項興修又江關爲商旅通津商船夏秋上稅俱泊於龍開河冬春泊大江北岸難免風濤請深濬河關河口以爲停泊之所得旨如所請五年七月御史朱續暉奏請行社倉法敕各省督撫酌議濬疏陳十條一每年冬季保正造煙戶清冊送地方官驗給門牌懸挂賑借核算易清經管之正副社長毋庸更設隊長鄉官各自支收報明州縣計口給發一逐年支收社長任其事州縣官稽查毋干預出納一取具領狀保結責成社長認識借給毋庸設立隊長大保名色一借米出入照部頒斗斛一江省每年借四省六卽朱子存一開二遺意或歉歲全借散賑隨時酌辦一江省現儲社穀十五萬餘石不必動借常平官米其社穀每石收息一斗歉歲免息許次年交倉一收穀不論里都隨到隨收

一捐貯社穀年終取具動存各數清冊送部查核一煙戶門牌俱將戶口生理產業逐一註明一社長缺出令地方鄉約公舉報官充補一設立社簿二一存社長一繳縣鎖鑰歸正副社長分管詔如所議行十一月署兩江總督楊超曾劾濬與知府董文焯劉永錫朋比作奸徇情納賄命侍郎阿里袞同江南河道總督高斌往鞠得實得旨革濬職從寬免罪餘論如律六年授光祿寺卿八年六月補福建按察司七月丁母憂服闋補廣東按察司十一年九月遷湖南布政使十二月調山東十二年擢廣東巡撫十三年疏言提塘發鈔命盜重案部咨未行邸報先至不足以昭慎重請嗣後緊要科鈔俟交部十日後發鈔發報下部議行十五年正月調雲南巡撫七月兩廣總督陳大受疏參廣東糧道明福婪贓前任巡撫岳濬並未糾參且列入計典卓薦又購辦楠木修築海陽隄工二案一任屬員弊混諭曰岳濬受朕深恩屢由廢員擢用伊父現蒙格外殊恩岳濬理宜感激圖報乃一味優柔姑息以取悅屬員且於明福之婪取多贓曲意瞻徇楠木隄工二案並不留心查辦深負朕恩著來京候旨十八年四月授鴻臚寺少卿五月轉通政使參議十月卒十九年鍾琪奏言臣子濬巡撫任內未完庫項八千八百餘兩繳抵外

請將臣公俸按年扣還諭曰此項未完銀兩原係岳濬名下應追之款若使岳濬尙在自應按數追完今伊子物故岳鍾琪尙屬舊人從前曾經出力著將岳濬未完銀四千九百餘兩加恩免其追繳次子泐三子澆均官藍翎侍衛四子淳官戶部主事五子澆襲一等輕車都尉

元展成

元展成直隸靜海人由歲貢生捐納知州雍正元年選授雲南阿迷州知州四年遷麗江府知府五年遷糧儲道六年擢按察使七年調廣西按察使八年遷廣西布政司十年擢貴州巡撫十一年七月奏黔省新闢苗疆設立重鎮宜豫籌積貯查古州之都江河直達廣西轉運甚便請將廣西潯州沿河倉儲撥穀五萬石運赴古州建倉分貯下部議行十二年疏言册亨羅斛兩州同雖係佐雜均有錢糧命盜專責與州縣略同永豐州吏目及南籠府經歷亦處煙瘴請將四缺均照苗疆之例三年俸滿卽予升用從之十三年五月苗叛擾黃平州上以黃平逼近苗疆設兵較少倉猝無備命事竣將元展成交部嚴議六月以清平縣知縣邱仲言守城不力平越縣知縣楊興道承辦軍裝糧運節詞推諉均奏請革職上以展成

未請將該革員治罪顯係徇庇復下部嚴議八月高宗純皇帝御極命湖廣總督張廣泗爲經略督剿逆苗諭曰元展成身爲巡撫所在地方不能撫綏得宜耽玩公事輕視民命甚負皇考倚任之恩著革職拏解來京乾隆元年九月刑部問擬遣戍諭曰元展成本屬中材適值地方難辦之事兼之文武不和諸凡掣肘遂至蒼黃錯亂莫展一籌雖有應得之罪尙有可原之情其治罪之處著加恩寬免尋起爲山西按察使二年擢甘肅巡撫三年二月奏甘肅藩庫有平餘銀兩歲不過千餘金舊日藩司於放兵餉各項內零星翦配湊足三千之數既失政體並滋弊端嗣後令將平餘實數報部卽以此項留充書院費用得旨允行十一月奏蘭州係省會之地請將臨洮府知府及附府之狄道縣移駐蘭州改爲蘭州府臯蘭縣原駐蘭州知州移駐狄道改爲狄道州蘭州原轄之金縣河州渭源各州縣俱隸首府其經歷州判吏目典史等官各隨原屬之府州縣移駐下部議行十二月寧夏地震先經總督查郎阿奏聞命侍郎班第馳往會勘展成績經奏入上以報災遲延嚴飭之四年五月奏安西鎮卜隆吉等處屯田向撥屯兵耕種糧石分收給作口糧於折餉銀內扣除後以借製行裝銀未完因在折餉項下四季攤扣上季

各營屯田被災請將平分糧石除支領春餉按扣一季外餘限以兩年分作七季扣清從之六年四月奏甘省地處邊陲凡山頭地角沙磧之區獲利甚微應聽民種植永免升科其平原曠野官興水利或民間自出公費引灌認墾者應照例六年起科如開墾尙未及年地有沙灘准報免如所請行六月御史李愬奏參甘肅各州縣匿災命會同總督尹繼善查勘得實革展成職發軍臺效力尋自請捐修直隸滄州城工上允之釋還八年諭曰元展成原係獲罪之人朕宥罪錄用畀以甘肅巡撫重任伊不思感激報效聲名狼籍復被糾參經審明革職治罪朕從寬發往臺站效力又因伊情願修整滄州城工是以准其回籍辦理豈意伊巧卸臺差回家後借稱變產任意耽延以致工程貽誤卽所變家資多歸私用情罪甚屬可惡著都統富昌查伊家產變價入官元展成卽著該都統收管俟城工告竣再行請旨九年故子克莊工部員外郎克中福建延邵道

張廣泗

張廣泗漢軍鑲紅旗人由監生捐納知府康熙六十一年選授貴州思州府知府雍正四年四月調雲南楚雄府知府未赴時貴州生苗長賽不法雲貴總督鄂爾

泰檄廣泗會同黔楚文武擒剿奏調黎平府知府五年擢貴州按察使六年正月廣泗以兵赴都勻府八寨及黎平府之古州鎮遠府之上下九股清水江清平州之大小丹江等處化誨生苗相機剿撫六月擢貴州巡撫十二月奏言丹江一帶生苗强悍臣遣兵分路進攻克小丹江大丹江及附惡之鷄溝各寨其略接丹江之上九股等寨次第投誠諭苗疆底定一切善後事宜與鄂爾泰詳酌辦理尋合疏條奏立營設官十事語詳鄂爾泰傳十年二月廣泗復疏言清水江及都江爲黔楚粵三省通流應設哨船聯絡聲勢古州積貯最要請分別鎮營貯米責成同知通判縣丞等經管新設文武各員三年俸滿應予保薦陞轉以示鼓勵效力通事人等分別勤惰給予養贍並授以土外委千把總筭付令宣布條約化導苗民部議從之詔敍剿撫逆苗功授廣泗騎都尉世職時準噶爾擾喀爾喀遊牧大將軍岳鍾琪率師赴西路奏由巴里坤軍營移駐木壘上以廣泗才優數年來苗疆用兵深諳軍務命馳驛來京請訓授爲副將軍七月大兵移駐木壘分路啟行廣泗統兵四千由鄂隆吉進與岳鍾琪所統兵萬二千會於科舍圖抵木壘是月上因岳鍾琪辦理軍務未協撤回命廣泗護理大將軍印廣泗奏言木壘地處兩山

間築城其中形同釜底受敵甚易制敵甚難實非屯兵進取之地查巴里坤地處平原南山綿亙數千里直至伊犁北山漸折而西南至科舍圖與南山合實爲巴里坤關鍵再西出烏蘭烏蘇口則北山已斷南山之北卽屬沙磧是以康熙五十四年間大兵駐巴里坤及科舍圖以西之烏蘭烏蘇口南山一帶之洮賚烏克克嶺北山一帶之小科舍圖塞必特鄂隆吉察罕哈瑪爾鏡兒泉及糧站經由之噶順烏爾圖哈畢噶等處俱駐兵與巴里坤形勢通聯可免賊人窺伺又言臣抵木壘察岳鍾琪調兵籌餉及統馭將士實多乖方不敢不據實列奏一綠營步兵負糧行抵木壘鍾琪全無布置及探有賊騎派兵沿山架梁晝夜不息旋派旋移略無寧所一木壘城工未就駐營關係甚重臣與副將軍常賚兩營所駐正當西北要衝派兵止二三百或百餘卽鍾琪營亦僅數百遇警何以抵禦至部曲隊伍每值調撥概於各營分攤雜湊官弁與兵素不相識徒滋紛亂一準噶爾專資馬力我兵必馬步兼用而鍾琪立意用車於沙磧情形不合至馬步兵除弓箭鳥槍外止令各帶木棍全無大刀長戟等械官兵莫不竊議一木壘並無牧處營馬倒斃甚多鍾琪令綠旗兵留馬二千餘悉就牧烏蘭烏蘇科舍圖此二處祇駐兵二千

餘差使繁多何能分管牧馬且距木壘遠萬一賊人窺伺殊屬可虞一駐兵數萬糧運最要岳鍾琪初謂車行甚易加以駝運至九月可得十萬石今查車路多叢山大嶺必繞從沙磧正賊人出沒要衝而鍾琪一聞賊信不論虛實輒停糧車以此遲緩轉瞬冰雪運送更艱數萬兵何以託命一鍾琪罔卹士卒號令不明鎮將時加呵斥參游以下日事鞭笞平時議論風生遇小警張皇失措性復剛愎不喜人言題奏事件奉到諭旨數月不宣臨時突然傳事莫測誠僞軍務重大臣不敢代爲徇隱奏入詔革鍾琪職諭曰上年岳鍾琪請由巴里坤移兵木壘今張廣泗奏其地四面受敵必不可駐筭大兵牧廠運道在在可虞是岳鍾琪欺罔之罪擢髮難數著將大兵撤回巴里坤至所稱科舍圖烏蘭烏蘇分別駐兵聽張廣泗酌量辦理務期妥協九月奏言臣前奏木壘駐兵不便請移駐科舍圖今臣周閱科舍圖路徑叢雜氣候苦寒難久駐臣不敢固執前議請盡撤兵至巴里坤駐守查洮賚烏克克嶺爲賊南走路應各置兵千五百庾集察罕哈瑪爾爲賊西來大道應各置兵千又鏡兒泉噶順及烏卜圖克勒克並在巴里坤北賊或由砂磧或由北山悉可通應於鏡兒泉置兵二千噶順五百烏卜圖克勒克一千又圖古里克

特爾庫勒在巴里坤東北賊自阿濟必濟越砂磧來此爲孔道應各置兵千更於一切要隘設卡倫巡護牧廠合密塔勒納沁亦增兵以資防守奏入報可十一月授正紅旗漢軍都統留軍營十一年廣泗引兵萬餘分駐北山十二年偵賊伏烏爾圖河檄副都統班第達什原任總兵張元佐遊擊郎建業及固原提督樊廷分路搜剿至哈洮遇賊官兵奪據山梁越噶順抵鄂隆吉大坂斬賊四百餘生擒三十六獲糧馬器械無算捷聞諭曰張廣泗調度分遣悉協機宜得獲全勝甚屬可嘉從優議敘尋議加三級十三年五月以準噶爾乞和撤大軍還召廣泗至西安候旨另用七月授湖廣總督自貴州苗疆定後至是七載九股生苗復肆劫掠尙書張照奉命偕將軍哈元生副將軍董芳剿之久無功八月今上御極以諸臣各執己見不能和衷共濟致辦理失宜詔授張廣泗爲經略赴貴州自將軍以下皆聽節制十一月廣泗抵黔奏言張照阻撓軍機置應辦之事於不理及調集各省兵數萬餘哈元生俱令沿途聽用密布攻剿不過三千顧此失彼董芳駐守八弓僅以招撫爲可了事又巡撫元展成辦理賑恤難民條款紛錯官無所遵循難民苦於守候得旨張照董芳元展成俱革職哈元生革去將軍暫留提督之任交張

廣泗委用其貴州巡撫卽著張廣泗兼管十二月廣泗至凱里派兵三路進剿副將長壽等由空稗總兵王無黨等由台營自統大兵由清江之鷄擺尾尅期並進連破上九股卦丁等寨燬其巢賊黨竄入牛皮大箐乾隆元年正月廣泗飭各路四面攢逼生擒首逆包利等斬獲萬餘復指示鎮將及文武各員分別剿撫各寨熟苗具疏以聞諭曰苗疆軍務就緒善後事宜正須料理必事權歸一始可專其責成張廣泗著授雲貴總督兼管巡撫事十二月奏言聖主恩威遠播永奠苗疆從前經理疏謬罪由臣始請敕部奪臣騎都尉世職嚴加議處得旨黔省逆苗不法擾害地方特命張廣泗爲經略專其事權俾無掣肘伊殫心籌畫調度有方董率數省官兵奮勇戮力未及一載卽奏膚功著交部議敘尋議加三級特旨從優授三等輕車都尉是月奏請於古州朗洞及凱里各增設一營改鎮遠營爲鎮並增荔波台拱丹江等處兵從之二年疏言安順府向未設城守營請增遊擊守備各一遊擊駐安順守備分防安順舊州定廣協向止都司請增守備一大定協原設遊擊守備各一以所轄遼闊遊擊分駐水城請改爲水城城守營設守備一其大定協守備不敷統轄增遊擊一以符原額平遠協向止都司請增守備一至黔

省提撫標及各協營額兵不敷分布酌議共增二千九百八十餘三年疏言貴州鎮遠以上自昔不通舟楫商旅交困兵精民食輓運維艱查清水江河道自都勻府城下經施秉舊縣至湖南黔陽縣抵洪江大河直達廣東實天地自然之利臣親往州屬之三腳屯達來牛古州抵廣西懷遠縣直達廣東實天地自然之利臣親往察看應修河道並鑿緯路飭募夫開濬資輓運以濟商民又言黔省向因糧賦不敷兵餉開十爐鑄錢配放今營兵既增放餉更多錢價昂貴請增十爐以廣鼓鑄現在湯丹等廠銅礦甚旺可資接濟均下部議行五年五月疏請陛見允之會湖廣城步縣橫嶺等寨紅苗糾粵猺滋事諭廣泗便道察看情形九月命卽留楚辦理軍務頒給欽差大臣關防軍前文武無論楚粵自提鎮以下俱受節制十一月廣泗奏搜剿大箐並各逆寨成就俘根株淨盡諭獎其辦理妥協六年正月廣泗至京乞假歸葬特賜其父母祭一壇三月以貴州黎平屬黑洞頑苗煽誘粵猺入界肆劫命廣泗馳驛回黔料理四月奏請敕廣西提督譚行義就近協剿尋獲苗酋石金元等置之法廣泗以石金元係楚省逃竄逆苗上年搜剿未盡自請嚴加議處詔原之十年加太子少保十一年三月以金川土司莎羅奔肆橫不法犯內

地詔授廣泗爲川陝總督籌辦軍糧諭曰張廣泗從前辦理苗疆尙爲妥協此次進剿機宜專聽調度務令逆酋授首剷絕根株永靖邊境六月小金川土司澤旺土舍良爾吉率衆投誠廣泗奏兩金川地界毗連小金川就撫金川外援已絕官兵駐其地卽用土兵前驅由美諾可直搗噶拉依由丹壩可直搗勒烏圖查莎羅奔與其兄就日吉父子同惡相濟莎羅奔居勒烏圖就日吉父子居噶拉依大兵現分路進攻巢穴奏至報聞八月奏言前派鎮將會攻賊巢總兵宋宗璋許應虎等分攻勒烏圖會合之路尙遠其攻噶拉依之副將馬良柱連戰克捷乘勝直前距賊巢不過三十餘里副將張興參將買國良等軍營相望聲勢聯絡此三路中有一先抵噶拉依卽親往督率策應再許應虎攻獨松未破不若由引路進攻噶拉依俟各兵會齊再分兵接應剿勒烏圖之軍據其心腹兩酋不能相救掃蕩自易諭曰自汝等定期會剿日夜望捷音之來遲至今日不過小小破礮克寨何足慰朕耶朕所憂者勞師動衆訖無成效必有身任其咎者務須始終籌畫銷邊防窺伺圖永久之策如古州之苗民相安始得矣十三年正月疏請原調漢土官兵三萬外增兵一萬得旨俞允三月疏參駐守丹噶之總兵馬良柱怯懦無能將五

千餘衆一日撤回以致礮械多遺失詔解京審擬上以奏凱無期命大學士公訥親前往經略並調岳鍾琪赴軍營會廣泗奏報各路駐守狀諭曰大兵將次調齊賊衆全無畏懼該督不能選銳進攻奪取要隘僅以堅壁爲自全之計遣兵爲策應之方其平日之調度機宜何在師老氣怯何時可圖進取五月奏報官兵克取戎布寨大小戰礮五十餘座諭曰此亦小小攻克耳佇待捷音以慰西顧嗣訥親議築礮與賊共險以示不滅不休上以建礮非策張廣泗老於戎行豈有不知而亦隨身附和顯因既有經略有意推諉且所奏籌辦軍務諸疏遊移兩可迄無成效嚴諭詰責訥親因張廣泗分十路進兵在在勢微力弱以致糜餉老師又好惡不公人心不服列款具劾提督岳鍾琪亦劾廣泗玩兵養寇疏先後至諭曰張廣泗自受任金川以來措置乖方陳奏閃爍賞罰不當喜怒任情人人解體又復觀望推諉老師糜餉且信用土舍良爾吉及漢奸王秋洩露機密貽誤軍機法所不容著革職交刑部治罪十二月廣泗被逮至京諭曰金川用兵以來張廣泗貽誤於前訥親貽誤於後兩人之罪狀雖一而其處心積慮各有不同至於自逞其私罔恤國事則實皆小人之尤朕昨御瀛臺親鞫張廣泗其狡詐欺飾緊要情節俱

一一供認不諱而其茹刑強辯毫無畏苦之狀左右大臣皆以爲目所未見卽此一節與市井無賴何異張廣泗乃剛愎之小人訥親乃陰柔之小人自當僨事一至於此當張廣泗初抵軍營以爲金川賊酋亦如黔苗之易辦屢次妄爲大言可以剋日成功旣而久無成效時復失機則又諉過屬弁藉口兵單及聞訥親前往伊復持兩端懷觀望訥親能辦此事伊固可依附而邀次等之功事不成則咎在訥親伊乃一切推諉使陷於敗乃可復據其任是以於訥親之種種乖方並無一語相告其後見訥親之必敗乃向屬員訕笑誹議備極險忤情態蓋恐此時據實奏聞猶或致譴責不若含混詭隨坐視其決裂之爲得計也此其心輾轉數變狡獪叵測經朕詳悉推勘洞見肺肝始得實情吐露訥親且在其術中而不覺矣夫訥親張廣泗在大臣中皆練達政事之員使其不遇此等重務則訥親張廣泗均可擁高爵而歷亨衢優游終老何至敗露若此可見人臣居心當一秉至誠使能公忠體國自邀休佑如其懷私自爲雖以訥親平日之小心謹密張廣泗平日之熟爛軍旅而方寸一壞天奪其魄雖欲倖免而不能豈不大可畏哉訥親張廣泗固不幸而遇此事而朕因此而益見知人之難則金川之事未嘗非上天昭示之

深仁也張廣泗供內有但知皇上慈仁不知皇上英武之語朕聞之深爲抱愧朕臨御十三年思與大小臣工共臻惇大之治而水懦而玩亦朕所深戒卽如鄂善之案不少寬假豈肯曲法縱容爲姑息之主耶且張廣泗在皇考時已由巡撫用爲西路副將軍後朕授任苗疆伊亦尙能隨宜籌辦訥親雖由朕信任然其十餘年來朕歷加明試委辦諸事不避勞怨若謂朕爲誤用訥親則可用張廣泗亦豈誤耶然當此軍國重務而伊等深負朕恩實非意料所及今朕明正其罪以彰國憲乃朕賞罰無私大公至正之道張廣泗著交軍機大臣會同該部按律定擬尋議以失誤軍機律應斬決得旨張廣泗著卽處斬子桓奪世職發黑龍江

譚行義

譚行義四川三臺人康熙五十八年由武舉授陝西西寧衛千總雍正二年隨大軍平青海四年遷河南城守營守備五月遷參將七年河東總督田文鏡劾行義養解陝營馬疲瘦得旨革職來京引見旋賜上諭一部及貂皮香珠復職八年遷廣東惠州副將十一年擢高雷廉總兵賞戴花翎尋丁母憂命在任守制十三年總督鄂彌達檄行義統兵五千協剿貴州逆苗六月抵古州分遣策應清江八寨

堵禦黎平兩路進剿滾縱高表等寨經略張廣泗又調赴援上江擣烏婆擺弔等險巢會搜牛皮大箐惡寨擒首惡殆盡乾隆元年調福建漳州總兵三年五月調湖南鎮筵總兵十二月署廣西提督四年十一月實授十二月議敘協剿逆苗功加銜一等五年閏六月統兵會剿楚粵逆苗八月與總督馬爾泰署巡撫安圖會奏宜山縣土蠻恃險劫掠派遊擊楊剛剿破白土邱索二村擒斬首惡及餘賊匿密箐中分路剿捕梟示撫其脅從上嘉其成功迅速六年正月行義奏慶遠府屬忻城土縣之外八堡地方積賊藍明星等恃險焚劫會商督臣檄副將畢映往捕又撥標營兵四百扼要堵禦有莫明權等投首願縛賊贖罪明星聞風遁入山箐旋督兵搜獲並擒斬要犯多人四月奏漢奸黃順等潛入楚粵毗連之懷集惑衆謀逆勾黔省黎阿蘭等散賣旗印約時起事臣與督臣調兵攻克賊巢擒賊首及黨七十餘名尙有十四名未獲嚴催訪拏均報聞又疏言柳州府城內兵多民少俱住草房易遭火患雍正十一年知府袁承紉捐銀四百兩給被火兵民借建瓦房但所捐過少今查兵丁草房尙有千五百楹或附倉庫藥局或連壇廟衙署仍屬堪虞請將承紉所捐交文員專管借給被火居民再借恩賞息銀四千兩交中

軍參將會同馬平縣經管借給失火兵丁有先願改建者一體借給每楹九兩分三年繳還從之七年正月奸匪李彩於遷江縣屬石版村樹旗聚衆謀攻城行義擒之並奏遷江縣遼闊無塘汛匪犯得潛藏請於城北北四地方設汛撥賓州營把總一兵五十城西平陽墟增巡檢一弓兵二十四駐防巡查七月奏言臣閱邸鈔見兵部議侍郎舒赫德條奏內城九門外城七門揀設銅鐵礮各十位九年演放一次奉旨欽准在案臣思九年爲日太久應照八旗例三年演放一次每次輪演四位九年三次不致鏽蝕礮手新舊二十二人尙不敷用每礮加二名學習演放俾器不虛設人收實用疏入均報聞八年因擅借給兵丁倉穀部議降一級調用十二月授登州鎮總兵十一年擢江南提督十四年調浙江提督十六年調福建陸路提督十八年八月以病解任九月卒賜祭葬如例諡恭愨

汪澂

汪澂安徽休寧人寄籍湖北江夏康熙三十三年進士改翰林院庶吉士三十六年散館授檢討三十九年充會試同考官累遷侍讀學士五十一年九月充會試副考官十二月充浙江鄉試正考官五十二年提督浙江學政五十三年留學政

任五十六年再留學政任五十九年任滿回京雍正二年升詹事府少詹事尋升太常寺卿左僉都御史三年四月升內閣學士兼禮部侍郎銜十月授廣西巡撫四年二月奏言蒙諭臣到廣西訪查左江鎮總兵梁永禧居官如何據實具奏臣到任後因左江鎮總兵駐劄南寧府與省城相距甚遠臣密加訪查梁永禧辦理營務尙去得在地方亦不多事伏惟皇上至聖至明無遠不燭凡臣下賢否之分難逃日月之照臣履任日淺耳目未周不勝惶懼之至諭曰旣云履任日淺耳目未周則辦理營伍去得在地方不多事之奏亦屬荒唐桂林不過數日之程卽以爲相距甚遠京城去粵西數千里之遙而謂朕之聖明無遠不燭其賢否之分難逃日月之照云云何不體情理一至於此耶爾初次奏摺卽如此依違瞻顧居心不純已見一斑殊大失朕之所望封疆大吏旣受國家知遇之恩當思竭力致身之義切忌柔佞巧詐獨善己身而不乃心國計朕披閱所奏甚憂汝不克勝此任也勉力爲之書生章句虛文非此任所需之物苟不以實心行實政秉公甄別賢否據實入告動輒瞻前顧後持首鼠兩端之見以圖自便則大負朕用人之意矣勉之慎之五月調江西巡撫五年二月內閣九卿翰詹科道議奏江西考試官查

嗣庭俞鴻圖收受舉人牌坊銀兩除查嗣庭大逆不道另案歸結外巡撫汪滌副
考官俞鴻圖應按律治罪諭曰舉人牌坊銀兩分送主考官向來亦相沿行之尙
非贓銀之比但謂主考應該收受亦非也汪滌之過在於身爲封疆大吏而與欽
差主考爲房屋交易之事應加處分以儆將來但其爲人尙老成著降四級以京
員調用是月以江西地方舊有落地稅白潢爲巡撫時將稅銀裁革不令商民完
納而以巡撫司道公捐銀兩代完每年假造花名冊籍報部其舊有收稅大使等
官設立如前接任巡撫王企靖裴律度皆照白潢例行奏入諭曰國家經制錢糧
豈臣子可以意爲增減若江西此項稅銀不應徵收則白潢應奏請於聖祖仁皇
帝施恩豁免若係地方應徵之項則自應令商民完納何得將公捐銀兩代商完
課曲市私恩以博無知小人之稱頌並不計及將來之可長行與否且此端一開
他省督撫何以催辦國賦似此沽名邀譽大奸大詐之行爲豈人臣事君之道汪
滌身爲巡撫凡事不能據理而行乃將白潢所行悖理之事奏聞於朕冀朕批示
朕若批令將稅銀豁免則是國家之經費聖祖仁皇帝六十餘年所未免者而朕
安能任意輕免之耶若批令仍向商民徵收則是白潢已免之項而朕復行徵收

無知愚民豈不歸怨於朕乎若批令照白潢之例以公捐銀兩代商完課則國體何在有此治天下之道乎尋補光祿寺少卿六年八月升光祿寺卿九月復授內閣學士兼禮部侍郎銜十月升工部左侍郎七年十一月命前往兩淮協同河臣孔毓珣修理高家堰隄工十二月調戶部右侍郎八年緣事革職十年起爲大理寺卿十一年以浙江海寧仁和海塘危險應行修築經總督程元章奏入命汪澂前往承辦工程十三年海塘衝決處甚多上以汪澂不得辭責下部議處尋議降一級調用上加恩寬免仍命督工效力照司道例聽大學士總理海塘工程嵇曾筠節制委用乾隆二年正月召來京五月奏考試新進士時應令其將本處當行之事各據所見明白陳奏下王大臣等議尋議歷科考試進士具有成式無庸更張諭曰朕思古來帝王爲治不棄芻蕘況伊等旣成進士皆係讀書之人於地方利弊或有確見亦未可定今年考試進士仍照舊例出題若伊等有願將地方事件敷陳者准其據實條奏閱卷大臣等擇其言有可採者進呈朕覽三年兩江總督那蘇圖奏請於淮揚一帶開築河道閘壩上以工程重大汪澂本籍江南情形自能熟悉且曾監修浙江海塘於水利工程諒亦諳練命往江南總辦此工會同

督撫河臣妥議四年正月汪滌尙未赴江南上御乾清宮賜廷臣等宴賦柏梁體詩汪滌與焉尋命偕通政使德爾敏辦理江南水利工程三月奏言淮揚河道請先將就近工程疏濬其餘挑挖引河修建閘壩俟逐段挨勘陸續估辦得旨不可惜費亦不可冒費必期一勞永逸於民生有益方爲善舉五年二月偕德爾敏奏稱鹹水東來之患惟天妃口與白駒三閘爲甚天妃口向無閘座應建白駒三閘頽壞應并拆建其沿范隄一帶之丁溪等閘內有上岡北草堰二閘俱頽壞更在串場河裏口開閘則不免鹹水內灌閉閘則鹽艘不能過行應移建串場河外口其餘各閘損壞者應修葺完密又鹽城之東塘河及上岡北草堰二閘內外河道并阜寧山陽寶應興化泰州各屬河道俱淤淺應一併疏濬高郵寶應見議添建三閘之處寬闊散漫應將河頭略爲挑濬引入下游河道至串場河及溱潼河新河舊河俱淺阻應一律挑濬其沿串場河之范隄及拼茶角斜三場隄工俱近海濱殘缺處多應加寬厚堅築夯碓又揚州之芒稻閘下抵通州河道淺澀應挑濬城東沙壩閘河淤墊應疏濬其閘板損壞者應修築城南揚子橋閘底過高不能通流應落低三尺其閘牆坍卸底石衝動亦應收小修葺又九屬田畝毗近河渠

地方應於兩岸修築田圩各高四尺底寬八尺頂寬二尺以作隄防該管地方官實力董勸居民每年於農隙時如式修築如有俸滿應升之員准以升銜留任俾得專力修築限於二月內一律告成將各員勞績分別具題量加議敘從之五月江南河道總督高斌奏汪漕年逾七旬動履維艱辦事實屬老成請令駐劄適中地方就近察理以德爾敏各處履勘則兩有裨益上允之八月奏言上江地方濱臨江淮地多山岡其間河渠形勢變遷不一各項工程自當量地制宜酌定緩急查有合肥縣城內之金斗河及洩水越河虹縣之枯河頭亳州之乾溪溝俱久淤塞難資灌溉請急爲挑濬和州之太洋河姥下河牛屯河含山之銅城閘河來安縣之龍尾壩河亦俱淤墊百姓未便請急爲挑濬又滁州之孟石口壩已經衝頽今卽原有石料改建石閘則蓄洩由人實於地方有益再合肥縣城東原有石閘一座年久頽廢水無收束請照舊建造又五河縣城南有蔣家土壩一道當滄淮二水頂衝歷年衝漫爲害甚巨請建竹篾石壩一道長九十丈以資捍禦其餘各州縣陂塘溝渠圩埂土壩共六十二處向係民修應令督撫轉飭地方官隨時勸導次第辦理九月奏稱豫省地居上游其水總以江南爲歸第入淮入渦稍有分

別今買魯河入淮之水既分洩入渦則渦河之水亦當分洩入淮庶上下游兩得均平請將兩河南岸分流之漳河並乾溪溝淤墊之處開濬寬深使渦河水大可洩又渦河經由之亳州城北石橋有礙水道應改建木橋以暢河流均下大學士九卿議行尋以下河沿海河道各閘座向係鹽場及佐雜官帶管勢難兼顧奏請添設閘官天妃石碇二閘設一員白駒南北中三閘設一員上岡北草堰二閘各一員專司啟閉仍令鹽務分司並該管州縣統轄稽查下部議行六年二月諭曰汪澹德爾敏奉差江南辦理水利工程已經數年之久至今未竣從前尙將情形奏報自去秋以後並無陳奏之摺今又於泰州江都山陽等處奏請動帑興工共計六疏朕不知見在工程若何何時可以竣局通計需費若干豈有漫無起止徒事遷延虛糜國帑之理令明白回奏三月覆奏水利鹽河工程共需銀六十七萬兩前經奏請遵辦動工以來所用錢糧俱係於原奏項下支用並非數請動項興工各工亦將次告竣其題估題銷各案應俟彙齊會疏奏報諭曰卽前經題定之數亦豈可漫無覺察聽衆人之分肥冒銷乎近布政使薩哈諒學政喀爾欽皆以貪贓之故朕將置之重典以警其餘汝二人亦宜慎之卽已無所染指而毫無覺

察將來水落石出恐汝二人之身家不能抵衆人之欠項也速行整理察辦爲是四月疏言泰州如臯下游等處因春雨連綿閘座未開以致停工諭曰觀此事汝等與督撫不和衷之處顯然何不明奏而爲是隱語乎尋奏到工之日凡興濬修築等事俱會同督撫和衷辦理惟泰州如臯鹽河係鹽運總漕之所行令通州知州王師旦將下游之鹽倉唐家二閘開放洩水該州並未開放機宜坐失工程未能及早完竣皆王師旦偏執所致上以王師旦偏執何不告之督撫諭將所奏與兩江總督楊超曾閱看會汪澹等奏刁頑商民因開鹽倉閘放水罷市尋楊超曾覆奏德爾敏等勘估開挑淮揚運鹽河道議開通州之鹽倉唐家二閘洩水入江王師旦請祇將唐家閘開放並於出水之地及該州迤北各築一壩攔截鹽倉並各支河之水不使旁洩正在會同築壩乃鄉市愚民以播種時資水灌溉同聲呼籲求免開閘以致居民罷市命楊超曾秉公查辦七月吏部侍郎楊嗣璟奏參汪澹德爾敏不諳地方情形罔恤民間疾苦或短發夫價或任意放水或將挑河之土堆入民田耗帑累民請交督撫查覈命楊超曾會同河臣高斌歸案奏結並詢問汪澹等是否別有不安之處尋楊超曾覆奏汪澹等在河工二年有餘頗爲安

靜謹飭惟汪滌年老多病諸事不能專主德爾敏未免矜才自用不能和衷共濟得旨此公論也九月上以汪滌等所辦江南水利大局俱已告竣召回京七年正月以原品休致八月卒

楊超曾

楊超曾湖南武陵人康熙五十四年進士改庶吉士散館授編修雍正四年入直南書房充湖北鄉試正考官尋提督陝西學政五年五月遷司經局洗馬六月遷左庶子六年疏言商州之鎮安山陽商南興安州之平利紫陽石泉白河等縣童生甚少文藝荒疏每將西安漢中各屬頂名冒考諸童取入足額謂之寄籍相沿既久諸弊叢生請嗣後就本籍童生文藝量取不必勉強足額俟人文漸盛補足寄籍諸生改歸原籍廩增俱作附生應試下部議行尋調順天學政八年遷侍講學士九年擢奉天府尹疏言各屬一切公務均有陋規攤派已嚴飭永禁疏入上是之將所奏宣示令永禁遵行十年疏言奉屬自光祿寺卿王符奏准商運販糶過多價難平減本年秋收稍歉明春商船雲集勢必騰貴請停禁商運部議准行十一年疏請州縣所收加一耗羨除錦寧遠二屬外俱免提解留充州縣養廉其

府尹等官養廉於中江等稅羨餘銀內撥給首領佐雜等官於錦縣寧遠縣酌派部議如所請以雍正十一年爲始永爲例時內務府議准御史八十條奏於錦州增莊頭百戶將舊交代民種荒餘地揀給超曾奏民種地立業已久今增莊頭百戶給六百五十晌六畝爲一晌計需三十九萬畝以民間每戶耕數十畝論給萬戶無地可耕斷難一時安輯且正值春耕清丈動須時日舊戶新莊俱不能播種本年賦必兩懸臣以諭民耕種毋妨農業應給莊頭地畝緩俟秋收查丈下部議行又言復州安州近年戶繁墾廣請裁復州通判改設知州一吏目一裁金州巡檢改設知縣一典史一義州接壤邊境微員不足彈壓請裁巡檢增設知州一吏目一自廣寧牽馬嶺以西錦縣齊家堡以北歸義州轄土默特耕地民就近附義州民籍又請將奉天治中照各府管糧廳例分管糧務理事通判照各府督捕廳例專司督緝又請改奉天各州縣要中簡缺量才補用又承德錦州寧遠廣寧四州縣衝要解犯絡繹請各增步快二十奉天府獄監犯多增禁卒八均議行尋定金州新改縣曰寧海四月擢總督倉場侍郎十二年九月擢刑部額外侍郎仍辦倉場事務十一月授右侍郎十三年充文穎館八旗通志館副總裁乾隆元年

充律例館總裁尋命署廣西巡撫二年正月實授二月疏言桂林等府州縣各墟雜稅窵遠難查請豁除其賀縣花麻地租雜稅有額無徵亦應全裁下部議行十二月疏言泗城鎮安二府及東蘭荔波寧明各州縣應試者少前撫臣金鉉令外省人入籍考試卽爲土著童子之師但冒籍者挂名學宮並未久居士著何從受益今鄉試三科外省人已中式數名若至十科勢將占去過半又其人皆行險僥倖中式後設獲罪逃脫居官虧空籍貫與里居不符從何追究請將外省入籍例停止部議從之先是撫臣金鉉奏令粵西廢員及外省官生借墾荒報捐後捏報者多每搜有餘熟田量給工本卽作新墾數雲南布政使陳宏謀原籍廣西力陳其弊部議令超曾秉公確查至是同督臣鄂爾達會奏從前捐墾不實田畝應減應豁及各官生短給工本各款部議巡撫金鉉布政使張鉞革職私派加徵各官論罪如律其田分別減則豁除三年奏言賓州原直隸州轄上林遷江二縣近俱改隸思恩府請裁分駐上林縣州同改設縣丞專司捕盜又言右江鎮增設中營請將思恩營原撥防田州汛之外委一兵五十移駐適中之馬平汛又言苗疆各官養廉不敷請將桂林平樂潯州三廠稅課盈餘銀酌繁簡增給又言泗城鎮安

二府俱改土歸流地廣俗悍以知府兼縣事未免顧此失彼請增附郭知縣各一
典史各一撤回駐天峩之泗城經歷改設縣丞一裁去泗城原設之同知照磨均
下部議准行十月擢兵部尙書四年八月充明史綱目副總裁十一月署吏部尙
書充經筵講官尋以任巡撫時濫舉貪酷知府饒鳴鏞部議降調得旨寬免五年
五月署兩江總督九月授吏部尙書仍署總督事先是蘇州織造兼管濟墅關海
保以貪婪參革部議海保管關九年其守口家人衙役等需索商民數多並著追
超曾奏言此等人役向係一月一換轉徙無常得贓甚零星年遠難查請免追從
之是月奏劾南昌知縣沈宏靖貪婪不法各款尋革宏靖職詔超曾嚴訊論絞候
十一月奏劾江西巡撫岳濬與知府董文偉劉永錫朋比作奸徇情納賄命戶部
侍郎阿里袞會同江南河道總督高斌鞠實得旨褫岳濬職從寬免罪餘論如律
十二月疏言今秋徐海二屬偏災應納粟米奉旨改徵折色照部定價每石七錢
五分內贛榆一縣向係民折官辦本年折徵已議定每石徵銀一兩陸續完納今
照部價溢銀二錢五分若以完納在前使急公良民轉不如未完之戶得沐皇恩
似未均平請將溢銀卽抵該戶本年未完或明年未完之數其舊欠折漕緩徵各

州縣亦多已徵銀米均作次年分徵之數得旨允行六年四月疏言松江府二屬涇係黃浦宣洩要道前兩浙鹽臣佟吉圖恐沙隨潮進淤積鹽河於涇口築壩攔截壩內民田蓄洩無備舟楫出入迂迴撫臣張渠請開壩建閘但建閘或害鹽運請開壩後卽於壩基設立木柵中留寬闊柵門每屆六月十二日掣鹽時依期封閉以防偷漏平時聽商民往來庶爲兩便又言松江太倉沿海土石塘工計占壓及窆廢田不下百餘頃撫臣許容奏請窆零田原令業戶領種定額輸租臣思此田皆民間恆產並未給還原價若以錢糧旣經豁免又必按畝徵租似非情理之平且半作溝潭不成阡陌將來歲修取土正無底止在舊戶亦不能長爲己有請聽耕種免租均如所請議行又言崇明一邑向係蘇松巡道統轄雍正八年因其孤懸海外文職僅縣令增駐太通道轄太倉通州兩屬但道員於地方案件不過一加覆覈原不親駐辦理況增設以來該道憚於過海俱駐太倉此缺無關輕重可見又揚州三江營原設同知一巡緝私鹽雍正十年改爲鹽務道要缺查兩淮鹽務有運司經理運判大使分地稽察且地方官俱有禁緝私販之責該道不過據文轉詳全無關係請俱裁汰通州就近歸併常鎮道轄餘如舊管理部議從之

六月兼署安徽巡撫時提督南天祥聲名平常超曾奉旨訪察奏言天祥明於水陸營制愛憎任情諸子及家人丁弁藉端營私漫無約束尋命南天祥原官休致先是乾隆元年三年安徽各屬賑濟銀米數溢例屢經部駁布政使託庸請以司庫節年盈餘照數支補奉旨令督撫查奏至是超曾奏言此項銀米並無捏報以不應著賠之項設法彌補不可爲平應卽照數銷結疏入報聞八月諭令回部辦事疏言本年七月間風雨大作上江臨淮鳳臺等二十四州縣下江上元江寧等二十六州縣及山陽鹽城等處沿江沿海田禾被淹災重急應撫卹者已將本州縣所存銀米動用又餘上江酌撥司庫銀八萬解宿州靈壽虹縣將鄰近不被水州縣倉米分撥十萬備賑動支司庫銀二十萬買米麥以供賑糶下江各縣穀見存及動買者約百餘萬又撥司庫銀十餘萬解徐海二屬撥銀三千解六合江浦二縣分別賑卹餘銀放給籽種疏入諭曰料理賑卹事宜頗爲得法務令屬員咸知朕視民如傷之意以至誠惻怛之心爲之庶可稍救災黎耳時通州鹽河工因春漲不能速竣辦理水利大理寺卿汪滌副都御史德爾敏議開唐家閘宣洩商民以外港水無去路必淹麥田紛集欲罷市吏部侍郎楊嗣璟奏開閘錯謬命超

曾查覈超曾奏言事皆出入因公民實切於爲己並無挾制阻撓且未竣工程稍遲數月亦無貽誤似可無庸深究又言通州知州王師旦深知唐家閘不可開因汪澹等檄諭嚴切不能堅執失在依違並非偏謬汪澹年老多病不能專主德爾敏矜才自用未能和衷此外並無不妥之處上曰此公論也十二月丁父憂回籍七年卒賜祭葬如例諡文敏

喀爾吉善子定長

喀爾吉善滿洲正黃旗人姓伊爾根覺羅氏祖喀齊蘭官副都統父凱音布初襲其祖克宜福所遺三等輕車都尉世職康熙十年授御史兼世管佐領二十六年擢光祿寺卿累遷吏部侍郎三十一年改漢軍正黃旗副都統三十三年調滿洲正黃旗副都統三十九年授禮部侍郎命偕學士碩穆布赴廣東查審雷瓊道成泰慎遊擊詹伯豸擾黎激變事得實論罪如律四十年擢戶部尙書四十五年調吏部尙書四十七年以老病致仕雍正元年卒賜祭葬如例喀爾吉善降襲騎都尉授上駟院員外郎充濟墅關監督雍正元年正月遷郎中三月調工部仍兼上駟院行走五年襲世管佐領七年以前偕通政使留保會鞠廣東署知州楊以寧

勒索耗穀案誤擬罪部議革職得旨從寬留任尋予開復八年擢兵部額外侍郎九年授左侍郎十年充八旗通志館副總裁十三年三月以驗馬不實議革職留任六月詔革任九月往盛京收糧乾隆元年三月奉旨仍留任佐領五月以廢員引見命管理圓明園八旗兵丁九月復往盛京收糧十二月奏言向來八旗臺站兵二八月於中江與朝鮮人貿易每減價勒買牛或借索海參請嚴禁諭曰朕思八旗臺站官兵有看守巡查之責原無暇貿易且不諳貿易之事嗣後著改令內地商民與朝鮮貿易中江稅官實力稽查務均平交易毋得勒措滋擾三年五月擢內閣學士七月遷戶部左侍郎協辦步軍統領衙門刑名事務十二月調吏部左侍郎四年兼管三庫事務五年閏六月授山西巡撫六年正月疏言晉省各屬自理贓贖銀兩未有詳報上司者亦有因公動用無案可稽者請令按季冊報二月又言汾水經大原府城西舊有土隄卑薄每夏山水驟發城郭堪虞應培堅厚並於頂衝處隨時搶護詔均如所請三月疏劾布政使薩哈諒貪婪及學政喀爾欽納賄營私各款命侍郎楊嗣璟往會鞫得實論罪如律諭曰此二案朕先有訪聞降旨詢問喀爾吉善不能隱匿始行參奏著該部嚴議尋部議革職上念其到

任未久詔從寬留任八月疏言晉省偶遇水旱米價輒騰貴請令各屬照時價及時平買從之九月疏劾河東鹽政白起圖貪鄙婪索白起圖亦以喀爾吉善挾私誣參奏辯命副都統塞楞額往鞫論白起圖罪如律十二月疏言煤爲兵民日用必需口外更資禦寒歸化城等處駐滿洲兵商民輳集附近無薪可採請多開煤仍禁內地煤出口杜帶禁物之弊下部議行七年三月疏言歸化城土默特蒙古不諳耕種以地典給民人生計窘迫請將民人所輸銀徵解將軍分給蒙古用度如尙有可耕地一體招民墾種大學士等議行十二月調安徽巡撫八年三月調山東巡撫六月疏言本年東省雨澤愆期秋成失望民人多外出謀生而隣省貧民亦有轉入東省覓食者請飭地方官勸令各回故土以待本處自有之恩諭曰所見甚爲得體各省督撫須當留心於平居無事之時委曲開導使知敦本務實力田逢年若輕棄其鄉則本業拋荒失所依倚卽國家收養資送亦不得已之計非可恃爲長策也七月又言濟武東三府屬遇旱濟東有漕運又有府倉及臨德二倉存穀緩急可相通惟武定無倉請於登萊二府倉撥運接濟九月又言倉糧買補貴有權衡濟武東三府屬現辦災賑倉穀請暫停買還其豐收價平處令及

時買補上嘉是之九年二月疏言春月糧價騰貴貧民艱食請酌量減糶三月又言東省兵米例係按季本折兼支春季青黃不接米價昂貴兵支折色秋收米價平減轉支本色請以春秋二季本折更換又德州海豐惠民樂陵各州縣應修城工以代賑及時舉行四月又言濟武二屬麥秋復被旱災現雖賑借糶三者兼行而繼此亦宜廣籌請飭各州縣於豐收之曹沂等府採買接濟並請於豫省沿河州縣麥收豐稔處量爲採買運貯五月請於司庫借支一季餉銀給濟武營兵於冬季爲始分四季扣還以紓兵困均得旨嘉允先是有直隸藁城知縣高封者山東人請試開臨淄卽墨平陰泰安沂費滕嶧等縣山場銀銅鉛鐵各礦事下山東巡撫勘奏至是喀爾吉善奏言神京拱衛礦洞久經封禁東省其地跨四府八縣形勢遠近聯屬開採殊多未便且利之所在衆必共趨恐濟武災區沂曹盜藪別生事端應照舊封禁上韙其言十年二月諭曰前因外省兵糧缺出惟馬糧係督撫提鎮親行拔補至步糧則由營員驗放往往徇情市恩濫行收錄虛糜糧餉曾降旨令直省督撫提鎮親自驗放今據喀爾吉善奏稱東省各營碁布星羅散處十郡若概送提鎮衙門考拔不惟道路跋涉且恐久懸名缺請嗣後將臣標所屬

二營登州鎮屬濟南城守一營及附近省城之大小營汛遇有兵丁缺出臣俱親加考拔其登克鎮臣均照此辦理至副將乃武職大員其同城本營及附近營汛之兵丁亦卽飭令該將慎重選拔秉公驗放仍造冊呈報提鎮於按年巡視各營時照冊查對此奏亦屬有見著照所請行并通諭各省督撫提鎮知之十二月以幕友吳芳猷掣選廣東縣丞疏請留東補用爲御史張孝捏所糾諭曰張孝捏奏稱喀爾吉善身爲大臣嫌疑俱不必避則當咨部銓選何必竟以留東奏請而於吳芳猷掣選廣東遠省始起辦公需人之見難免規避此奏亦是吳芳猷著仍補廣東原缺十一年九月遷閩浙總督十一月命開復前革職留任案十二年五月疏言臺灣漢民流寓日衆匪類肆竊更有闖棍惡徒恣行不法請嗣後竊案計贓在徒罪以下並眷屬在臺者初犯刺臂責懲交屬收管再犯則刺面按律治罪並眷屬逐回內地安置其闖棍擾害地方者審明治罪無論有無眷屬概行逐回仍行知原籍地方官交保鄰族正管束不許私渡過臺六月又言臺灣地狹民稠奸僞百出請自本年五月爲始定限一年在臺民人迎取家眷及的屬欲往就養者確查給照過臺仍飭內外汛口員弁詳察逾限不准給照詔均如所請尋偕巡撫

陳大受合疏言閩省倉穀出陳易新不難於出糶而難於買補春夏碾米給兵秋冬民間碾米完納官又易穀補倉事多周折不若卽令糧戶交穀官民兩便從之七月議覆浙江處州總兵苗國琮儲材備用一疏言閩浙戰船桅木非巨材不可若如國琮所奏於無稅官山種樹令地方官培養則須先發工本未免糜帑且必百十餘年始中繩墨恐日久稽查匪易不若許民自種納課種樹之初得收花息成材之後仍給價值民視爲己業培護自勤在官不費經營而良材可獲實用下部議行九月疏劾浙江巡撫常安貪婪各款卽命大學士訥親往鞫得實論罪如律十三年四月諭曰閩浙總督喀爾吉善鎮靜和平練習吏治其參奏常安一事不以同官稍爲隱護公直可嘉乃督撫中所少者斯實不負朕倚任之意著加太子少保十四年二月偕巡撫潘思榘條奏海防三事一內地民往來外洋勾結滋事應令保甲族長於編查門牌時將戶內所有往販外洋之人或爲舵水或爲客商逐一登明倘久客不歸及條來條去形迹可疑並外番人往來其家卽報明詳究一洋船舵水人等給照時應逐名親驗卽客商跟役亦親驗取結至出口如有更易許船戶呈明守口各員於總照內填註不能遠赴原籍取結者卽取具行保

及同船客商甘結俟入口時驗明原照方准回籍一洋船回棹之六七八九等月及出行之十二正二三等月責沿海汛弁兵丁晝夜巡查渡載外洋人貨者以私越論諭實力行之又言台州府屬之寧海縣舊有東湖地勢平行與海相通宋元洎明失修臣諭守令等察形勢土性導士民輸貲合築撥爲世業以出資輕重定分地多寡成隄酌定期限照例分別陞科雖國家增賦無多民人實有攸賴諭曰勸課農桑興修水利正務本之圖也欣悅覽之十五年加兵部尙書銜十六年三月上南巡恩免江南積逋二百餘萬而浙省向無逋欠亦特蠲本年正賦三十萬兩獎賜喀爾吉善詩曰巡吳於越便中過恐誤農桑候正和完賦自緣民俗美不須重勉善催科七月疏言浙省温台一帶被旱儲積空虛應自閩撥運臺穀接濟但重洋往返需日一面先撥廈門廳及莆田縣倉由廈門乘南風運往所撥臺灣穀廈門就近歸還至臺灣備貯穀亦應及時買補無俟温台解還糶價卽先借款於秋成收買得旨嘉九十七年二月以浙江巡撫永貴辦賑乖謬喀爾吉善不能匡正且附和部議革職詔從寬留任七月又以失察司庫吏侵冒帑項議革任仍詔免十月奏年老懇回京供職温諭慰留又奏閩省產米穀少向來採買俱預先

公平給價與各省買自市集徒昂市價者不同本年豐稔宜收買儲備請將現存倉穀不足五分者買足卽已足五分而本地穀價平減亦動支原存糶價買補又閩省山險就近通融撥運無庸赴鄰省採買上是之十八年正月以督擒福建漳州奸民蔡榮祖等迅合機宜諭部議敘加一級十九年四月加太子太保閏四月條奏更改浙省海塘六事一南北兩岸工程各不相及海防道員宜裁北岸仁和海寧海鹽平湖四縣塘工歸杭嘉湖道轄南岸蕭山山陰會稽三縣塘工歸寧紹台道轄各增養廉銀五百兩一海防同知通判宜更定分管之界北岸土石柴塘鞏固無事興築八仙石至戴家石橋歸東防同知戴家石橋至談仙嶺歸西防同知談仙嶺至江南金山界歸乍浦同知統聽杭嘉湖道轄南岸塘工向係紹興府通判兼管究非專責應將北岸通判改爲南塘移駐紹興府之三江城聽寧紹台道轄一塘兵宜改堡夫海防營額兵一千內有僅諳修防不習技藝者應挑四百名作爲堡夫照南河例在堡看守堡房及錢糧於裁撤兵餉內動撥一裁撤之兵宜分撥杭乍兩營海防額兵一千內既改堡夫四百再將諳曉技藝者撥入杭協城守營二百諳曉水務者撥入乍浦水師營一百餘均裁汰或歸農或補附近各

營缺額一杭乍兩營宜增設備弁杭協城守營僅一都司應將海防左營守備改爲杭協城守營中軍守備乍浦水師應分左右兩營將原設守備改爲左營海防右營守備改爲乍浦左營其千把總外委各員分別酌撥一官兵裁贖經費宜歸併塘工備用海塘每年額設引費萬餘兩備歲修不敷仍題動正項今官兵既撤節省各項銀兩應歸入海塘經費項下遇有工程無須復動正項部議從之先是上以八旗生齒日繁恩許京城漢軍人等改歸民籍各謀生計各省駐防漢軍一體准行所遺缺卽派京城滿洲兵往補命喀爾吉善會同福州將軍新柱籌議七月會奏應辦事宜六條一願爲民之漢軍無論世族閒散准入民籍一願爲民而別無生計惟借糧餉贍養者分派近省綠營坐補糧缺一漢軍甲兵儘馬甲先改一半以便滿洲兵坐補一漢軍原住房屋均留給新派滿洲兵一漢軍水師兵令滿洲兵漸次學習頂補一派入京城滿洲兵應分次分路行走又言福州駐防兵旣改滿洲則協參防校等缺應改用滿洲人員請於八旗滿洲現在任佐領以下等官及隨旗世職內揀發來閩與漢軍人員交代任事大學士等議行二十一年以查審前任浙江巡撫鄂樂舜勒派鹽商銀一案論擬失實部議革任詔寬免尋

奏浙江省海塘爲杭嘉紹三府田廬攸關年來水勢南趨北塘鞏固南岸紹興所屬尤險請於朱家樓楊樹下一帶照海寧魚鱗條石等塘建石塘四百丈其平穩處接築土塘二十丈塘後幫築土戩以護塘身其原有之土塘及鑲修之柴塘留資外護不致頻修糜費如所請行二十二年二月上南巡時喀爾吉善子定長任貴州巡撫賜喀爾吉善詩曰海疆澤國久聲騰坐鎮宣風嘉汝能連帥威儀今陶侃一家父子昔韓宏行春惠化吾方覽作雨平章民久稱供頓何須事華飾山川韶秀此邦勝七月諭曰喀爾吉善奏現患疽疾不能視事將關防暫交將軍新柱護理披閱之下深爲軫念著太醫院派外科一員令伊子員外郎定敏帶同馳驛前往診視並加賞人參一斤以爲藥餌之用仍傳諭喀爾吉善伊年老患病不妨寬以時日從容調理全愈後再行視事不必遽請解任副朕優眷至意是月喀爾吉善卒遺疏入諭曰閩浙總督喀爾吉善品行端重練達老成久任封疆勤勞懋著前聞偶患熱疽特命伊子定敏同御醫馳驛前往診視並賜參餌以冀速痊乃計程尙未到閩遽爾溘逝朕心深切軫悼喀爾吉善著入祀賢良祠以昭眷念賢臣之意應得卹典該部察例具奏尋賜祭葬如例謚莊恪長子定長由監生於雍

正十三年授內閣中書乾隆三年遷侍讀五年襲世管佐領九年授江南徐州府知府十二年遷淮徐道十三年遷山東按察使十四年遷陝西布政使十五年擢安徽巡撫十六年調廣西巡撫十七年調山西巡撫十八年二月調署貴州巡撫九月實授十一月條奏武科不許本省文武官員子弟頂食名糧應試又奏現經調任湖廣總督永常條奏隣省會哨事宜奉旨籌議臣查貴州與隣省聯界幽僻之地苗夷環處從前未加兵威若與隣省酌辦會哨雖不必張皇其事而苗性多猜保無別生事端應請停止大學士等均議如所請十二月疏劾提督丁士傑以書囑調知縣馬中驥上嘉定長據實陳奏持正得體降士傑爲廣西左江鎮總兵十九年九月請以節省棚馬公費銀交地方官平價買穀借給撫標兩營兵以資接濟又言黎平府屬之古州城東北江水泛漲爲患乾隆九年城北已築石隄而城東未及興舉請接築報聞二十年四月題請原任黔西州知州黃秉忠入祀名宦諭曰定長此本甚屬錯謬黃秉忠乃黃廷桂之父計其宦黔以來六十餘載該州士民身親見之者尙餘幾人今日之合詞呈請豈出輿情公論且果有遺愛在人何以久未題達明係因黃廷桂現任總督且又與伊貴州連界瞻徇市恩耳定

長著嚴加議處尋議降二級調用詔革職從寬留任二十一年疏言本年雲南廠運銅愆期黔省積銅現足供鑄通融籌辦請將上年所買滇銅五十萬斤停運來黔先儘解京備用得旨嘉允二十二年二月上南巡定長請入覲命便道至浙江省其父喀爾吉善賜詩曰迎鑾當入覲述職並寧親此意原嘉爾推恩詎一人西南門戶固禮樂獐苗新撫遠惟安靜庶因福及民五月諭偕尙書劉統勳往鞫雲貴總督恆文勒屬員買金短價及縱容家人收門禮一案得實論罪如律卽署雲貴總督六月調山西巡撫未赴任尋丁父憂十一月授副都統銜命赴西路軍營督辦屯田二十三年以委員擒賊未獲部議革職命以現在品級仍留屯所辦事二十五年補兵部右侍郎二十六年授福建巡撫二十七年疏言常平額穀例原借糶兼行應於青黃不接時先儘積貯最久之穀定價出糶秋成買補農民願借者聽詔如所請二十九年三月請移泉州府西倉同知駐就近之石獅街又言新例禁絲出洋絲價低昂總視蠶事豐嗇徒禁出洋無益請照舊弛禁從之七月以提督黃仕簡奏參總督巡撫收受廈門洋行規禮事解任尋諭曰前以此案關係督撫婪索多贓因命舒赫德等前往查辦今所奏既無確據定長發價購物亦沿

習舊例初無不可輕貸之處著從寬仍留原任十月疏言閩省常平倉穀較他省數本充裕而遞年收捐監穀額貯益增現值平糶時請以積存溢穀遇應行買補各邑一水可達者通融抵補不必糶價解司上嘉允之三十二年二月遷湖廣總督十月疏言緝匪惟在地方官文武員弁認真留意申明賞罰楚省各屬現派眼目不下七十餘名徒多無益應概撤回上是其言先是湖南桂陽州民侯七郎毆斃大功服兄侯嶽添知州張宏燧誤以七郎之親兄學添爲正兇按察使宮兆麟駁審宏燧護原招稟辨布政使赫昇額力庇宏燧讞久不決至是事發命侍郎期成額往會定長嚴鞠得宏燧及赫昇額執拗黨庇狀均請革職上以赫昇額身任藩司命案非其專責何以偏袒宏燧必別有結交情弊諭再研鞠三十三年正月究出前任巡撫李因培與赫昇額曾授意宏燧爲已革武陵縣馮其柘彌補虧缺事因培赫昇額宏燧其柘均擬斬如律二月部議定長失察應革任詔免四月疏言雲南現在用兵需人造船廷議於湖南水師營內選送查向來水師營船係雇工成造今雲南需船孔亟若僅於水師營內選送恐有貽誤現飛飭洞庭協及岳州營儘數發往仍於巴陵覓諳練工匠續送六月以濫用竹兜送過境兵役議革

任仍詔免三十三年卒諭部議卹三十四年署總督高晉奏荊州副都統石亮老病請勒休諭曰石亮衰庸戀棧已非一日定長在任時豈竟毫無聞見而一味姑容徇庇其膜視公務不問可知前此朕念其平日尙屬勤慎降旨加恩予卹今觀其闖茸若此卹典應卽敕部停止使封疆大臣知不實心奉公之咎雖身後已邀寬典亦當亟行追正以示懲創定長子台布襲騎都尉職曾任乾清門侍衛次子台斐音現官山海關副都統

方觀承

方觀承安徽桐城人雍正十一年由監生加中書銜隨定邊大將軍平郡王福彭赴北路軍營爲書記十三年回京補內閣中書乾隆二年軍機處行走三年遷兵部主事累遷吏部郎中七年七月授直隸清河道十二月署總督史貽直奏勸永定河工諭曰永定河實關緊要卿於明春協同方觀承詳酌爲之此人想宜於河務爲其不穿鑿而亦有條理也八年遷按察使九年二月命隨大學士訥親履勘河道並海塘工十月遷布政使十一年署山東巡撫奏稽察漕弊嚴緝盜匪二事諭曰足見留心地方實力行之可也十二年正月疏言安山湖地撥民認墾陞科

一案臣飭屬確勘湖中尙有積水但二麥布種於水已涸之後收穫於水未發之先且湖田多沃壤而麥收足抵秋禾故雖有水患民願認墾陞科但陞科之後官徵民納例重秋收秋禾被水請蠲請賑請豁徒致紛煩卽如南旺湖前經臺臣條奏給民認墾其時臣隨訥親履勘雖最窪之處亦俱乾涸貧民於中取土熬鹼高處則如屋如巖意以爲水必不能及上年臣抵東詢知夏秋運河汶水暴漲賴有南旺及獨山湖同時分減運道得保無虞而兩湖之水則一望瀾漫無分高下以此觀之凡大川經由及衆水所注其宣洩瀦蓄之區嘗閱數年數十年有若閒置而一旦用之乃知其見功爲不小未可以目前之形而忘久遠之慮也安山南旺二湖同爲運河洩水之地南旺現准報墾徵租安山請一例辦理並照直隸淀泊河灘地畝分季徵收之法其專種夏麥者於麥後徵收兼種秋禾者分麥禾兩季徵收則租額毫無減於陞科而除去陞科名色官地民種應徵應免可以隨宜辦理上是其言又言委積相調義倉稱便與社倉鬻鬻但社倉例惟借種義倉則借與賑兼行而取重尤在猝然之賑大要設倉宜在鄉不宜在城積穀宜在民不宜在官秋穫告豐勸導輸納年底將捐過穀數奏明不必開具管收除在則其數仍

不在官法可行久捐輸及典守年久者照社倉例議敘報聞二月回直隸布政使任十三年三月擢浙江巡撫九月疏言海塘引河現由中小疊安流弭節其北大疊北抵石塘根沙漲如平地臣沿塘查勘自仁和縣之觀音堂起至海寧縣東之淡水嶺止丈出地三十五萬四千八百餘畝民竈五千七百五十戶臣爲認墾者核編字號以十號爲一甲每十甲選老農一人司勸課按其土宜分年墾科仁和海寧二縣歲徵雜糧十萬石小民咸資生業諭曰墾田乃務民之本圖所宜留心勸相者也又言中小疊貧民應撥補地畝俾安耕作查附近中疊之許村西倉獨山腳河莊山北各地共二萬七千餘畝堪以撥補現除將萬八千餘畝撥給四百七十三戶餘八千餘畝留爲續至各戶之用再所撥地必俟鹹氣盡除始可種植貧民豈能懸耒以待查有乾隆十一年各竈戶報墾陞科之地附近西倉竈戶不能全種今卽令各戶佃種交租竈戶得租貧民得地兩受其益又各戶前於被水時有就竈戶課地內造屋而居者不便屢移令卽撥出二百畝劃界安居應納錢糧改歸各戶名下完納得旨嘉允十四年二月疏言定海縣之普陀山遠在大洋每年正二月間有所謂香頭者領衆進香男女偪處一船住山寺經旬始返旣於

風化有關而海洋關汛例應稽查禁物因婦女在船或致疏懈恐奸民乘機夾帶偷漏臣已飭查嚴禁上是其言三月請纂輯兩浙海塘通志以備參稽許之五月疏言臣於上年奏請將豆麥雜糧私運出洋者照私運米穀例治罪經部議准嗣閩浙總督喀爾吉善奉天將軍阿蘭泰等奏請酌籌彼此流通敕部議定豆麥雜糧出口俱給印照驗放臣查沿海情形各省不一浙省如寧波屬之定海象山二縣定海屬之岱秀二山温台屬之玉環山向許流通至嘉興屬之乍浦杭屬仁和縣之通口一帶海道又温台連界之蒲岐所海港向俱不通商販卽本處米穀亦禁出入以杜影射偶遇歉歲暫一弛禁舊例或經奏明辦理或臨時僅據屬員詳請遽准通融易滋流弊請嗣後辦理時必將確實情形奏明請旨則就流通之中仍嚴維制之道下部議行七月疏言浙省徵收錢糧原有頒發官戥聽糧戶稱較完納以杜捉補短封之弊而所製官戥當花戶叢集時勢不能逐一稱較官吏藉詞捉補弊竇實多現照部頒樣戥多爲製造發各州縣令鄉保當堂具領使一里甲之內足供輪用花戶投糧時齎戥赴櫃交納櫃書查給印串如短少卽係櫃書剪邊換錠不得於給串後向花戶捉補違者以重耗嚴參報聞尋擢直隸總督兼

理河道十一月疏言永定河身自六工以下舊有高仰之形乾隆二年大學士鄂爾泰會同督臣李衛河臣顧琮議於半截河隄北改挑新河移北隄爲南隄另築北大隄乾隆五年顧琮續請接築北埵與北大隄相連而下然祇係下口入河之保障非爲改河之用近年來六工淤墊日甚水流不下情形又異今就舊有之北大隄於六工改移下口庶水由地中暢下無阻惟北大隄內田廬墳墓多請俟來年汛後將改移事宜籌酌辦理至臣現議應修隄壩俱在六工以上量加培補以防浸溢將來下口改移上游亦得刷深尙非專恃加高致復淤墊爲害諭曰改移下口之處不可輕言卽鄂爾泰之原勘亦未可卽信爲盡善不易之策使改移而數年後復致淤塞又將何所改移乎十五年二月上閱永定河隄諭觀承以下口宜暢使易趨下御製詩示之曰水由地中行行其所無事要以禹爲師禹貢無隄字後世乃反諸祇惟隄是貴無隄免衝決有隄勞防備若禹豈不易今古實異勢上古田廬稀不與水爭利今則尺寸爭安得如許地爲隄已末策中又有等次上者禦其漲歸漕則不治下者卑加高隄高河亦至譬之築寬墻於上置溝渠行險以徼倖幾何其不潰胡不籌疏濬功半費不貲因之日遷延愈久愈難試兩日閱

未定大率病在是無已相咨詢爲補偏救弊下口略更移取其趨下易培厚或可爲加高汝切忌多爲減水壩亦可殺漲異取土於河心卽寓疏淤義河中有居民究非長久計相安姑弗論宜禁新添寄條理爾其覆大端吾略示桑乾豈巨流束手煩計議隱隱聞河南與此無二致未臨先懷憂永言識吾意是月賜人參三斤三月加太子少保六月永定河南岸三工淤溝奪溜命將江南總河高斌豆瓣集漫口圖鈔寄酌辦觀承疏言豆瓣集漫口係中河餘水泛溢故可擇便於水緩處施工其漲溜全歸正河照舊下注不虞堵截今永定三工南爲月隄缺口北爲大隄漫口南北相對里許若將月隄堵築其已過漫口之全溜並無去路實與南湖情形不同現在新開引河附近漫口請仍堵築逼溜歸入引河以復故道上是其言十六年正月疏言喀喇沁土默特等處種地民人漸多奉旨查禁廷議照署督陳大受所請將有力者按三年五年之限交地回籍若原係民墾不能卽回者按畝交租俟一二年後再行給還本人上年六月理藩院咨稱土默特貝子欲不問年限概行驅逐臣思此等貧民無家可歸卽使甘受驅逐而數萬男女概入內地亦覺安置爲難今旣蒙恩從寬查辦自應行之以漸請簡公正大臣前往查辦俾

蒙古民人俱各安輯命侍郎劉綸侍讀學士麒麟保會同貝勒羅卜藏往勘尋議仍照三年五年限撤還嗣後不得私典至領地開荒民與價典不同俟年滿先將原主需種地退還餘地仍許租種從之三月疏言上年增建冰窖減水草壩貼近從前永定河下口近因水大全河於此掣溜冰窖以上河身自四工至七工吸刷深通比冰窖以下河身驟低至五六尺其水仍由金門而壩臺並無衝刷至三十里外卽已澄清竟由坦坡埧汪爾淀一帶出水可無淤墊之虞但坦坡埧之設原爲格淀起見如遇淀水內漾不免阻遏河流應培築高厚以別清渾卽請於坦坡埧尾東北斜穿三角淀開引河歸入葉淀由鳳河轉輸入大清河疏下廷臣議以此時甫過凌汛與伏秋情形迥異一經盛漲挾沙直注恐致汙淀未可因一時水由壩出遽議更張令詳查再議觀承復疏言冰窖壩口掣溜在上七工尾當舊下口旁地面低於正河丈二三尺南岸距南坦坡埧較北岸距北大隄寬又加倍有漫衍而無衝溢此地勢之順也水由壩出非衝決亦非開放民情不怨此人事之順也凌汛改移經理有暇此天時之順也臣今日敢以必應改移爲請不復稍存歧見查河身北高南下水勢偏側竟成通河之病自七工出水後去路甚暢上游

吸刷倍益寬深自數尺至丈餘不等今卽倍用人力將七工八工舊河挑與相等而出口不順已刷深之上游轉眼停淤如故是水歸故道雖屬守經之論然不乘此就下偏南之勢仍強使北不但機會可惜竊恐伏秋盛漲南岸經理非易至原議內有一經盛漲挾沙直注恐致汙淀之語臣以渾水至三十里外卽已澄清雖盛漲多挾泥沙而水渙沙停必無直注汙淀之虞臣因慮及渾水或致入淀故不使東循龍尾直入鳳河議於王慶坨之南開引河二十里東北入葉淀迂其途而廣其地更可經久無患命尙書舒赫德河東總河顧琮會勘如觀承議五月疏言理藩院尙書納延泰條奏以多倫諾爾鋪司占蒙古游牧請毀屋另用蒙古人遞送文移查自設鋪司以來文移資其郵送解餉藉以棲止卽行旅商賈亦堪投宿並無礙游牧近因民人於鋪司之外增建坊店該處總營達錫等恐增建漸多侵占游牧是以呈明理藩院具奏但數百里荒漠公務往來棲託無所商賈等野宿堪虞而蒙古人不諳內地文移難免舛錯今查明南茶棚等六處每處上有屋一二所無庸拆毀上渡酌留屋一所轉山子水泉子兩處各留屋三所如有多建容留奸匪者責成地方官究治軍機大臣議行十一月上以豫省黃河兩岸大隄外

舊有古隄多殘缺黃水近自陽武灌入直隸之長垣東明衝開月隄三口命觀承往勘十七年二月疏言長垣東明二縣太行古隄在防隄外其地南高北下豫省陽武等縣瀝水北注長垣全賴此隄捍衛康熙六十年後屢被衝擊口門刷深難於施工惟王家隄以東舊有引河入運故近東隄工可無恙而隄西瀝水匯至屢被衝隄今宜爲瀝水籌其去路請於隄西開引河導入舊引河使容納東注卽將所起土自隄西村起另築新隄則隄外有河以疏瀝水河內有隄以防漫溢事半功倍且隄西八村皆得新隄爲外障民情更爲欣躍詔如所議七月諭曰直省錢價昂貴由於富戶囤積山東布政使李渭請定以五十串之限但驟行之不無滋擾應先行明切曉諭各富戶出易勿令壅滯九月觀承疏言富戶積錢類皆深藏固閉勢難逐戶稽查與其定以所積之限紛擾而難行不若稽其所入之數顯明而有據應令交易買賣價在三十兩以下許其用錢如逾三十兩卽令用銀違者照官價易之舊積錢文遵旨曉諭早爲出易加以獎賞如仍敢多積以十之二入官至尋常出入之錢拘以官收不免滋弊似應各從民便奏至上以所辦過遲詢問成效若何有無平減觀承覆奏富戶自諭後不敢多積錢文價俱以平減報聞

十月廷議各省採買糧石委員賚銀赴米船停泊處所收買而牙行轉運藉名昂價嗣後沿河聽商販自行轉運停隔省採買令各督撫動項交本地方官採辦委員運送則操縱隨時牙僧不得抗本地方官教令較隔省委員坐待羣得把持者難易迥別是需米雖在隣省仍如本省自爲採買無礙商販流通其弊除而其利自見下部議行十一月疏言滿城縣之奇村河發源一畝泉匯距泉以入保定春夏之交每虞微弱臣委員於滿城東孫家堂勘得申泉又東得連室泉夏家莊南得五花泉龍泉寺西得紅花泉俱爲葦草湮閉而渠形可尋一經濬治合流併注可增治稻田多頃商販亦得通行奉旨嘉獎十八年正月疏言熱河地方遼闊請編立烟戶定文武各官稽查責成其附近之敖漢奈曼翁牛特土默特等處令副都統每年巡查一周補營汎所不及如所議行二月奏設義倉告成凡千餘倉貯穀二十八萬五千三百餘石酌籌條規繪圖以進諭曰諸凡周詳妥當爾惟實力行之三月疏言子牙河支河請自楊家口至閻兒莊八里改爲正河以收因勢利導之益再於閻兒莊尾北通蔡家窪沿留兒莊東隄抽挑河槽下接黑港舊河俱於子牙橋北歸入正河詔如所請十月請將保定雄縣二處駐防兵米停向各縣

採買以省派累照天津等處兵米例截撥豫省漕米部議從之十二月疏言永定渾流善於移徙而下口形勢尤變遷靡常年來下口漸淤請於北岸六工尾開隄放水作爲下口至五道口東南導歸沙家淀仍由鳳河入大清河廷議以甫自南岸冰窖改移下口何以又請於北岸六工開隄放水令據實覆奏觀承言自冰窖改移之後水勢暢順上年汎水盈丈挾沙直注下口十里以內舊積新淤阻塞去路至南埵中下地面尙可以資容蓄今請於北岸六工放水循南埵導歸河淀照舊以鳳河爲尾閘雖有向南向北之分其實水道本屬相通北埵至南埵三十餘里瀾漫一片或分或合原足任其蕩漾臣逐細查勘向北改移水道仍以南埵下汎爲歸宿實於現在情形爲便十九年疏言鳳河隄工分隸永定天津兩道責成不專請將東隄並韓家北埵改隸永定道增弁兵畫一查辦均得旨允行三十年四月加太子太保九月命署陝甘總督由肅州至哈密抵巴里坤籌辦軍營糧馬諸務十月疏言軍營所需馬臣現解送萬三千餘匹合之軍營原存五千四百餘匹已敷一兵三馬之數但恐軍營積用復寬爲挑備撥往安西候調如不用卽以補實安西營缺又言准軍營咨約需馬三萬臣查索倫察哈爾厄魯特兵跟役無

多官員分例等馬尙有可減又哈密回兵三百祇派一半亦有可減之馬計實需用二萬七八十匹臣陸續督飭解送至軍駝共需四千四百餘現已解送足數餘供哈密運糧之用十一月又言哈密貯茶三萬封駝到卽運往軍營仍撥五萬封補貯哈密舊存糧十萬餘石就近撥運嗣後所貯以此數爲率隨時動撥庶緩急有備至餉銀先後已撥三十萬兩請再由藩庫撥四十萬兩貯哈密及西安甘肅兩道庫備用諭以安速爲要十二月疏言哈密至巴里坤中隔大坂積雪兵三百名在彼鏟除用力勤苦懇恩日加給麪四兩允之二十一年正月回直隸任三月疏言臣前奏准於永定河北岸挑引河改作下口今行水之北埵卽向之遙埵請於北埵外更作遙埵預行展拓以爲勻沙散水之圖鳳河東隄亦接築至遙埵之尾以資穩固從之二十二年八月奏遵旨赴東西兩淀督辦民船赴天津剝運漕糧諭曰甚好卿自能妥辦也又諭曰今歲糧船遲緩雖經剝船起運若令旗丁運送抵通乃於回空有礙且恐剝船未能同時畢集旗丁不免守候爲今之計莫若卽在天津交兌令漕船及早南回不誤明年起運著傳諭方觀承并行知倉場侍郎雙慶等派員赴津收兌除剝船脚費照例聽旗丁出給外其旗丁將本船應交

糧石如數交卸卽令催趲回空其如何設法稽查該督等當悉心妥辦此原係漕督楊錫紱職守但伊不過尋常循分供職於應機集事一籌莫展方觀承肆應裕如可協助辦理期於漕運有濟觀承奏言天津北倉餘廩可貯糧三十萬石圍牆內設席囤可貯十數萬石臣飭辦大席二萬片並麻繩秫秸應用事竣仍可變價歸款所費無多至交兌之船悉令泊北倉以南起剝之船悉泊北倉以北北倉東岸分釘椿界每二里泊船一幫同時起米不相妨礙西岸留爲河道令空船行走復咨飭南來各船並幫盪進毋拘銜尾常例迅速抵津及早告竣又言向來起剝係抵楊村以北酌視水勢深淺所剝不過十之三四腳價旗丁自給今自天津全數起剝運通腳價多至兩倍丁力較爲拮据仰懇聖恩於直隸藩庫內借動公項交地方官代給不須更經旗丁之手仍移咨漕臣於明歲新漕內扣解歸款均得旨嘉獎尋命同山東巡撫鶴年籌勘南運河宜洩事宜二十三年二月疏言永定河淤灘地請於隄內外共留十丈爲種柳取土之用餘撥給永清等七州縣守隄貧民領種輸租從之二十四年正月遵旨酌定陵寢兵役規條四事一大臣官員及各項當差人等雇用人役責成地方官查明造具來歷實係守分鄉民冊結方

准充役一賃住官房之人照雇工人例一體查造冊結分別去留一樹夫草夫更夫掃院夫及各衙門隸役照定例行文地方官募送驗充一馬蘭泰寧兩鎮屬綠營餘丁每年清查一次造冊送地方官稽查其因事革退兵歸入民籍嚴加管束諭曰所定甚妥如所議永久實力行之二月疏言理藩院議領票赴恰克圖庫倫貿易商民不得私住喀爾喀各旗販賣致蒙古賒欠將牲畜抵償有礙生計臣查商民多在張家口設鋪奉禁以來赴恰克圖庫倫者甚少蓋有力之商始能遠赴恰克圖庫倫一帶若中途糧乏不能不易貨接濟而先已蹈例禁之罪因此商民強半改圖惟是蒙古駝馬羊隻皮張資用內地者甚廣卽蒙古所需茶烟及布今商販稀少有無不能相通亦未見其有益可否於例禁之中加以區別領票赴恰克圖庫倫之商仍准經過喀爾喀各旗交易貨物如有盤據日久擡價放債致礙蒙古生計仍嚴行查禁上是其言四月上以北運河水勢微弱命將先到糧艘截留四十萬石貯天津北倉將來水長續到之船直抵通倉令觀承等詳悉奏聞觀承疏言前幫截留後幫繼進常速其間爲日無多若北運之水未長則續進之船仍不免起剝請就先到各幫內每船應剝若干卽得輕便今於北倉按應剝之數

截留原船之米餘仍抵通交兌以剝爲截則應截五六百船全米者勻於千數百數之半米以次起卸俟河水長發繼進之船浮送無阻諭獎其妥協如議行九月因滹沱河以東鹿改流南徙由寧晉縣入滏陽河地方官詳請導由舊路觀承勘奏言改流之晉州張岔山口新河係滹沱舊道非平地另有衝齧且原近東鹿城南頗費捍禦今改道晉州寧晉皆距城三十餘里近河邨莊多在高阜可築隄防護不須復濬十二月又言漳河向由豫省臨漳東北流入山東館陶與衛河合本年秋汎盛漲改流東南直趨大名府城水退後分爲二支一經府城之北一趨河南府城適當其衝請於改流淤塞處濬河身六百八十丈接入舊河其新衝河口堅築欄河大壩一百十丈以斷南流壩外加築土隄作爲重障使水無旁洩仍歸故道大名積水自消均如所議行是年涿州拒馬河河流北徙舊橋傾圮觀承改奏建石橋從之二十六年正月御史七十五條奏派員於多倫諾爾收稅命觀承議奏觀承因疏言多倫諾爾糧米皆資運販貿易貨物較前雖增而情形與八溝迥別內地茶布俱自張家口販往毋庸重徵惟恰克圖庫倫各處貿易貨物及克什克騰木植其在多倫諾爾售賣者應一律徵收課稅以杜私販下廷臣議行二

十七年三月疏請寓賑於工凡河渠隄埝應修應築如千里長隄格淀大隄大清
滹沱子牙牝牛豬龍海河鳳河北運河兩淀各處之減河疊道等凡三十二州縣
地方銀米皆歸確實四月同大學士劉統勳山東巡撫阿爾泰會勘山東四女寺
哨馬營兩處減水引河應加疏通並請將兩岸隄工歸德州與恩縣分管其兩壩
支河入海綿長將德州州判移駐交匯之邊陵鎮專司河捕責成德州糧道天津
道轄均得旨允行十一月上以河南巡撫胡寶琮現辦豫省民田道路溝洫甚善
令觀承仿而行之尋疏言正定順德廣平大興等處民力易集上下游並皆協取
畧與豫省相仿近年漳漆滏洺在在疏通是其明驗河間府屬河渠消水較前爲
速保定四境開溝種樹已定章程其餘各處俱先後開工至田間溝洫與道溝或
分或合要使瀝水有歸農田杜患以期事不勞而民不擾報聞先是易州城北白
楊嶺有安國河觀承奏准開渠道之灌田渠成賜名安河二十八年三月上以天
津等屬積水未涸觀承不能設法疏消模稜玩誤交部嚴議尋議革職命從寬留
任是月觀承疏言安河現鑿子渠建大小閘以時啟閉並分上下游按日輪啟如
上游單日用水卽閉閘導入上游子渠下游雙日用水卽閉閘導入下游子渠設

渠長二專司其事兩旁隙地量予種藝從之四月御史吉夢熊疏劾觀承玩視民瘼徇縱天津道那親阿啟聞遲延不早籌宣洩六月御史朱續經復劾直隸胥役派車船勒索賄放觀承不能督屬鋤奸諭曰方觀承在直年久每存息事寧人之見前此辦理疏消積水事宜不能及時整頓經朕特派大臣履勘業將該督嚴加議處以示懲儆而言者動以爲歸過之地直隸通省事務殷煩又值災歉之後措置自不無竭蹶持論者置身局外坐言易而起行難使易地以處恐其施展或未必能如該督之勉力支持也方觀承如自愧悔湔滌前非正宜稍假時日以觀後效倘其因循玩愒復蹈前轍斷不能逃朕洞鑒又何能屢邀寬典乎五月疏言直隸水道溝渠田間滄漚遵旨查勘入於以工代賑案內辦理茲查自大興宛平東至撫寧西至易涿西南至望都東南至阜城又運河大道自武清至吳橋一路共二十二州縣疊道開渠一律完竣諭曰溝渠卽河道之脈絡也應聯爲一氣方得宣洩之宜二十九年十月疏請嚴麥田牧羊之禁令羊販赴津滄荒窪地牧放毋許至京西京南以衛民息事上是其言十二月疏言右衛兵移駐張家口其歲支粟米通計協領等官四十四員兵千一百二十名此內有張家口原設官三員兵

三百名卽在新移官兵應支數內實不敷米一萬四百餘石宣屬產米本少商販不通本地無可撥給請將宣化懷來懷安三縣現支半豆照二十六年改折之例停支額豆八折改徵粟米撥連又於蔚州西寧二處酌撥屯豆六千六百石亦照前例折徵粟米但道遠運煩恐多糜費請卽於本地出糶收價至張家口買米交倉以上可得米八千餘石再於移駐之領催前鋒馬兵歲支米十五石每名改折三石以准籌撥之數惟張家口米價較右衛昂貴所有新改折色每石加給銀二錢如此通融則兵食有資而轉輸可省下廷臣議行三十年正月上南巡觀承迎駕賜詩曰棨戟依京國隼旗鎮冀門中丞近張瑩大尹昔王遵任久民情悉心恆吏治敦幸哉連稔後元氣復堪論四月條舉木棉事十六則繪圖說以進御題詩十六章並命將觀承所作詩句書於每幅之末十二月疏請將欒城柏鄉內邱定興安肅望都等縣改建甄城三十一年二月又奏淀泊河灘淤地向係撥給貧民認種完租每戶不得過三十畝近因胥役豪強詭列多名影射兼并今俱查明撤回請歸留養局爲養贍貧民之用八月籌辦居庸關城及關溝疊道十月奏永定河葦地已成高灘請改種禾收租均詔如所請十一月奏衡水縣西重建石橋成

賜名安濟橋三十二年疏言現奉部議准將宣化鎮所屬之張家口副將作爲都統標營以嚴隘口查該副將所轄其在邊外者係張家口中營及萬全營膳房堡新河口堡洗馬林堡柴溝堡西陽河堡七處在腹內者係左衛懷安二處左衛西連山西天城營懷安東連宣化城守營係通山陝軍站大路並無隘可查而以上下聯絡之營汛分隸兩標一切差務實虞歧誤請將邊口七處歸都統轄左衛懷安仍隸宣化鎮兩得其宜軍機大臣議行三十三年卒諭曰方觀承老成歷練任直隸總督兼理河務二十年來奉職恪勤方資倚任昨該督至石槽迎鑾見其病後氣弱卽令回任安心靜養繼因其患瘡增劇特賜經驗藥丸遣醫診視以冀速痊今聞溘逝朕心深爲軫恤應得卹典該部察例具奏尋賜祭葬如例諡恪敏四十一年諭曰原任直隸總督方觀承宣力畿輔二十餘載懋著勤勞其身後每深軫念伊惟方維甸一子彼時尚在幼穉今年已及歲前赴良鄉接駕着加恩照襲曰修之子襲行簡之例授爲內閣中書並准其一體會試四十二年直隸總督周元禮題准入祀直隸名宦祠四十四年御製懷舊詩列入五督臣中詩曰以書記見用古有今則無有之祇一人曰惟觀承夫夙稱習政事銓曹尤著譽出而爲監

司洵陞督與撫在直二十年勤幹實有餘永定籌補苴難爲永逸圖然僅能如此誠亦蒿日予徒以莅任久稍與姑息俱未至大狼籍何必吹求吾成全良臣多詎非佳士乎五十一年命入祀賢良祠

吳達善

吳達善滿洲正紅旗人姓瓜爾佳氏乾隆元年進士授戶部主事六年遷員外郎十三年遷國子監祭酒十五年六月遷光祿寺卿十二月擢內閣學士十七年授盛京禮部侍郎尋調刑部十八年調兵部侍郎十九年調工部侍郎兼鑲紅旗滿洲副都統二十年五月授甘肅巡撫七月以查辦軍臺無誤軍功加一級二十一年諭獎其宣力軍營賞戴孔雀翎二十二年議敘軍功加一級二十三年六月疏言軍糧由肅州運至哈密轉運軍營每石需費十二三兩向來凱旋官兵鹽菜口糧長支者按口抵扣少領者按日補給兵丁藉以糶賣製辦衣履請嗣後酌以二成本色八成折價支給既得隨時支用亦可稍省運費下部議行七月加太子少保二十四年正月授陝甘總督四月命以總督銜管甘肅巡撫事十一月奏言寧夏府屬橫城堡濱河漲塌西南角樓牆垣請於東岸築草壩以禦河流城下堆碎

石六十四丈護城垣接修草壩防風三十餘丈砌西岸游嘴俾大溜北行庶可化險爲平詔如所議行十二月調河南巡撫二十六年四月奏改營制四條一延津縣向設千總一隸開封營封邱縣駐衛輝營外委把總一查延津現屬衛輝府封邱縣屬開封府請撤協防封邱之外委把總回衛輝營移原駐延津之開封營千總駐封邱兼防陽武縣爲專汛歸開封營都司轉移衛輝營千總一駐延津爲專汛歸衛輝營參將轄一胙城係新鄉縣專汛今延津旣撥衛輝營千總移駐巡防請仍將胙城外委爲協防以延津千總爲胙城專汛一王祿營駐筍榮澤向設守備一馬步兵百三十應改歸河北鎮標中軍兼轄改原武汛外委把總爲王祿營協防同榮澤獲嘉二縣均以王祿營守備爲專汛歸河北鎮遊擊兼管一盧氏縣汛屬嵩縣營守備轄河南府參將兼轄請移嵩縣城守備駐伏牛山之孫家店移陝州營協防靈寶縣之外委千總一陝州營馬兵三步兵二十二駐盧氏歸陝州都司兼轄其嵩縣營原設盧氏汛把總馬步兵撥歸孫家店營守備轄下部議行四月調雲貴總督二十七年二月奏言滇黔各標協營每兵千設藤牌兵百提督撫標兵多藤牌兵尙成隊伍至各鎮協營兵有分防汛守及護解餉鞘等差藤牌

兵少又不適用請以七成改鳥槍手三成改弓箭手部議從之六月兼署雲南巡撫二十九年六月奏言貴州都勻協銅仁協兵馬錢糧向無專司中軍請裁都勻協分防獨山州之右營遊擊改設中軍都司兼管左營事隨都勻協副將同往都勻府城移左營守備駐獨山汛更八寨左營遊擊名右營以符營制裁銅仁協駐府城之左營遊擊改設中軍都司兼管右營事裁銅仁協副將駐松桃其原駐松桃之左營守備應移駐銅仁府城部議從之是月調湖廣總督七月兼署湖北巡撫三十一年二月調陝甘總督十二月奏言木壘一帶地廣沃請將招集戶民編里一里分十甲每里選里長一每百戶選渠長鄉約保正各一以資鈐束戶民墾地請均勻丈撥凡訟獄各案由守備審理命盜案守備驗實訊供巴里同知審擬招解從之三十二年調湖廣總督三十四年十月命赴貴州同欽差內閣學士富察善侍郎錢維城等會鞫威寧知州劉標虧空銅本並巡撫良卿按察使高積營私骫法案得實論罪如律三十五年兼署湖南巡撫三十六年四月調陝甘總督時土爾扈特全部歸順諭賞給羊隻皮衣吳達善辦理安速議敘加一級十月卒諭曰陝甘總督吳達善久任封疆老成練達近於陝甘任內辦理諸務更見周詳

妥協茲聞溘逝深爲軫惜着加恩晉贈太子太保入祀賢良祠應得卹典該部察例具奏賜祭葬如例諡勤毅

陳惠華

陳惠華直隸安州人雍正二年一甲一名進士授修撰四年丁父憂七年服闋充日講起居注官九年遷贊善旋擢侍讀學士提督廣東肇高學政十年調廣韶學政十一年丁母憂十二年特命來京充一統志館副總裁官十三年充浙江鄉試正考官乾隆元年三月充會試同考官十月遷詹事府詹事充經筵講官入直上書房十一月擢刑部右侍郎三年充江南鄉試正考官四年正月賜羣臣宴賦柏梁體詩惠華與焉尋遷戶部尙書三月充殿試讀卷官五年京師有富室俞君弼者死九卿俱往弔事聞飭查未往者惟惠華等數人七年三月充殿試讀卷官四月奏言聞近日民人踵至山海關者皆詘然而返恐有留難勒指情事請行令直隸總督飭查近關三百里內居民出關種地者卽給印票并令該關副都統轉飭驗放下大學士等議行七月調兵部尙書八年以弟惠正任陝西按察使審訊王之博幼女被勒身死一案任性酷刑經巡撫塞楞額疏劾惠正具密摺申辨並帶

部科揭帖與惠華先行酌商惠華以惠正既經被劾理宜候勘將原摺等寄回並未入奏事聞諭曰陳惠正以密奏之摺及用印之文齎送來京與伊兄陳惠華相商投遞與否伊既欲駁回豈有不奏知於朕之理況伊身爲大臣既深知其非卽當據實奏參乃隱匿不發及朕詢問始行奏出大臣事君豈容如此詐僞夫父爲子隱子爲父隱直在其中朕非不知以此風示天下然君臣之倫實在弟兄之上著交部嚴察議處尋議革職命降補右侍郎十二年以議處江西總兵高琦武備廢弛一案違例邀譽應革職聖駕由湯泉回至行宮惠華不偕九卿侍班指名尋覓良久始至上切責之遂褫職十四年正月起爲都察院左副都御史仍在上書房行走七月諭曰諸皇子等扈蹕行圍武備固當講肄而經書亦豈可暫荒卽不必日課新編亦應溫理舊業陳惠華身爲師傅自起程以來從未一至諸皇子讀書處及經詢問乃以腹疾爲詞豈途次每日皆患腹疾耶其曠職之咎實無可道著交部察議尋議革職命從寬留任二十年諭曰上書房行走諸臣理宜勤謹供職乃朕今日甫及未初偶至上書房並不聞皇子讀書聲行走各員多半不到不意平日怠惰不能盡心課讀至此毓德養正之謂何奪惠華俸三年二十二年升

工部侍郎二十四年遷禮部尙書二十九年以病乞致仕允之三十六年恭祝孝聖憲皇后八旬萬壽上命繪九老圖宴遊香山惠華列致仕九人中並予優賚四十四年卒子箴兵部主事

王安國

王安國江蘇高郵人雍正二年一甲進士授編修十一年擢司業十二年遷侍講九月提督廣東肇高學政十月擢侍讀學士十三年遷僉都御史仍留學政任乾隆二年疏言丁憂官員回籍守制親赴省會易衣冠拜院司送禮赴席恬不知怪請嚴行禁止下部議行四年五月遷左副都御史十一月擢刑部右侍郎五年三月轉左九月擢左都御史會兩江總督馬爾泰覆奏廣東巡撫王暮徇縱各款命安國審訊得實召暮還著安國以左都御史銜管廣東巡撫事七年奏裁大埔坪大宮田同知二員高廉運判一員三水縣西南清遠安遠曲江縣芙蓉英德正陽驛丞四員陽江縣那龍司澄邁縣新安司巡檢二員崖州陵水感恩昌化等州縣訓導四員部議從之八年十月疏言江西應撥廣東漕糧十萬石水陸所經湖灘踰嶺輓運維艱請改於湖南撥運一水可通實爲便利議如所請又言廣東之欽

州與安南接界商販出洋貿易貧民業操舟者不可數計小汶甚多最難稽查請將瀕海船隻報官印烙船戶水手出洋人給身照一紙歸時繳查暫羈者准於三年內附載歸港並行文安南王必有印照方准收留即有事不得過三年從前出洋之人生長彼地者聽其勒限三年附載回籍違者拏送正法疏入上曰如此立法亦稽查之一端但須實力妥爲之九年正月晉兵部尙書尋丁父憂廣州將軍策楞奏言安國孤介廉潔歸葬無資與護巡撫託庸等助銀回籍報聞十年十一月授禮部尙書十四年六月諭曰前日召見尙書王安國伊面陳目下正屆科試各省學臣尙有未除積弊朕以事關學政令其繕摺具奏候朕降旨今伊奏稱上科鄉試之後頗聞學臣中因錄科例嚴轉開僥倖之門或於省會書院博督撫之歡或於所屬義學洵州縣之請或市恩於朝臣故舊或縱容子弟家人乘機作弊以致取錄不盡公明等語朕思歲科試爲士子進身之階果有前項諸弊豈可不嚴加懲飭但各省學政多員未必悉係如此自宜據實舉出庶幾懲一儆百若漫無指名卽行降旨或傳諭督撫查察亦不過文告故事其真實作弊之人轉以指摘未及不知做畏而謹慎自持者又因無所區別不足以服其心乃面詢王安國

遲延觀望者久之始舉尹會一之向督撫求送遺才陳其凝之營私孫人龍之濫取呂熾明知鄧釗子弟冒籍直隸不爲稽查改正此數人者如陳其凝已經敗露孫人龍因考規避已經處分尹會一鄧釗均經物故而鄧釗亦不可謂之朝臣王安國身爲大臣奉旨詢問而所舉皆參革病故之員於學臣之見任者第諉爲無從指實不知人臣事君大義凡所陳奏宜本公忠既不可有市恩之心亦不可存避怨之見王安國市恩之心縱無避怨之見不免朕自臨御以來何事不由乾斷又誰能庇護私人傾排異己者而必畏首畏尾瞻徇退縮乃至於是耶且市恩朝臣之處最爲關係夫所謂朝臣者如大學士張廷玉史貽直內廷辦事尙書陳大受梁詩正汪由敦等或足以當之此數人者果有恃勢夤緣各學臣果有徇情取錄王安國自應秉公指參如不確鑿指出豈朝臣之子弟皆不應循例與試而該學臣以朝臣之故轉可故意裁抑令不得與衆人齒耶朕用人行政悉出於至中至正不存成見無所假借王安國既有此奏各御史寧無風聞何以無一人奏及著傳諭申飭伊等如有所見不妨據實直陳但不可又如王安國以儻侗浮泛之詞塞責並諭各督撫一體留心稽查如學臣實有弊端卽宜糾劾毋得徇隱王安

國之摺因朕問及而具奏故不議處二十年遷吏部尙書二十一年十一月以疾乞解任諭曰尙書王安國夏間曾奏懇給假回籍遷葬彼時以明春卽屆南巡面諭俟期隨往今據奏舊病復發難於行動著准其給假解任調理俟可就道自行從容回籍二十二年卒賞給內庫銀五百兩料理喪事仍賜祭葬如例諡文肅三十年上南巡賜其子念孫爲舉人

清史列傳 卷十八

大臣畫一傳檔正編十五

尹會一子嘉銓

尹會一直隸博野人雍正二年進士分部學習三年授考工司主事洊遷員外郎四年充廣西鄉試副考官五年授湖廣襄陽府知府九年調江南揚州府十一年遷兩淮鹽運使乾隆元年二月詔署兩淮鹽政十月加僉都御史銜尋授兩淮鹽政二年以淮揚運河定於冬月挑濬鹽船不能轉運諭令預運貯存以濟民食恐商人辦理竭蹶著將請單呈綱兩次應納錢糧緩至加斤時一體完納會一陳奏鹽務三條一本年丁巳綱淮南正運鹽七十萬引預運如之丙辰綱應運殘鹽四十萬引數多期迫竈戶乘機擡價各場產鹽不敷商艘趨運不及查運河東岸邵伯鎮迤南向有陸閘係淺水由荒稻河歸江之路上接邵伯諸湖下通泰壩鹽河擬於挑河時在陸閘南北各築攔河壩一中留運河五六里蓄水濟運鹽船直抵揚州灣頭自灣頭陸運至三汊河所留運河五六里三月復挑濬無誤一預運鹽

堆貯儀所鹽垣夏多滷耗請六月以前每引加鹽二十五斤七月以前加二十斤八月十五日以前加十五斤十五日以後加十斤商本庶免虧折一鹽課例於九月奏銷十一月考覈但丙辰綱鹽課特旨以新頒引鹽展限至乾隆二年二月奏銷丁巳綱新引見今領運至九月爲期甚近請寬至三年二月奏銷四月考覈下部議行三月入覲詔署廣東巡撫會一以母老疏辭調署河南巡撫五月奏言豫省闕雨歉收應緩徵以紓民力又平糶必需見價窮民尙費經營備領則急補目前請不拘存七糶三之例視地方緩急斟酌多寡以資接濟從之十月條奏農務一天時宜乘也力田貴早豫民有時宜播種尙未舉耜時宜耘耔始行播種旣失天時遂違物性臣擬分析種植先後刊諭老農督率勸勉仍遵聖諭州縣官不拘時日輕騎減從親往查勘如有工本不敷許借倉穀秋後補還一人力宜盡也南方地狹人稠一夫所耕不過二十畝力聚工專故所穫厚北方地闊一夫所耕自七八十畝至百餘畝不等力散工薄故所穫少臣今勸諭田主多招佃戶量力授田以三十畝爲率則地少力多可望豐收分多種之田以給無田之人則游民亦少一樹藝宜廣也豫省多鹹鹺沙地去其三尺而鹹少則潤澤臣今責成鄉耆保

長勸諭就隙地視所宜之木種植則地無曠土一女工宜勤也查江南蘇松繁庶而貧民俯仰有資者女子七八歲以上卽能紡絮十二三歲卽能織布一日經營供一人之用度有餘今棉花產自豫省而商賈販於江南豫省民家有機杼者百不得一擬有力之家多造機杼貸於織戶量取賃值或動支無礙公項製造給領俟一年後繳還原項並廣勸婦女互相做做得旨酌量行之不可存欲速之心不可有終怠之念若民不樂從不可徒繩以法也十月實授河南巡撫三年上以河南山東歲稔敕會一等籌補倉穀十二月疏言本年河南豐收以直隸江南災歉商販較多價值日昂臣飭各州縣如本地價昂平糶不敷買補卽赴鄰邑穀賤處採買儻鄰邑價亦相做卽將不敷銀報明在各屬盈餘銀內通融撥給再豫民食用以麥爲上高粱蕎麥菽豆次之臣飭地方官遇穀貴卽查明雜糧若干可抵穀一石參酌糴貯來春先儘雜糧糶借以濟民食秋後仍照時價買穀還倉至新舊民欠穀石河北三府被水無穀之民須糶雜糧糶穀還倉出入多虧折遲延請照穀價折收雜糧來春一體糶借秋後易穀庶民易輸將而倉儲不至虛虧上嘉之時安徽按察使張坦麟條奏農忙停訟如商賈爲奸牙串騙侵吞適值農忙恐日

久比追無術請酌改定例以恤遠人敕各督撫酌議會一議應如所奏並請以訟事而妨農宜停准理若因農事成訟時當農忙尤宜准理速結奏入報聞又奏報勸諭鄉農栽植榆柳棗梨一百九十餘萬株敕各督撫勉爲之四年五月黃沁水漲沿河武陟原武鄭州封邱陽武儀封蘭陽考城虞城夏邑災會一奏請酌借倉糧資助籽種趕種秋禾七月奏預籌民食事宜一請免關稅以通商也祥符等屬被水民食仰給鄰省江南則由淮河之正陽關達陳州府之周家口山東則由運河之臨清關達彰衛二府之楚旺道口等處懇敕免收稅俾商爭趨以資接濟一及時興工以代賑也各屬城垣倉庫監獄河渠隄岸營房傾圮淤墊宜動帑興修俾貧民力作餬口一酌量買運以備賑也州縣儲穀如不敷賑糶請於本省就近可通舟楫處不論常平穀撥用並動帑採買米穀雜糧以濟民食一多種菁菜以助食也查蔓菁春食苗夏食心秋食莖冬食根昔諸葛亮行兵所止乃令軍士種植取其易長而可食見飭被水州縣酌購菜子給貧民廣種以備採食部議從之七月奏辦災賑事宜一成災地方漕項錢糧豆米照地丁例按分數蠲免一應納漕項緩至次年麥收後徵解一未被水州縣應辦漕糧截留本省以備賑糶額徵

八旗飼馬黑豆七萬石水淹無收祈敕產豆省分採運詔從之十一月御史宮煥文奏劾會一莅豫至本年報盜至百六十餘案本年秋審招冊所擬情實可矜改駁至三十餘起疲玩不振貽誤地方諭曰尹會一自任豫撫以來屬員怠忽不知畏懼其讞獄弭盜多未妥協今年豫省各屬被水災重所辦賑務之事亦未盡善實少幹濟才能不勝巡撫之任但其爲人忠厚謹慎非有心誤公者可比著解任來京候朕另用尋授左副都御史五年會一母年七十餘疏請終養上以會一孝其母而母亦賢賜詩曰聆母多方訓於家無閒言休風誠所勵百行此爲尊名壽輝比里孝慈萃一門猶聞行縣日每問幾平反九年丁母憂十一年三月服闋授工部侍郎十月提督江蘇學政十二年上敕各省學政於考試文藝後就御纂四經中酌量舊說別異處摘取數條發問答不失指者生童卽予補廩入泮會一奏言一等生員概補經解似凡列優等者盡能記誦傳說未爲覈實請於冊報生童另期發問經義答不失指者卽以經解二字印記卷面衡其文藝酌予補廩入泮其不在冊報者不必概補經解下部議行十三年四月轉吏部侍郎仍留學政任閏七月卒諭賜祭十五年江蘇巡撫雅爾哈善奏准入祀名宦祠子嘉銓由舉人

授刑部主事洊遷郎中乾隆二十八年擢山東濟東道三十二年遷山西按察使三十三年擢山東布政使旋調甘肅三十九年授大理寺卿四十年以甘肅布政使任內失察邪教部議降調得旨留任四十三年二月以失察河州逆犯蘇阿洪邪教交部議尋議革任詔免以原品休致四十六年三月諭曰今日回蹕保定有尹嘉銓遺子至行在奏爲伊父尹會一請諡一摺已屬狂妄易名賜諡國家大典豈可妄求而又不親來乞恩本應交部治罪因批諭念其爲父私情姑從寬免若再不安分家居則罪不可逭及次閱伊爲父請從祀孔廟一摺更爲肆無忌憚愚而好自用矣從祀宮牆非人品學問純粹無疵久經論定者孰敢輕議是以國朝從祀寥寥寧缺無濫今尹嘉銓奏稱欲爲湯斌范文程李光地顧八代張伯行並請從祀而則以伊父謬妄殊甚湯斌在皇祖時曾經侍讀理密親王乃不盡心輔導以致理密親王縱欲敗度終於廢黜於保傅之義有虧至范文程本係明季諸生臣事我朝致身通顯雖非如洪承疇等身事兩朝可比然於純儒品節不無遺議若李光地於耿逆時遣人齎送臘丸告變外間傳有不與陳夢雷一同列名之事於公論亦未允孚至顧八代不過通曉繙譯滿漢文義居官循謹本無行誼過

人之處又張伯行雖操守廉潔亦人臣職分當然其奏參噶禮一案實因噶禮欲尋其釁勢難兩立因先發以爲自全之計不得以其託名講學輕議入祀以上諸臣皆朕素所深悉乃尹嘉銓以休致在籍人員不知安分妄言無忌實屬從來未有之事甚至奏稱伊父尹會一蒙御製詩章褒嘉稱孝已在德行之科自可從祀等語尤爲狂吠罪不可道尹會一從前經朕賜詩獎勵原藉以風示羣倫而已其於巡撫任內亦僅循分供職後因不能勝任改用京員尙不能如湯斌等諸人今尹嘉銓乃敢妄稱已在德行之科旣爲請諡復請從祀如此喪心病狂毫無忌憚其視朕爲何如主耶且尹嘉銓託於行孝爲此妄奏天下之人孰非人子乎使令皆爲其父求諡求入祀孔廟亦可行乎否則爲不孝卽得罪仍託於爲父則朝政不至於大紊乎此而不嚴行治罪何以彰國憲而懲將來尹嘉銓著革去頂帶拏交刑部治罪並將朕批示其兩摺發交大學士九卿閱看四月諭曰尹嘉銓由落第舉人用爲部屬洊歷藩司內擢京卿因其年老無用准予原品休致伊父子兩世受恩理應感激安靜居鄉以終天年乃敢令伊子齎摺爲伊父尹會一請諡又請從祀孔廟肆無忌憚罪無可道因降旨將伊拏交刑部治罪並飭查伊家有無

狂悖不法字跡隨據英濂袁守侗於伊京寓及本籍查伊所著各書則其中狂妄悖謬之處不可枚舉而其尤甚者如朋黨爲自古大患我皇考世宗憲皇帝御製朋黨論爲世道人心計明切訓諭乃尹嘉銓竟有朋黨之說起而父師之教衰君亦安能獨尊於上哉等語古來以講學爲名致開朋黨之漸如明季東林諸人講學以致國事日非是可鑒戒乃尹嘉銓反以朋黨爲是顛倒是非顯悖聖製誠不知是何肺腸且其書又有爲帝者師之句則竟儼然以師傅自居無論君臣大義不應如此妄語卽以學問而論內外臣工各有公論尹嘉銓能爲朕師傅否昔韓愈尙言自度若世無孔子不應在弟子之列尹嘉銓視朕爲何如主耶又其書有名臣言行錄一編將本朝大臣如高士奇高其位蔣廷錫鄂爾泰張廷玉史貽直等悉行臚列無論此諸臣居心行事未能及古名臣且以本朝之人標榜當代人物將來伊等子孫恩怨卽從此起門戶亦且漸開所關朝綱世教均非淺鮮卽伊託言做照朱子名臣言行錄朱子所處當宋朝南渡式微且又在下位其所評隲尙皆公當今尹嘉銓乃欲於國家全盛之時逞其私臆妄生議論變亂是非實爲莠言亂政又尹嘉銓在山東藩司任內而求賞戴花翎且敢於朕前肖述伊妻言

狀稱若不得賞卽無顏相見等語彼時毫不知恥而朕之深鄙其人實從此始也然尙欲全伊顏面從未宣示廷臣昨日廷訊伊仍自述不媿此種行徑豈講學者所宜爲也至託言夢中神人告以係孟子後身當傳孔子之道又朕御製古稀說頒示中外而伊竟自號古稀老人且欲娶年逾五十之女爲妾所行種種乖謬出於情理之外其他狂悖誕妄見於所著各書者尙不一而足正所謂少正卯言僞而辨行僻而堅爲所必誅者伊從前經朕屢次保全休致回籍本可終其餘年俸逃法網乃惡積罪盈自行敗露此實天理昭彰可爲天下盜竊虛名妄生異議者之戒連日命大學士九卿等公同反覆確訊奏請加刑訊問朕尙未允行將伊書內狂悖各條復加親訊伊俯首伏罪自認爲欺世盜名之小人懇求立置重典以彰國法等語經大學士等按律定擬奏請凌遲處死家屬緣坐覈其情罪卽予磔誅亦所應得當此光天化日之下此種敗類自斷不可復留尹嘉銓著加恩免其凌遲之罪改爲處絞立決其家屬一併加恩免其緣坐此朕爲世道人心起見不得不明示創懲以昭炯鑒凡內外大小臣工天下讀書士子均當洗心滌慮各加儆惕引以爲戒若再有如尹嘉銓之狂悖不法一經發覺斷不能復邀尹嘉銓之

末減也翌日又諭曰昨閱尹嘉銓自著年譜載其在大理寺卿任內與刑部簽商緩決一條夫明刑所以弼教準律定罪或輕或重執法者惟當斟酌平允不得意爲軒輊俾犯者輸情服罪無可市恩亦無所歸怨至問刑衙門內而法司外而地方官遇有案件自應悉心研究彼此講論務使情真罪當卽司官之於堂官州縣之於府府之於臬司臬司之於督撫凡有寬嚴不中之處皆許其據案直陳若上官意涉偏私有乖允當司員等所爭果是原可不隨同畫押或竟自行陳奏朕方將嘉其持正不阿卽外吏亦准直揭部科秉公嚴議要之皆爲公事起見不得少涉私心也夫從寬從嚴視其人之自取而寬之嚴之均無所容心於其間若議獄者不求其平甚至自記是出市恩沽譽之私其可乎若朕亦欲博寬大名將秋審情實人犯全予免勾其爲陰德豈不更大而使國家刑章憲典竟成虛設有是理乎昔雋不疑每錄囚還其母輒問平反幾何人歐陽修文亦載其母述父之言謂求生不得則死者與我皆無憾此雖婦人之仁就其所言亦祇爲辨明冤枉者言之耳非謂弗冤枉者概當從輕縱也若如尹嘉銓所載是博寬厚之名而歸過他人且以所辦公事退而私自記載以冀無識之徒妄爲稱譽其心尙可問乎朕矜

慎庶獄惟期大中至正雖匹夫匹婦之細亦必確覈案情折衷至當若徒以姑息爲念致失情法之平乖止辟之義朕不爲也因尹嘉銓欺世盜名妄行記載一事明切宣諭內外問刑衙門將朕此旨各錄一通懸之公署觸目警心共矢詳慎以臻協中之治其凜遵毋忽又諭曰尹嘉銓所著各書內稱大學士協辦大學士爲相國夫宰相之名自明洪武時已廢而不設其後置大學士我朝亦相沿不改然其職僅票擬承旨非如古所謂秉鈞執政之宰相也況我朝列聖相承乾綱獨攬百數十年以來大學士中豈無一二行私者然總未至擅權翫法能移主柄也大學士之於宰相雖殊其名而其職自在如明季嚴嵩豈非大學士而其時朝政不綱竊弄威福至今稱爲奸相可見政柄之屬與不屬不繫乎宰相大學士之名在爲人君之能理政與否耳爲人君者果能太阿在握威柄不移則備位綸扉不過委蛇奉職領袖班聯如我皇祖聖祖仁皇帝皇考世宗憲皇帝暨朕躬臨御四十六年以來無時不以敬天愛民勤政爲念復於何事藉爲大學士者之參贊乎卽如傅恆任大學士最久亦僅以蓋忱勤職自效今伊身後十餘年朕於庶務豈致廢而不理乎昔程子云天下之治亂繫宰相此祇可就彼時朝政闕冗者而言若

以國家治亂專倚宰相則爲之君者不幾如木偶旒綴乎且用宰相者非人君其誰爲之使爲人君者深居高處以天下之治亂付之宰相不可也使爲宰相者居然以天下之治亂爲己任而目無其君此尤大不可也本朝協辦大學士職本尙書不過如御史裏行學士裏行之類獻諛者亦稱爲相國已可深鄙而身爲協辦者亦儼然以相國自居不更可嗤乎從前傅恆於乾隆十三年扈從東巡因行在令其暫攝協辦事務其時直隸布政使辰垣遂以大學士稱之伊深以爲愧如此庶爲知恥識大體之人而此外諸臣恐未必皆然矣乃尹嘉銓概稱爲相國意在諛媚而陰邀稱譽其心實不可問至名臣之稱必其勲業能安社稷方爲無愧然社稷待名臣而安之已非國家之福況歷觀前代忠良屈指可數而奸佞則接踵不絕可見名臣之不易得矣朕以爲本朝紀綱整肅無名臣亦無奸臣何則乾綱在上不致朝廷有名臣奸臣亦社稷之福耳乃尹嘉銓竟敢標列本朝名臣言行錄妄爲臚列謬著品評若不明闢其非則將來流而爲標榜甚而爲門戶爲朋黨豈不爲國家之害清流之禍乎總之人君果敬天愛民勤政自能庶事惟和百工熙載否則雖有賢相亦何裨政事我國家世世子孫以朕心爲心整綱紀而勤宵

旰庶幾永凝庥命垂裕萬年所謂無疆惟休亦無疆惟恤可弗凜歟

楊錫紱

楊錫紱江西清江人雍正五年進士授吏部主事累遷郎中九年授貴州道監察御史十年擢廣東肇羅道乾隆元年署廣西布政使二年實授三年請禁州縣餽上司土產收受者嚴議六年正月署廣西巡撫九月實授時土苗石金元滋擾焚貴州永從縣治錫紱會貴州湖廣督撫鎮發兵剿擒金元未幾遷江土苗謀犯思恩府錫紱率兵往捕獲賊首李尙彩及其黨八十餘人部議軍功加一級七年五月疏言保甲平時足以弭盜遇災賑亦可按籍而稽粵西僻處天末保甲法多未奉行臣思苗獯雖與漢人不同然聚族而居一村一寨原有頭人等管束頭人等多習見官吏略識事體亦有識字者若因彼管束舊制寓以稽查之法諒不至驚擾臣見飭官吏實力辦理苗獯狎獯各就情形變通其法責成知府兩月來已有造冊呈報者如平樂縣春夏出借倉穀自保甲已立小民各抱門牌赴領牌到給穀絕無向時冒借短減弊此其明驗諭曰所見甚是所辦亦妥可嘉也六月疏言設兵所以衛民而積習有累民者如城守兵於鄉民貿易入城時攫取薪蔬塘汛

兵則驅役村莊科斂自肥而飲博滋事尤甚臣於撫標內已訪獲懲治恐僻遠相習爲常請敕封疆大臣共相釐剔得旨允行八年四月梧州府知府戴肇名私餽人夔諱其名曰長生果錫紱峻卻之具以聞上曰汝可謂不愧四知矣但此過尙小或戴肇名別有他過自應參處耳七月疏言粵西柳慶二府與黔省古州毗連向來黔省委員赴粵西買米無定期致粵西米價日昂請立章程先將應買數目知照於秋冬閒給印照採買查驗運回不得於春夏閒採買下部議從之先是錫紱奏獲逃入安南奸民黃漢周道南項亞等飭令羈禁奉硃批卽應重處示懲何必令其展轉偷生錫紱旋奏已提犯杖斃諭曰朕從前批示因人犯知罪無可追往往攀引多人以圖延緩前奏似有任其延案之意是以批示令其速審具題明正典刑乃楊錫紱誤會朕意竟將三犯立斃杖下三犯均係應死之人尙未至誤殺三命亦應明正其罪設使不應死者死則死者不可復生矣楊錫紱此舉實屬紕繆之至交部察議尋議削軍功一級九年授禮部侍郎十年授湖南巡撫十一年三月疏言桂陽礦商有隱漏侵欺之弊前撫臣蔣溥以常寧縣白沙村爲桂陽運銅水路要隘委府佐一員駐劄稽查今卽其地建廠設鑪令駐劄之員監督煎

燒則獲銅多而鉛稅亦增至郴州各礦僻遠畸零煉銅無幾宜仍交商辦從之十二年八月疏劾原任戶部侍郎陳樹萱在籍每以細事與鄉人訐訟見在服中曾以訟事至長沙府面相請託諭曰近因各省紳衿漸有恃勢欺陵鄉里干預詞訟之習曾經降旨訓飭楊錫紱查出據實陳奏甚屬可嘉陳樹萱交部察議尋議樹萱補官日降一級十三年丁父憂十五年授刑部侍郎旋授湖南巡撫十六年丁母憂十八年九月仍授湖南巡撫十月擢都察院左都御史十九年正月署吏部尙書二月禮部侍郎張泰開保同部侍郎鄒一桂之子志伊爲國子監學錄命嚴加議處吏部議泰開一桂均降調諭曰吏部甚屬徇庇蓋二人罪不同科鄒一桂止於不行阻止張泰開之心以朕未必卽知爲一桂之子故朦混薦剡瞻徇行私此而不懲則黨援門戶之漸將自此啟是以特令嚴加議處今該部之議所爲嚴者安在且又不分輕重均議降調朕能聽大臣之曲庇專擅乎著另議吏部堂官交都察院嚴察議奏吏部改議泰開革職一桂降三級事詳鄒一桂傳都察院議錫紱等革職詔從寬留任二十年二月署湖南巡撫五月授禮部尙書二十一年十一月署山東巡撫二十二年正月授漕運總督三月疏言興武江淮二衛旗丁

疲乏已極從前所領漕項勢不能繳請全豁得旨有意沽名著於伊養廉內坐扣二十三年四月疏陳調劑漕運事一屯田取贖宜寬年限也屯田乃贍運之本閱年久多典賣自乾隆七年清查定例後疲丁仍不能取贖無屯田則無津貼則贍運無資請嗣後屯田原價百金以上許三年交價價足田卽歸船一請嚴挂欠以杜冒濫也糧船到壩坐糧聽驗色兌收不足者名曰挂欠勒限三日兌足不完追比足數此定例也挂欠之丁非水次折耗卽沿途盜賣請嗣後有挂欠坐糧廳勒限追完仍行懲治領運千總所管幫內但有一丁挂欠卽限後全完亦不准議敘並總運之同知通判督運之糧道俱不准議敘一新僉旗丁應禁勒認公私欠項也向例丁力貧疲另僉殷丁但所革疲丁官私欠項纍纍向俱令新丁接受是以未出運而先受累請嗣後止認篷桅槓索價值至舊欠官項應於舊丁著追一年不完原領運千總賠還私債令舊丁自還不許勒新丁接受如違將抑勒之備弁參革一水次兌漕應令旗丁執概也州縣兌漕時不肖吏胥私收折色於交兌軍旗時串通積慣斛手輕用手法一斛有少至一二升者糧丁長途輓運已有盤剝傷耗何堪於水次先受虧缺嗣後州縣兌漕准令倉役執斛旗丁自行執概仍飭

監兌之員稽察不許顆粒虧短一江南之江淮興武二幫宜運快並僉以杜狡脫也此二衛貧乏尤甚無丁可僉緣二衛俱隸江寧省會向有運丁快丁之名運丁運糧屬糧道轄快丁管駕號船屬鹽道轄一族之中一家之內分充二丁往者運漕得利則俱稱運丁近日幫船疲乏卽冒快丁是以每僉一丁輒自謂非運是快僉丁雖由衛所聽斷必由州縣狡詐者關合吏胥州縣不察卽斷以是快非運僉一丁卽脫一丁因而丁已貧疲仍令駕運安得有殷丁幫船安得有起色查漕運全書江寧快丁原准與運丁並僉十餘年來快丁不可勝數而運丁寥寥且竄入快丁之籍皆有力之家而貧乏者不能卸其責請定爲運丁快丁並僉則狡脫之弊可除得旨此奏確有所見下部議從之十月疏言江南所屬鳳中幫船止十六隻而兌糧水次高郵五河及正陽關三處在高郵兌糧者由運河渡黃可以計日在五河正陽關兌糧者由洪澤湖至清口渡黃湖中守風或至半月前後船不能聯接雖有領運千總止在後管押其先行者無人稽察抵通日米石或有不足且過閘剝淺需費較多旗丁苦累查向例幫船過少原可歸併帶運請以高郵兌運者歸揚州二幫五河兌運者歸宿州頭幫正陽關兌運者歸宿州二幫水次旣近

運道亦同揚州二幫暨宿州兩幫原設糧艘無多增併數船不難稽察查惟安慶幫有一百餘船耳目難周請分爲兩幫卽以所裁千總督理安慶分幫實一舉兩便部議從之十一月疏言漕標效力千總由部揀發每年新運視何幫缺員卽行委辦期滿咨部卽用此輩無一定之幫不過虛應故事更或需索幫規稍不如意則尋事責懲幫丁是委一標員幫丁卽受一番苦累請停止又每幫有押空隨幫千總一報滿咨部候選其中頗有實心辦公者或值中途運員參革卽委本幫重運或本係疲幫令隨幫協同辦理三運之後漕務已熟而候選無期似屬可惜臣以爲與其請揀各員不若酌留熟諳請嗣後期滿除照常供職仍咨部外如有諳悉漕務者出具考語送部引見候旨飭發漕標效力差委三年後准照試用知縣例遇有調補遺缺人地相宜者題請補用部議如所請二十五年疏言南省漕運自開中河糧艘南來者一出清口卽由楊家莊入運以避清口至徐州數百里黃河之險惟徐州府之江北一幫長淮兩幫因受兌水次例在徐州府城是以每年仍走黃河不能避險然十字河竹絡壩未閉以前徐州之船由竹絡壩入運不必下至楊莊口門道里尙近自乾隆十四年竹絡壩不開之後非下至楊莊口門無

由轉入運道深冬致冰凌剗傷春行則有呂梁二洪及埽灣急溜之險且由徐城至楊莊逆溯阜河紆迴幾七百里請將徐州之江北長淮幫船住泊阜河至兌糧時令弁丁仍赴徐城受兌兌畢卽用小船運至黃河與阜河相連處過壩入船所需運價旗丁自認需用剗船令州縣酌定價值代雇雇船誤責在州縣剗運誤責在旗丁得旨如所請行又言運河內椿石起除不盡宜驗實參處凡有閘座之越河宜一律疏通管河應汛宜備挑取器具部議從之尋諭曰楊錫紱自任漕督以來於一切轉運事宜頗見實心釐剔有裨漕政所有從前濫行請豁漕項應於養廉內按年分扣銀兩著予加恩寬免二十六年正月疏言運蘇糧船至天津卽另由寧河縣之新河口入海河又由海河轉入寶坻縣之小河然後由白龍港劉家莊達蘇州之五里橋交卸本年三月幫船至津因候寧河縣挑挖新河口至四月八日始從天津開行入至河口又自劉家莊至五里橋計程九十餘里有淺七十餘處州縣雖撥夫疏濬終以沙流易淤爲辭致回空糧船凍阻寧河嗣後請責成地方官專管凡船到境淺阻卽督夫竭力疏濬遲延則參運員疏濬不力則參地方官庶回空無虞凍阻部議從之十月疏陳漕運四事一各關限單宜裁也糧船

北上撫臣給發限單所以速運臣又同巡漕諸臣親行督押立法已極周詳乃板關臨清天津三關亦有給發限單例查係明時准倉臨倉等分司原管船務是以有限單之式今制稅歸關船歸道府各關惟司正稅並不催漕限單徒爲虛設而請領繳銷適滋吏胥勒索應將板關臨清天津三關限單裁革一收漕違例知府之處分宜重也知府與州縣管轄最親收兌漕糧尤宜加意稽察乃因例不議處知府多不實力稽查或徇庇州縣與糧道齟齬請嗣後州縣收漕如有攙雜潮潤經糧道查出知府不先揭報者將知府照徇庇劣員例議處一奸丁藉充書役抗避僉點之弊宜除也軍屯內奸猾之徒謀充文武衙門書役以抗僉點衛所差拘各衙門公然庇護藉此藏身請嗣後凡係軍丁遇僉選之年無論大小衙門書役一體句僉如身在公所不能出運卽令子弟承領出運不得藉詞抗避各衙門亦不得曲爲庇護一頭舵水手脫逃之例宜嚴也糧船頭舵水手皆係旗丁雇覓往往於領工價後潛逃旗丁恐誤運出錢另雇雇後復逃卽報明運弁緝拏而此輩游手單身復難緝獲臣查糧艘卽係軍船水手受雇潛逃卽同遺棄請嗣後頭舵水手有工費給足而潛逃者通行嚴緝審明發邊衛充軍得旨所奏俱可行從之

尋加太子少師二十七年三月上南巡御製詩賜之曰轉漕由來大政關得人久任謂卿閑四星儲蓄天容與千里北南歲往還革弊深應體民隱董煥兼欲恤丁艱奉公盡職誠斯在扈蹕儀文儘可刪二十八年晉加太子太保二十九年七月疏言軍民戶籍各分既隸軍籍卽應聽僉辦運乃各省衛所紳宦富戶因辦運艱難百計思脫或將屯田轉售專置民產向州縣納糧或冒入民籍考試入學中式或以民籍報捐貢監職官或移易族譜或抽毀卷牘閱年既久一遇報僉紛紛辨訴胥吏多爲右袒州縣或礙情面往往憑狡辨之詞斷爲是民非軍衛所官弁坐視而莫可如何是僉一富戶卽脫一軍籍僉一紳宦亦脫一軍籍也查運丁除應得隨運屯田外造船則有官給價銀在家則有月糧在途則有行糧雖多寡不同皆以資其辦運原非空役身旣殷富苟有人心卽應辦運至力能捐納職官者原圖報效乃以素隸之軍籍百計圖脫誠不知其所欲報效者在況宦家富民承認一丁原不必身行或令族中子姪爲之或令知事家人代之今富且貴者以勢利求脫而所僉皆無力窮民於情理未得其平請嗣後遇丁力已疲勢須另僉卽富戶紳宦徑行僉報而仍潛令人猝辯或挺身自訴一經審虛富戶則按律治罪

紳宦卽據實題參庶奸狡不使脫漏辦運不患無人論曰楊錫紱此奏可謂大破情面無瞻徇之習如所議行交部議敘尋議紀錄一次七月疏言糧船夾帶私鹽定例綦嚴直隸山東淮安揚州各有搜索惟揚州查鹽督臣專委守備一鹽臣專委分司鹽大使一臣標委遊擊一可謂慎重矣乃此外又有淮揚道巡快十名無官而但有其役又揚州游擊有守備同屬一營而將備各差查鹽兵丁六名又江都甘泉各差快手六名隨同搜查每回空幫至五臺山卽銜尾停泊而衙門衆多不能齊集需候經時是未查而巳有稽遲矣及至齊集快手兵丁分爲八班遞進搜查或該管官因事不到兵役無所拘束往來自由又有藉稱文武各家人隨意上船彼此皆稱奉委大約一日止查十餘船以一幫五十船計之非三四日不能竣此臨查之稽遲也查竣後放至鈔關復有兵役攔船搜鹽不過羈阻索錢此查後之稽遲也南漕如江廣幫船乃通漕殿後每年回空過揚早則十月遲則十一月尙須涉歷江湖然後抵次已及受兌之時安有修船之暇其爲苦累已非一日臣思事權宜歸於一雜出徒爲滋擾若以總督鹽政委員爲不可信豈州縣之兵役轉可盡信請嗣後專聽總督鹽政委員實力辦理餘兵役一概停止又向例糧

船查出私鹽專參押空之弁領運千總免議實係沿途逗遛巧爲規避此後遇私鹽發覺領運千總無論在幫與否一體參處得旨所奏是部議從之三十年三月上南巡復賜詩曰內供卿貳外封疆司運今番政最良不必精嚴事皆就善於驅使衆胥襄卽今水次排南舸弗誤秋來到北倉更議僉丁蠲積習不拘流俗審應臧七月疏言駱馬湖當邳宿之間周一百四十三里每當秋冬蓄水濟運乃沿襲相傳以駱馬湖水專濟江廣重運而江浙幫船至古城驛以上卽阻淺起剝難望駱馬湖涓滴之助今年四月幫船阻滯臣商之河臣高晉先開柳園隄口運河之水立長五六寸江浙幫船遂得遄行次開王家溝口及江廣船至湖水未嘗告竭可見從前拘守譌傳使全湖之水半歸無用且此湖上受沂水下通六塘河入海每歲沂河水發由湖洶涌而下多爲海州沈陽之患若於四五月引湖水濟運則湖身寬裕至秋沂水驟至亦容受有地俾海州沈陽少減水患實爲一舉兩利從之三十二年十二月卒賜祭葬如例諡勤愨

王士俊

王士俊貴州平越人康熙六十年進士改庶吉士雍正元年八月特旨揀發河南

以知州用九月補許州知州三年河南布政使楊文乾陞任廣東巡撫奏准帶往
題用四年授肇高廉羅道五年署廣東巡撫阿克敦清查稅羨因士俊虧少肇慶
府黃江廠稅銀千餘兩疏參諭曰王士俊尙爲有用之員此等小過猶在可諒當
嚴加訓飭令其悛改尋諭內閣近聞督撫等帶往人員在地方不甚相宜或羣相
趨奉指爲上司之腹心或妄生議論以爲上官之偏袒其中弊端百出以致流言
不少如楊文乾信用王士俊廣東闔省人心不服朕思所帶之一二人其得力有
限而阻衆人效力之心則爲益少而無益多楊文乾等所請帶往之人現在屬下
者俱著來京另用士俊奉旨回京行至曲江縣命仍還廣東署布政使先是肇慶
府有重役李長茂充黃江廠典吏庫官陳成元代布政使官達勒取規禮銀一千
二百餘兩士俊因事關行賄婪贓詳明督撫阿克敦仍批官達提審士俊又詳請
改員嚴訊阿克敦改批按察使方願瑛會審士俊卽以阿克敦官達方願瑛結黨
朋謀徇私滅法士俊孤立將來必被抑勒具揭到部吏部侍郎查郎阿等以聞得
旨官達方願瑛俱解任其揭內情由令廣東總督孔毓珣及楊文乾審明具奏至
是毓珣等會審官達婪贓屬實阿克敦明知袒護不行查參方願瑛故爲開脫俱

論罪如律九年擢湖北巡撫十年四月奏言楚省州縣經徵民米例分漕南二項其漕糧則旗丁運至通倉其南糧則各州縣運送荆倉以供兵食查荊州府屬之江陵公安監利松滋等縣向例漕南均辦如應辦漕糧必運至省城查驗方得交旗丁裝運黃州府屬之黃岡蘄水蘄州廣濟黃梅武昌等州縣向例亦漕南均辦如派撥南糧俱係逆流輓運每至四五月內始抵荆倉常有風濤不測兵食反致遲誤請將荊州屬江陵等縣無論南米漕米俱就近留貯荆倉黃州屬之黃岡等州縣無論南米漕米俱就近兌交旗丁起運一經改撥可免遲誤兼省腳費又疏請增設漢陽府同知一員駐漢口鎮俱下部議行先是特設河東總督以田文鏡補授十一月田文鏡解任命王士俊代兼管河南巡撫事十一年八月疏參河南學政俞鴻圖納賄行私命侍郎陳樹萱往鞫得實鴻圖依擬論斬十二年疏言東省舊設衛所屯地分布各州縣相距既遠催徵輸納均有未便請將萊州府屬之鼇山靈山二衛守備浮山雄崖二所千總俱行裁汰改設巡檢把總等官屯地錢糧歸併附近平度膠州卽墨高密四州縣徵收各屯戶與民一體排甲編審仍註明衛所字樣以免牽混部議如所請十三年五月疏言豫省陝汝二州河南一府

距省甚遠爲極西藩籬請增設河南陝汝道以資彈壓部議從之士俊在豫三載墾荒勸捐貽累民間十一月戶部尙書史貽直奏言河南地勢平行沃野千里民性淳朴勤於力穡自來無寸土不耕其不耕者大都斥鹵沙磧之區臣聞河南各屬廣行開墾一邑之中有報開數頃十數頃至數十頃者積算無慮數千百頃安得如許荒田之多推求其故不過督臣授意地方官多報開墾於是各屬迎合上司指稱某處隙地若干某處曠土若干造冊申報上司據其冊籍按其數日報多者超遷議敘報少者嚴批申飭或別尋事故挂之彈章地方官畏其權勢冀得歡心詎恤日久官民受累以致報墾者紛紜其實所報之區非河灘沙礫之區卽山岡确磳之處甚至墳塋之側河隄所在搜剔靡遺目下行之不過枉費民力其害猶小數年後按畝陞科指荒田爲膏腴勘石田以上稅小民將有鬻兒賣女以應輸將者又如勸捐一節乃不得已之策今則郡縣官長驅車郭門手持簿籍不論鹽當紳民慰以好言令其登寫旋索資鏹地方官一年數換則捐簿一歲數更不惟大拂民心亦且有損國體請敕簡廉明公正大臣前往澈底查核疏入諭曰河南地方自田文鏡爲巡撫總督以來苛削搜求以嚴厲相尙屬員又復承其意指

剝削成風豫民重受其困卽如前年匿災不報百姓至於流離蒙皇考降旨嚴飭遣官賑恤始得安全此中外所共知者乃王士俊接任河南不能加意惠養且擾亂紛更以爲幹濟借墾地之虛名而成累民之實害彼地民風素敦淳朴踴躍以從罔敢或後甚屬可嘉然先後遭督臣之苛政其情亦可憫矣王士俊著解任來京候旨河南仍照舊例止設巡撫著工部侍郎傅德補授並將朕旨宣諭豫民咸使聞知十二月士俊至京命署兵部侍郎乾隆元年二月疏言平糶之法經久不易無如直省州縣不肯實力奉行每石不過減價數分貧民需惠無幾穀價例應提解司庫新穀出時赴司請領輾轉出入種種掣肘又新舊交代更多勒措是以狡猾之徒輒稱市價甚平毋庸出糶以免拖累請令各督撫通飭所屬務依每年存七糶三之例照時價大加酌減買補時務選好穀貯倉將通省貴賤不齊之處通融發補至所糶銀兩道府有庫可收旣經就近解貯不必悉提司庫新舊交代不得措勒推諉部議如所請行四月命署四川巡撫向例外官呈請終養必歷俸三年妄請者以規避論士俊請嗣後有請終養者查明倉穀錢糧並無虧空政務並無怠忽卽准回籍不拘三年之限又言鳥槍一項禁例森嚴但防守盜賊民所

必需請令民人照營兵鳥槍尺寸製造呈送地方官編登於冊又言貴州鄰近苗疆之州縣多無城郭應行修築俱下部議行士俊任總督時有上蔡令貴金馬因奉檄開荒勒派所屬民加報地畝錢糧武生王作孚等當堂聲辯貴金馬以聚衆鬩堂具揭呈省士俊諭承審各官不必牽扯地畝捏稱勒減鹽價擬王作孚等大辟至是爲巡撫傅德所劾部議王士俊身爲封疆大吏明知此案爲勒派報地起釁欲掩其從前報墾不實之咎諭屬員串供羅織無辜應革職留任七月士俊密疏四事上閱疏內有近日條陳惟在翻駁前案之語發令王大臣等閱看御史舒赫德因劾士俊奸頑刻薄中外共知其河南總督任內勒令州縣捏報墾荒苦累小民等劣跡無不敗露近日巡撫傅德又查參數款聞者無不快心以爲惡貫滿盈自遭嚴譴故外間竟有王士俊已經拏審之語我皇上至仁如天猶冀其改惡向善曲賜矜全乃王士俊喪心病狂妄發悖論請明正其罪不宜仍畀封疆疏入詔拏解來京治罪諭曰昨王士俊密奏一摺朕洞鑒其巧詐居心背理害道沽直言之名以自遂其私披覽之下不勝痛恨比卽嚴批申飭並將原摺發與總理事務王大臣及是日在乾清門奏事之九卿等公同一視朕意以爲王大

臣九卿等深明大義次日必有參劾王士俊者乃止據口奏其密疏之罪而未劾其巧僞之罪今日御史舒赫德封章特參直陳王士俊喪心病狂妄發悖論不宜復加寬宥仍畀封疆之寄朕用是召入王大臣九卿等而面諭之據王士俊第一條云近日條陳惟在翻駁前案甚有對衆揚言祇須將世宗時事翻案卽係好條陳之說傳之天下甚駭聽聞等語夫指羣臣爲翻案是卽朕爲翻案矣此大悖天理之言從來爲治之道損益隨時寬猛互濟記曰張而不弛文武弗能弛而不張文武弗爲一張一弛文武之道文武豈有意爲張弛哉亦曰推而行之與民宜之耳昔堯因四岳之言而用絛絛治水九載績用弗成至舜而後殛絛於羽山當日用絛者堯也而誅絛者舜也豈得謂舜爲翻堯之案乎我皇考卽位之初承聖祖仁皇帝深仁厚澤垂六十餘年之久休養生息物熾而豐厥後遂有法網漸弛風俗漸玩之勢皇考加意振飭使紀綱整齊弊革風清凡此因勢利導之方正所謂成繼志述事之善也又豈得爲翻皇祖之案乎皇考初政峻厲至雍正九年十年以來人心已知法度吏治已漸澄清未始不敦崇寬簡相安樂易見臣工或有奉行不善失於苛刻者每多救其流弊寬免體恤之恩時時下逮是卽十三載之中

而酌濟盈虛調適競練前後已非一轍矣至朕纘承丕緒泣奉遺詔諭令向後政務應從寬者悉從寬辦朕祇遵明訓衣德紹聞凡用人行政兢兢以皇考誠育民物之心爲心以皇考執兩用中之政爲政惟恐膠固成見有違時措咸宜之理弗勝負荷之重臨御以來與廷臣敬慎斟酌庶曰陟降庭止克綏予乎蓋皇祖皇考與朕之心原無絲毫間別如果內外大小臣工俱能仰體使政治清平民生安樂可以垂之永久而無弊又何必更有因時制宜之舉無如法久自滋弊生奉行每多過當不得不因畸重畸輕之勢而爲之維持調護以歸於正直蕩平之道此至當不易之理乃王士俊嘗爲翻駁前案是誠何言是誠何心夫朕躬有所闕失朕惟患諸臣不竭慮盡心直言規切至於事關皇考而妄指前猷有意更張實朕所怵惕靡寧而不忍聞者也又據王士俊第二條稱大學士不宜兼部之說尤見其自相矛盾挾私懷詐之情形纖毫畢露大學士兼部正皇考之成憲王士俊欲朕改之是又導朕以翻案也彼意不過爲大學士鄂爾泰而發以冀惑朕之聽夫朕豈爲僉壬所惑之主哉多見其不知量矣卽如王士俊河南墾田一事市興利之美名而行剝民之虐政中外共聞人人切齒設使此案敗露於皇考之時豈能稍

爲寬宥乎彼回京時畏首畏尾一言不發今見朕加擢用途欲掩飾從前之罪且中傷與己不合之人遂撰爲邪說以覆護之以爲前案不宜翻駁此則其設心之機詐有不可勝詰者至於第三條所云各部辦事預存一私意計較某省督撫正在褒嘉其事宜准某省督撫方得不是其事宜駁不論事理之當否專以逢合爲心及第四條所云廷臣保舉人員率多瞻徇情面甚至有巧索酬謝之事等語朕思部件題駁懷挾私心或所不免保舉徇情夤緣賄囑亦難保其必無卽以近日廷臣論之如勵宗萬之所薦不外徇情受託其保舉河員聞竟有納賄之事又傅鼐爲人奏求恩蔭一事亦屬瞻顧情面爾廷臣受朕深恩豈因王士俊之妄言而遂不駁一事不薦一人乎惟當清夜捫心此等陋習有則痛自湔除無則益加勉弗爲僉壬王士俊所訕笑以全朕委任簡用之顏面可也古稱爲君難卽此用人一節已千難萬難但亦自知其難耳旁無一人可語者而王士俊僉邪小人又安足與語哉王士俊爲人巧詐衆所共知朕格外保全棄瑕錄用念其尙有材幹或可成就姑令署理川撫陛辭之日朕何等諄諄訓諭乃巧詐之習牢不可破外飾鯁直以便己私敢將悖理之言妄行陳奏關係重大不可姑恕將舒赫德參奏

原摺交王大臣九卿等會議具奏九月王大臣等奏言王士俊居心狡詐行事乖張怙惡不悛恣行訕謗臣等將伊原奏內狂悖之處逐條嚴訊王士俊俯首伏罪無能置喙請照大不敬律擬斬立決奉旨改斬監候二年詔釋爲民飭令回籍六年因爭占甕安縣民羅尙珍墳山遣僕攢毆尙珍之父玉弼玉弼氣忿自縊尙珍赴都察院具控上命副都御史仲永檀赴貴州與總督張廣泗會鞫得實士俊擬杖徒如律二十一年卒於家

仲永檀

仲永檀山東濟寧人乾隆元年進士改庶吉士散館授編修三年六月充湖北鄉試副考官五年十一月授陝西道監察御史十二月疏言酌減上元燈火聲樂諭曰昨御史仲永檀奏稱人君辦理政務一有暇逸之心卽開怠荒之漸每歲上元前後燈火聲樂日有進御伏願酌量裁減豫養清明之體書云不役耳目詩云好樂無荒古聖賢之垂訓乃朕所夙夜兢兢而不敢忽者仲永檀所奏亦卽此意惟是歲時謙賞慶典攸關自古有之況我朝統一中外元正獻歲外藩蒙古朝覲闕庭錫宴同歡有不可缺之典禮朕亦惟踵舊制而行之未嘗有所增益至於國家

政務朕仍時刻留心照常辦理並未蹈怠荒之戒而略有稽遲也因仲永檀不能深知爰頒此旨至伊胸有所見卽直陳無隱是其可嘉處朕亦知之先是工部鑿匠俞君弼富而無子病故後其義女婿許秉義欺其嗣孫長庚幼謀爭產出名主喪因囑同宗內閣學士許王猷徧邀九卿往弔且首君弼有埋藏銀步軍統領鄂善以聞詔嚴鞠秉義論罪如律並革王猷職傳旨申飭九卿六年三月永檀奏言臣聞鄂善於掘銀案內受俞姓賄一萬兩禮部侍郎吳家駒因弔喪受謝儀五百兩又吞分送九卿炭金二千兩旋即假歸且聞弔喪不止九卿大學士亦然張廷玉差人送帖徐本趙國麟俱親往詹事陳浩在彼陪弔奔走數日臣因未得鄂善等受賄確據大學士等又於皇上申飭九卿時追燬原帖不敢遽參恭讀上諭原許風聞言事謹據實密奏以備訪查又聞向來密奏留中事件外間旋知此必有串通左右暗爲宣洩者權要有耳目朝廷將不復有耳目矣疏入諭曰據御史仲永檀奏參鄂善等稱係風聞言事據實密奏以備訪查鄂善係朕倚用之大臣非新用小臣可比伊意欲朕訪查不知應委何等之人若委之禁近小臣豈大臣不可信而小臣轉可信乎若委之大臣又豈能保其必無恩怨乎況命人暗中訪查

而朕不明言藏於胸臆間是先以不誠待大臣矣此事甚有關係若不明晰辦理判其黑白則朕將何以任用大臣大臣又何以勝任國家之事耶著怡親王和親王大學士鄂爾泰張廷玉徐本尙書訥親來保秉公查審使其果實則鄂善罪不容辭如係虛捏則仲永檀自有應得之罪王大臣必無所偏徇於其間也仲永檀又稱向來審奏留中事件外間旋知朕於左右近侍訓約甚嚴防閑甚密數年以來凡密奏留中之件皆朕親自緘封並有覽閱之後默記於中卽焚其稿者實無宣洩之隙其有宣洩於外者則皆係本人自向人言以邀名譽而反謂自內宣洩以爲掩飾之計朕猶記方苞進見後將朕欲用魏廷珍之意傳述於外並於魏廷珍未經奉召之前遷移住屋以待其來京此人所共知者又李紱曾經召對朕以君不密則失臣臣不密則失身之義諭訓之伊稱臣斷不敢不密但恐左右或有洩露耳朕諭云朕從來召見臣工左右近習曾無內侍一人並無聽聞亦何從洩露如此二人者皆此類也至於權要串通左右一語朕觀此時並無可串通之左右亦無能串通之權要伊旣如此陳奏必有所見著一併訊問具奏朕之所以廣開言路者原以明目達聰以除壅蔽若言官自謂風聞言事不問虛實紛紜瀆陳

徒亂人意於國事何益是以此案必須澈底清查不便含糊歸結亦正人心風俗之大端也仲永檀摺并發尋命革鄂善職拏交刑部嚴審諭曰仲永檀奏參鄂善得受俞長庚賄賂一案朕初以爲必無之事仲永檀身恃言官而誣陷大臣此風斷不可長但事不查明何以治仲永檀之罪因而派王大臣七人秉公查審屢經研訊逐日奏聞乃鄂善家人及過付人等俱各應承是鄂善受賄之處已屬顯然朕特召和親王大學士鄂爾泰尙書訥親來保同鄂善進見面加訊問鄂善始猶抵飾朕諭之曰此事汝家人及過付人等俱各應承汝能保家人捨命爲汝而自認此贓爲己吞乎若能如是事亦可已若不能如此此數人者出將秉公嚴訊彼時水落石出汝一人之事所關甚小而朕用人顏面所關則大汝若實無此事則可若有不妨於朕前實奏朕另有處置面諭此數大臣從輕審問將此事歸汝之家人以全國家之體設非朕另有指示此數人者但知秉公而已敢如是辦理乎鄂善熟思乃直認從家人手中得銀一千兩是實朕以鄂善在朕前已經自認毫無疑竇以皇考及朕平日深知信用之大臣而負恩至此國法斷不可恕若於此等稍有寬縱朕將何以臨御臣工但朕心欲以禮待大臣以存國體賈誼曰其有

大罪者聞命則北面再拜跪而自裁上不使人摔抑而刑之朕之處鄂善亦猶是耳因垂淚諭之曰爾罪按律應絞念爾曾爲大臣不忍明正典刑然汝亦何顏復立人世乎汝宜有以自處乃彼既出之後朕猶恐如此辦理或有過刻之處又令和親王等四人會同大學士張廷玉福敏徐本尙書海望侍郎舒赫德再加詳議據王大臣奏稱鄂善婪贓負國法所不容人心共憤理當明正典刑乃蒙天恩容其自盡實無過刻之處朕因令訥親來保前往將王大臣奏帖與鄂善閱看并傳諭曰朕於大臣視同手足今爾負朕至此朕萬不得已如此辦理自降旨之後心中戚戚不能自釋如人身之失手足也汝心中若有欲言之事不妨向二人再行陳奏鄂善忽奏稱我錯聽皇上諭旨以爲我家人已供我得銀一千兩又聽得諭旨云爾係皇考及朕信用之大臣如果有受賄實情可在朕前據實奏出朕另有辦處以全大臣之體我因皇上屢次降旨滿尙書皆可信其無他今我被人參劾審有得銀之供恐皇上辦理爲難是以一時應承我實無贓私入己如家人供出我來情願與之質對等語朕當爾等面訊鄂善時總以至誠開導欲得其實情爾等皆爲之感泣鄂善亦良心發見俯首無詞因而直認不諱並未以威懾之以言

誘之以刑訊之也旋命訥親來保傳旨與伊朕意彼若自知罪重誠心悔過或以罪當監候懇切哀求尙欲緩其須臾之死乃鄂善無恥喪心至於此極其欺罔之罪卽立時正法亦不爲枉夫朕之所以令彼自處者以欲全國家之體而賜彼以顏面也乃彼自不惜顏面朕將何惜豈皇考在天之靈不容此負恩之輩冒恩苟免欲使明正其刑以儆戒大小臣工耶可將鄂善革職拏交刑部著福敏海望舒赫德會同爾等嚴審則虛實自見或因鄂善愧懼一時錯認亦未可知王大臣必不阿朕旨而故入以重辟也夫奸盜等案朕尙熟思審處期於至當況鄂善曾爲大臣者乎朕爲此事數日以來寢不安席食不甘味深自痛責以爲不如我皇考之仁育義正能使百爾臣工兢兢奉法自不致身陷重辟水弱之病朕實蹈之若再不明彰國法則人心風俗將何所底止朕之苦衷亦惟皇考在天之靈鑒照之耳垂淚書此王大臣其體朕意焉布告天下咸使聞知四月王大臣等鞠實鄂善擬絞決吳家駢陳浩均革職諭曰仲永檀身爲言官能發奸摘伏直陳無隱甚屬可嘉應加超擢以風臺諫著將僉都御史鄭其儲調補順天府府尹其僉都御史員缺卽將仲永檀補授至仲永檀摺內所奏大學士到僉姓送帖弔奠一事今查

詢明白全屬子虛伊係得之于枋之口則非伊捏造可知又奏留中密摺宣洩於外伊既舉出吳士功參奏史貽直一案查上年吳士功果有此奏現在交王大臣查詢是伊亦並無妄言之咎俱不必向伊置問朕始疑仲永檀妄言誣陷大臣故欲加罪今詢查有據旋即加恩擢用朕大公至正之心可以對天地可以對臣民自今以後居言官之職者皆當以仲永檀爲法而不必畏首畏尾矣八月擢左副都御史時貴州甕安縣民羅尙珍赴都察院控家居之原任四川巡撫王士俊占據墳山命永檀赴貴州與總督張廣泗會鞫得實士俊擬杖徒如律七年二月充會試副考官時河南巡撫雅爾圖劾永檀自貴州回京令家人鞭打平民下部議罰俸九月充武會試考官十二月命往江南同巡撫周學健辦理查賑事務是月以密奏留中事洩於鄂容安奉旨革職鞫問交王大臣等會鞫尋諭曰朕細閱鄂容安仲永檀供詞伊等往來親密於未奏以前先行商量既奏以後復行照會二人俱已供出明係結黨營私糾參不睦之人爾等祇擬以洩漏機密事務之律不合著三法司另行嚴定王大臣等因請刑訊並將大學士鄂爾泰革職鞫問奉旨鄂爾泰著交刑部議處以示薄罰至爾等奏請將仲永檀鄂容安加以刑訊伊等

俱曾爲三品大臣又豈可似盜賊罪犯重加三木若不過套夾一訊爲爾等斷案張本又何必多此一番奏請乎況此事形迹已明無庸刑訊仲永檀受朕深恩由御史特授副都御史乃依附師門將密奏密參之事無不豫先商酌暗結黨援排擠不睦之人情罪甚屬重大鄂容安在內廷行走且係大學士之子理應小心供職閉戶讀書乃向言官商量密奏之事情罪亦無可道但較之仲永檀尙應末減耳爾等可定擬具奏永檀尋病卒

哈元生子尙德

哈元生直隸河間人由行伍拔把總累遷直隸黃花路守備康熙五十七年遷建昌路都司六十年因失察私木過關革職雍正二年三月奉旨帶領引見發直隸以守備用四月補撫標右營守備七月貴州威寧總兵石禮哈奏帶往貴州隨剿狝家苗三年補威寧鎮標中軍遊擊四年四川烏蒙土知府祿萬鍾擾新隸雲南之東川府其黨鎮雄土知府隴慶侯助逆雲貴總督鄂爾泰檄元生與四川兵協剿賊據險拒元生冒矢石奮攻克之鄂爾泰上其功諭曰哈元生前取狝家苗赫赫有名今烏蒙所效之力實出格外具疏時可一一申明若有副將或參將缺出

當引見題用尋遷雲南尋霑營參將六年三月米貼苗陸氏不法鄂爾泰令元生往剿破險設伏搗其巢陸氏就擒八月赴阿驢界之阿路媽會剿前助陸氏刼糧之四川雷波土司楊明義詔賞銀四千兩遷元江協副將九月兵還阿驢人忽謀圍我軍元生率遊擊卜萬年等督戰兩晝夜賊敗卻我軍奪據赤衣臺鶴麗總兵張耀祖馳往援十月元生由小溜筒江搜斬賊衆阿驢人空寨遁十二月克附逆之拉金者呢等寨鄂爾泰以聞且言元生之初赴阿驢也夷目隨營聽用爲元生鞭責致滋釁請交部議處諭曰野夷之性反覆靡常卽哈元生無鞭責夷目之事伊等亦未必帖然安靜但旣因輕忽致生事端應交部議處朕念不法凶苗悉經擒獲軍務已竣哈元生效力之處亦多功過足以相抵著免其處分其應得議敘之處亦不必議敘七年正月調黎平營副將二月擢安籠鎮總兵八年十月烏蒙賊復叛鄂爾泰調兵三路分剿元生由威寧一路疾趨不數日擊破賊數萬射斃兇目黑寡暮來連躡賊營八十里直抵烏蒙復郡治捷聞上深獎其功賜戴孔雀翎及冠服賞銀萬兩仍交部優敘九年二月擢雲南提督九月諭曰雲南提督哈元生之母年八十有六未遇覃恩得受封典哈元生宣力苗疆懋著勞績伊母身

享大年應加特恩以彰慈孝著照哈元生提督職銜賞給伊祖父母封誥尋調貴州提督十年七月諭曰貴州提督哈元生朕另有簡用之處著馳驛來京陛見並賞給公用銀三千兩製備衣裝十月至京召見特解御衣以賜命軍機處行走並令回籍省親十一月貴州九股苗不法命回黔督剿十一年二年諭曰貴州提督哈元生才幹優長實心任事伊母年逾八旬訓子有素今聞在籍病故深爲憫惻著賜祭一壇以示恩眷貴州提督事務緊要哈元生著在任守制六月奏擒兇苗百餘俘斬甚衆其悔罪投誠者各予安置仍暫駐兵彈壓報聞十二年三月恭進新關苗疆圖志諭曰古州八萬等處新關苗疆周圍共三千里非有圖志無以垂久遠哈元生所奏著交與巡撫元展成遣官詳查再加考訂務令周備十三年古州苗叛擾黃平元生遣兵擊之總督尹繼善奏調湖廣廣西兵會剿詔以元生爲揚威將軍統軍進剿而以湖廣提督董芳爲之副嗣欽差撫定苗疆大臣張照與元生忤倡議分地分兵劃施秉以上爲上游用滇黔兵隸元生施秉以下爲下游用楚粵兵隸芳元生與芳遂欲將村莊道路盡劃上下界文移辦論日久無功元生坐革職拏解來京擬斬乾隆元年諭曰哈元生身爲全省提督乃苗人造逆不

能覺察於機先及賊衆肆行又復稽遲於臨事按律治罪亦復何辭但念伊粗鄙武夫知識短淺尙非有心貽誤軍機且從前征剿烏蒙皆經效力今既革職拏問著從寬免死釋放尋賞副將銜赴西路軍營效力三年正月卒於軍營二月諭曰哈元生人材壯健歷任苗疆頗有勞績後因古州一案獲罪被逮來京朕念其前勞特予寬宥授爲副將前往哈密效力冀其奮勉尙思錄用今伊已病故實屬可惜著加總兵銜令大學士查郎阿寬裕料理將伊柩送回原籍應得卹典該部查例具奏尋賜祭葬如例子尙德初隨父至雲南充伍拔授千總雍正八年從剿烏蒙賚疏奏捷特旨以遊擊題補九年補雲南鶴麗鎮標右營遊擊十三年遷奇兵營參將率兵赴貴州剿古州叛苗乾隆元年經略張廣泗奏言哈尙德奉檄從征屢著勞績苗人聞風畏懼伊係哈元生之子因伊父貽誤封疆身獲重譴阻勉圖功倍加努力詔擢貴州清江協副將二年調定廣協副將三年偕大定協副將馬似龍會剿定番州所屬姑盧等寨逆苗平之尋丁父憂回籍五年服闋赴補諭曰哈尙德熟悉苗疆人亦強幹著以副將職銜前往湖南軍前辦事遇有副將缺出卽以補授六年補湖南辰州副將八年擢湖廣宜昌鎮總兵九年調陝西涼州鎮

尋調雲南臨元鎮十三年閏七月調貴州古州鎮卽命赴金川軍營十一月諭曰哈攀龍冶大雄哈尙德三人年力正強尙屬驍勇可備驅策特發金川軍營令及時自效乃伊等到營並未有克捷建功之處所領兵丁作何布置作何攻取亦未有一摺奏聞可傳旨詢問令伊等明白回奏十四年五月傅恆奏尙德攻克右梁山下巴郎平碉報聞會班師尙德赴古州任十月雲貴總督張允隨疏劾尙德乖張狂悖擾民虐兵奉旨革職交巡撫愛必達查審嗣審得尙德婪贓事擬杖流二十二年正月賞副將銜赴西路軍營效力三月因解送羊隻倒斃過多奉旨革職枷號責令賠補三十一年回籍二十八年卒

馬爾泰

馬爾泰蘇完尼瓜爾佳氏滿洲正黃旗人由拜唐阿授內務府主事洊升郎中雍正六年擢工部額外侍郎七年七月奉旨往江南清查錢糧九月實授左侍郎八年江南邳州等處被水命就近查勘籌款賑濟九年正月以用兵西安諭令馬爾泰協理軍務七月署陝西巡撫十年奏額塞爾津城介在山谷人跡罕至查哈爾垓圖地方乃各隘口總會之所水草頗好請將額塞爾津城駐紮步兵撤回合西

寧大通馬步兵共派二千名於哈爾垓圖詳勘耕種地方令其開墾再扎哈素泰地方水草亦好其原駐西寧之西安綠旗兵一千名滿洲兵二千名請於每年十月帶往該處駐備策應正月仍回西寧下軍機大臣議行十二年以馬爾泰母年踰七十召還京乾隆元年調刑部右侍郎三年正月遷都察院左都御史命在議政處行走二月授正藍旗滿洲都統四月署理陝西總督大學士查郎阿參承辦軍需道員沈青崖等私運侵帑總督劉於義徇庇屬員命馬爾泰赴陝西會訊得實依律問擬有差七月授兩廣總督四年五月奏場竈收買餘鹽任其擁積融化堪虞請寄貯各埠鼓勵商人認銷上嘉其實心任事如所請行八月以冊封安南正副使翰林院侍讀嵩壽修撰陳倓請於廣西太平府之明江改築甌城將寧明州治遷建明江敕馬爾泰詳議以聞尋奏明江雖爲土府舊治乃係偏僻之區寧明爲太平咽喉水陸扼要應請於寧明舊處建造甌城不必遷移明江至明江居五十村寨之中應修築土城以資捍衛從之十二月安南祿平州土官韋福瑄叛攻掠諒山府進逼王京命馬爾泰駐廣西備邊五年正月馬爾泰奏祿平州興兵該國見與講和情形漸就安帖如特爲此事移駐廣西恐兵民以邊疆有警轉生

疑慮請於二三月間以閱兵爲辭前往該處巡防上是之三月馬爾泰奏融懷汛爲黔粵咽喉須安設專營改調大員駐紮請將永寧營參將一員弁兵六百餘名移駐再將提標分防懷遠等處之弁兵六百餘名派駐永寧以歸原額下部議行六月廣西桂林府義寧縣屬桑江苗匪與湖南城步綏寧二縣紅苗勾結滋事又義寧地方狗彘糾衆不法知縣倪國正等往撫被戕馬爾泰與巡撫安圖提督譚行義合疏以聞諭曰義寧去省城不過百里而苗彘猖獗如此平日之漫無約束可知朕思楚粵苗彘共爲犄角必須併力會剿庶可削平苗逆寧謐地方馬爾泰可速赴桂林省城相機調度並將朕旨知照楚省撫提協同辦理復經譚行義奏報應遠府宜山縣白土邱索等村土蠻劫掠逞兇調兵剿捕閏六月上以貴州總督張廣泗熟諳苗情命督剿楚粵逆苗八月馬爾泰奏宜山土蠻經派委右江道李錫秦遊擊楊剛統領漢土官兵三千餘名分路進剿擒首從賊匪羅扶養等九十七名斬馘無算被脅良民全行招撫宜山土蠻平得旨嘉獎尋奏剿辦義寧逆苗派副將許應虎等分三路進兵燬平各寨賊聞風投誠就撫者二十餘寨上所奏多屬粉飾嚴飭之旋奏三路官兵大獲全勝見分兵赴楚會剿諭曰所奏俱

不可信朕惟俟張廣泗之實信耳十二月張廣泗奏埽蕩逆苗軍務告蕝馬爾泰以辦理延緩部議降調上加恩改爲留任六年正月疏稱兩廣鹽課羨餘歲有存積而兩省提鎮等官除親丁俸薪別無所入辦公實難東省前於殘引項下歲給提鎮數百金各鎮尙可藉資提督所轄營伍較多用度紛繁歲應給千金爲賞需至西省提鎮亦應照東省辦理再督臣衙門陋規已積至二萬餘兩請將此項修繕南寧府城垣餘銀生息以助養廉較少之州縣上如所請舊制安南兩貢並進每值貢期先於本年春夏之交咨報督撫遲則移檄詢問二月馬爾泰奏見當該國入貢之年匪日韋福瑄等逞逆弄兵貢道梗塞又新立國王正在擾攘之際修貢容有稍遲請免飭催從之三月奏慶遠府永順土司所轄之白土邱索等村自覃奉恩等恃險肆橫以來久爲土司所棄今若仍歸土司恐撫綏無術日久滋事請將白土邱索並附近之猴峒二十四村割歸宜山縣管轄並添設文武員弁分駐下部議行四月丁母憂八月署兵部侍郎七年四月擢正黃旗漢軍都統九月署川陝總督十二月以郭羅克賊番肆劫疏言該番屢次劫奪必應重加懲創追賠贓物勒獻頭人使之畏威守法見咨商四川提督鄭文煥妥協辦理至噶爾丹

策凌夷使見請進藏熬茶亦應預爲防範上可其奏八年五月奏前安西改設提督所有駐防哈密兵二千名分撥塔勒納沁三堡賽巴什達里雅等處以遊擊都司守備各一員統之查三堡一城係哈密與準夷往來要路又聯接烏克爾各卡請將原撥塔勒納沁兵丁酌留更換卡塘之用餘俱歸併三堡從之是月仍授兩廣總督九年奏言廣西南寧太平鎮安三府逼近交趾沿邊關隘防範未周應令地方官每年冬月查勘一次再由村隘口當年題定封禁交趾驅驢地方貨物叢雜距由隘不遠寧明商販多願從由口出入請仍行開放責地方官慎密稽查至平而水口兩關俱屬河道應設立鐵練橫江攔截每月逢五逢十開放又商民逗遛番地方給限驅回至已娶番婦並有廬墓田業情甘異域者照例安插彼處永不許進口上允之尋調閩浙總督十年四月以年力就衰請回京供職上不許八月患病命御醫馳往診視是月再請解任諭曰覽奏頓增懸念今已差良醫赴閩診視矣卿其善爲調攝尙期速痊以慰朕懷毋以解任爲請也十月奏福建撫標弁兵原係陸汛其分防之羅星壁頭等塘汛均屬水汛且與督標駐紮相近請改歸督標水師營卽將督標之埔頭古岐等塘汛改歸撫標報聞十一年四月疏言

福建陸路副參遊都守各員題調者八十三缺部推者二十五缺通計部推之缺不及十分之三以致本省之人多升本省之缺酌將督撫提各標及福寧漳州二鎮所屬參將遊擊都司守備十七缺改爲部推從之九月召來京授領侍衛內大臣十二年諭曰馬爾泰在外多年諸事取巧未能盡力今年老有疾一切不能勝任且以舊臣自居動止驕慢昨令射箭又託病推諉著革去領侍衛內大臣尋署熱河副都統十三年卒

魏定國

魏定國江西廣昌人父原任禮部侍郎方泰定國康熙四十五年進士五十三年選授湖北應城縣知縣五十八年升直隸冀州知州雍正二年升浙江杭州府知府三年浙江巡撫福敏奏稱定國操守好辦事勤敏詢之合屬官民皆無異論臣所深信不敢隱蔽報聞四年三月超擢河南按察使十月調直隸按察使五年六月諭曰各省所報雨澤俱各調勻惟直隸雨水不時此必因刑獄不得其平之故按察使魏定國操守朕所深悉恐其於案件或有不明之處嗣後凡有關係民命重大案件著布政使張适協同辦理十月大名府知府曾逢聖以虧缺庫帑被劾

上以逢聖任畿輔有年贓款必多命總督藩臬等轉諭所屬被屈受害者許據實控告時吳橋縣生員竇相可控逢聖任吳橋時貪劣各款布政使張适袒護逢聖夾斃相可與定國詐稱監斃六年上察知之命吏部尙書福敏戶部侍郎史貽直往訊諭曰魏定國專司一省刑名乃任張适恣意妄行全不置問及朕面加詰責則將顛倒是非草菅人命數案全推於張适而置身事外若然則直隸之設立臬司者何爲朕之簡用魏定國又何取乎尋福敏等鞫實适定國擬斬諭曰張适係原任大學士張玉書之孫既負朕恩並不念其祖父肆意妄行本應置之重典但朕念張玉書一生謹慎效力多年著將張适從寬免死發回原籍令地方官嚴加管束不許出境生事令其出銀一千兩給竇相可之家魏定國身爲臬司專掌刑名乃將人命重案推卸他人而置己身於局外及朕面加詰問則以未曾許其奏摺爲辭奸險狡獪莫此爲甚朕屢降諭旨凡大小臣工於職分當爲之事推諉觀望者法難寬貸魏定國係州縣微員朕不次加恩擢用臬司伊一味瞻徇並無報效之處而奏對時亦並無感激之心其罪本無可道但張适既已寬免魏定國亦著從寬免死發往黑龍江當差十三年九月命來京引見十二月命署西安按察

使定國以前戍黑龍江時丁父憂未得躬親治喪乾隆元年正月奏請回籍終制上以魏定國服制已滿與在任守制者不同給假四月回籍以盡人子之心再赴西安按察使任二年疏稱孤貧口糧一項請敕下直省督撫嚴飭各州縣遇外來流勾察其聲音詢其住址卽移送本籍收養令各保甲將實在孤苦無依者呈報州縣官除驗補足額外有浮於額數者亦收養院內動支公項散給口糧部議如所請十月實授五年正月升山東布政使閏六月以山東疊遭歲歉民力未紓倉儲亦多未足前經巡撫碩色奏請令外省在山東貿易者聽其納穀捐監俟五年十一月一年限滿停止定國疏稱奉文以來並未報捐一人請展限一年從之六年十月以山東地方被旱成災奏請將從前運往直隸碾米補漕等項應買倉穀三十萬餘石停俟明歲採買上是之七年三月署山東巡撫四月奏請行令直隸等省分別查明恩旨以前到配徒犯放回原籍軍流三年無過請旨釋放上飭其甫護撫篆卽欲以弛刑博寬大之名四月調安徽布政使六月以前署山東巡撫任內奏登萊青三府倉穀過多霉變堪虞請分撥府屬各州縣收管至是得旨允行七月命署山東巡撫包括查定國任內公事有無沈閣並一切關稅有無私弊

尋奏定國寶無營私誤公情弊報聞十年四月升安徽巡撫七月奏言上江所屬鳳潁廬六泗滁等府州盜劫時聞請嚴定功過酌立賞格令廬鳳道爲總緝並選幹練州縣官數員分辦除獲本境盜犯毋庸記功外有獲鄰境盜首一名者記大功一次從盜記功一次積匪搶奪等賊犯兩名記功一次如有玩縱卽行題參至安慶沿江一帶亦照此辦理得旨觀汝所辦尙屬過於賞而薄於罰賞重而罰輕將來反致不賞則不緝盜此不通方之政也十一年二月上以安徽宿州等處多盜定國未必能辦理此事諭兩江總督尹繼善加意緝捕時安徽按察使都隆額奏請酌借社穀修濬陂塘下兩江總督安徽巡撫議奏定國借尹繼善覆奏社穀藉以補助向不移爲別用陂塘應民力自修如概許按畝指借則穀少處旣難徧給充裕處亦滋冒濫陂塘未收利益倉儲先致空虛臣等酌議應令州縣官躬巡境內凡陂塘疏濬寬深增修隄埝勸民廣爲興舉儻遇旱澇或窮民自爲耕作並無業戶資其工本者准借倉穀成熟後免息歸倉上是之五月遷刑部右侍郎八月調吏部右侍郎十三年以年老休致十五年定國子內閣侍讀允迪告病回籍因受賄請託經江西巡撫奏參革職充徒十八年奏請將允迪釋放上加恩准令

回籍侍養二十年卒子涵暉貴州貴東道允迪內閣侍讀淵映河南確山縣知縣

尹繼善

尹繼善滿洲鑲黃旗人大學士尹泰子雍正元年進士改庶吉士散館授編修充日講起居注官五年三月遷侍講尋遷戶部郎中九月命往廣東察審布政使官達按察使方願瑛受賄徇庇案得實卽署按察使六年四月授內閣侍讀學士協理江南河務八月署江蘇巡撫七年二月實授尋署河道總督十二月疏禁收漕上司陋規及官吏浮費每石定爲加費六分半給旗丁半給州縣常平社倉捐穀聽民樂輸不得隨漕勒徵詔如議行八年奏言崇明屹峙重洋爲江南屏障知縣不足彈壓請增設巡道駐之兼轄太倉通州至縣屬沙地遼闊鎮標四營駐城內巡察難周應撥左營駐永興沙地增巡檢一駐牛羊沙移縣城巡檢駐大安沙並撥左營千把總二協同分防其戲臺等沙各設哨船巡緝福山營爲江防門戶應撥蘇鎮沙船四隸之與京口狼山等汛按期會哨又江蘇按察使駐江寧距巡撫治所遠請移駐蘇州蘇松道責在巡防應移駐上海下部議行九年署兩江總督奏請析淮安府屬之山陽縣爲二增知縣縣丞典史各一治廟灣鎮移廟灣司巡

檢駐草偃口鹽城清溝司巡檢駐上岡撥鹽城縣訓導歸新縣析揚州府屬之江都縣爲二增知縣典史各一撥主簿訓導及邵伯驛官二巡司並邵伯驛歸新縣又如阜縣增設主簿一駐掘港場均議行定山陽分縣曰阜寧江都分縣曰甘泉十年正月協辦江寧將軍兼理兩淮鹽政疏言京口爲江淮鎖鑰南北咽喉向設沙船五十六船幫船三十二水兵千四百餘實水師重鎮乃隸將軍標爲水陸路兩營陸路將弁不諳水師船隻水兵又遠駐距鎮江數十里之高資港春秋兩操外將不知兵兵不知伍請於高資港設水師都司千把總一歸江陰水師副將轄操暇教以技藝資防禦江寧爲省會重地襟帶長江居京口狼山上游駐防兵與學習水師向撥將軍標沙船二十水兵三百餘春秋操演但操期止選鎮江千把總四員至江寧分配教習事竣仍回本任無論暫時派撥並無責成難收實效其實鎮江將弁初不能教習水師至今三百餘兵技藝未習且家在鎮江僕僕往來經理旗員素不熟識請撥隙地建營房令挈眷駐紮設水師守備一把總二專司其事歸將軍轄狼山爲長江尾閘大海門戶鎮標三營向設戰船二十二春秋出洋操練江防每月會哨近年來僅駕船數隻兵數名往來江口並不出洋至會哨

更屬空文尤可異者趕繪大船原爲出洋而設近竟高擱沙灘臣飭交署總兵王廷梅整理期復舊觀再京口江寧派佐領協領二員每月巡查江南狼山鎮標右營將弁巡查海汛中左二營亦輪派游巡如此庶長江數千里聲援聯絡奏入上嘉之先是尹繼善疏請清查江蘇積欠錢糧命侍郎彭維新等會同辦理二月合奏自康熙五十一年至雍正四年官侵吏蝕四百七十二萬餘民欠五百三十九萬餘疏入詔侵蝕自首者免罪尹繼善等下部議敍九月奏請改直隸徐州爲府設知府一附郭增置一縣設知縣一改直隸邳州爲屬州並所屬之睢寧宿遷二縣歸徐州府轄改分駐徐州之淮安府同知爲徐州府同知增設通判經歷各一改州同爲縣丞吏目爲典史南北岸州判爲主簿學正爲府教授訓導管縣學巡檢驛丞關官歸縣轄又請分壽州置一縣設知縣典史各一改壽州訓導管縣學又增設定遠縣池河驛巡檢一均議行定徐州附郭縣曰銅山壽州分縣曰鳳臺十二月條奏鹽政巡緝事宜請於儀徵縣之青山頭增一營設守備把總各一兵百巡船四江都縣之馬家橋甘泉縣之邵伯鎮北壩僧道橋各設把總一兵三百揚州府搜鹽廳委佐雜一員同武弁監察新設之三江營同知改爲鹽務道准所

選府佐監掣淮南之泰壩淮北之場關大伊關永豐壩烏沙河湖口及泗州天長壩俱揀員管理淮北壩所場關事歸淮揚道轄督緝事歸淮陽淮徐二道分轄部議從之十一年正月調雲貴廣西總督先是雲南思茅土把總刁興國等滋事前督高其倬擒興國餘黨尙未解六月尹繼善奏元江臨安賊勢猖獗臣調鶴麗鎮總兵楊國華領兵往元江與臨元鎮總兵董芳協剿賊潰匿暗縱我軍遣諜入賊寨舉火奮勇衝入斬賊酋三從賊百餘生擒六十九十一月又奏元臨內地現平定而攸樂思茅餘孽未靖臣調兵剿捕念地方遼闊兵到勢必奔竄酌出東西兩路東路兵分三支一由紅藤管黨憂黨別出慢岔河底一由思茅糯電那列漫蚌等處至茄色裸所及磨胖三達一由孔明山莽通莽瓦及小猛崙等處分布堵剿事竣會合攸樂清理三十六寨西路兵分二支一由關鋪板角一帶一由白馬山圈羅一帶搜剿事竣會剿六囤再分遣土練沿江堵禦以防奔軼令投誠賊酋刁輔國等隨軍效力今已攻破賊柵十五寨招降夷民八十餘寨其遁匿餘黨分路圍剿務在廓清臣惟攸思一帶非元臨內地比非兵不足示威恃兵又無以善後所期恩威並濟操縱得宜庶邊圉永寧疏入諭曰剿撫名雖二事恩威用豈兩端

當撫者不妨明示優容當剿者亦宜顯施斬馘俾其知順則利而逆則害方可期近者悅而遠者來今此目前攻心之師卽寓將來善後之舉是乃仁術非關詐謀寧止綏靖普思將見信孚莽緬也識之十二年三月奏貴州新關苗疆八事一台拱舊營改建於歐家寨一陞台拱營爲鎮移清江鎮總兵駐之置中左右三營設遊擊守備各三千總六把總十二降清江鎮爲協設副將統原設左右二營一移清江同知駐台拱增鎮遠府理苗通判駐清江裁天柱縣縣丞增施秉縣主簿駐台拱一歐家寨河可達下秉宜疏濬以通台拱糧運一台拱增兵擇各鎮協營精練撥補一各寨荒田諭復業一清查九股苗寨界址擇舊苗目之良善者按寨大小酌定鄉約保長甲長管束稽查一古州清江界之朗峒地方分設塘汛令文武官弁巡行化諭部議從之七月奏雲南濬土黃河工竣起土黃經西隆西林土富州土田州過剝隘至百色袤七百四十餘里得旨嘉獎十二月奏貴州台拱改鎮增兵請令本標右營遊擊帶兵五百駐下秉撥把總一兵八十分防施秉外委一兵二十分防新城原防施秉之黃施營兵改防黃平州改黃施營爲黃平營仍隸台拱鎮撥黃平營外委一兵三十分防巖門原防巖門之平越營兵撤回再撥鎮

標守備把總各一兵二百駐防稿貢汛從之是月詔廣西省仍歸廣東總督轄十三年閏四月奏請於安籠鎮增兵三百定廣協增百四十思南營增設遊擊一兵百五十守備改爲中軍守備歸銅仁協轄石阡營增兵百遵義黔西二協各裁都司守備左營改爲中軍都司右營改爲守備留遵義協右營千總一兵百駐防桐梓縣原防之把總撤回又請撤黔西協原防安平汛兵另撥千總一兵百二十駐沙土調安順營分防瀾陽汛千總一兵八十移駐安平瀾陽汛改歸長寨營調安順營分防石頭寨把總一兵五十移駐平遠協之白老虎汛石頭寨撥歸化營千總一兵五十防守又安順營之犁兒哨於提標城守後營內撥兵防守均議行七月奏貴州頑苗聚衆倡亂臣檄調雲南兵四千餘並湖廣廣西兵策應嗣雲南副將紀龍剿破清平賊穴參將哈尙德收復新舊黃平二城與紀龍合兵至重安渡江副將周儀參將崔傑都司陳思儀等收復餘慶縣獲賊酋羅萬象等廣西總兵王無黨帥兵二千五百與古州總兵韓勳援剿八寨高州總兵譚行義帥兵四千九百協剿鎮遠一路臣又委王無黨帥廣西兵八百並前調至之湖南兵三千至鎮遠總統襄陽總兵焦林帥兵二千已起程大兵雲集分路會剿破逆巢數十斬

首千餘生擒賊酋阿九清等黃平餘慶平越現俱平定鎮遠施秉偏橋都勻黎平俱無失疏入命停派往駐常德之熱河保定浙江湖廣兵乾隆元年設貴州總督以尹繼善爲雲南總督二年閏九月奏豁雲南軍丁銀萬二千二百有奇允之是月來京陛見以父尹泰年老乞留京命爲刑部尙書兼管兵部事議政處行走十二月充經筵講官三年丁父憂四年正月疏言臣兄尹立善素不安分臣父尹泰奏請發黑龍江今五年洗心改過乞恩赦回令於錦州看守臣祖父墳墓許之五月晉太子少保教習庶吉士七月充繙譯鄉試正考官八月充三禮綱目兩館副總裁五年授川陝總督時松潘鎮總兵潘紹周以郭羅克番滋事疏請剿之敕與總督提督會商尹繼善檄諭番目擒獻夾壩番衆畏服六年奏善後四事一分設土目擇上中郭羅克副土目給外委土百戶委牌分管各寨再拔副土目數名協理一頒給打牲號片按番寨大小酌給號片出口人給一紙無者擒治一寬從前積案番人所劫牲畜年遠根究爲難夾壩既經痛懲均免追問一撤駐防兵前督查耶阿奏准每年撥兵二百駐防番地千餘里兵力不足控制恐日久玩生應撤回以省遣戍諭曰所辦甚妥仍因時制宜爲之先是御史李愬奏參甘肅有司諱

災不報命愆與尹繼善會勘得實尹繼善因請將巡撫元展成等分別治罪併自請議處尋部議銷加一級七年丁母憂八年二月署兩江總督協理河務命馳驛赴任賜以詩曰淮沛今何似災餘不忍言邇來闕二黼誰與辦三殮敢靳司農帑還祈大造恩當春應舉趾積潦尙留痕民瘼遐觀在心憂夢想存勉伊經畫策爲我活黎元五月疏言臣欽奉恩命同任河防夙夜靡寧寢食幾廢伏以久離江南情形各異詳勘博考體察民情咸以舊制宜循萬口如一凡三事一毛城鋪宜仍舊也黃河至徐州北係山嘴南偪郡城以千支萬派之水納之數十丈之中下流不暢則上游必壅前河臣靳輔於上游南岸毛城鋪立減水壩下疏引河以洩盛漲北岸自李道華家樓至蘇家山不設隄工聽其漫入微山湖由荆山口入運少殺其洶湧之勢近則因毛城鋪進水過多圈隄築壩層層阻閉致南岸日高黃溜側注北岸石林一帶處處受險經欽差大臣議於壩口水底用亂石填高臣按此處洩水之路止有倒勾三河其餘支港俱已淤平若再填高壩口水底是有遵照舊制之名仍與舊制不同有隨時啟閉之名實與緊閉無異不惟北岸無隄處受全黃之水其勢堪虞而上游山東之滕嶧金魚等縣下游徐沛一帶城社更爲可

慮請仍舊制相機啟閉開通倒勾河使之順直壩堰有礙宣洩者量爲撤平兩岸分流減洩勢緩水平北岸之險工可保沿河上下永享成平且減下之水歸入洪澤湖濁沙停淤黃澄爲清更可助清敵黃轉害爲利一天然壩宜仍舊也淮水挾七十二河之水匯入洪澤湖僅恃高堰一線孤隄爲淮陽保障夏秋黃淮交漲拍岸盈隄勢難容受前河臣靳輔建三滾水壩又設天然南北二壩酌量啟閉以洩異漲思慮至爲深遠新議以洪澤湖之水宜蓄而不宜洩欲將天然壩改建滾水石壩臣思河南疏濬賈魯河以後淮水勢大伏秋盛漲若不將天然壩開放則尾閘不暢必病中滿且舊天然土壩相水勢大小酌量蓄洩操縱在人改建石壩則一定不易無可增減當蓄而不能蓄當洩而不能洩利未見而害隨之矣請將天然壩仍照舊制其估建滾壩及南北石工無庸建築不惟節省數十萬帑金且洪澤湖異漲之水有所宣洩高堰全隄可以保固一高郵三壩宜仍舊也高保諸湖周圍數百里上受天長七十餘河及洪澤湖減下之水匯入運河其勢甚盛是以於高郵迤下設立南關五里車邏昭關各壩分注下歸海遇水漲次第開洩制最精詳新議以南關等壩開放下河必致難受議永閉高郵三壩另建石閘七座抽

板開放臣按從前各壩寬一百九十餘丈今議建石閘合計八丈四尺較舊制寬狹懸殊況高郵等壩原與天然滾壩上下相應天然等壩寬至三百餘丈上游來水甚多勢必仍然壅積雖與邵伯迤南疏濬入江之路亦是減水之意但其地距江甚遠江湖朝夕往來與水相抵洩出無多而迤上高寶一帶爲諸湖頂衝之區首當其險設遇水勢驟漲自必直趨附近就下之捷徑豈能紆迴流遠以入江但宣洩不及深爲可慮況高寶不能容納勢必仍掘壩以注下河洶湧驟至較之循序漸至者受患更猛請將高郵三壩仍照舊制所議石閘七座無庸增建至下游宣洩再行詳勘疏濬深通近水民田修築隄堰有餘之水導之入海可免瀰漫臣悉心籌酌至再至三不敢少存成見好爲更張不敢狃於前議草率從事總期合舊制而順水性孚公論以洽輿情得旨應斟酌者須因時制宜九年尙書公訥親查閱江南營伍劾蘇松水師廢弛總督統轄全省咎實難辭下部議降三級准抵是年江南生蠲延及山東河南上以江南有司捕治不力貽害鄰封尹繼善等徇隱不參下部議銷紀錄十二次十年實授兩江總督十二年三月疏言阜寧高保等處修築圩岸臣相其緩急分年修治高寬丈尺俱爲酌定修治之法務於圩外

取土挑濬成溝圩身量留涵洞使蓄洩有資旱澇足備無力者量借帑項再上江鳳潁泗三屬頻遭水患現在河渠次第開濬而田間水道圩塍實與水利相爲表裏亦照例陸續興修俟有成效遠近推行於水利善後之圖似多裨益諭曰此誠務本之圖妥協實力爲之五月疏劾狼山鎮總兵黃錫申廢弛營伍詔革職十三年正月陛見將回任賜詩曰熙績匪獨能亮工資羣彥詞林擅卓犖封疆推老練簡畀淮海區奏成佇底奠保障財賦地繭絲非所羨去歲吳淞災波臣勢方扇每念幸活民玉食不能嚙賑濟救燃眉其何籌久宴安民首察吏輝惡亦彰善設誠物乃孚逞明終必眩閏七月以徇庇南河總督周學健部議革職命從寬留任九月調兩廣總督十月授戶部尙書協辦大學士充國史館總裁十一月軍機處行走兼正藍旗滿洲都統命署川陝總督嗣設四川總督以尹繼善爲陝甘總督時大學士傅恆經略金川大兵出陝西上以尹繼善於一切安臺站馬匹事宜星速趕辦調度得宜詔加恩開復從前革職留任處分十四年正月詔尹繼善與內大臣傅爾丹尙書達勒黨阿舒赫德參贊軍務二月晉太子太保十五年二月疏請修文武成康周公太公陵墓享殿下部知之十一月西藏羅卜藏扎什不靖四川

總督策楞統兵入藏敕尹繼善管川陝總督事十六年復調兩江總督十七年四月尹繼善以上江頻被水疏請濬宿州之睢河彭家溝泗州之謝家溝虹縣之汴河上游又修築宿州符離橋靈璧縣新馬橋砂礮河尾黃幢橋翟家橋詔如所請行是月湖北羅田奸民馬朝柱聚衆於天堂寨圖不軌界連江南尹繼善檄壽春鎮總兵牧光宗統兵搜捕並親往擒獲朝柱家屬黨羽甚衆疏聞得旨嘉獎下部議敕十月召來京十八年正月署陝甘總督二月以前兩江任內承審江西千總盧魯生等傳鈔僞稿一案不能究出實情部議革職命從寬留任八月又以徇縱南河劣員虧帑誤工議革任命寬免仍註冊九年授江南河道總督先是哈密蔡伯什湖屯田萬畝於雍正十三年屯兵承種乾隆七年改回民承種嗣貝子玉素富以收成歉薄請罷事下尹繼善及安西提督王進泰議至是尹繼善奏言從前開渠引水幾費經營近日歉收實由回民不諳耕作所致即使水澤偶有不敷亦斷無舉萬畝屯田概行廢棄之理伏思開墾此田原爲接濟兵食請選安西兵丁子弟或招各衛戶民承種旣於兵食有益且有此壯丁二百餘依安西屯戶團練之法又可寓兵於農協同防守臣已調任南河謹就所見陳之上謹其言十九年

二月疏言黃河之水挾沙而行停滯積久成灘灘之所在則水射對岸而隄工受險聖祖仁皇帝諭於曲處挑直使得暢流誠萬世治河之良法臣案銅沛邳睢宿虹河道多曲折大灘日淤日積急宜截去灘嘴開濬引河導溜歸中央借水刷沙既省兩岸隄埽費並免偏溜偏趨奔突衝激之患其土隄不甚險要者每年加高五寸險要者及時修理庶河防穩固而青黃不接時亦可寓賑於工詔如議行八月署兩江總督十二月兼署江蘇巡撫二十年正月上以尹繼善前任兩江總督有沽名邀譽之習諭誡之四月奏言臣長子戶部員外郎慶雲性情暴戾請革職發往錦州看守墳墓詔如所請並諭曰尹繼善自行覺察據實直陳無所徇隱著加恩令於諸子中擇可承廢者以聞尋請以第四子慶桂承廢許之十二月奏請於江西湖南湖北三省各撥米十萬石運江蘇備來春平糶上報可二十一年二月疏言洪澤湖有入海入江二路入海之路甚遠興鹽一帶形如釜底海灘高於內地潮大時內外相抵不能暢流入海惟入江之路宣洩盛漲最便然淺阻處多如東西灣兩壩減下之水由石羊溝入江河身僅寬三四丈又有兩岸灘嘴阻抑應開金灣六閘並金灣滾壩減下之水由芒稻閘達董家溝入江引河淺阻應疏

又璧虎鳳凰二橋減下之水由廖家溝入江河口淺阻灣曲應加寬芒稻迤上石羊溝並廖家溝董家溝歸江水道阻塞應濬又興鹽等邑之天妃閘青龍閘及白駒南閘爲下河衆水匯聚磯心閘牆之損壞者應修允之三月奉旨覆審浙江按察使富勒渾劾巡撫鄂樂舜勒派商銀案所劾實仍坐富勒渾以誣告加等罪上責尹繼善所擬悖謬詔革職留任十月實授兩江總督命紫禁城內騎馬二十二年正月解南河總督事務二月上旬南巡賜詩曰幕府山邊開幕府風規得似茂宏無保釐務布兆民福清蹕寧求一己娛靜柝久曾經數省建牙今復鎮全吳吏民相習休云易勗爾思艱莫漫圖初丁憂江蘇巡撫莊有恭奏捐職州同朱昉主使斃命律應絞罰贖外結命尹繼善同新任巡撫愛必達查審四月奏有恭罪在專擅贓非入己詔免有恭死發往軍臺效力諭曰莊有恭辦理朱昉贖罪外結一案尹繼善既經莊有恭告知卽應據實參奏否則正言阻止莊有恭自不敢視爲泛常致干重辟及奉到朕旨尹繼善亦當備述前情速爲辦理乃遲回觀望希圖模稜了事經朕屢行飭催並將莊有恭革職拏問始稱原曾與聞是縱莊有恭之情罪而釀成其事始終皆由於尹繼善也尹繼善交部嚴加議處尋議革任命寬免

仍註冊七月疏言沛縣地勢本低昭陽微山諸湖環之山東濟泗汶滕山水奔注
滙歸來源多而去路少不能驟消臣按湖水去路自荆山橋外尙有湖口閘與韓
莊閘相近爲洩水尾閘僅丈餘不足宣洩臣商之山東撫河諸臣或建滾壩或建
閘座使湖水暢流入運又山東沂河自北而南入駱馬湖近因水大於邳州之盧
口散漫入運與荆山橋洩下之水相阻皆爲沛縣受病之由臣飭員相度堵修上
以所言中形勢俾通盤勘辦十二月同侍郎夢麟等會奏准揚徐海支幹各河暨
高寶各河工竣下部議敘二十三年疏奏壽春鎮總兵納漢泰不勝任詔獎所奏
得大臣體二十五年上以江蘇錢穀殷繁令增設布政司分理敕下督撫酌議尹
繼善等奏請分江寧淮安揚州徐州通州海州爲一布政使駐江寧蘇州松江常
州鎮江太倉爲一布政使駐蘇州安徽布政使移駐安慶從之二十七年上南巡
賜詩曰保障資三省忠勤著兩朝節樓無過久幕府獨稱超善得軍民服兼能上
下調暇還工作誦吉甫可同條尋命爲御前大臣二十九年晉文華殿大學士仍
留總督任三十年二月上南巡賜詩曰綸扉昨已命和羹江國仍資扈蹕行明代
稱賢必王右漢家推盛則韋平封疆幾處皆時望旌節卅年獨老成亦識心殷依

北闕待宣入閣贊樞衡四月時尹繼善年七十恩賞韋平介祉匾九月召來京入閣辦事兼管兵部事務充國史館總裁十月充尙書房總師傅教習庶吉士三十一年充會試正考官三十二年充經筵講官三十四年兼翰林院掌院學士三十六年正月上東巡命留京辦事四月卒遺疏入諭曰大學士尹繼善學識優通老成端謹歷封疆者三十餘載綏輯協宜泊入贊綸扉兼直禁近恪勤奉職倚畀方殷今春東巡啟蹕前見其精力就衰時樓微疾因令留京安攝冀得速痊每於奏章郵便詢悉病勢漸增特派御醫診視諭其服藥調理以起沈疴並令在家靜養不必力疾趨覲回鑾後時遣侍衛存問知其日漸委頓屢念有加今聞溘逝深爲軫悼著加贈太保入祀賢良祠賞給內帑銀五千兩辦理喪務並派皇八子前往奠醑應得卹典仍著該部察例具奏尋賜祭葬諡文端四十四年御製懷舊詩列五督臣中詩曰八旗讀書人假借詞林授然以染漢習率多忘世舊問以弓馬事曰我讀書秀及至問文章曰我旗人胄兩歧失進退故鮮大成就自開國至今任事奏績茂若輩一二耳其餘率貿貿繼善爲巨擘亦賴訓迪誘八年至總督異數誰能邁政事旣明練性情復溫厚所至皆妥帖自是福量輟前詩略如白唱和亦

頗富獨愛馳驛喻知寓意不留子慶桂現官兵部尙書慶霖現官青州副都統

陳大受子輝祖

陳大受湖南祁陽人雍正十一年進士改庶吉士散館授編修乾隆二年大考一等第一名超遷侍讀充日講起居注官累遷左庶子侍讀學士晉少詹事三年二月遷內閣學士充浙江鄉試正考官四年三月擢吏部右侍郎七月充經筵講官十月充三禮館副總裁尋授安徽巡撫五年六月疏言廬鳳穎等府素稱盜藪地方官多避參諱匿或事主隱忍不報致蠹役表裏爲奸臣抵任後分別案情輕重勒限嚴緝現據報獲盜五十名上以其到任未久諭嘉之又奏今歲二麥豐收但積歉後蓋藏尤要查晒麪造酒消耗最甚一商囤積卽以數千石計臣通飭嚴禁鳳穎泗等屬地接豫東二省并知會一體究懲報聞十月疏言高阜斜陂稻穀雜糧均不宜種前督臣郝玉麟於福建攜來早稻一種名畚粟性宜燥無須浸灌臣於春間教民試種現各收成聞此稻產自安溪臣遣購數十石分給各屬樹藝化無用之田爲有用數年後種多利廣可漸及他省得旨如此諸凡留心甚慰朕懷六年六月調署江蘇巡撫九月實授疏言收漕舊例各屬造斛送糧道衙門與部

頒鐵斛較準印烙發還乃吏胥巧於作奸有溼板成造領回後用火炙者有用豆裝撐使寬者前經糧道請採乾木依式另造限各屬領回臣思造斛數百未必升合無差赴領者又或賄通書吏給以寬斛因飭該道將新斛逐較於詳報開倉日提道署樣斛數張委員賁往抽驗違者分別參處得旨嘉獎七年疏言句容縣地處高原舊建閘蓄水民享其利後閘廢腴產化爲石田又西門外舊有塘灌田久淤淺請借帑興修報聞八年疏言臣前在安徽冬月令民搜掘蝻子每斗給銀二錢蓋蝗蝻生子必在高亢地尾栽土中深不及寸留孔如蜂窩一蝗生十餘粒粒有子百餘冬遇積雪則難出土今冬雪頗稀臣飭諭搜掘仍給銀示勸貧民無不踴躍樂趨諭曰此舉甚善著傳諭直隸總督高斌照所奏辦理先是丹陽運口藉潮水灌輸淤沙每需疏濬至是大受奏定六年大修每年小修上於壬午年南巡御製反李白丁都護歌有豈無疏濬方天工在人補輪年大小修來往通商賈之句嘉其奏定歲修轉漕便利也十年疏言常州俗好設靜堂拜佛自立名教江寧松江太倉亦有之查拜佛立教形涉異端目下雖無爲匪不可不防其漸請佛像移入廟宇堂內人田屋產酌量安置諭曰此等若欲爲之則須實力而不可欲速

不然則所謂好事不如無也時奉旨普蠲明年天下錢糧大受疏陳江蘇蠲糧三事一核準漕項科則曉諭周知一彙造地丁耗羨同漕項并完一酌定業戶減租分數通飭遵行諭獎所議尙屬留心十一年調福建巡撫十二年二月疏言近海商民例准往暹羅造船販米但內渡時若有船無米者應倍稅示罰大學士等議行三月又言向來巡臺御史出巡南北二路派臺鳳諸彰四縣輪備夫車廚傳犒賞之用又濫准詞訟額設胥役外有奸民挂名恃符生事等弊奏入敕自乾隆五年起巡臺御史俱交部嚴議十月授兵部尙書十一月疏言臺屬向惟鳳山倉粟許番民春借秋還免息餘並無接濟之項番民生業艱難向漢民重息稱貸難償孀女田產每被盤折請撥臺穀二萬石分貯諸彰淡水等屬照鳳山例接濟其不願借者聽上報可十三年三月充會試正考官四月調吏部尙書協辦大學士軍機處行走六月充經筵講官十四年二月晉太子太傅七月署直隸總督十五年授兩廣總督四月命協理粵關稅務七月奏調任雲貴總督碩色雲南巡撫岳濬前在粵東互相牴牾雲貴極邊重任恐不能和衷妥辦請皇上於奏事之便切加訓飭上踐其言十六年三月請裁廣東肇高學政部議從之九月疏言海陽海康

遂溪等縣之隄遇風雨坍塌卽應搶修刻不容緩若必待詳估動帑坍塌卸漸甚不若令民隨時自修遇重工另奏官辦報聞是月以病乞解任上慰留之未幾卒遺疏入諭曰兩廣總督陳大受才品優長精明勤慎敷歷中外倚任方殷前因患病奏明暫交督篆隨經降旨令其在署加意調理以冀速痊忽聞溘逝朕心深爲軫惻著入祀賢良祠以獎賢勞應得卹典仍著察例具奏賜祭葬諡文肅子輝祖由廕生於乾隆二十年授戶部員外郎遷郎中二十四年授河南陳州府知府累遷直隸天津道三十一年擢安徽按察使三十三年遷布政使三十四年調江寧尋擢廣西巡撫三十六年調湖北四十四年正月復調河南十二月授河東河道總督四十五年調江南河道總督四十六年授浙閩總督兼管浙江巡撫四十七年正月輝祖弟嚴祖與安徽巡撫閔鶚元弟鵬元均於甘肅捏災冒賑案獲罪諭曰甘省自王直望爲藩司與蔣全迪通同一氣侵帑婪贓種種不法而陳輝祖閔鶚元之胞弟卽係案內人犯其平日家信往來必有確切音問屢經降旨詢問乃始終掩飾支吾不肯奏出實情及嚴切究問始各奏稱伊弟婪贓舞弊從前亦有所聞并有家信往來祇因一經陳奏恐伊弟必罹重罪是以隱忍瞻徇致涉欺飾是

伊二人之知而不舉俱已自行供認如出一口似屬實情陳輝祖等若於此事未經敗露之先早爲陳奏朕必嘉其公正伊等既甘心隱忍於前及降旨詢問又隱躍其詞於後此時卽將二人革職交刑部治罪伊等亦無可置喙惟是將來爰書既定朕斷不肯因其弟株連遽置重典且此案內外大臣皆知而不舉又何獨歸罪於陳輝祖閱鶚元現在督撫一時乏員陳輝祖等尙屬能事著加恩免其治罪降爲三品頂戴各留本任所有應得職俸養廉永行停止陳輝祖等務各反躬自愧洗心滌慮潔己奉公庶幾可以稍贖前愆如或因停其廉俸借詞需索致有簠簋不飭之事王亶望是其前車朕必加倍重治其罪不能再爲曲貸也九月因浙江查王亶望任所貲財以銀易金隱匿玉器等事發諭曰陳輝祖身爲總督卽無抽換入己之事而於屬員通通抵匿置若罔聞其庸懦無能卽與勒爾謹無異豈可復膺封疆之任陳輝祖著革職拏問十二月大學士阿桂等審明輝祖商同屬員隱匿抽換擬斬決諭曰此案發覺之始朕以事屬瑣細本不欲辦因盛柱有底册不符之奏或經手之員從中弊混而陳輝祖受其欺蔽亦未可知然實不疑及陳輝祖身爲狗偷之事也今爰書已定前疑頓釋在陳輝祖以陳大受之子受朕

厚恩用爲總督昧良喪心固屬罪無可道但細核所犯情節與王亶望之捏災冒賑侵帑殃民究有不同卽較國泰之以代父贖罪爲名公然勒派屬員致通省虧空者亦尙有間傳所云與其有聚斂之臣寧有盜臣陳輝祖祇一盜臣耳著從寬改爲應斬監候秋後處決四十八年二月賜自盡諭曰陳輝祖抽換王亶望入官財物一案前經大學士等定擬應斬請旨卽行正法朕從寬改爲監候昨據福崧奏桐鄉縣聚衆鬧漕並稱上年該縣卽有聚衆之事案犯僅擬枷杖知縣另行參革故奸民罔知懲創復蹈故轍又據富勒渾奏訪查浙閩兩省各州縣虧空倉穀又黃仕簡等奏查拏臺灣械鬪匪犯現已獲二百餘人陳輝祖在總督任內於不肖官吏浮收漕糧及刁民鬧漕之案撫拾別故希圖避重就輕將就完事致刁民益無忌憚至於閩浙二省各州縣倉庫虧缺武備廢弛俱漠不關心竟似置身局外一味牟利營私隱匿回護貽誤地方種種情弊不可枚舉實與勒爾謹王亶望情罪無異不止侵隱入官財物尙可量爲末減朕不能再爲曲貸矣陳輝祖本應卽行正法但念其辦理海塘尙無貽誤著加恩免其肆市卽派福長安穆精阿前往將此旨明白宣諭監視賜令自盡以爲封疆大臣廢弛地方者戒五十二年諭

曰湖北近年以來吏治闐茸地方大吏於鹽務匣費任意染指濫觴已極福建吏治亦復廢弛營伍毫無整頓以致海洋盜劫頻聞釀成林爽文等滋事巨案朕詢訪輿論僉以爲湖北之積弊起於陳輝祖福建則起於楊景素伊二人受朕厚恩用至總督乃不思潔已奉公實心任事致通省官吏貪黷懈弛相習成風日甚一日現經朕力爲整頓其歷任督撫如舒常李封已經革職特成額富勒渾雅德俱先後拏交刑部治罪而該二省吏治之壞實作俑於陳輝祖楊景素二人使其身尙在必當與特成額等一體治罪今伊二人俱已物故而其在任貪索所得貲財伊子等又得捐官以爲進身之階此等昧良負恩之人豈可任其子名登仕版若不從嚴示懲何以警貪頑而飭綱紀所有陳輝祖之子陳山岷楊景素之子楊炤俱係捐納主事均著革職發往伊犁效力贖罪其餘子如有職銜者俱查明斥革一概不許出仕以爲大臣貽誤地方者戒

陳宏謀

陳宏謀廣西臨桂人雍正元年進士改庶吉士散館授檢討四年揀授吏部郎中七年二月遷浙江道御史仍兼郎中行走七月充山西鄉試副考官十月授江南

揚州府知府仍帶御史銜九年遷江南驛鹽道十一年擢雲南布政使先是廣西巡撫金鉷奏准廢員官生借墾報捐至是宏謀奏報捐者祇就各屬搜有餘熟田量給工本卽作新墾多弊混上命雲貴廣西總督尹繼善查奏尹繼善請將捐墾地畝冒領工本確實查追乾隆元年四月部議報捐之員旣多冒濫請敕兩廣總督鄂彌達及金鉷逐一清查九月宏謀劾鉷欺公累民自開捐報墾不下二十餘萬畝實未墾成一畝請將捏報捐納及勒比首報之田豁除時鉷內遷刑部侍郎疏辯命鄂彌達及新任巡撫楊超曾秉公確查二年閏九月宏謀復密奏前事諭曰從前陳宏謀奏廣西借墾報捐一事與金鉷所奏互異朕已諭令督臣鄂彌達撫臣楊超曾秉公確查毋得徇徇日今尙未覆奏而陳宏謀又復具摺曉曉瀆陳陳宏謀身爲滇省藩司此並非伊任內之事其始初之奏猶云據已知而直陳以備採擇旣降旨交與他人查議則伊事已畢惟有靜候無再言之理乃伊不待督撫諸臣議覆而又爲是瀆奏竟儼然似以爲不如伊所奏不止者是誠何心且伊爲粵人卽所言盡是而從之猶啟鄉紳挾制朝政之漸況未必盡是乎殊屬冒昧之至著交部嚴加議處尋議降二級調用十月鄂彌達等覆奏捐墾田畝多不實

請分別減豁金鉉及私派加徵各員降革如律三年補直隸天津道五年遷江蘇按察使六年七月遷江寧布政使八月擢甘肅巡撫九月調江西十二月疏言江西郡縣非濱江帶湖卽環山逼嶺近湖地與水平民築圩隄閘壩捍禦以內民田廬舍煙火萬家遇水發全賴圩隄閘壩周固始保無虞此以圩隄閘壩防水害者也近山之地高下崎零開墾田地旣防衝決又苦灌溉無資惟修砌陂塘堰圳水至可資防禦水少可資灌溉此又以陂塘堰圳防水害而卽以資水利者也江西水利不外此二者而年歲豐歉卽係乎此向例農隙時撫臣行令地方官將舊築圩隄派夫修葺年底將完固緣由造冊報部存案止就南昌瑞州臨江饒州南康九江贛州等府所屬十餘縣每年報部有案者彙冊開報而近山逼嶺地方一切陂塘堰圳均不在開報勘修之列卽此數府中除所報圩隄外尙有續修未修之圩隄閘壩地方官向無承修保固之責並不親勘督修其間民力勤惰出夫多寡圩隄堅否官旣不親查督田戶每推諉不前不但應修而未修者遲延觀望卽已經派修者亦不過虛浮掩飾隨修隨傾一處衝決闔境罹害是修築雖出於民督率不可無官臣思知縣身膺民社水利農田本其專責應飭親勘督修至向無圩

隄等項及曾有而年久坍塌過甚如工大民力不敷者惟支存公銀兩照以工代賑之例確估造報責附近居民修築核實題銷各該員三年之內果實力督修並無衝決等事遇保舉陞用將承辦水利如何列入事實獎薦以示鼓勵如修築不堅至有衝決題參議處下部議行七年五月疏言江西錢價甚昂民間多攬私鑄砂錢臣現飭屬嚴禁七月請將滇省額解京銅於過九江時截留五十五萬五千斤濟鼓鑄急需仍陸續赴滇採買解京補項詔如所請行十二月奏修南昌新建二縣圩隄並於南昌縣羅絲港建石壩障贛水西注卽以工代賑上報可又言江西民情尙氣好訟有司以自理之案無關考成未免延擱拖累臣檄各道分巡所屬據實稟聞州縣官漸知警惕地方情形屬員聲名亦得藉悉梗概得旨實力督率毋使徒爲具文八年閏四月奏言錢局舊設爐六儘所鑄搭放兵餉恐錢少不敷請增設爐四從之初宏謀因倉貯多缺請將捐監一項改於本省收穀諭令一年後奏報至是偕總督尹繼善奏本地捐監收穀倉儲民食兩有裨益得旨准再收一年九年二月疏言廣信府玉山縣之廣平山產礦砂臣令工匠開硎煎試銀鉛夾雜山之前後左右並無妨礙請選殷實良民爲硎頭募夫開採下部議行十

月調陝西巡撫十一年九月仍調回江西任十月調湖北巡撫十二年二月疏言湖北改鑄小制錢重八分試行無效請照原題仍鑄一錢二分重之大制錢於漢口採買客銅四十萬斤加爐增鑄搭放兵餉外可減價出易流通下部議行三月以大學士管川陝總督慶復劾宏謀在陝撫任內愛憎任情好自作聰明不持政體部議革職詔從寬留任又以前經保薦之長安縣知縣董三錫貪劣事發議革任仍詔免十二月復調陝西巡撫十三年正月諭曰此汝駕輕就熟之地一切持重秉公毋立異毋沽名若能去此結習則汝尙可造就之器也先是宏謀以陝西各驛疲困請增夫馬經大學士公訥親議駁十一月復請於漢中府屬之寧羌沔縣褒城鳳縣棧道十四驛每站增馬一夫十酌支工料詔如所請又言陝省開十爐鼓鑄已准部撥運到洋銅其所需黑鉛本省開採白鉛點錫赴楚採辦至配用銅斤鉛錫照例扣耗每卯餘賸挫磨枝梗尾卯一併繳錢歸款設監鑄官一員總理官一員內外巡查官二員並輪撥弁兵防範又從前所鑄錢俱搭放兵餉今兵餉已有川省增鑄之錢協濟不必搭放現在陝省錢少價昂俟鑄有成數照市價酌減出售易銀歸款部議從之十四年疏請採辦滇銅免致停爐守候錢價可漸

平又制錢陸續易銀恐價平則買錢者少其川省運回秋季協濟之錢出易外餘
卽搭放兵餉報聞十五年請修周文武成康四王及周公太公陵墓卽以陵外餘
地召租支用下部知之十六年四月疏言陝省各屬常平倉多空厥請擇完整者
酌留數間備曬晾并貯捐監穀地方官入冊交代不時修葺其遠年舊厥漸就傾
圯者物料及早拆卸據實冊報有應分新社卽移建社倉似亦化無用爲有用之
法得旨允行六月又言關中沃野千里平原土厚雖有河道岸高難引惟鑿井灌
田實爲救旱良法臣諭屬員勸導凡以己資開井者地方官驗明獎勵無力者就
近借給社穀作工本收息還倉無社穀者以常平倉穀給之報聞十月調河南巡
撫十一月疏言豫省黃河兩岸大隄外有古隄一道自懷慶府屬之武陟縣起由
獲嘉新鄉延津而至滑縣與長垣縣交界止土人名爲太行隄遇河漲實爲外衛
年久多缺今陽武壩工合龍太行隄急宜修補查武陟延津等處俱本年被災工
作於貧民有益十七年正月又言歸德府屬各河宜分別修濬除支流小溝工段
無多督令民修其商邱豐樂河夏邑響河永城巴溝河均洩水之幹河現多淺塞
應濬又商邱南門外之古宋河亦應濬並於附近城壕各開引河一道但非民力

所勝請動項興修再武陽壩工所用料因應付殷繁不無浮於購採銀數前蒙恩旨令照地畝錢糧酌蠲第小戶地畝少者原未領辦若按畝蠲則未辦工料之戶濫邀恩賞請就所領工料價銀按數加賞較爲均普並如所奏行三月調福建巡撫十九年正月疏言閩俗囂競多訟案必速審臣清查立限每月稽核一次以已未完案件之多寡者驗各屬之勤惰庶塵案漸清上可其奏閏四月又言閩省地狹民稠所產不敷食用半借海船貿易資生如實係內地良民因貨物拖欠稽留在外及本身已故妻妾子女願歸本籍者無論年歲遠近准其回籍從之五月調陝西巡撫九月疏言明歲大兵進剿準噶爾派出之索倫巴爾虎哲哩穆兵應設臺站營馬不敷抽撥酌雇民間騾馬車輛以利遄行詔允所請又言陝省常平倉穀缺額節經動用庫貯雜項買補還倉第採買不宜過多恐於民食有礙今穀麥旣多價賤准售官買照市價聽從民便此正昔人和糶之法可以濟民食而廣積貯上嘉納之十一月疏言鼓鑄必預籌銅斤滇黔路遠費重且恐無餘銅洋銅到陝遲早難期不若就本省漢中府屬寧羌州之銅緣溝舊銅礦開採並華陰縣屬之華陰川亦有原礦一并採試以供搭配鼓鑄上報可二十年正月疏言古北口

解到戰馬疲瘦先就西安將軍標及督撫兩標預備安臺之馬擇最臙壯者解甘又協理總督劉統勳以甘省安臺缺馬令陝省幫雇腳騾恐緩不濟急查陝省各臺原於通省驛馬內抽撥八百匹爲領兵官騎用今移此馬先解甘省涇州計日到臺卽可送兵陝省少此臺馬八百匹再於民間增雇陸續赴臺就近易集得旨諸凡留心甚屬妥協三月調甘肅巡撫五月以平定準噶爾議敘軍功加一級尋調湖南巡撫宏謀將赴新任疏陳甘省水利事宜言臣前由甘涼肅出關沿途審視渠河多未通順赤金靖逆柳溝安西沙州五衛所亦可疏濬渠源宜責成地方官於農隙時督民分段修濬得旨嘉獎下新任巡撫吳達善議行又言準噶爾旣內附需用貨物應量爲流通請定互市地以茶易馬歸官充營伍用詔從所議時江蘇淮揚各屬秋潦成災上命截留湖廣漕糧二十萬石備賑十月宏謀請再動湖南溢額倉穀碾米十萬石運濟平糶諭曰災地米糧多多益善碾運倉穀以資平糶旣不致市儉居奇於民食更爲有益陳宏謀所辦甚屬妥協著照所請速行二十一年二月奏析衡州府之衡陽縣爲二分理賦訟下部議行定所分縣曰清泉九月疏劾布政使楊灝侵扣穀價奉諭陳宏謀留心體察據實奏參毫無瞻徇

交部議敘瀨論罪如律閏九月疏言湖南產米之鄉請將乾州永綏二廳華容永定永順保靖桑植慈利等縣常平倉穀各撥借數百石貯社作本出借俟本息漸充仍卽歸還常平不致虧缺部議從之十一月調陝西巡撫二十二年正月奏大兵過陝設站趨行狀得旨獎勵六月調江蘇巡撫七月陛見上詢及各省水災宏謀奏言皆因上游爲衆水所匯而下游無所歸宿必通盤籌辦方爲有益上以其言頗中肯綮命卽由河南歸德一路赴江蘇沿途查勘與安徽巡撫高晉會同籌辦賜以詩曰東南繁劇地撫治寄賢良爲我蘇徐海宜民簡召王允維力溝洫方可課耕桑實政斯應樹虛名尙謹防一心要於敬五字示其綱勸爾推行善芳同桂嶺長十二月以淮揚徐海等處河工告竣諭部議敘加一級尋奏言江蘇獄訟煩多全在地方官早爲審斷臣檄行各屬向後不許借稱隆冬歲暮不理詞訟並責成道員實力督查報聞是月遷兩廣總督諭曰陳宏謀籍隸廣西但久任封疆朕所深信且總督節制兩省又係專駐粵東不必迴避宏謀條奏江南河工未盡事宜五款一黃運各河現已節節開通然必逐年挑濬方免淤淺請歸河員及地方分界查勘於水落後督民挑濬一所挑河祇能洩近河之水俟今年河水通流

後令民間濬支河小溝以達於所開之幹河其各處道旁小溝亦應挑深通達一
淮揚徐海地非盡瘠薄凡可以種植者各開溝洫備旱潦卽以所開土加築圩圍
安砌涵洞隨時蓄洩以成圩田一上游之水由高而下內有窪地原係湖蕩不免
淹浸請勘明頃畝除糧有可種葦草者改照葦課輸納一下河一帶民田以范公
隄爲捍衛日久坍塌愚民又多掘隄放水倘海潮盛漲高寶鹽城等處必受其災
請動項分段興修命欽差大臣裘日修等議行二十三年四月奏請增撥廣東疲
商帑本收買場鹽經部議駁上以鹽法攸關非詳查不能妥協命侍郎吉慶往查
妥辦是月命宏謀以總督銜仍管江蘇巡撫七月加太子少傅八月部臣奏參宏
謀請增鹽帑一案將存庫銀數遺漏舛錯請交部議處諭曰疏忽之失誰則無之
但宏謀素以幹練自居乃自到粵省諸事尙未設施而先亟請鹽本增帑爲取悅
屬員商人之計且伊辦事非不能如吉慶之澈底查本者也是其市恩好名痼習
不但未改而因陞用益甚此非尋常疏忽可比著交部嚴加議處尋議革職詔從
寬留任二十四年正月偕總督尹繼善河督白鍾山等奏江南運道蓄洩三事一
丹徒丹陽運河在大江以南東岸之橫閘越河閘利涉橋閘俱係旁通江潮導引

濟運應於糧艘經臨前期飭閘員駐河干潮長則啟板進水潮落則下板蓄水使進多出少以資行運一揚州運河在大江以北上游之高寶東岸向設十三閘蓄水濟運其邵伯迤下金灣六閘向未設板隨時啟閉而揚州東關地勢高運口下注之水多由金灣等處旁洩應於重運經臨時祇留北關二座常川啟放其中閘南閘亦照南寶東岸之例相機蓄水一桃源砂礪河係黃河以北運道應將滙水之駱馬湖尾閘於每年秋汛後相時堵閉俟次年重運經春水微弱即將柳園等閘壩開放接濟均如議行又言蘇州向設普濟育嬰廣仁錫類等堂收養癯獨老病遺棄嬰孩近年公費不敷請查通州崇明濱海淤灘除附近民業者聽升科執業餘撥入堂充公用又通州崇明界有新漲之玉心河兩地民互爭一併撥入以息爭端諭曰不但一舉而數善備而汝亦因此得名也六月以不能督率地方官捕蝗復不嚴參部議革職留任得旨陳宏謀非尋常徇庇可比著革去總督銜仍照部議革職留巡撫任二十六年五月疏言蘇州商賈輻輳用錢最廣小錢亦多臣現今寶蘇局歲給爐匠工料錢照時價給銀收買不許爐匠攜出既可杜夾帶私錢及囤積居奇之弊並設官局兌換俾民間制錢漸多錢價不致昂貴詔如議

行先是宏謀奏准開蘇州府屬之白茆河徐六涇二口土塘建閘備蓄洩二十七年正月以水漲衝壞閘口復請改爲滾壩從之二月上南巡賜詩曰外吏中維久由來繁鉅勝體予視傷切謂爾仰思能必有遠猷贊寧維苦節稱金閫誠富庶返樸最相應九月查奏原任濟墅關監督安寧管關家人李忠侵漁舞弊時安寧已故上以宏謀不早劾奏下部嚴議革任詔從寬留任十月諭曰據尹繼善等查奏安寧家人李忠所婪貲產至三萬兩之多陳宏謀久在同城安坐膜視其意何居該撫向與安寧不合衆所共知然以此等利弊大事豈引避小嫌之理蓋模稜之習一成不變且自揣與尹繼善素號相能遂爾因循玩愒江蘇吏治尙望其力爲振刷乎陳宏謀著調補湖南巡撫倘不痛自創艾復蹈故轍朕不更爲該撫貸也二十八年三月疏言軍流人犯俱係擾害地方情罪較重之人狡惡性成到配往往逃回地方官接緝逃之文一票了事不肯認真根究親鄰遂得容隱致多漏網名曰罪應遠徙之犯實則輕於本犯之徒長奸釀惡莫此爲甚請飭取親鄰供結責成地方官嚴拏牽混者議處上是其言下部議行五月遷兵部尙書署湖廣總督兼管巡撫事六月疏言洞庭湖橫亘八百餘里容納川黔楚之水濱湖居民多

築圍墾田有與水爭地之勢從前雖經創毀尙有未盡恐湖而愈狹漫決爲患請多掘水口使私圍盡成廢壤自不敢僥倖再築諭曰陳宏謀於此事不爲姁嫗小惠殊得封疆之體是月遷吏部尙書十月加太子太保疏言各省應歸部選之缺臣部按月截缺掣籤引見給憑赴任後各督撫或奏補有人者舊例仍准扣除將掣缺之人留於下月卽選或業經領憑聽其情願赴彼省候補或繳憑另選但已往該省者以奉旨赴任之人轉爲候補之官無任可到理失輕重事不均平請嗣後凡於未經掣籤之先及掣籤而未經引見者仍准扣除另選於已引見依擬用者卽不扣除仍令月選之官各赴新任從之十一月又言地方文武官弁均有查緝奸匪之責乃州縣捕役狡猾者平時參賊或經營兵先獲有司未免心存畛域審時任其狡展巧爲開脫請嗣後遇有翻供之案令原獲營員會訊營伍緝捕責成更專上嘉所見實切事理如所請行十二月充經筵講官疏言河工辦料應令管河各道於送到時親驗加結稽核營員來去料物數目務歸實貯實銷又河防失事例應文武分賠而參遊同有修防之責轉得置身事外不足以昭勸懲應酌改畫一下河臣議覆允行又言匿名揭帖之案已將該犯抵法應於所告款內有

無虛實嚴查按究則宵小不得逞奸而不肖有司亦知所警上是其言二十九年七月諭曰內閣辦事需人應增設協辦漢大學士一員著尙書陳宏謀協辦十月賜紫禁城內騎馬三十年充國史館副總裁三十一年十一月疏言凡駐重兵與提鎮同城之道員時有兵民交關文武商辦之事應一律加以兵備銜互相鈐轄下各督撫議行十二月充玉牒館副總裁三十二年二月充三通館副總裁三月授東閣大學士三十五年七月因老病請解任詔弗允十月復陳請回籍諭曰大學士陳宏謀於本年七月間患病懇請解任曾諭令善自調攝不必開缺茲復以衰病未克卽痊奏請解職歸里情詞甚爲懇切但現在各部事務並不乏人經理陳宏謀儘可仍前從容靜養且伊奏時屆冬令不能遽歸此際不妨安心調理待至明春自揣精力漸次復元原可照舊供職設明春病竟難痊欲得優游林下以樂餘年俟河開時乘船而歸甚爲順適此時仍毋庸開缺諭令加意頤養以副優眷十二月又懇請開缺諭曰大學士陳宏謀前以抱疴奏請辭職屢經降旨慰留令其加意調理今復以體氣未能卽痊懇將所管閣部開缺簡放現在內閣事務辦理並未乏人陳宏謀正可安心靜攝無庸開缺至大學士特令兼管部事原非

額缺可比陳宏謀既不能到署者將工部事務暫停兼管以資頤養并不必另行派員管理三十六年二月奏衰病如前不能在閣辦事若再因循戀職實難自安懇將大學士開缺得以安心靜攝俟少愈即覓舟起程回籍諭曰大學士陳宏謀老成端謹敷歷宣勤簡任綸扉正資倚畀前以抱恙屢次懇請解任調理節經降旨慰留令其安心調理無庸開缺冀春和可待復元今據奏精神恍惚仍復如前懇請開缺回籍調理情詞肫切勉從前請著加太子太傅以原官致仕並賜御用冠服朕親賦詩章以寵其行令伊孫刑部主事陳蘭森隨歸侍養回籍後仍加恩按原品食俸俾得蠲疴頤養期臻耄耋用昭優眷老臣至意賜以詩曰中外勤宣歷久頻遂教黃閣預絲綸老成允著恆敷政疾病不期近迫身豈弗惜離留未可最憐言去戀猶真粵西天末相望遠祝爾平安歸里人時上東巡宏謀奏臣於三月望後起程赴天津迎駕卽由江浙一帶水程旋粵諭經過地方官在二十里以內者照料護行四月宏謀迎駕於寶稼宮賜詩曰北來恰值返南舟邂逅因之覲面諏川楫已辭惜常往風帆非利卻難留歸鄉自樂桑兮梓釋病當怡林與邱雅憶岳陽樓記語行哉寧忘退時憂六月卒於途諭曰原任大學士陳宏謀老成敦

樸才品端方中外宣勞恪勤素著去歲以來屢以抱恙未痊懇請解任調理節經降旨慰留今春復據以衰病日深堅請開缺回籍念其情辭懇切俯俞所請親爲賦詩寵行加賜冠服並命伊孫隨歸侍養沿途令地方官照料護行以期長途安穩昨東巡回鑾時伊於寶稼宮行在陛辭見其精神尙不至疲憊猶冀遄歸故里得以頤志蠲疴今聞於韓莊舟次溘逝深爲軫悼著入祀賢良祠並於歸櫬抵家之日加祭一次應得卹典仍著該部查例具奏尋賜祭葬如例諡文恭

劉統勳

劉統勳山東諸城人雍正二年進士改庶吉士散館授編修入直南書房七年充湖北鄉試正考官九年遷右中允十年閏五月轉左八月充河南鄉試正考官十一年遷侍讀十二年十月充日講起居注官十一月遷左庶子十三年八月在尙書房行走十月充順天武鄉試正考官尋遷詹事府詹事乾隆元年六月擢內閣學士八月署刑部侍郎九月充武會試副考官十月命隨大學士嵇曾筠赴浙江學習海塘工程二年三月授刑部左侍郎仍留浙江五月疏言新任督撫提鎮往往奏請隨帶人員備委用在大吏平日真知灼見自應有幹練之才足收臂指之

益惟是先寄耳目於數人卽付腹心以要缺補用不循資格輿論指爲私交更相仿效滋弊多端除河工軍前效力外請概停奏帶以杜偏袒鑽營之習若調任後本省本標實不得人而舊屬內果有出衆之員許據實保奏送部引見疏下部議如所請三年三月還京疏劾江南太倉州丁憂在籍御史毛之玉至浙拜謁總督藩司受餽遺上以之玉違例干謁交部嚴議降三級統勳據實奏聞可嘉紀錄二次五月管理武英殿事務四年六月丁母憂回籍六年六月特命補刑部侍郎九月服闋來京擢左都御史十月疏禁督撫提鎮各標中軍積弊四事一中軍例以副將參將遊擊充之承辦公務支發錢糧爲各營領袖原非爲上司服役乃督撫提鎮出署輒步隨至躬爲料理車馬旗幟甚爲失體一中軍朝夕相見往往代籌米鹽瑣務不但體統有虧恐開鑽營之路一道府州縣等官以督撫署內之事中軍無不周知至省輒先往候而又與文員兩無統屬遂宴會往來藉端營私一督撫提鎮衙門遇歲時令節張燈結彩中軍每以兵丁子弟充優伶雜戲平時則醫卜星相碁師琴客藉其梯引均應嚴禁部議從之十二月疏言大學士張廷玉歷事三朝遭逢極盛然而晚節當慎責備恆多臣竊聞輿論動云桐城張姚兩姓占

卻半部摺紳今張氏登仕版者有張廷璐等十九人姚氏與張氏世姻仕宦者有姚孔鋹等十人雖二姓本係桐城巨族得官之由或科目薦舉襲廕議敘日增月益以至於今未便遽議裁汰惟稍抑其陞遷之路使之戒滿引嫌卽所以保全而造就之也請自今三年內除特旨陞用外概停陞轉又言尙書公訥親年未強仕統理吏戶兩部入典宿衛參贊中樞兼以出納王言趨承禁近時蒙召對嚮用方隆我皇上用人行政無非出於至公訥親之居心行事當亦極圖報稱但臣慮訥親以一人之身承辦事務太多或有疏失又任事過銳恐逢迎者漸衆兩疏入諭曰朕思張廷玉訥親若果聲勢赫奕擅作威福劉統勳必不敢如此陳奏今既有此奏則二臣並無聲勢可以箝制僚案可知此國家之祥瑞也朕心轉以爲喜且大臣辦公責任綦重原不能免人之指摘卽伊等辦事亦豈能竟無差錯聞過而喜古人所尙大臣爲衆所觀瞻見人直陳已過惟當深加警惕所謂有則改之無則加勉若有幾微芥蒂於胸臆間則非大臣之度矣大學士張廷玉親族人衆因而登仕籍者亦多此固家運使然然其親族子弟等或有矜肆之念爲上司者或有瞻顧之情則非大學士所及料也今一經查議人人皆知謹飭轉於張廷玉有

益至訥親身爲尙書若於本部之事稍涉推諉不肯擔當則模稜成習公事何由辦理但所辦之事其中未協之處亦所不免況朕時加教誨戒其自滿自足年來已知恪遵朕訓矣今見此奏益當留心自勉至於職掌太多如有可減之處候朕酌量降旨近來參劾大臣者每多過當殊不知以今日之勢論之若有擅權營私者朕必洞照隱微斷無不能覺察而陷於不知之理彈劾大臣有關國體此等奏摺若不發出宵小無知者必且以參大臣爲倖進之階其爲害於人心風俗實非淺鮮著將二摺發出諭衆知之尋命往勘海塘十一年正月充經筵講官三月署漕運總督九月還京十二年充順天鄉試正考官十三年三月命會同大學士高斌查辦山東賑務五月查勘河道奏濟南府屬德州哨馬營有滾水壩分消運河盛漲而壩身過高宜改令祇資減洩東昌府屬聊城縣運河東岸有減水閘引河四歷久多淤宜挑濬通暢令注入海泰安府屬東平縣之戴村壩爲汶水分入大清河關鍵其遏汶入運之石壩過高宜稍令低並將壩西歸入大清河之水道疏通沂州府沂河西岸之江楓口所建滾水壩二候秋汛無虞再加培以衛蘭山郟城一帶出廬報聞十四年十月充國史館總裁十二月遷工部尙書十五年七月

兼管翰林院掌院學士命赴廣東會鞠糧驛道明福違禁折收一案鞠實擬斬如律八月遷刑部尙書十六年充會試正考官十七年三月以查驗通倉短少米石不實詔革職從寬留任十一月軍機處行走十八年四月以審擬懦怯僨事之把總謝又榮罪名錯謬部議革任詔免之七月命偕署尙書策楞往勘江南河工八月合疏言臣等巡歷河干通查工料實多虧缺不清察其積弊之由總在牽前扯後工員率取入己上司漫無查考以一廳論之每年冬河臣核減錢糧並不勒追補項卽令留爲辦料之用次年核減仍復如是惟指工段消彌了局此本廳本任牽前扯後之弊也其調任陞任仍屬河員者所欠錢糧並不實交復帶至新任稟請別廳交料其收料之員輒報收料若干用在某工便可完結此廳員虛報牽前扯後之弊也又廳員陞任他處如平越府知府施廷熾離任已久所欠核減帑項數千尙待補苴此陞任官員牽前扯後之弊也至緣事離任之員河臣查明欠項僅咨追而不參奏致歷年虧欠至九萬兩之多此緣事離任官員牽前扯後之弊也現在查出外河同知陳克濬虧空二萬五千二百餘兩海防同知王德宣虧空一萬八百餘兩本年高郵州二閘因湖河異漲被衝聞未衝之前文武員弁咸謂

有料尙可堵塞而該管下河通判周冕並無物料致束手任其衝決河臣高斌祇以誤事掣回委員另辦請澈底清查詔革高斌及協辦河務安慶巡撫張師載職留工效力其侵帑各員革職拏問勒限一年完繳周冕革職鎖押二閘漫口虧空物料勒限半年完項九月疏言臣由桃源縣前赴徐州途中接銅沛廳李焯河營守備張賓等稟稱銅山縣小店汛南岸隄工危險比臣星赴小店則已衝開口門一百四十丈溜勢全掣奪河之勢已成上以李焯張賓平日任意侵蝕貽誤隄工又現奉清查自知獲罪必重今乘水漲遂任其衝決不加搶護命卽行正法統勦尋疏言張家馬路漫口大溜直趨東南正河業經斷流今水下注洪澤湖一出五壩一出清口臣查清口出水東入河道清江以下河底可冀刷深隨將河口之東清二壩拆卸免阻清水出路但黃水入湖終非正道堵閉事宜亟宜籌畫口門現寬百四十餘丈工料約需三十萬兩俟豫東二省購料完備急行搶築臣訪輿論上游南岸之毛城鋪北岸之石林口皆昔年分減大溜之處若水深溜急卽於兩處略加疏導諭曰此亦無聊之極思耳黃水下注洪澤湖其流漸緩湖身必停淤日積河底豈能借以刷深治河之道究以多方設法導歸正溜爲是固不可使湖

河并勢又不可急於堵閉漫口蓋當此波濤猛急苟非正溜順流卽築壩進埽亦祇虛糜工料且工料未集何能徒手以禦洪流應待水勢稍落隨方疏濬使正流仍歸故道若於圖中硃筆畫處開濬引河則離南岸頂衝旣遠去灣取直乘勢東趨較之從張家馬路河身迂曲者似爲便捷可傳諭劉統勳等悉心籌畫至所奏毛城鋪石林口兩處果能分減大溜無礙正流不妨隨宜疏導十月疏言臣現駐銅山率領河員於漫口附近舊河內勘定引河二道南三百餘丈北五百餘丈計日可成蒙御筆指畫北岸一道開濬誠屬有益候淤河稍堅陸續開工惟開放之期最爲緊要早則溜勢不順新河易淤遲則將有用之河不能及時分溜容臣屆期相度開放此處迤下百餘里爲朱家海口雍正年間曾經衝決彼時河臣齊蘇勒素稱勇幹而進埽逼緊深至五丈餘屢走屢築連年始成今裏頭之外已築隄臺又於隄臺之外兩旁用稽中實以土名鐵心隄層層礮實逐次前進直至深水三四十丈漸近中泓之所下埽步步得實節節交鍵臘底可以竣工又言正河身內所挑南北小門河二道串成大河溜勢半回趨正河直達清口今大門河已放水趨東滙先挑小門河之水同歸正河身後雖近尾閘一段底係淤沙易致壅滯

然人夫衆多不致阻礙不惟合龍時洩水分溜來歲桃伏秋汛可大減頂衝之勢於新築隄工有益報聞十二月統勳奏張家馬路隄工於本月十二日合龍黃河大溜復故道策楞奏二閘漫口亦於是日合龍諭曰今年江南秋雨過多河湖異漲銅山決口奪溜南趨朕特遣衆臣協力堵禦而在事諸臣俱能體朕宵旰之心實心奮勉黃流復歸故道二閘漫口適又同日告成奏績神速若有默相從此運道民生均資利賴朕心實爲嘉悅劉統勳策楞舒赫德等在工專辦日久宣力居多著交部從優議敘其餘在事員弁一併議敘統勳偕策楞條奏稽查工料四事一各廳庫貯少者至數千多者至數萬舊料塵積復領新料本年未銷又領次年廳員請領款項不由道詳河臣約計歷年之數給發有無核減俱不詳查致挪新掩舊陋弊相沿請嗣後預辦上游鹽河等項銀兩由該管道員承領霜降後分發各廳收工備用仍報河臣委驗其在銷算以後之款仍令廳員照舊承領責成該管道會同河庫道查明有無舊欠具結轉詳方准給發統限冬底運柴到工其雜料限領銀一月到工並照州縣倉庫例盤查一河工有歲修搶修之分而每年核算則在霜降後埽壩工程已歷三汛廳員任意浮開無憑查驗請於秋防告竣後

將該廳營所管工程分三等以逼臨大溜當衝最急者爲一等次險者爲二等又次者爲三等或拆修或鑲修或改築或加幫確估申詳該道核轉河臣督該道沿隄踏勘限正月內興工三月內完竣該管道親往各工驗收不得轉委至伏秋大汛臨期搶護難以預定令該管道駐劄河干親估親收詳河臣親驗一一切物料工程向係廳員按月申報往往以少報多指無作有甚至甫請驗料卽稱某工動用甫經驗工卽報墊陷加鑲弊端不一查廳營同駐一工最爲親切運到何項物料承修何處工程無不深知確見請嗣後除廳員照常申報外并令該營守備汛弁逐一據實摺報該管道府按所報數目比較抽驗一河員查工俱於霜降時照水大小約計准銷並不按工考驗致調任離任輾轉遷延請於銷算時經河臣核減者勒限交完年清年款陞調緣事離任必交代清楚方准新任出結徇隱題參賠補詔如所議行先是大學士陳世倌奏黃河入海向祇六套六櫃今增至十致海口壅塞十九年正月命統勳等往勘奏言河海交會之所河水遇潮停阻頗積淤沙而南大口門出水深通無庸疏濬至櫃套均在七曲港之上櫃一里十櫃僅十里套則七八里或十里不等十套計八十餘里不但十櫃去海口甚遠河流

通塞與增櫃無涉卽十套下河身數十里分流入海並無阻遏報聞尋命清查江南河工未結案統勦奏言水利工程陸續題銷或丈尺數目不符或水方土方各異屢經部駁不准銷算一案不銷遂致全案稽遲而外省輾轉行查至延二十餘年之久官更吏易若再往返駁詰徒滋案牘現查出未銷銀百十三萬三千五百兩有奇請限十月內確核題銷工部於覆到日詳核應銷者卽准銷結案應減者卽核減著追詔如所請行二月疏言河臣顧琮奏請於祥符盧家莊建支河壩榮澤陽武隄內加築土壩並估挑引河奉旨命臣等詳度臣自陳留沿隄而西查支河南由古城村北由盧家莊分流東注宜建土壩堵旁流俾由古城村前歸入正河臣復自陽武十三堡及五堡迤南之三壩迤西之原武榮澤等處詳勘形勢其地土鬆沙厚隄內灘地易成支河兼正河漲濫卽成漫口河流自西而東均趨隄根宜幫築三壩埽工及陽鳳大隄並建攔河土壩以資防護至引河一節臣思上乏來源中經沙地難免淤墊應停估挑從之四月晉太子太傅五月命協辦陝甘總督事務賜孔雀翎十一月疏言陝甘沿邊一帶至巴里坤軍營雍正七年專設塘站馳遞軍機文報乾隆元年撤兵時議裁今議明歲進兵請酌照舊例增設查

陝省自神木縣至定邊營九百五十五里設正站九馬各三十腰站二十馬各十
七甘省自花馬池營至嘉峪關二千二百七十里設正站七馬各二十五腰站六
十二馬各十六協站七馬各十其口外自嘉峪關至巴里坤千六百五十六里設
站二十七馬各二十六十二月疏言西路軍營戰馬約需六萬匹派兵遞送廷議
分設五大站臣於分站之中寓脫卸遞更之法第一站安馬十分每分千五百匹
二三四五等站各千五百匹每起官兵按站換馬不必回空即留爲後起更換之
用官兵既可按程長驅而各站馬行五日即得休息三日仍另備數十匹或百匹
以濟疲乏再各標營馬已儘數調撥備戰未便全無守禦今有現議設站之北口
解來馬二萬三千七百餘匹及西安駐防兵并固原提標兵騎赴肅州馬八千八
百餘匹臣擬於此內以七分留甘三分還陝並阿拉善等換存馬分補缺額詔如
所議速行二十年二月疏言巴里坤營壘久廢倉庫無存糧餉若儘數運往必修
葺堆貯之所而大兵進剿後又宜分兵防守事多未便請將進剿口糧應官運者
自哈密馱載應裹帶者運往巴里坤散給從之六月以平定準噶爾議敘加三級
七月充平定準噶爾方略副總裁尋命查勘巴里坤哈密駐兵事宜九月逆酋阿

睦爾撒納叛擾伊犁定西將軍永常自木壘退師巴里坤統勦請棄巴里坤退守哈密諭曰劉統勦奏西路情形一摺乖謬已極伊犁平定之後阿睦爾撒納背恩叛竄阿巴噶斯哈丹不過一鄂拓克之宰桑爲所煽誘搶奪臺站伊克明安宰桑查木參等率衆來請於附近軍營居住而永常妄生疑懼退回巴里坤今噶爾藏多爾濟之子諾爾布林沁帶兵千餘已殺退阿巴噶斯等衆則西路全勢並無變動若使永常仍駐木壘率來歸之衆令爲前驅奮往直前早可通伊犁聲息而追尋阿睦爾撒納遁竄踪跡西陲當早經安貼無事矣乃永常誑怯於前劉統勦附和於後實出情理之外軍營所恃全在領兵大臣今一將軍一總督無端自相恐怖衆心其何所恃耶劉統勦摺內所云諾爾布林沁來告之說未可深信夫諾爾布林沁爲守護游牧始則懇求內移繼則率衆剿賊現將阿巴噶斯之得木齊班雜擒送來營尙何不可信之有又云內外之界不可不分試思各部自歸誠以來悉已隸我版圖伊犁皆我疆界尙何內外之可分西路諸台吉宰桑皆知遣人來告軍營求以兵力壯其聲勢其自效之意顯然可見而永常劉統勦乃望風疑畏甚欲全調陝西滿漢標營馬匹以向年巴里坤孤懸塞外馬駝被劫爲詞夫雍正

年間準噶爾以其全力鷓張寇竊視今日之一舉平定諸部歸誠者相去天壤三尺童子莫不知之劉統勳作此種種乖謬之語搖惑衆聽貽誤債事且班第等在伊犁係辦理軍務大臣劉統勳並不與永常亟謀安接臺站竟請返回哈密而置班第等於不問伊身爲總督現在巴里坤一切軍營應辦事務何莫非其專責卽如軍營馬匹現俱疲乏卽云騎回之馬不無疲瘦而所有一切馬匹何以不豫飭餵養臙壯劉統勳所辦何事糜費錢糧不能適用其罪允無可道昨據冷大雄奏到伊將安西官兵忽而遣調忽而停止馬匹豈不更加疲乏永常已降旨革職拏解來京劉統勳如此乖張貽誤軍旅重務若以其漢人爲之寬恕而不治以應得之罪則是朕歧視滿漢且復何以用人何以集事耶劉統勳著革職拏解來京治罪劉塘亦著革職拏交刑部永常劉統勳在京諸子並拏交刑部所有本籍及任所貲財並著查出爲償補軍需馬匹之用十月諭曰劉統勳因永常自木壘退回巴里坤輕信浮言張皇乖謬律以阻撓軍機搖惑輿情卽置之法實無可道但念劉統勳所司者糧餉馬駝其軍行進止原係將軍之事設令模稜之人緘默自全轉可不致獲罪是其言雖刺謬其心尙可原也況永常尙不識死綏之義何怪於

懦弱書生劉統勳在漢大臣中平日尙奮往任事朕於萬無可寬之中求其一線可生予以自新之路劉統勳著從寬免其治罪往發軍營在司員內辦理軍需效力贖罪倘伊以爲士可殺而不可辱欲來京甘受典刑亦惟其所自處伊子俱著釋放劉墉著加恩令在編修上行走自效二十一年六月諭曰刑部尙書員缺著劉統勳補授劉統勳未到任之前汪由敦仍辦刑部尙書事劉統勳從前妄議棄巴里坤退守哈密正當逆賊初叛之際朕恐其搖動人心阻撓軍務且果如其言則今此之直進伊犁何其甚易若使阿睦爾撒納久保伊犁則亦不至如此窮竄也是以將伊犁職治罪然當其時劉統勳因目擊永常恩遽自木壘撤出驟聞其言未能深察是以張皇失措夫永常身爲將軍膺闕外之重寄尙且怯懦退回甘心僨事劉統勳本係書生未嫻軍旅其所陳奏識見固屬冒昧舛謬尙爲乃心公事假令彼時藉口於職在文臣辦理軍需不預師行進止模稜觀望緘默自守轉可安然無事矣且如策楞玉保等皆統兵大臣於阿睦爾撒納窮蹙逋逃距軍營密邇乃仍徘徊不進坐致遠颺彼三人者皆滿洲蒙古世僕勇敢舊風未遠而皆選懦至此以劉統勳文怯漢人相提並論則其過爲可諒而其心轉爲可嘉矣七

月奉旨給還本籍家產閏九月命勘江南銅山縣孫家集漫工十月疏言孫家集向無隄工以備盛漲例於秋汛後補築水衝溝渠今兩年未經補築致成渠分溜詔解總河富勒赫任以劉統勳暫署十一月漫口合龍上嘉其妥速下部議敘二十二年三月充會試正考官四月赴徐州督修近城石壩五月充經筵講官是時雲南巡撫郭一裕愆愆總督恆文購金製鑪以致闔省喧傳乃訐恆文抑勒短價各款命統勳往會鞠得實恆文賜自盡一裕發往軍臺效力贖罪十一月山西布政使蔣洲侵帑勒派通省彌補冀寧道楊龍文逢迎不法統勳奉旨鞠實均擬斬如律十二月晉太子太保二十三年正月遷吏部尙書奉旨紫禁城內騎馬先是徐州黃河北岸無隄議者以爲留洩漫水五月巡漕給事中海明疏請補築統勳往勘以爲可行自大孤山至蘇家山置亂石壩洩漲且可衛田上嘉允之二十四年正月協辦大學士事務二月西安將軍崧阿里疏參原任將軍都賚剋扣兵餉統勳往鞠得實擬斬如律六月山西歸化城理事同知普喜訐將軍保德同知呼世圖侵帑通同掩飾統勳奉旨與巡撫塔永寧會鞠保德呼世圖共侵帑一萬八千餘兩保德又於穆納山私伐木植受銀千五百兩上以保德身爲將軍貪黷敗

檢卽行正法閏六月諭曰劉統勳等查審呼世圖侵帑掩飾一案究出普喜執法婪贓及根敦札布恣行科斂等款贓據確鑿揆其情罪均無可逭然亦不甚懸殊乃劉統勳等於呼世圖則擬以斬普喜根敦札布則擬以絞不知普喜贓至萬餘且署道員時呼世圖正其屬員而有心弊混應盤查時亦並不盤查根敦札布以軍需名色科斂入己其罪視呼世圖有過之無不及劉統勳等徒以庫帑婪贓視爲差別不知民務爲重庫帑爲輕朕爲秋審不曾屢降諭旨乎而塔永寧欲因此以曲庇普喜劉統勳亦佯爲不知朕實不解著軍機大臣會同三法司另行核擬尋均擬斬如律三十五年八月兩江總督尹繼善奏蘇州布政使蘇崇阿稟稱存公耗羨二項書吏侵蝕至七十餘萬兩命統勳偕侍郎常均往查十月奏言臣等抵蘇州盤查藩庫並無短少蘇崇阿所奏報與存貯數目不符疑書吏作弊嚴刑追究致誣服而蘇崇阿卽指謊供爲確據駕空懸坐詔革蘇崇阿職發往伊犁效力贖罪時江西學政謝溶生疏劾巡撫阿思哈收受屬員餽送命統勳等卽赴江西會鞠得阿思哈因生女收受司道金錫綾緞及令贛南道董溶代購什物短發價值各款擬絞如律二十六年二月充會試正考官五月授東閣大學士兼管禮

部事務尋兼兵部事務八月偕協辦大學士公兆惠查勘河南楊橋漫工合疏言臣等赴工相度先將月隄堵築候大溜斷再接築大隄以資鞏固仍於楊橋原淤河身內開挑引河諭曰速堵決口爲要朕日夜望之統勳又言現開引河九百三十六丈引溜歸入正河並將正河身內濬渠疏引十一月奏報合龍上嘉統勳等董率有方剋期竣事下部議敘二十七年三月上南巡以高寶河湖入江之路未暢命統勳偕兆惠往勘尋合疏言湖河之水以五壩爲來源江海爲去路歸江多一分之水卽下河受一分之利自邵伯以下向設灣頭閘壁虎橋鳳凰橋西灣壩東灣壩金灣滾壩金灣六閘共七處宣洩湖水由鹽河歸廖家溝石羊溝董家溝芒稻河四河分流下注金灣壩引流緊接六閘地居上游由董家溝下注宣洩湖河甚爲便捷惟滾壩僅寬十五丈未能暢達請將新挑引河量爲展寬使有建瓴之勢六閘鹽河向設南中北各二閘北閘爲鹽運要津應自中間迤南改建石壩三十丈將中間存留閘下土隄接築加長并挑引渠以順水勢旣與鹽運無礙而盛漲亦資暢達其西灣滾壩照東灣一體落低並於西灣河頭酌濬寬深諸河歸江之路益增宣洩之形益暢諭曰所議甚合朕意應如是行四月以直隸景州被

水命查勘德州運河統勳疏言運河自臨清以上疏洩閘壩共八處而臨清迤北惟藉四女寺哨馬營兩壩宣洩必宜疏通以防盛漲漫及下游但兩壩支河俱會老黃河故道入海袤延三百餘里居民於淤灘種植河身易致淤塞請將德州州判移駐兩支河交匯之邊陵鎮專司河捕責成山東糧道董理其地在直隸者移會天津道商辦詔如所請二十八年兼管翰林院掌院學士命爲尙書房總師傅三十年正月兼管刑部事務二月教習庶吉士七月充國史館正總裁三十三年十月命往江南酌定清口疏濬事宜十二月時統勳年七十御書贊元介景額賜之三十四年復勘挑運河三十五年兼管吏部事務三十六年三月充會試正考官三十八年閏三月充四庫全書正總裁十一月卒諭曰大學士劉統勳老成練達品行端方雍正年間耆舊服官五十餘年中外宣猷實爲國家得力大臣自簡任綸扉兼綜部務秉持公正眷畀方殷並命爲諸皇子總師傅久直內廷勤勞懋著雖年逾七旬精神甚爲矍鑠冀其可常資倚任今晨肩輿入直至東華門忽嬰痰疾比聞之卽遣御前大臣尙書公福隆安齎藥馳往看視已無及矣遽聞溘逝深爲軫悼著加恩晉贈太傅入祀賢良祠朕卽日親臨奠醑並賞內庫銀二千兩

經理喪事其任內革職降級之案概予開復伊子西安按察使劉墉著諭令卽馳驛來京治喪守制應得卹典仍著該部察例具奏尋賜祭葬如例諡文正三十九年三月諭曰故大學士劉統勳其子於月內扶柩歸里著照從前史貽直之例沿途文武官弁在二十里以內者均至柩前弔奠並遣人護送俾長途妥穩進行以示優眷故臣之意四月諭曰大學士舒赫德于敏中各賞古今圖書集成一部俾其收藏傳付子孫守而弗失故大學士劉統勳原欲一體賞給不意其猝爾身故未及身預因念伊子劉墉尙克世其業亦著加恩賞給一部四十四年御製懷舊詩列五閣臣中詩曰從來舉大事要欲衆論定小利亦何慶小失亦何病阿逆之初叛衆志已紛競統勳督陝甘儲需任所勝欲棄巴里坤是殆亂軍令治罪易廷桂並令隨軍進五年大功成釋罪重從政賞罰寓矜全順應自取聽十餘年黃閣兼理部務仍遇事旣神敏秉性原剛勁進者無私惑退者安其命得古大臣風終身不失正是年恩賜其孫鏗之爲舉人子墉現任禮部尙書

清史列傳 卷十九

大臣畫一傳檔正編十六

傅清子明仁

傅清滿洲鑲黃旗人追贈一等公李榮保之次子雍正元年由閒散受藍翎侍衛五年授三等侍衛十二年授雲麾使乾隆元年晉鑾儀使二年六月晉正黃旗滿洲副都統五年授天津總兵九年駐藏副都統索拜期滿命傅清以副都統往代十年疏言駐藏章京筆帖式向照哈密等處例三年錯綜換班派唐古特巴塘裏塘等兵護送查唐古特兵沿途窮乏不無竊掠請嗣後駐藏大臣率章京等赴藏舊駐官員帶兵同回不另護送藏地不比內地事隨到隨辦交代後可查照無庸錯綜更換下軍機大臣議從之十一年疏言西藏處邊末番蠻錯處西北界準噶爾北通青海爲四川西南外郭打箭鑪之門戶是以特派大臣並文武各員駐兵彈壓自雍正十二年設塘汛不特傳送公文且聯絡聲勢法本周詳上年副都統索拜議改番塘以免糜費乃撤汛未幾搶劫累累而裏塘一帶夾壩更甚於昔又

準噶爾不惜重費赴藏熬茶或萌覬覦意況番塘初設遞送卽不妥協倘因循日久遇緊要事難保無誤請自藏至鑪沿途塘汛官兵仍舊第酌衝僻遠近布置總在一千兵數內軍機大臣議如所請行先是西藏郡王頗羅鼐之二子長珠爾默特策布登次珠爾默特那木札勒上獎頗羅鼐勞績令自保一子襲爵頗羅鼐以珠爾默特那木札勒奏十二年三月頗羅鼐卒命珠爾默特那木札勒襲郡王諭曰西藏地方關係甚要頗羅鼐經事練達下人信服伊亦能奮勉效力今已身故雖命伊子珠爾默特那木札勒襲封總辦藏衛事務而藏地素屬多事衆心不一珠爾默特那木札勒又年幼未必卽能收服衆心頗羅鼐在時凡事由伊主張不過商同傅清斟酌辦理今非頗羅鼐時可比著傳諭傅清逐處留心訪查如有珠爾默特那木札勒意見不到之處卽行指示惟期地方安靜不生事端今歲準噶爾又往熬茶當留心防範此際衆人意見情形及珠爾默特那木札勒襲爵辦事後各處人心輸服與否俱一一體訪具摺奏聞倘有一二滋事之人卽酌量辦理以示警戒四月奏言阿里克地方向係頗羅鼐長子公珠爾默特策布登駐守嗣因足疾回藏茲頗羅鼐故阿里克緊要伊疾亦漸愈臣令仍往駐騰格里諾爾喀

喇烏蘇等處向係珠爾默特那木札勒於夏季領兵駐防今伊留藏辦事臣令派親信宰桑先期往駐再自阿哈雅克起至阿里克每卡增兵三十巡防疏下軍機大臣議行六月疏言準噶爾夷使進城熬茶各隘應增兵防範阿哈雅克騰格里諾爾一路派兵六千交該管宰桑等駐守另派噶卜倫策凌旺札勒等帶兵三百由喀喇烏蘇護夷使進藏珠爾默特策布登帶兵五千防守阿里克又派四千於工布達克布及藏內防備再準噶爾入藏徑路凡五各派兵百設卡偵探又歸併藏內之那克素三十九部落番衆俱係叛賊羅卜藏丹津舊屬夷使到時難保必無生事令移牧別處至準噶爾人等赴各寺廟熬茶時仍派兵約束并密飭知各寺廟喇嘛疏入詔軍機大臣議奏尋議調兵太多不但勞費恐伊等聞而生懼應令酌調數千於緊要處防守毋涉張皇與珠爾默特那木札勒酌辦餘如所奏行十三年二月命俟準噶爾熬茶事竣馳驛來京四月補天津總兵九月授古北口提督十四年二月調固原提督十月駐藏副都統紀山奏珠爾默特那木札勒性情乖張與達賴喇嘛有隙請將達賴喇嘛移駐泰寧上訓飭之諭曰從前藏地常派大臣二員駐劄辦事後乃裁去一員朕思藏地關係緊要彼處應辦事件有二

人相商較爲有益且換班更替有一舊人尤覺妥當傅清曾經駐藏彼處事體諒屬稔知著賞給都統銜由固原馳驛赴藏十二月紀山復奏珠爾默特那木札勒告其兄珠爾默特策布登聚兵攻取果弼奈事諭曰現在既有珠爾默特策布登起兵之信可速寄信傳清藏地關係甚要今事之真僞雖不能卽定然不可不爲留意珠爾默特那木札勒年幼躁急性好生事外貌雖依紀山教導其實紀山轉被欺蒙亦未可知使伊本無生事之心伊兄實欲進兵來藏是特其兄弟間互相侵犯辦事尙易若伊兄並無此事而伊造言誣構藉端生事則伊卽係不可存留之人速宜辦理然土默特人賦性狡詐或因珠爾默特那木札勒嚴刻屬下乘伊兄弟不和從中離間更未可定此事傅清務須沿途留心細訪倘珠爾默特那木札勒不願派大臣駐藏藉端設計以陷紀山斷不可忽略以致墮其術中如有見聞卽行具奏尋命侍郎拉布敦往代紀山傅清途中復奏言珠爾默特策布登構兵事恐未確或係珠爾默特那木札勒謀據兄地捏詞起兵事端臣至藏察看情形卽將珠爾默特那木札勒辦理得旨珠爾默特那木札勒乖戾詭譎留之終必生事或乘伊與兄構兵令四川總兵策楞等帶兵以助戰爲名相機擒戮或俟明

年章嘉呼圖克圖赴藏熬茶遣川督帶兵護送至彼伺閒殲除二者孰爲利便傅清至藏可察看情形熟籌具奏十五年五月傅清既抵藏偕拉布敦奏言珠爾默特策布登暴死珠爾默特那木札勒擅調兵甲運礮赴薩海諭曰此時惟應靜以鎮之待其自起自止在我原無治罪之心則伊亦不生猜疑之念勿因急欲解其疑心轉生一番忙亂俟其回藏後將如何舉動之處再行奏聞九月疏劾珠爾默特那木札勒往後藏時誣搆噶卜倫弟巴布登隆贊等抄沒其產給親愛又逐珠爾默特策布登之子珠爾默特旺札勒戮辱頗羅舊人殆盡現帶兵二千餘在距前藏三百餘里之達木地方駐牧諭曰此皆珠爾默特那木札勒乖張悖戾但道途遼遠可暫聽之十月覆奏珠爾默特那木札勒叛跡漸著相機擒治上命副都統班第赴藏並密諭總督策楞等備兵援剿時珠爾默特那木札勒陰通準噶爾絕我郵置軍書不達者旬日傅清與拉布敦決計先行翦除是月十三日召珠爾默特那木札勒至通司岡公署登樓數其罪誅之逆黨羅卜藏札什等糾衆圍樓縱火施槍礮達賴喇嘛遣救不得入傅清被槍自盡拉布敦亦遇害十一月策楞馳疏聞諭曰駐藏都統傅清左都御史拉布敦前因珠爾默特那木札勒潛謀

不軌情節顯著奏請相機翦除朕以伊等孤懸藏地未可輕舉曾令侯班第到彼察看情形候旨辦理乃伊等未及奉到諭旨以機有可乘遂爾便宜行事逆渠已經授首而傅清拉布敦旋爲逆黨所害爲國捐軀深用憫惜又諭曰從前西藏郡王頗羅鼐實心恭順且料理藏中事務一切妥帖後因年力就邁朕詢及將來伊二子之中孰堪爲嗣據伊奏稱長子人甚軟弱又已出家次子珠爾默特那木札勒人尙強幹能勝彈壓因是令其承襲迨伊奏事一二次以後朕於其詞意之間卽知其非伊父居心可比日後必生事端屢諭駐藏大臣留心體察嗣伊摺奏請撤駐藏官兵朕以兵數原屬無多若不准其所請轉起伊疑忌之心是以卽依所請行著紀山前往駐劄詎紀山與之設誓和好卽奏事常與同列銜名朕深責其非體是紀山不但不能懾服其心更已墮其術中矣傅清前往駐藏爲伊等所敬服遂令前往更換且慮其勢孤益以拉布敦協同駐藏乃珠爾默特那木札勒心益狡悖將伊長兄珠爾默特策布登圖害反以伊兄叛逆誣奏又伊與達賴喇嘛素有讎讐卽戕其兄遂欲計害藏中不順伊之班第等其勢將延及達賴喇嘛獨據其地雄長一方近遂將塘汛文書禁絕不通悖逆情形益漸昭著傅清拉布敦

深知奸計摺奏便宜行事以絕後患於今年十月初八日奏到朕以僅二大臣孤懸絕域不可輕舉即使便宜辦理亦於國體有關且非萬全之道批令俟班第更換拉布敦到藏日會同達賴喇嘛及藏中大格隆等明正其罪以申國法庶協天朝體制乃傳清等未及接到諭旨卽於十月十三日傳珠爾默特那木札勒到通司岡加以誅戮而傳清拉布敦旋爲伊屬下羅卜藏札什所害總督策楞奏到朕深爲憫惻不覺涕零因思傳清拉布敦若靜候諭旨遵行或不至是但珠爾默特那木札勒反形已露若不先加誅戮傳清等亦必遭其荼毒則傳清拉布敦之先幾籌畫殲厥渠魁實屬可嘉非如霍光之誘致樓蘭而斬之也夫臨陣捐軀雖奮不顧身然尙迫以勢所不得不然如傳清拉布敦揆幾審勢決計定謀其心較苦而其功爲尤大以如此實心爲國之大臣不保其令終安得不倍加軫悼耶傳清拉布敦著加恩追贈爲一等伯著入賢良祠昭忠祠春秋致祭傳清並入伊家祠從祀伊等子孫給與一等子爵世襲罔替以示朕褒忠錄庸之至意並將伊二人爲國捐軀之大節明白宣示使天下共知其不得已之苦心否則好事喜功者將借此二人爲口實而事外無知之人又有議其擅開邊釁而仍邀國家如此厚恩

者朕豈肯令是非倒置若此者乎十六年三月命立祠通司岡樞至京上親臨奠醑賞治喪銀萬兩仍賜祭葬如例諡襄烈御製詩紀其事曰衛藏西南夷極邊入我王化百餘年始猶羈縻後受贓置兵爲守防呼韓蒙古習俗尙黃教得失視此爲轉旋其何小醜背厚澤夜郎自大輕王臣託詞承平勞物力示之大信休兵屯戕兄虐下遂無忌更與外賊爲牽援血人於牙攫財賄中梗驛路軍書傳惟時奉命監彼土曰傅清暨拉布敦日覩逆勢日猖獗炎炎不息將燎原戰守不可兵力弱官軍萬里阻蜀門國事爲重餘度外二人同心利斷金知無一生有九死但期濟事酬深恩珠爾默特那木札勒汝來示汝大義存天無二日爾二日爾忘爾父叨翰藩兇渠稔惡力已張藐視二人何有焉籠中之鳥砧上魚西藏指日詎有全挺身來見忽疑慮潛呼羣醜施戈鋌傅清且前扼其臂逆王命者誅無延拉卿拔刀刺其脰罪在魁首無牽連羅藏札什其羽翼走險叫譟豕突然桀犬吠堯各爲主蜂屯蟻聚來攘挺吁嘻二臣力不逮如歸視死雙軀捐小醜烏合旋就縛駢首就戮長竿懸逆誅順撫妖氛靜衛藏萬衆如一言忠臣報主有如此智勇兼濟誠通天昔每椎心今吐氣如披雲霧瞻蒼旻不勞一旅翦渠魁豈止萬命免沈淪尸

祝社祭衆率志虔伸絕域千秋傳靈輿肅肅歸故里建祠臨奠恩頻宣錫爵賜封
延後世志予哀悼旌勳賢雙忠之氣浩千古雙忠之力敵萬軍罵賊有似奮常山
誘致大異斬樓蘭雙忠節略傳斯篇他年待入信史編又諭曰前駐藏都統傅清
左都御史拉布敦因珠爾默特那木札勒逆謀顯著先事翦除奮不顧身忠誠卓
越俱著加恩贈卹入祀賢良祠昭忠祠傅清並入伊家祠從祀不知者或訾二人
冒險邀功且議朕爲酬庸過厚也今據駐藏策楞班第等奏珠爾默特那木札勒
自立名號潛遣其心腹堅參札錫等通款準噶爾稱策旺多爾濟那木札勒爲汗
且求其發兵至拉達克地方以爲聲援幸值準夷內潰所遣使人回藏被獲得其
逆書併餽獻諸物是其陰蓄異志勾結準夷罪不容誅設非二臣協力同心決計
先辦則其貽害藏地將不可言是二臣協心甚苦而有功於國家甚大特建雙忠
祠合祀二人春秋致祭不昭勸忠令典傅清既有專祠著不必從祀家廟傅清子
明仁初襲一等子爵授三等侍衛乾隆二十五年同額爾登額賚敕往巴達克山
宣諭威德三十六年四月赴金川軍營十二月大軍攻巴朗拉賊卡明仁偕侍衛
新達蘇等於兩礮閒據山礮擊賊三十七年三月攻資哩北山賊乘雪夜逃明仁

偕侍衛喬蘇爾等分路追之賊潰遁阿喀木雅寨我軍以礮環攻賊復竄明仁追擊之五月攻資哩南山明仁偕侍衛廣吾素等有功督鑄礮七月賊番三百餘犯明仁等所守木卡擊敗之九月提督董天弼由納雲達進兵命明仁偕翼長富瑚等往助之尋自咱瑪山梁踰穆陽岡分攻木子山梁克石卡三十餘大卡木城三斬賊百餘諭部議敘十一月授二等侍衛十二月西南兩路大軍合兵進剿明仁充領隊侍衛尋隨將軍溫福攻克布朗郭宗擢頭等侍衛三十九年三月大軍攻凱立葉明仁偕侍衛彭靄擊第二峯賊卡五月進攻羅卜瓦山岡下木城石礮賊番百餘從箐內拒敵擊敗之四十年五月諭曰明仁在阿桂隊內於本年五月攻取康薩爾山梁等處隨衆帶兵乃此後打仗並無伊名著阿桂查明據實覆奏尋以明仁患病未愈奏諭曰明仁在彼無用著來京明仁懇留軍營自效力將軍阿桂代奏奉旨聽其自留看如何效力九月卒於軍營諭曰據阿桂奏明仁自到軍營以來帶兵打仗頗屬奮勉近雖抱病尙力疾行走茲因病身故等語覽奏深爲憫惻著賞給副都統銜並著該部卽照贈銜議敘所有子爵卽著伊子寶綸承襲尋賜祭葬如例

拉布敦

拉布敦滿洲正黃旗人父尙書錫勒達康熙五十五年拉布敦由閒散襲其叔祖勒爾圖三等輕車都尉世職雍正七年赴北路軍營隨靖邊大將軍傅爾丹剿準噶爾於和通呼爾哈諾爾拉布敦與賊連戰數晝夜斬獲甚衆十年八月隨額駙策凌敗賊於額爾德尼昭十二月授世管佐領十一年查敘軍營超勇人員賞戴孔雀翎十二年奉命率兵越阿爾台山偵探十三年保列一等引見以參領用乾隆元年補參領六年二月授鑲紅旗滿洲副都統三月調正紅旗八年授北路軍營參贊大臣九年授定邊左副將軍疏言偵得布爾吉推河有厄爾特宰桑額勒慎等十餘戶駐牧布延圖河源有烏梁海得木齊札木禪等十餘戶駐牧布爾吉推河在阿爾台山梁外布延圖河源在阿爾台山梁內均距卡倫不遠見密札坐卡侍衛等嚴防詔軍機大臣等議尋議伊等或因避雪來但日久未免生事準噶爾夷使哈柳現在京應諭以守定界毋任意游牧令還告台吉噶爾丹策凌卽撤回從之十年疏言烏梁海得木齊烏爾巴齊等避雪駐牧黃加書魯克距卡倫甚近託爾和烏蘭及布延圖哈瑪爾沙海卡倫外皆有準噶爾人嚴飭坐卡侍衛等

小心防範報聞十一年還京補正白旗滿洲副都統十二年署古北口提督十三年四月駐藏副都統傅清期滿命拉布敦往代十月諭曰據拉布敦奏西藏新襲郡王珠爾默特那木札勒寄知阿里克交易回人等告稱現在準夷內亂伊卽嚴飭各卡緊密防守如有準夷來到卽送至藏等語藏地關係緊要駐藏大臣凡事最宜查取確實權其輕重相機辦理毋得稍有滋事藏內不可容留準夷一人可傳諭拉布敦知之十四年正月還京授工部左侍郎仍兼正白旗副都統六月兼正藍旗副都統並署鑲白旗漢軍都統十二月命仍赴藏辦事傅清亦復往十五年九月擢都察院左都御史時珠爾默特那木札勒謀叛拉布敦與傅清決計翦除十月十三日召至通司岡公署數其罪而誅之逆黨羅卜藏札什糾衆肆逆二人同時遇害事詳傅清傳總督策楞以聞上軫悼諭獎其奮不顧身忠誠卓越心甚苦而功甚大贈一等伯入祀賢良昭忠二祠恩授一等子爵世襲罔替初拉布敦族隸鑲紅旗至是命入正黃旗十六年命立祠通司岡樞至京上親臨奠醑賞治喪銀萬兩仍賜祭葬如例諡壯果并特建雙忠祠祀之嗣子隆保襲世職

班第

班第蒙古鑲黃旗人姓博爾濟吉特氏康熙五十六年由官學生授內閣中書五十七年二月遷欽天監五官正十二月遷理藩院堂主事五十八年遷內閣侍讀六十一年授內閣侍讀學士雍正二年擢內閣學士三年四月打箭鑪外裏塘巴塘乍了察木多及雲南之中甸畫歸內地魯隆宗諸部落歸達賴喇嘛轄詔班第偕副都統宗室鄂齊赴西藏宣諭五年遷理藩院侍郎尋因辦事未協命仍在學士上行走九年五月賜孔雀翎十二月補公中佐領十年充繙譯鄉試正考官十一年軍機處行走十三年九月署工部侍郎時恭纂世宗憲皇帝實錄充副總裁乾隆元年十一月署兵部侍郎十二月充經筵講官三年授兵部侍郎四年六月兼理藩院侍郎尋擢湖廣總督十月奏修隄塘補倉貯各事諭曰不必欲速但實心竭力爲之十一月奏言臣察閱營伍立賞格勤訓練期兵強餉實又詞訟案嚴禁積蠹把持得旨嘉獎十二月以湖南鎮守永綏苗人不法偕巡撫馮光裕等籌剿閱兩月軍務告竣諭獎其成功速交部議敘五年丁母憂六年正月仍在軍機處行走三年授兵部尙書兼議政大臣八年兼管理藩院事十一年九月署山西巡撫十二月諭曰準噶爾現遣使進貢班第有應辦事件著來京供職尋兼正藍

旗滿洲都統十二年充會典館正總裁十三年正月授內大臣赴金川軍營辦理糧餉四月加太子少保班第奏糧運四事一兵役分別支折銀米省運費一內地運費口糧量加給一口外最險糧站增賞銀一臺員間委丞倅州縣稽察軍機大臣議行六月赴軍前督攻昔嶺一路七月上聞四川巡撫紀山聽州縣派徵累民命班第回川查察閏七月解紀山任班第署巡撫八月復赴軍前十月諭曰朕命班第前往四川雖爲辦理糧運用兵非其專責但伊身爲本兵且係軍機大臣於軍中攻剿事宜及將弁功罪皆伊職掌所在不得以專辦糧餉遂一切置之膜外乃伊見軍機未能速竣既不肯任其事惟請另派大臣經理而於訥親張廣泗之乖張退縮老師糜餉初未據實入告及降旨詢問伊於張廣泗之罪直陳無隱而一字不及訥親爲大臣者固宜如是乎在伊自謂辦餉無誤卽爲克盡己職其他自有任其咎者惟欲脫身事外爲自全計而無吉凶同患之心居心若此國事其何賴焉班第不稱兵部尙書之任但辦理糧運尙屬妥協著從寬降爲侍郎十四年賞副都統銜由四川赴青海辦事十五年四月調赴西藏辦事未至西藏郡王珠爾默特那木札勒謀叛駐藏都統傅清左都御史拉布敦設計誅之旋爲逆黨

羅卜藏札什所害十二月班第抵藏羅卜藏札什等伏誅十六年授都統銜諭防
準噶爾窺藏十七年回京仍在軍機處行走補正紅旗漢軍都統兼管理藩院事
十八年正月署兩廣總督三月緝獲增城東莞奸民王亮臣等置之法十月奏言
廣東庫貯礮械甚多皆前蕩平藩逆及海寇時所繳日就朽壞可惜請將完好者
修整餘悉鎔鐵備用上嘉之十九年閏四月召回京七月授兵部尙書赴北路軍
營署定邊左副將軍時準噶爾內亂杜爾伯特台吉策凌烏巴什策凌蒙克輝特
台吉阿睦爾撒納和碩特台吉班珠爾等相繼降陳準噶爾台吉達瓦齊昏暴狀
詔定於明歲進剿諭班第籌辦軍務九月奏言軍營所需駝馬牛羊解到時宜妥
收備用札布堪呢圭等處冬令暖饒水草臣檄喀爾喀親王額琳沁多爾濟等赴
彼督牧又言準噶爾屬之烏梁海居阿爾台以內今春誑言投順同札哈沁宰桑
瑪木特掠阿睦爾撒納妻孥阻歸順路應懲創示威臣檄參贊大臣薩喇勒努三
等帶兵往剿報聞十月奏擒烏梁海宰桑車根赤倫等收戶口千餘復遣兵擒瑪
木特及通瑪木特盡收其屬諭曰班第自到軍營以來奮勇果斷調遣合宜深屬
可嘉著賞給世襲子爵補授正黃旗領侍衛內大臣仍賞銀一千兩十二月授定

北將軍來京陛見奏言臣自烏里雅蘇台軍營啟行至推河見阿睦爾撒納示以軍營應辦事宜並與商明年二月間赴額爾齊斯屯田應遣兵一萬據形勢後隊兵二萬整頓繼進準噶爾衆心已叛大軍一到易於成功又額爾齊斯爲杜爾伯特原屯地臣令策凌及策凌蒙克派員協往督耕又言出征滿洲蒙古及索倫巴爾呼喀爾喀厄魯特各兵應照例均給廩食攜炒米麪牛羊乾魚並鹽菜銀初到軍營時亦照例資給又原議進兵口糧給兩月現議二月內哨探兵先進應改帶四月軍機大臣議如所請二十年正月詔定西北兩路軍營大臣名次北路班第爲帥定邊左副將軍阿穆爾撒納爲副領哨探兵先進額駙色布騰巴爾珠爾郡王品級青滾雜卜內大臣瑪木特奉天將軍阿蘭泰爲參贊西路定西將軍永常爲帥定邊右副將軍薩喇勒爲副領哨探兵先進郡王班珠爾貝勒品級札拉豐阿內大臣鄂容安爲參贊兩路軍至博羅搭拉會合時奏事首班第尋奏言收獲包沁札哈沁等衆謀哈薩克掠達瓦齊牧準噶爾生計蹙臣與阿睦爾撒納等議於二月內先後進剿諭曰從前原議於四月內進兵且未深知達瓦齊情形故令於額爾齊斯留兵屯田今進兵甚早而達瓦齊之力已窮兵到即可成功其額爾

齊斯仍需留兵屯田與否著班第等另行籌辦此次進兵特爲平定準噶爾將阿睦爾撒納等四衛喇特封爲四汗俾所部咸登衽席大兵奏凱後阿睦爾撒納策凌等帶領新降人衆前赴熱河朝覲所屬人等卽留居原游牧處俾無往返之勞二月奏言平定準噶爾後額爾齊斯亦需駐兵管新降人衆請照原議屯田諭曰額爾齊斯仍須屯田著照班第所請行至大功告成後伊犁已留重兵兼有大臣駐劄額爾齊斯距阿爾台甚近何必更設兵駐防著諭班第知之尋奏言臣前在京與軍機大臣會奏哨探兵及續進大兵需馬七萬餘今陸續解到除以二萬六百餘匹應付六千哨探兵已於二月十二日起程臣俟察哈爾等兵到卽將糧馬妥辦帶領前進其續到兵令喀爾喀親王成袞札布等監辦事畢成袞札布赴屯田地方辦事又奏哨探兵起程後臣卽派屯田兵二千起程報聞三月奏領察哈爾兵丁於二月二十日起程令永貴將後隊官兵口糧辦理支給餘駝酌帶糧餉繼進諭曰此奏殊未明晰現在大兵鼓勇直入成功指日可期官兵已攜帶口糧四個月又何須額外帶往此或預備賞賚之用或從前議帶兩月口糧後復定爲四個月而於官兵起程時未及滿支今特爲之補運均未聲明如係帶往預備賞

賚之用尙屬可行若官兵已攜帶四個月口糧今復多行裹帶接續前進萬餘兵丁應備口糧若干需用駝隻若干中途保護旣分兵丁之力且防意外之虞殊未妥協著傳諭班第查奏尋復奏言前隊哨探兵千俱帶四個月口糧臣所領察哈爾兵二千亦帶三個月口糧並無減半留存須俟續運者特備賞之項前未攜帶現計衆兵進發後馬駝尙屬有餘臣意酌帶軍餉不特可以接濟大兵而平定準噶爾後一切賞項亦可動支且此次解餉兵卽繼大兵前進似可無虞又言臣於三月初六日至齊齊克淖爾查現存馬四千餘尙有未到者前隊兵已出卡倫三日若俟馬全到始出卡恐相距遠難策應卽將現馬支給千五百兵乘騎於初八日帶兵起程出巴顏珠爾克卡倫其餘五百兵俟馬到以次續進又言三月十九日至郭勒阿里克臺據阿睦爾撒納文稱將新投誠宰桑阿巴噶斯哈丹等奏明帶往額爾齊斯屯田現留貝勒齊木庫爾候護軍統領塔勒瑪善到時指示耕種再現在赴察罕呼濟爾後隊續進大兵速行方有益臣卽行催塔勒瑪善等速往會辦屯務將現領察哈爾千五百兵內選馬力健者六百與喀爾喀郡王桑齊多爾濟等減裝馳進報聞未幾奏至額爾齊斯之西喇托輝已與阿睦爾撒納前隊

會合諭曰大兵前進自宜略分先後經朕屢降諭旨令班第與阿睦爾撒納行程約離數日相繼前進一則阿睦爾撒納係準噶爾人衆知名之人今伊帶哨探兵前行人多認識收服較易再前隊既有哨探兵復有將軍隨後繼進聲勢聯絡軍威益振如合併一處則衆人但知有將軍不復更知有副將軍轉置阿睦爾撒納於無用之地殊與軍行無益前因永常急遽進兵其意惟恐薩喇勒首先成功伊不得同膺爵賞朕已降旨訓飭班第若亦存此意卽屬器量狹小豈朕委任之意卽使阿睦爾撒納先抵伊犁克奏膚功朕於班第亦必加恩若先存急於赴功之意恐反不能承受朕恩矣著伊二人務須酌量相離數日陸續進發不得同在一隊行走又諭曰大兵兩路進前抵博羅塔拉指日卽可蕩平伊犁平定後班第帶領官兵駐伊犁大臣官員兵丁等需用口糧若照永常所奏由內地運送則輓輸勞費斷不可行如向該處夷衆責令供應又未免滋擾朕意平定伊犁後加封投誠各台吉令其自行管束屬衆至達瓦齊乃準噶爾大台吉其牧養牲畜及伊屬下輸納必多非諸台吉所應分用應卽以辦給官兵用資口糧再有不敷將帶往銀兩向厄魯特回人等酌量購買毋得滋擾班第豫爲籌辦四月奏言臣等會合

後於三月三十日至額爾得里克阿睦爾撒納先進臣等繼發約至察罕呼濟爾會軍四月初六日臣至彼詢知阿睦爾撒納等未得達瓦爾信已赴額米爾等處臣以大兵既深入亟選兵八百令瑪木特阿蘭泰先行往會阿睦爾撒納餘兵八百臣隨往接應報聞是月班第等既至博羅塔拉行文西路副將軍薩喇勒會剿而是時達瓦齊在伊犁日縱酒爲樂不設備比聞大軍至乃調兵潛竄特克斯我軍獲其調兵者日巴朗察罕及鄂勒錐圖盡知之於是班第等謀徑渡伊犁河協力追擒北路軍由固勒札渡口越推墨爾里克嶺進西路軍由喀塔克渡口越克特滿嶺進疏陳方略諭曰辦理深屬允協達瓦齊若能去逆效順朕自當另有加恩之處今既潛身遠竄一經擒獲卽當獻俘京師以彰國法五月大軍入伊犁準噶爾屬衆盡降偵達瓦齊據格登哦喀喇巴圖魯阿玉錫等以二十餘騎突擊之驚遁捷聞上獎班第有功封一等誠勇公賜寶石頂四團龍服金黃纒朝珠尋奏言伊犁厄魯特生計拮据不足供應大兵諭曰準噶爾地方數年來屢被兵革又爲哈薩克所掠生計自屬拮据若於伊犁多駐大兵深屬未便從前薩喇勒奏請停止伊犁駐兵經朕傳諭班第等令其酌留兵丁一二百名爲駐藏大臣差遣委

用今功已告成大兵卽宜陸續撤回班第等自當卽爲辦理若尙未議撤卽遵旨妥協籌辦其應酌留兵丁一併議奏六月奏言伊犁卽令大臣駐劄辦事不可不留兵駐守備差遣應照原議駐五百兵派察哈爾三百喀爾喀二百達瓦齊雖未就擒諸事業已大定伊犁毋庸大兵久駐應遵旨撤回臣等亦遷移伊犁河北尼楚袞駐劄辦事凱旋兵分隊撤還上報可是月奏獲達瓦齊命獻俘京師先是大軍之初進也阿睦爾撒納妄請給印文招降彼輝特屬上察其蓄異志密諭班第嚴約束至是伊犁既定阿睦爾撒納凱旋圖據伊犁誘各屬人衆附己遣人赴哈薩克揚言自領兵平定伊犁而不云天朝大兵又詭稱哈薩克將犯邊謂非令伊爲總台吉不可私調兵九千置副將軍印不用用準噶爾舊台吉噶爾丹策凌小紅圖記班第及鄂容安薩喇勒以其叛逆已著密疏劾之諭曰阿睦爾撒納圖據準噶爾僭越妄行情跡顯著前班第等初奏時朕尙以爲防微杜漸之意傳諭公同體察如阿睦爾撒納果有實跡明白具奏嗣復降旨阿睦爾撒納受恩至重未必卽萌悖叛之心使伊罪未彰而治之以法朕心不忍且使新降之人俱生疑懼是以未卽傳旨令伊等辦理今據班第等詳細奏聞阿睦爾撒納種種不法圖據

準噶爾已無可疑豈必待其生變始爲實據由此觀之伊未必卽遵旨入覲卽使前來若令仍駐準噶爾斷不能安分靜守勢必至妄爲滋事與其俟交結煽惑變遲而力費何如及今乘機辦理之爲得也朕意已決此事卽宜速行辦理著密諭班第等如阿睦爾撒納尙未起程班第等卽密商擒治數其罪惡於軍前卽行正法如伊勉強行至中途逗遛不前或經伊游牧處託故遷延卽著烏里雅蘇臺辦事大臣阿蘭泰等領兵赴伊等牧處將伊妻子及任用宰桑等一併拏解來京七月奏言臣等察看阿睦爾撒納甫至伊犁卽不願他往詢其何日起程入覲輒推託支吾臣等據理開導雖勉強聽從而遲疑瞻顧之情時時流露數日內其辭又復變遷自云俟拏解達瓦齊至厄楚亥並凱旋兵起程訖卽速行入覲伊性極狡詐臣等議令喀爾喀親王額琳沁多爾濟監同起程俟期近再示彼知抵熱河後皇上訓諭開導伊背逆之意自必潛消諭曰前班第屢次密奏阿睦爾撒納負恩狂悖斷難姑容是以特降諭旨令其密行擒治今阿睦爾撒納復欲速來入覲語屬可疑未必出於至誠特因所行非理懼班第等擒治因而多方逞其狡猾是其言雖可聽實無欲來之心或行至中途託病遷延或至塔爾巴哈臺游牧依戀久

居均未可定夫以阿睦爾撒納如此奸宄狂悖豈僅爲降旨開導所能了事若不將伊擒治又何如置之不問今伊惡跡已顯著如此班第等不思密爲辦理但稱朕向加訓諭以折其心是全不知事理之輕重矣著速諭班第等於此際奉到前月二十八日所降之旨已將阿睦爾撒納擒治甚善若未及辦理而伊已起程前來班第等接到此旨約計阿睦爾撒納行程未遠卽遣人將伊追回擒治如已逾旬日之外亦須沿途密偵消息再行辦理總之阿睦爾撒納逆跡已著不可姑容以致貽害將來然路途遙遠班第等須盡心籌畫乘時決斷毋得稍自委靡致失機宜再額琳沁多爾濟不過一小有才之人未經更事一切密要之語且勿令與聞班第等又劾奏阿睦爾撒納置上賜孔雀翎不戴用且諱言已內附受爵不肯實告厄魯特及臣等趣之起行復令納噶察告稱阿巴噶斯烏克圖與喇嘛等議若不令阿睦爾撒納統領準噶爾伊等寧剖腹而死種種煽脅諭班第等速擒治八月奏阿睦爾撒納已於七月初十日自尼楚袞軍營與額琳沁多爾濟同行又撤回大軍在後似必前來入覲諭曰阿睦爾撒納果至熱河辦理自易且將伊罪惡令暴白於新來投誠人等亦可以快衆心而彰國法但伊甫經起程卽有人指

其罪狀紛紛告訐伊豈不聞風畏懼且伊自揣所爲必不肯前來入覲雖已起程或沿途託故戀住游牧事所必至伊現在已抵何處摺內未經聲明前曾諭及起程若尙在十日以內卽行擒治此時曾否辦理當加意慎密至阿巴噶斯等皆受其籠絡今但將阿睦爾撒納擒治釁端卽可永弭宜斟酌辦理旣而班第等遵前旨遣追阿睦爾撒納適哈薩克使者至願隨入覲恐其驚疑不果追是月十九日阿睦爾撒納行至烏隆古忽以印授額琳沁多爾濟徑由額爾齊斯遁旋遣心腹人至札卜堪取其孛約日颺去會烏里雅蘇臺大臣阿蘭泰豫奉旨遣兵往收其孛無脫者阿睦爾撒納旣叛阿巴噶斯哈丹等掠臺站伊犁道梗逆黨克什木巴朗敦多克曼集烏克圖等糾喇嘛回人作亂班第與鄂容安陷賊中由固勒札赴空格斯轉戰至烏蘭庫圖勒賊蜂集力不支遂各自盡上初聞班第陷賊信諭曰昨據策楞奏從伊犁脫出之索諾木告知班第等陷賊朕心深爲憫惻已傳諭策楞令其派侍衛滿楚等前往偵探並著從優賞賚期速得實在情形蓋進剿烏合之衆原屬無難惟伊等因國事爲賊所困每一思之不勝憤懣然亦未知虛實著策楞等設法通信傳諭班第等以朕初意準噶爾危亂之餘甫經平定若屯駐大

兵恐多驚擾是以但命伊等駐劄辦事兵少力弱爲賊所困非失守封疆可比伊等或相機脫出或忍死以待大兵方爲大臣舉止若謂事勢至此惟以一身殉之則所見反小矣鄂容安素稱讀書人漢蘇武爲匈奴拘繫十九年全節而歸阿睦爾撒納固不足比匈奴我大清又豈漢時可及自當愛惜此身以圖後效恐伊等以失守罹罪不識大義遽爾輕生夫爲人臣子若君父欲加之罪亦惟順受豈可預料而以一死爲賢於生於心安乎朕今命定西將軍札拉豐阿等會合各路大兵竭力剿捕務體朕憫惻伊等之心俾逆惡知所懲創不得稍存姑息十月策楞奏班第等引決自裁狀上軫悼卽以班第子巴祿襲誠勇公爵二十一年三月大軍復定伊犁逆黨次第就縛後阿睦爾撒納竄死俄羅斯七月諭曰班第鄂容安靈櫬將次到京前已降旨親臨祭奠並令三品以上大臣齊集用昭優卹二臣臨危致命義烈所著可嘉可憫其靈櫬著准其入城各於本家停設並加恩入祀昭忠祠應得卹典該部察例具奏尋賜祭葬如例諡義烈諭曰班第鄂容安捐軀殉節今靈櫬已到卽將逆黨阿巴噶斯克什木巴朗馘耳於柩前祭奠特建雙忠祠祀之御製詩曰昔有傅介子手斬樓蘭頭通權建殊績芳名播千秋況乎統三軍

既悉彼逆酋一武夫之力何事仍夷猶逡巡大軍撤偏師五百留彼梟有密約入
覲中逗遛八月廿五日三處共一謀阿睦爾撒納來阿爾台陬將合其部衆挈妻
孥以逃是則豫有旨其妻孥盡收厥阿巴噶斯斷我軍書郵克什木巴朗伊犁逞
劫偷兩路如期發猖狂肆叫誼蜂屯更蟻集不可爬與梳二臣知不敵全軍將內
投而彼截歸路加以聚蚍蜉巴朗謀致辭權假爲我速徐當備馬駝送之返皇州
二臣怒唾罵天朝無此媮效死視如歸背義生肯求奮旅更前進怒髮衝兜鍪終
知事不濟畢命飲屬鏤問罪重整師豈辭雪在途旋復定伊犁脅從寬厥尤一二
助惡者繫虜皆虔劉渠魁竄異域王師奮遐搜亦聞哈薩克縛獻深同仇命求二
臣骨靈輿返首邱臨奠列雙忠惜哉淚湧流初若聽我言寧有今日不忠於國有
濟烈惟己不渝究匪偷生比使我悲心悠朱門歌舞輩青史文章儔我豈爲彼哉
長歌旌乃休二十六年命圖形紫光閣御製贊曰元戎率師平定伊犁而何阿逆
叛亂乘危變出不期投軀西漠故里櫬歸痛哉酌酌子巴祿官至都統

熊學鵬

熊學鵬江西南昌人祖一瀟工部尙書學鵬雍正八年進士授兵部主事十三年

充貴州鄉試副考官尋遷員外郎升郎中乾隆五年授山西道監察御史六年二月奏王貝勒貝子公所屬五品以上長史護衛典儀等官係引見除授如當斥革應奏參交部覈議又滿洲蒙古漢軍旗人有爲綠營武職及八旗文員老病休致者應照在旗武職例查明曾經出兵打仗及有無功牌分別給俸從之三月請定京察濫舉處分奏言外省大計卓異卽予升用京察一等例止加級若將濫舉之堂官照濫舉之上司議處輕重未平應請將該員所犯劣蹟在保舉前者堂官降二級留任在後者降一級留任再筆帖式庫使等官有由司覈定者將司官一併議處下部議行七年奏京師竊匪肆行以五城有協緝之條三營無協拏之例嗣後遇有竊案除報明本城及該管營員躡緝仍移會各營協緝如有弋獲酌加升賞疏縱者責革如所議行八年命巡視臺灣九年遷太常寺少卿十年遷通政司右通政使十一年遷太僕寺卿十三年疏言太僕寺多司蒙古事見設員外郎八缺蒙古僅二請於滿洲六缺內改設滿洲蒙古主事各二並請無庸專用科甲人員從之十五年五月京師旱詔求直言學鵬奏上年秋審勾決人數過多近來臣工條奏更改刑名律例多尙嚴刻請槩行禁止諭曰此奏甚屬悖謬上年秋審勾

決朕詳悉裁定其中侵貪各犯實乃法所不宥若謂因此而致雨澤愆期遂恣貪官污吏之所爲適足以干天怒而召災沴豈得爲修省之要務乎熊學鵬雖爲此謬論朕慎持政柄必不爲浮言所動果使貪風未卽悛改無論京師一隅雨未霑足設令更甚於此亦不因一時災祲而於立政之大經御世之大法廢而不舉至言官及外省臬司條奏律例或比擬失當經部臣議駁者不一而足以此時刑獄而尙以爲過嚴信爲罔知輕重之尤者矣翫法縱奸思以感召休和如熊學鵬所云者直瞽論耳本宜議處但朕旣降旨求言姑從寬勿問特詳悉剖示令中外諸臣共知明刑弼教不可爲貪吏開倖生之路其有遊談附和者必從重治罪七月以查驗牧場馬匹請將出差養息牧放之滿卿世貴就近派往上責其規避下部議革職十六年二月賞復原銜六月補光祿寺卿十九年遷太常寺卿二十一年調順天府府尹二十四年四月擢內閣學士兼禮部侍郎銜仍兼管府尹事閏六月遷兵部右侍郎二十五年五月充殿試讀卷官十月調刑部右侍郎二十六年二月充會試知貢舉奏停進呈試卷另行謄錄例三月授廣西巡撫二十七年調浙江巡撫三十年三月京察以勤慎供職下部議敘五月其子候選知州之台爲

書吏指缺撞騙問擬杖徒學鵬自請嚴議上宥之並准其子贖罪三十二年四月
奏各省大計藩臬兩司向不在考覈之內但兩司與督撫最爲親近請嗣後令督
撫出具考語另單進呈得旨允行閏七月奏浙江向於漕糧起行後將辦漕府州
縣及衛所備弁等官開具賢否事實造冊咨倉場衙門備查查府州縣等官所司
不止漕糧一項如有舉劾向不與倉場會覈此項冊籍徒爲具文請停止從之三
十三年丁父憂三十四年特命署浙江巡撫三十五年丁母憂三十七年仍命署
浙江巡撫三十八年正月服闋調補廣西巡撫八月上林縣僮匪陸李能倡造逆
謀聚衆滋事學鵬帶兵往剿擒獲首逆及夥匪李春榮等五十餘名事竣上嘉其
安速下部議敘四十年調廣東巡撫先是明江同知嵇璇失察民人私越關隘潛
赴安南左江道秦廷基袒護改供坐罪前任同知鄒錫彤總督李侍堯查明奏參
經學鵬審訊屬實問擬斬候至是廷基自縊諭曰熊學鵬既將秦廷基擬以斬候
乃任其在省安居並不卽行收禁致該犯得以在寓投縊其事實由熊學鵬釀成
況秦廷基袒護改供一案熊學鵬近在粵西並未查出奏參難保無徇庇之處直
至李侍堯秉公參劾熊學鵬乃不得不嚴行定擬其隱微已不問可知朕以熊學

鵬素常辦事勤慎小心是以調赴粵東大省不料其荒唐一至於此實爲孤負朕恩著卽革職發往川省辦理軍需奏銷事務其軍營各員虧短官項力不能完者卽著熊學鵬賠補以爲督撫徇情沾名者戒尋命籍其家四十四年召來京以老病賞三品銜飭令回籍尋卒子之福乾隆丁丑科進士之台廣東高廉道

鄂容安

鄂容安滿洲鑲藍旗人大學士鄂爾泰長子雍正十一年進士改庶吉士軍機處行走乾隆元年授編修在南書房行走二年遷侍郎三年七月充日講起居注官十二月轉侍讀五年六月擢詹事府詹事時鄂爾泰承旨奏辭再三諭曰朕之用人悉秉至公毫無私意於其閒古云非喬木之謂有世臣之謂蓋以大臣子弟果能立志向上諸事阻勉斯能不愧世臣可以爲國家宣力朕觀鄂容安及大學士張廷玉之子張若靄朱軾之子朱必塔皆能遵守家訓祇受國恩況鄂容安張若靄向蒙皇考命在軍機處行走原欲造就成人此次擢用乃朕量材加恩卽寓栽培之道鄂爾泰不必以己意固辭八月命入尙書房隨福敏行走七年以與聞左副都御史仲永檀密奏留中事革職詳永檀傳八年命仍在尙書房行走補國子

監祭酒九年偕刑部尙書來保往奉天同侍郎兆惠會審奉天將軍額洛圖扣餉
勒派等款得實論罪如律十年署兵部右侍郎襲父三等伯爵十二年五月授兵
部左侍郎九月以與尙書彭維新等議處總兵高琦武備廢弛一案違例邀譽奉
旨訓飭部議革職得旨從寬留任十三年三月充會試副考官四月兼翰林院掌
院學士尋兼管國子監事十月署河南巡撫十二月以辦送金川兵差妥協議敘
賞孔雀翎十四年正月疏陳文武各員優劣上嘉之四月河臣顧琮往署總漕諭
鄂容安就近料理豫省河務九月疏言豫省有伏牛山居嵩山南界連秦楚二省
袤延八百餘里山多箐密臣於查閱營伍之便自邾縣汝州至伊陽縣渡汝水入
伏牛山經十八盤等處至孫家店閱兵復由分水嶺等處至嵩縣出伏牛山親履
查看飭各員弁不時巡查該管道員嚴行督察再豫省各關其近秦省者陝州有
硤石關靈寶縣有函谷關閩鄉縣有大谷關近楚省者淅川縣有荆子關信陽州
有平靖關桐柏縣有犁耙口俱通商大道恐奸宄藏匿現飭行保甲嚴禁諭獎其
諸事認真實授河南巡撫時衛輝參將阮玉堂因操演鞭責兵丁過甚致譁鄂容
安以玉堂失職應題參但兵丁甫經喧鬧遽參營弁恐啟驕悍之漸奏請嚴拏兵

丁分別首從定擬後解玉堂任上是之十月疏言豫省常平倉穀前准部咨以雍正年間額貯二百三十一萬九百九十九石爲准除實存並借糶抵補外計缺額穀二十九萬七千四百石有奇應收捐補足臣維倉穀期實貯而地方繁簡不同豐歉各異宜乘此定額之際將各府州縣應貯穀數勻派開封府貯二萬石歸德陳州懷慶南陽彰德衛輝六府各貯一萬五千石河南汝陽二府各貯一萬五百石戶口最多之許州等二十七州縣各貯二萬五千石其次通許等五十五州縣各貯二萬又其次河陰等之二十七縣各貯一萬五千石統計適合雍正年間定額至各府州縣原貯穀較現派額溢者糶價提解司庫撥補未足額者此次額數足補後將來有餘另案存貯遇賑卹并平糶未買以此撥補現在溢額糶價已敷提解者全提不敷者於明歲春糶案內補提其缺額之區所撥穀價如秋成後本地米價未平卽於隣近價平處買補旣與定額相符又使緩急有備部議允行十一月賜所襲伯爵號曰襄勤十五年二月疏請將省會城門鎖鑰歸城守尉掌管允之四月奏言開歸陳三府地勢窪下多水患非開濬溝渠不足資宣洩臣查開封府屬泉水所歸之河曰賈魯河發源於滎陽縣聖僧池各泉會河索須京三水

成河歷開屬之河陰滎澤鄭州中牟祥符尉氏陳屬之扶溝西華至睢寧之周家口入大沙河其附以東注者則有鄭州之金水河七里河磨河欒河洧川之杜公河接入尉氏之太溝河康溝河陳屬扶溝之雙泊河蔡河西華之清流河皆挈兩屬溝渠之水而同趨於賈魯河此開屬洩水之幹河也陳州府屬衆水所歸之河曰大沙河發源於汝州屬魯山縣伏牛山之莫大嶺歷南陽府屬之舞陽許州屬之鄆城而入陳屬之西華商水睢寧項城沈邱以入江南太和縣下達於淮其附以東注者則有西華商水之渚河扶溝太康西華睢寧之清水河太康睢寧之古黃河枯河睢寧沈邱之察河皆挈本屬溝渠之水而入於大沙河此陳屬洩水之幹河也歸德府屬下遊有渦河而惠濟一河據其上游諸水由惠濟而入渦河者居多惠濟河自開屬中牟縣西十五里鋪分洩賈魯河之水由祥符陳留杞縣入睢州經柘城至鹿邑入渦河以達於淮其附以東注者則有儀封睢州柘城之老黃河陳留杞縣之坡河接入杞縣之橫河杞縣睢州之挑河司家河太康柘城之沙河皆挈三屬溝渠之水而同趨於惠濟河以入渦河又鹿邑之清水河下接澗河由江南之太和縣以入渦河又有濯河卽黑河由茨河歷江南之蒙城縣入渦

河則是渦河又爲歸屬洩水之幹河也伏查諸郡幹河如賈魯河大沙河渦河俱各深通惟惠濟一河上流尙須開濬資蓄洩其各支河內應行開濬者開封則有鄭州之金水河七星河中牟之欒河祥符之城東乾河南陽儀封之周家河李家渡口尉氏之乾河陳州則有太康之燕城河西華商水之渚河睢寧東西之蔡河枯河古黃河項城之蔡河沈河歸德則有寧陵之舊沙河考城商邱之沙河睢州之橫河挑河司家河姬家大坡河鹿邑之清水河黑河以上諸河皆爲承受溝洫貫注幹河之要道此內有止須疏濬即可通流者有應擇地改挑者有應逢灣取直者有僅存河形必須另挑者有道里較長土方較多猝難竣事者酌量工程難易或分年帶挑或借給口糧酌量民力籌辦毋庸動項惟陳屬項城受汝寧屬上蔡洪河減水之害或謂塔橋攔阻水勢應改拆木橋或謂竹絡壩減水過多應另建石壩臣以爲其害不在於橋身之阻水亦不在竹絡之多洩因橋之西壩過寬挑水東注所致止須將東西牆改作一律使洪河減水南歸茅河黑河之水東歸蔡洪兩河分洩自無泛溢之虞至汝寧府汝陽縣亦以洪河爲患查向來西南山水盡歸乾江河自渦東埽口決山水入爲汝害臣飭令照舊堵塞使山水全歸乾

江河則洪水已減自能容受至歸屬永城之巴溝河下接江南宿州沙僵灘此工關涉兩省應俟江南咨覆興工臣於各屬挑濬處每年底查核勤惰或附參或保薦使工員咸知慎重庶沮洳漸成膏壤諭曰如此留心本務方副委任之意勉之十月上巡幸河南鄂容安奏紳民感沐皇仁情願捐輸共收銀五十八萬七千餘兩充公用諭曰朕時巡方岳一應道路橋樑等費皆准開銷正項從無絲毫累民之事卽城垣祠廟有應勦聖灑掃略爲整葺者祇宜動支帑項卽其間或有開銷不到之處現經賞給該省公項銀兩以資通融辦理之用曾何藉於輸將鄂容安此奏甚屬錯誤因其據實陳明尙不致陷於欺隱之咎猶可稍寬但朕省方問俗勤恤民隱尙慮助之弗周豈容供用轉資於下鄂容安不能仰體朕意殊失政體著傳旨嚴行申飭紳民樂輸之項俱著令給還鄂容安奏樂輸實出至願如復行給還非特不肯領回且頭緒紛繁難免胥吏中飽懇請聽其所願至辦理之初並未具奏實屬錯謬伏祈嚴治臣罪諭曰朕巡方問俗蠲復頻仍惟慮德意未能徧逮一切供頓絲毫不以累民前降諭旨甚明鄂容安惟知下情踴躍輸將遽行冒昧從事本應嚴行治罪但既經據實陳奏究與有心欺隱者有間情尙可寬且以

陸續輸工之項復令紛紛具領恐奸胥滑吏從中舞弊轉以飽其欲壑此語亦頗近是則給還之舉實屬勢所難行然辦理失宜款項無憑稽覈以閭閻尊君親上之忱適足資其糜費侵用是又始終不能仰體朕意獲罪尤甚者矣著鄂容安將蠲輸銀兩作何辦理之處詳悉查明繕冊送軍機處逐一查核毋得稍有朦混十一月諭曰朕於昨日回鑾今日見河南布政使富明奏請陞見一摺援藩臬三年期滿之例伊於行宮召對數次並非三年未見者比不應糊塗至此鄂容安前奏富明辦事勇往在豫省頗稱得力朕一見卽曾諭鄂容安其人小聰明不可信汝勿爲其所賣今觀其奏請陞見一摺一則見其與巡撫不扶同二則希圖於召見時卸責鄂容安其居心不可問如此鄂容安至今應服朕之卓識而恨己之爲所愚也然以如此之人而信任之無怪中州今歲所辦之不能仰體朕意矣設果出自鄂容安一人之意富明身任藩司卽當勸阻如其力爭不得何妨於朕未至中州之前或行在召對時據實奏聞朕必將鄂容安治罪而擢伊爲巡撫乃當時旣已商同辦理及見朕責鄂容安之辦理不善於回鑾後爲此狡猾伎倆何能逃朕洞鑒朕謂其人不可信果如何耶再今日方觀承具摺謝恩而鄂容安於朕回鑾

至保定及進宮已請安兩次而不置一言夫直隸係巡幸常經之地方觀承卽不具摺謝恩亦無不可至朕之加恩於鄂容安實出於格外包涵鄂容安宜如何感激沒身頂戴何以竟似無事卽謂方觀承僅屬外吏虛文鄂容安身係滿洲受厚恩棄虛文積習可也豈獨無不能自己之情耶若謂有心疏略亦未必然因責其辦理不善心懷疑懼思欲含糊了事此豈含糊所可了者耶著傳諭鄂容安令其痛自改悔據實查核逐一清晰無絲毫糜費絲毫粉飾以爲補過之地十六年三月疏參歸德府鄉紳雲南布政史家屏原任江蘇按察使李肖筠抗糧至七千餘兩得旨罰追革職從寬留任先是湖廣總督永興與布政使嚴瑞龍先後疏參湖北巡撫唐綏祖婪贓累萬奉旨革職拏問永興尋丁憂回京諭新任總督阿里袞嚴審至是阿里袞參奏瑞龍收受平餘等款命鄂容安赴楚會審四月合疏參奏永興於進京時私受賸賻詔革永興職交部治罪五月審明綏祖並無婪贓情事惟縱容鑪頭私買銅鉛添鑄瑞龍收平餘四千八百兩入己屬實上以鄂容安等未得辦理此案之正法命給還綏祖家產來京候旨錄用並命刑部另擬永興等罪尋議瑞龍改照誣告人死罪律擬斬候永興減一等擬杖流枷責從之鄂容安

尋疏言河北鎮屬九營暨臣標左右二營公費不敷查南陽等十縣官租積穀不過二萬餘石存銀不及四千兩各州縣既有常平義社等倉民食原不藉此接濟請撥歸營軍機大臣議行八月調山東巡撫時濟南府屬夏秋被水糧價頗昂而沿海之登萊青三府地僻山險轉運尤難鄂容安奏請照乾隆十三年例暫弛海禁招商前往奉天糴運以資接濟商船出入照例稽察得旨允行十二月與河臣顧琮等合疏言張秋挂劍臺漫口因豫省陽武隄工泛溢黃水穿運入海現在武陽工竣張秋一帶水勢日消但西坡來水從冰底原原下注今堵塞漫口須使有所歸東方無壅滯查漫口迤北有減水閘壩三可由分洩入徒駭河戴灣閘以上閘壩涵洞四可由分洩入馬頰河又有戴灣閘臨清磚板二閘入衛北流俟水勢大減仍將戴灣閘下板嚴閉俾水從徒駭馬頰二河宣洩入海漫口迤南有素東汛三空橋可由分洩入鹽海又有五空橋原係分洩運河淤漲但橋底甚高不能過水臣相度於其北築攔河壩一長二十餘丈并於橋南挑引河導水由鹽河歸海俾西坡之水南北暢流消涸更易下部知之十七年二月奏言運河全隄自臺兒莊至德州千有餘里素稱卑薄每年伏秋兩汛兼風雨侵汕又漕船往來下楸

施犁日漸殘塌臣與顧琮會籌應及時估修計需銀十五萬三千餘兩又單隄向無堡房應照黃河例每二里建堡房二需銀二千一十八兩至所修工程原以保固爲重而犁溝楸眼及水溝浪窩尤需隨時修補並於漕船過後通查增修庶可垂久三月又言太行隄在黃河北岸大隄之北兩隄相去數十里中有河一道本以宣洩頽隄以內坡水順流而東達江南豐沛二縣入微山湖因年久淤塞隄內田廬淹沒雍正年間於太行隄建涵洞使隄南之水穿隄北行經定陶武城單縣魚臺等邑入昭陽湖以歸微山湖嗣因涵洞旁衝缺口定陽等邑俱受水患是此涵洞必應堵塞庶太行隄仍舊完固爲黃河重垣保障至西隄夾東中間之水應亦開通舊河使東注免漫溢報聞四月奏言東省庫項多不清其交代流抵之弊率以辦差墊用爲辭臣飭屬作速核消至常平社倉糴借穀石未歸補者甚多有因州縣恐穀石霉變強派民間者有希圖染指不暇詳查徒爲無業之人領去者有村莊離城窵遠爲胥役冒領者有因社穀并無倉廩散交地方致強半虧缺者有因積欠難追恐干督責捏報新欠以掩舊欠者凡此皆宜嚴懲但操之過促恐劣員怙過飾非徒有追呼之擾究無完補之益而人情急則無賴更或別啟弊端

已令藩司責成各府確查妥辦臣仍不時體察如玩徇料理不清者知府一併嚴參得旨嘉獎十月署江西巡撫十一月卽命調補時上猶縣逆犯何亞四尋就獲鄂容安按擬如律因親往勘地勢奏請移千總一駐上信地於營前城防守內撥十五名鎮標二十五名往駐下信地亦於附近別營撥兵十名駐守營前留把總一兵三十名聯絡聲勢改浮龍司巡檢爲上猶縣縣丞仍駐營前龍泉縣禾源司巡檢改駐龍猶接壤之左安村崇義縣上堡司巡檢改駐金坑下部議行十八年正月諭署兩江總督印務卽在江西辦理九月奉旨實授十二月會同欽差侍郎嵇璜德爾敏查勘高家堰隄工並赴下河一帶籌辦疏濬事宜十九年正月奏言江南地廣事繁胥役最多作弊臣遵旨於勘災途次留心察訪查得淮安等府屬有藉賑弊混得贓分肥者蘇州等府屬有收漕舞弊婪贓者徐州府屬有辦差工料滋弊者但作弊雖出於胥役而州縣豈皆聾聵除將各犯嚴拏審擬如本官於中染指及知情故縱者嚴參治罪卽失察亦分別辦理示警至胥役原有經制名數酌設副役并載入冊乃江浙胥役非冒缺頂補卽永遠充辦一役載冊外有無名白役至十數名者皆倚官作威因公訛詐大爲吏治民生之累現飭各屬稽查

務符定額嚴禁頂補朋充俾易約束得旨嘉獎先是刑部覆准廣西等省先後條奏印官公出令佐雜相驗命案一事經江西按察使范廷楷疏請仍令鄰邑印官驗報不得濫委佐雜得旨交鄂容安酌行至是覆奏言命案惟兩邑相距窳遠印官公出而鄰邑印官正值乏員方許佐雜往驗立單仍由印官覆核毫無疑竇始填圖通報并將因事公出及屍所距鄰邑若干里各緣由聲明倘佐雜相驗不實印官扶同填報一併嚴參詔如所議行三月奏沿海塘工前經撫臣莊有恭查勘估辦俱妥惟林家嘴頂衝應於隄後幫寬培厚以資捍禦又寶山縣舊城灣月隄張家濱抄塘及劉沔七浦二河原閘座俱應修築報聞四月加太子少傅時部議刪除武職空銜將江南省五遊擊缺改都司行令酌議何營應改鄂容安奏言蘇鎮右營遊擊所管汛有守備分防改設都司足資辦理狼鎮左營遊擊兼轄城池關廂水陸改都司儘堪彈壓壽鎮左營遊擊事較簡於駐防宿州之守備今將遊擊酌改都司駐宿州卽以宿州守備移駐壽州廣德營遊擊兵少事簡漕標左營遊擊僅司權漕可酌改都司部議從之八月上以杜爾伯特台吉策凌輝特台吉阿睦爾撒納等先後來降諭曰年來準噶爾內亂頻仍人心離散屢有大隊輸誠

內嚮正可乘機辦理永救邊境鄂容安年力壯盛勇敢有爲一切緊要機宜尙能
曉暢著速赴行在面聆指授軍行辦事十二月授西路參贊大臣總督劉統勳籌
辦糧馬二十年正月定邊右副將軍薩喇勒哨探兵由西路進剿命鄂容安同進
二月諭曰漢時西陲塞地極廣烏魯木齊及回子諸部落皆曾屯戍有爲內屬者
唐初都護開府擴地及西北邊今遺址久湮著傳諭鄂容安此次進兵凡準噶爾
所屬之地方回子部落內有與漢唐史傳相合可援據者并漢唐所未至處一一
詢之士人細爲記載以資採輯四月同薩喇勒奏臣等沿途招降各部人衆並遣
侍衛塔奇圖等賫檄往諭達瓦齊降獎賜荷包鼻烟壺五月大軍定伊犁諭曰準
噶爾平定兩路將軍大臣等朕俱已加恩鄂容安在參贊大臣任內行走亦應加
恩但伊從前有準噶爾不應辦理之議伊父鄂爾泰與大邁胡中藻師生交結伊
兄鄂昌又與胡中藻附和黨同鄂容安明知其事不爲陳奏有負朕恩伊若不前
往軍營原欲從重治罪今因此行走免其治罪卽係朕恩可傳諭鄂容安知之
是月大軍渡伊犁河直抵達瓦齊所居之格登達瓦齊遁鄂容安偕喀爾喀郡王
品級青衮雜卜等收其游牧獲達瓦齊之叔及其孥並喇嘛六千餘六月達瓦齊

就擒鄂容安同班第駐守伊犁時阿睦爾撒納爲定邊左副將軍蓄異志謀據伊犁鄂容安同班第密疏劾之命趣阿睦爾撒納赴覲熱河命鄂容安與薩喇勒以兵至塔爾巴噶臺相機擒治會阿睦爾撒納行至烏隆吉叛逆黨應之臺站斷鄂容安同班第被陷力戰自盡都統策楞以狀聞上軫悼卽令其次子鄂津襲襄勤伯爵二十一年柩至京上親臨奠醊入祀昭忠祠賜祭葬如例諡剛烈特建雙忠祠御製詩旌之並命誠逆黨阿巴噶斯克什木耳於柩前祭奠並詳見班第傳二十六年命圖形紫光閣御製贊曰世臣知書料善論兵惜弗通語遂弗燭情變起倉卒力戰命畢用違其才實予之失二十七年鄂津在伊犁領隊大臣任內以私派隨人種地革職其世爵以鄂容安長子鄂岳襲現任散秩大臣

納穆札勒

納穆札勒蒙古正白旗人姓圖伯特氏父拉錫官領侍衛內大臣有傳納穆札勒初由閒散授藍翎侍衛洊授頭等侍衛乾隆十年六月授正白旗滿洲副都統十二年二月調鑲藍旗十三年九月署總管內務府大臣尋遷戶部侍郎十五年調工部時西藏郡王朱爾墨特納木札勒謀叛詔納穆札勒偕都統班第往駐藏十六年

三月奏言藏中增噶卜倫辦事現充噶卜倫者一係公爵餘俱札薩克台吉今增設之員請並給札薩克銜以符體制從之尋命增設卡倫兵十一月奏自喀喇烏蘇至那克桑喀勒占庫車等處增臺八飭札薩克台吉等巡察十七年正月又奏準噶爾通藏隘口係阿里那克桑騰格里淖爾阿哈雅克四路現俱設卡倫嚴防從前準夷犯藏係繞勒底雅路而入此路現亦派兵防守報聞十九年命赴北路軍營管理新降杜爾伯特及輝特和碩特等游牧二十年三月奏言厄魯特人赴京領俸餉值夏令恐不耐炎暑請加體恤命副都統多爾濟運應支俸餉至張家口給之四月以輝特和碩特生計維艱奏給糧畜接濟上允所請五月同喀爾喀親王得親札布由塔密爾安置輝特和碩特十三旗人於固爾班舒魯克杜爾伯特十旗人於鄂爾海西喇烏蘇分界駐牧設卡倫防範六月杜爾伯特遭霜雪傷畜奏給口糧賜米五百石賑之時將軍班第奏輝特降酋阿睦爾撒納謀據準噶爾狀命納穆札勒偕參贊大臣阿蘭泰等駐防烏里雅蘇臺十月調戶部侍郎二十一年六月奏言伊克明安台吉德濟特同逆賊阿睦爾撒納叛遁請以其屬分給輝特不從叛之札薩克阿卜達什等及喀爾喀又言和託輝特郡王青衮雜卜

自軍營叛遁臣恐衆喀爾喀被煽徧諭所部示以利害上獎之尋授參贊大臣赴將軍成袞札布營領索倫兵追剿青袞雜卜十一月擒之於杭哈將噶斯諭曰納穆札勒帶兵追擒一聞逆賊所在疾馳前進立爲掩獲甚爲勇往出力著加恩封爲一等伯賜號勤襄十二月命赴喀爾喀車臣汗部查緝齊木齊格特人之肆竊者尋於呼倫貝爾之西墨爾根哈瑪爾俱就擒上嘉其功下部議敘二十二年二月授工部尙書兼正紅旗滿洲都統四月命仍赴北路駐科布多辦事五月移駐布延圖十月署定邊左副將軍二十三年二月奏言烏梁海部衆歸誠其酋察達克等授內大臣散秩大臣等職所屬鄂拓克內每得奏有得木齊收楞額辦理庶務請將得木齊改佐領收楞額改驍騎校給頂帶歲貢貂皮送烏里雅蘇臺以恩賞緞布給之三月納穆札勒回京六月命赴西路軍營授參贊大臣署將軍印務七月授靖逆將軍由庫車會剿回酋霍集占等九月阿克蘇城歸附詔納穆札勒同參贊大臣三泰往會定邊將軍兆惠軍兆惠遣副都統愛隆阿侍衛奎瑪岱以兵來迎納穆札勒路遣愛隆阿先還而自與三泰奎瑪岱乘夜進騎兵僅二百餘遇賊三千被圍力戰矢盡死之三泰奎瑪岱俱沒於陣事聞諭曰靖邊將軍納穆

札勒參贊大臣三泰巴圖魯侍衛奎瑪岱奉命前赴軍營輕裝盡發所領兵丁僅二百餘人設令先到大營固可會同進剿卽後至一二日亦與愛隆阿一同駐守乃星夜僮行之時適遇賊衆猖獗伊等並不肯於中途退避自全惟知直前衝擊以致授命捐軀忠毅之氣深可嘉憫納穆札勒著贈公爵三泰贈子爵俱世襲罔替奎瑪岱照奇徹布例賞給世職應得卹典仍著該部察例具奏尋賜祭葬如例諡武毅入祀昭忠祠贈三等義烈公以子保寧襲二十四年回部平上追悼納穆札勒及三泰爲國盡節與前西藏殉節之都統傅清左都御史拉布敦伊犁殉節之將軍班第參贊大臣鄂容安比烈御製雙義詩紀其事詩曰雙忠昔集事雙烈能忘身茲作雙義詩其故得細陳曰納穆札勒曾贊北路軍奮勇剪逆賊封伯酬其勲副都統三泰英氣頗超人均御前侍衛素悉厥忠純兆惠富德輩從戎久效勤欲代俾將母二臣被選掄去歲黑水役固守遣索倫致信愛隆阿權退催後援可支百日間速進莫遑巡將軍及參贊輕進徒俱焚當待師並來何慮狂狙猖爾時二臣者馳驛往軍門過愛隆阿營卻近黑水濱所遣人未遇礮聲前忽聞知賊與我戰聞戰恥退奔徒攜百餘騎赴義命同捐凶信驛遞來痛淚傷心魂使早知

拒守退俟熊羆羣同進可樹功何致均沈淪卽先至一日合兆惠軍屯亦可旋今歲奚煩以身殉不前復不後此實若有神富德自和闐重至黑水津葉爾奇木降諸事粗處分痛念我將士沙場化爲燐黃頭雖不備掩骼權爲墳猿鶴昔屬幻邱隴今可因循以此事奏西望揮淚頻豐碑旌墓門千秋西海垠捐軀固臣節任爾非所論惟予則何忍此恨終當伸夷考六人跡事異心同均與國休戚共寧止曰蓋臣史筆多訛傳永言傳其真尋命圖形紫光閣御製贊曰我懷賢勞命將往代正值黑水猖獗鼠輩以二百衆陷萬賊中因緣殉節勇濟以忠長子保寧襲公爵現官伊犁將軍第三子保泰現官察哈爾都統駐藏辦事

三泰

三泰漢軍正白旗人曾祖內大臣華善以其先原係蘇完人姓瓜勒佳奏請改入滿洲籍祖石文炳襲三等伯官福州將軍父觀音保任都統三泰由藍翎侍衛洊授二等待衛乾隆二十二年四月遷正紅旗漢軍副都統十月陞吏部右侍郎二十三年正月軍機處行走四月調戶部左侍郎六月詔三泰與尙書納穆札勒赴西路軍營以參贊大臣行走學習軍務七月逆回霍集占自庫車敗遁定邊將軍

兆惠往擒剿命納穆札勒爲靖逆將軍與三泰等統索倫察哈爾及健銳營官兵往會兆惠軍兆惠軍至葉爾羌令副都統愛隆阿侍衛奎瑪岱以兵來迎納穆札勒遣愛隆阿先還自與三泰奎瑪岱乘夜進期以黎明趨程至兆惠軍營隨行二百騎猝遇賊三千被圍奎瑪岱死之納穆札勒矢盡三泰墜馬徒步接戰俱中創陣歿上嘉憫其忠毅贈三泰三等子爵並加恩授其兄詳泰爲散秩大臣尋賜祭葬如例謚果勇入祀昭忠祠回部底定上追悼納穆札勒三泰御製雙義詩紀其事見納穆札勒傳尋命圖形紫光閣御製贊曰率二百人共詣軍營臨敵而退寧謂忠誠如早聞信何致殞身不前不後失二賢臣子佛柱襲世爵及散秩大臣現官阿克蘇領隊大臣

方苞

方苞江南桐城人寄籍上元康熙四十五年由舉人會試中式以母病未預殿試五十年十月副都御史趙申喬劾編修戴名世所著南山集子遺錄有大逆語下刑部擬名世凌遲詞連苞從祖孝標曾降吳逆所著滇黔紀聞亦不法應戮屍子登嶧雲旅孫世樞緣坐苞爲名世作序論斬命九卿詳議五十二年二月諭曰戴

名世從寬免凌遲著卽處斬方登嶧方雲旅方世燾俱從寬免死並伊妻子充發黑龍江此案內干連人犯俱從寬免治罪著入旗是月苞隸旗籍三月上知苞文學特命入直南書房八月直蒙養齋編校御製樂律算法諸書六十一年六月命爲武英殿修書總裁十一月世宗憲皇帝嗣位頒恩詔其一以族人犯罪牽連入旗者赦歸籍時入旗合詔條者惟戴名世案而原讞例不得援赦刑部特請上肆赦苞及其族人雍正元年苞旣承恩宥二年請假歸葬三年還京召見有先帝持法朕原情汝老學當知此義之諭九年特授中允十年五月遷侍講七月遷侍講學士十一年四月擢內閣學士苞以足疾辭命仍在修書處行走不必辦理內閣事務六月教習庶吉士八月充一統志館總裁十三年正月充皇清文穎館副總裁十一月疏言常平倉穀定例存七糶三有司奉行失宜必穀旣貴始詳上司定價示期開糶未奉批不敢擅開請嗣後各州縣遇穀偶貴卽酌定官價一面開糶一面詳報又穀之存倉則有鼠耗盤量則有折減移動則有腳價糶糶守局則有人工食用春糶價稍有餘卽留充諸費庶中材可守若廉能之吏遇秋糶價賤盈餘較多聽據實詳明別貯一倉備歉歲發賑用下部議行乾隆元年三月疏言救

荒之政宜豫周官保章氏以星土之法五雲之物先期知水旱降豐荒之侵象以修救政雖其法無傳然夏末秋初則水旱豐歉情形十得八九舊例報荒必待八九月後災民朝不待夕而奏請得旨動經旬月請嗣後各州縣水旱五六月卽據實奏報臣又思古者城必有池故易曰王公設險以守其國周公立司險掌固二官以通守政所恃惟溝樹耳凡國都暨近郊遠郊必設溝樹三重鄙邑三重詩曰築城伊滅池與滅卽周官所謂溝也本無城而創作則起土而溝形已具本有城以築外垣使附城民得保焉卽春秋所稱郭與郊保也不獨通川之地濬溝卽可爲池卽地不通川而溝深三丈則行潦所滙可納城市流澌春秋戰國時雖彈丸小邑莫不有溝以爲限有樹以爲蔽秦漢以降古法不講故盜賊滋多請將城堡溝樹之政及時修舉又吳楚蜀越嶺徼皆賴川流塘堰以灌秔稻不專恃雨澤請飭各省凡通川之地可開支河及沮洳可興大圩與大塘大堰宜創作修復者詳報核估造冊具題北五省塘堰圩隄可興者少則查千家數百家之鎮集宜開溝渠築垣堡者亦造冊具題遇歉歲及時興作以工代賑至溝樹之地不能無廢民田而歉歲官給原價買之民亦樂從部議五六月報災恐滋捏飾浮冒所請不可

行至溝樹塘堰諸事應令各督撫因時地熟籌而行得旨如議六月上憐苞老病命太醫時往診視尋諭曰國家以經義取士將使士子沈潛於四子五經之書舍英咀華發摠文矣因以規學力之淺深與器識之淳薄而風會所趨卽有關於氣運誠以人心士習之端倪呈露者甚微而徵應甚鉅也顧時文之風尙屢變不一苟非明示以準的使海內士子於從違去取之介曉然知所別擇專意揣摩則大比之期主司無以操繩尺而度羣才士子豈能合矩矱以應搜羅乎有明制舉之業體備各種如王唐歸胡金陳章黃諸大家卓然可傳本朝文運昌明英才輩出劉子壯熊伯龍以後作者接踵莫不根柢經史各抒杼軸此皆足爲後學之津梁制藝之科則者自坊選之禁垂諸功令而大家名作不得通行士子無由睹斯文之炳蔚率多因陋就簡剽竊陳言襲取腐語間或以此倖獲科名又輾轉流布私相仿效馴至先正名家之風味杳乎難尋所係非淺鮮也今朕欲裒集有明及本朝諸大家時藝精選數百篇彙爲一集頒布天下以爲舉業指南學士方苞工於時文著司選文之事務將入選之文逐一批抉其精微奧窔之處俾學者了然心目間用以拳服摹擬嗣後並弛坊間刻文之禁倘果有學問淹博手眼明快者不

拘鄉會墨卷房行試牘准其照前選刻但不得徇情濫觴及狂言橫議致釀惡俗
苞遵旨選錄有明制義四百八十六國朝制義二百九十七以清真雅正爲宗呈
欽定頒行天下尋充三禮義疏館副總裁命再入南書房二年六月擢禮部右侍
郎苞仍以足疾辭詔免隨班行走七月教習庶吉士九月疏陳九卿會議二事一
九卿中有異議者宜並列上聞以俟聖裁一詹事科道宜仍與九卿一體會議所
議不符亦隨九卿議並奏疏下總理事務王大臣等議駁諭曰廷臣會議其秉公
建白與否皆發於其入中心非立之章程可迫之使然者若如方苞所奏不但事
有難行卽定以爲例而不肯視國事如己事之人其緘默仍如故也嗣後九卿等
當思受朕簡畀之恩凡遇廷議事件胸有所見卽據理直陳互相參酌以歸於至
當毋得推諉主稿衙門隨班書題以了故事負朕博採衆論之至意十二月苞復
以老病請解侍郎任許之仍帶原銜食俸教習庶吉士四年二月命武英殿重刊
十三經廿一史苞疏言庫貯書籍並無監板經史而現今監板更剝蝕無憑校對
請敕內府及內閣藏書處徧查舊本諭在京諸王大臣及有列於朝者如家藏明
泰昌以前舊本奏明交館並敕江南浙江江西湖廣福建五省督撫購送舊板經

史彼此互證再孔穎達賈公彥等所引十三經及傳註並周秦間諸子多訛誤請
詳校開列呈覽酌改又前侍講學士何焯曾博訪宋板校正前後漢書三國志遺
訛應就其家索原書照式改註別本其原本仍行給還從之五月諭曰方苞在皇
祖時因南山集一案身罹重罪蒙恩曲加寬宥令其入旗在修書處行走效力及
皇考卽位特沛殊恩准其出旗仍還本籍又漸次錄用授職翰林晉階內閣學士
朕嗣位之初念其稍有文名諭令侍直南書房且陞授禮部侍郎之職伊若具有
良心定當痛改前愆矢慎矢公力圖報效乃伊在九卿班內假公濟私黨同伐異
其不安靜之錮疾到老不改衆所共知適值伊以衰病請改侍郎職任朕俞允之
仍帶原銜食俸上年冬月因伊條奏事件偶爾召見一次伊出外卽私告於人曾
在朕前薦魏廷珍而參任蘭枝以致外間人言藉藉經朕訪聞令大學士傳旨訓
飭伊奏對支吾朕復加寬容未曾深究近訪聞得伊住魏廷珍之屋魏廷珍未奉
旨起用之先伊卽移居城外將屋讓還以示魏廷珍卽日被召之意又庶吉士散
館屆期伊已將人數奏聞內閣定期考試矣伊復於前一日將新到吳喬齡一名
補請一體考試朕心卽疑之今訪聞得伊所居之屋卽吳喬齡之產甚覺華煥伊

受託爲之代請似此數事則其平日之營私可以概見方苞深負國恩著將侍郎職銜及一切行走之處悉行革去專在三禮館修書效力贖罪苞以年近八旬時患疾痛懇回籍調理大學士等代奏恩賞侍講銜准其回籍十六年卒

錢陳羣子汝誠

錢陳羣浙江嘉興人康熙六十年進士改庶吉士散館授編修雍正七年充湖南鄉試正考官九年遷右贊善十一年轉左贊善十二年三月遷右庶子四月遷侍講學士充日講起居注官十三年正月提督順天學政閏四月轉侍讀學士七月命南書房行走九月改右通政仍留學政任十一月疏言各學舉報優劣請照京察計典例止於歲試隨棚舉行蓋歲試文武生畢集至科試則武生不與而文生應試者亦止十之三四不能面加獎戒其歲科並行之地必有朝報劣而夕褫革欲自新而無路者卽舉優亦易掩飾請停科試舉報下部議行乾隆元年丁母憂回籍服闋命提督順天學政四年補原官陳羣母陳氏知書工繪事陳羣少時母勸之學爲夜紡授經圖陳羣嘗奏及之上賜題以詩有嘉禾欲續賢媛傳不愧當年畫荻人之句五年疏請增順天鄉試南北皿中額諭曰此奏甚屬錯謬國家育

才取士自有章程卽正途人員應得之缺亦有定制斷無因人數衆多而多設官職之理目今進士之就選者已覺濡滯而舉人之就選者則在二十餘年之久已有難於疏通之勢若欲希圖士子之稱揚感激再增中式之數則取者愈多而用者益覺遙遙無期彼中年中式之人至老方得一官精力衰頹志氣怠惰國家何能收科目取人之實效乎錢陳羣身爲學臣不知政體爲此沽名之奏甚屬不合著交部察議尋議銷去加一級六年六月遷太僕寺卿七月遷詹事八月疏請直省學宮從祀先賢先儒神牌位次悉遵太學不得因陋就簡以譌承譌用昭慎重部議從之七年五月擢內閣學士六月遷刑部右侍郎七月轉左九年七月充經筵講官十年充會試副考官十二年二月充大清會典館副總裁六月充江西鄉試正考官十五年復充江西鄉試正考官十七年患反穀疾連疏乞解職回籍許之命其子編修汝誠侍行且賜詩以寬其意詩曰三尸素所滅二豎胡爲作予告遂頤和還鄉竟如約陞辭意懇款請詩應允諾憐汝身日羸壯汝神猶鑠達生有至論庸醫無大藥辟穀方赤松先憂後原樂十八年陳羣進途中所作詩上用其會錦春園和韻賜詩曰北海惟客待杜陵詎身謀勝會開名園新詩步秦州猶記

陛辭時流火方新秋何事大江北閒尋谿壑幽養疴許謝莊遁跡非田疇故鄉山水佳藥餌頗易求頤攝冀良愈待泛還朝舟江頭有錦春何妨一命遊几杖兒孫侍樽核賓從稠江湖信可樂廊廟豈忘憂遲遲有深意欲邁還停收況彼五畝閒卷阿我曾留卽是矢音地扈賡憶從頭詩筒附奏箋翰苑傳風流固知解脫心疾等浮雲浮從茲一葦南遙望心與悠二十二年上南巡諭陳羣在籍食俸二十五
年上親爲橋梓圖寄賜陳羣序云重五日錢陳羣和賜其子汝誠詩畫扇以進蓋欲之而不敢言陳羣老矣不可使其因此鬱鬱於懷促成是幅並疊舊韻賜之詩曰南國應嘗穀雨茶箠頭書自遂初家貢來恰好臨蒲節賜去無須寶墨華教寄北山聊示梓漫參西土擬拈花高年已覺多男累莫逐東風更羨鴉二十六年來京恭祝皇太后七旬萬壽蒙恩與香山九老會諭曰錢陳羣久歷卿貳兼直內廷年逾七旬學問優裕前以養疴回籍有旨在家食俸用資頤養今來京慶祝召對之次見其神明不衰而居鄉素稱恪謹著加恩賞給尙書銜以昭優眷又諭曰今年恭逢聖母皇太后七旬大慶在籍諸臣來京叩祝具見悃忱獻歲之初朕恭奉安輿時巡南服諸臣甫及旋里復當出境迎鑾僕僕道途於林下高年諸多未便

可諭諸臣今年曾經赴闕者明春無庸赴省候接在兩浙者不必至江南在江南者不必至東省如沈德潛卽於蘇州錢陳羣卽於嘉興餘均視此爲例副朕體卹至意二十七年駕過常州陳羣偕德潛來迎御製詩各書一通賜之曰二老江浙之大老新從九老會中回身體康強自逢吉芝蘭氣味還相陪迎隄恭遇以爲喜出詩命和羣應推更與殷勤訂佳約期頤定復登金臺三十年上南巡陳羣復偕德潛迎駕賜詩曰二仙仍此候河濱三載相睽意更親郭泰李膺一煙舫沈期錢起兩詩人飄然白髮都還健瞭爾清瞳自有神筆力年華雖共老載賡知復倍清新是年陳羣年八十命加太子太傅賜其子汝器爲舉人汝誠適扈蹕諭至家省侍三十一年陳羣進其母畫冊每幅有其父綸光題句上製詩十章歸之有子昂題句仲姬畫頗有今人似昔人之句三十六年二月上東巡駐蹕平原陳羣進所書登岱祝釐頌及御製詩文並賡韻詩冊至賜詩曰平原此日巡方駐秀水多時奏牘欽萬有餘言親手寫三千里外故人心可知食履益康健具見頌揚篤悃忱冬月定當重晤面健談興自勃知音八月陳羣進謝恩詩上卽以前韻答之曰宣毫端硯常隨側卽景摛詞每寓欽何必多思甫老句所無逸緬旦公心往來筆札

如覲面賡和篇章每託忱善頌雖卿頗自許不忘規更佇佳音是冬來京恭祝皇太后八旬萬壽命紫禁城內騎馬並賜人籩令其子汝誠扶掖出入內廷再與香山九老會陳羣進和御製香山九老詩句云鹿馴巖畔當童扶上賞其超逸親爲圖以賜陳羣將南歸復賜詩曰剛喜談心頻席前胡爲慶歲又當旋幾番笑語消一瞬重晤風光期十年雪阻長途仍發軔冰凝順水未開船精神健豈妨跋涉卻是南瞻每眷然明年陳羣抵家疏謝上時駐蹕香山賜答詩有香山適接還鄉信卽景尤思扶鹿人之句陳羣深於詩多不經人道語書法亦蒼老家居後每歲上錄寄詩百餘篇命之和陳羣旣和韻必親繕冊以進冊必有跋體或兼行草屢蒙獎贊三十九年卒諭曰在籍加刑部尙書銜錢陳羣老成端謹學問淵醇自康熙年間通籍詞垣以後久直內廷洊歷卿貳奉職恪勤嗣因養疴予告優游林下者二十餘年實東南搢紳領袖前此屢次南巡疊加授尙書銜晉太子太傅在籍食俸並時以御製詩章寄令賡和儒臣老輩中能以詩文結恩遇備商榷者沈德潛故後惟錢陳羣一人而已前歲來京見其精神強健爲之欣慰因賞給人籩俾資頤養冀其壽躋大耋尙可再赴闕廷益承優寵昨冬聞其忽爾抱疾廬念良殷曾

於奏摺內溫垂諭詢意其即可調理就痊以副恩眷今驟聞溘逝深爲悼惜著加恩晉贈太傅入祀賢良祠並於浙江藩庫內賞銀一千兩經理喪事應得卹典該部察例具奏尋賜祭葬如例謚文端四十四年御製懷舊詩列陳羣於五詞臣中詩曰少年困場屋賢母授之經故學有淵源於詩尤粹精經濟雖非卓不失爲老成以疾賜懸車還鄉信循名迎鑾三於浙祝釐兩入京倡和稱最多頌中規亦行林下惟恂謹文外無他營優游登大耋生賢歿亦榮長子汝誠乾隆十三年進士改庶吉士散館授編修十六年充河南鄉試正考官十七年侍父南歸比還職命南書房行走二十年三月充日講起居注官五月遷侍講二十二年遷侍讀學士二十三年擢內閣學士二十四年遷兵部左侍郎二十五年三月京師穀價未平命赴德州會勘北上商販船因請嗣後商船至天津關毋得留難回空時概免封隄剝船得旨嘉允四月調刑部左侍郎六月充江南鄉試正考官二十六年三月兼管順天府府尹十一月調戶部右侍郎尋轉左充經筵講官仍署刑部侍郎事二十七年復充江南鄉試正考官二十八年二月請將應入鄉會試外簾官通行開列無得規避上是其言如所請行六月文安霸州大城等處生蠶諭嚴督捕命

會勘順天府及宣化永平遵化旗地覈定租額二十九年因刑部擬罪乖謬部議革職詔從寬留任三十年疏請終養許之三十二年丁母憂服闋仍留籍養父三十九年丁父憂四十一年服闋署刑部右侍郎尋授左侍郎充四庫全書館三通館副總裁四十三年命仍在南書房行走四十四年卒

任蘭枝

任蘭枝江蘇溧陽人康熙五十二年一甲二名進士授編修雍正元年正月入直南書房二月充江西鄉試副考官尋充日講起居注官九月命視學四川遷左中允二年擢右庶子三年轉左庶子五年閏三月遷侍講學士四月遷少詹事尋授內閣學士兼禮部侍郎九月以安南國定界事命偕左副都御史杭奕祿齎詔往諭詳杭奕祿傳七年充浙江鄉試正考官八年充會試副考官尋教習庶吉士九年正月擢兵部右侍郎六月江西廣信營參將張福揭報南昌總兵陳玉章侵扣兵餉諸款上命蘭枝往按之惟侵扣屬實餘坐誣奏入上嘉之十二月調吏部右侍郎十年七月充八旗志書館副總裁八月充順天鄉試副考官十月轉左侍郎十一月充經筵講官尋充會試副考官四月充一統志館總裁十三年八月高宗

純皇帝御極十月命充世宗憲皇帝實錄總裁官擢禮部尙書奏言雍正八年經吏部議准通政司參議吳山條奏將直省舉人預行截取分部學習一年期滿該堂官出具考語仍歸原班銓選蓋欲令其諳練政務以爲後日服官之資也但六部各司額設滿漢司員兼有額外進士及筆帖式等承辦其學習舉人爲數衆多又無畫彙說堂之責一應案卷紛繁若使盡閱轉稽時日兼恐傳說議論別生事端是以伊等分部毫無職掌於堂司官亦漠不相親不過每日赴部畫到期滿日該堂官出具考語但按到簿稽查填寫行走勤字樣其吏治之熟諳與否實屬無憑考驗況一奉部文截取學習地方官督促赴部不便遲延及至期滿銓選尙遙又難久候仍復回籍長途往返資斧維艱遠省邊方情有可憫且部務原與外任知縣不同諸凡錢糧刑名催科聽斷之法自須因地制宜隨時更變非必在部行走方可學習請嗣後舉人應選知縣者停其分部學習俟選期將屆時陸續截取赴部候選下部議行乾隆二年二月命蘭枝偕鄂爾泰張廷玉三泰恭點泰陵神主諭曰點主大禮攸關必取其人品望素優老成端慤俾之敬謹將事方克稱尊奉之隆儀卿等皆國家大臣夙荷皇考恩遇倚任有年名望夙著故藉卿等襄此

鉅典其體朕哀慕惻忱齋莊嚴恪靜慮凝神以對越皇考在天之靈庶得仰邀皇考歆鑒朕有厚望焉三年十月調戶部尙書四年正月上御乾清宮新煖閣賜諸王貝勒貝子大學士九卿翰詹科道及督撫學政在京者九十九人宴賦柏梁體御製洪鈞氣轉叶韶年句首唱羣臣恭賦成章賜箋硯筆墨有差蘭枝與焉復調禮部尙書五年四月蘭枝門生太常寺卿陶正靖謝恩時奏對失指諭曰從來師生同年袒護朋比最爲惡習關於風俗政治者非淺我皇考屢垂訓戒力爲整頓此風已覺改易近日又有復萌之意前日陶正靖因陞授太常寺卿具摺謝恩召伊進見面詢云見在雨澤愆期朕用人行政之間或有闕失召爾獨對當直陳無隱伊沈思良久奏云並無闕失惟處分魏廷珍一事不無屈抑朕思魏廷珍歷來居官一味因循推諉從未擔承一事不過師友同年援引標榜博取虛譽有負國恩朕是以因其自請罷歸降旨革職伊旣請離任已不供職與國計民生有何關係而陶正靖獨舉此一事爲言豈得謂之直陳無隱乎彼時朕並無責伊之詞亦無疑伊之意及恭閱皇祖實錄內紀載癸巳科拔取翰林知魏廷珍任蘭枝孫家淦等皆屬同年朕卽疑陶正靖必係伊等之門生昨日禮部引見朕問任蘭枝伊

果稱陶正靖係伊門生如此明係任蘭枝將魏廷珍屈抑之處向伊言之而有此奏據任蘭枝辯稱未曾向伊言及則陶正靖私心揣合任蘭枝之意互相袒護矣因此事有關師生年誼比周朋黨之漸特令任蘭枝將朕旨寫出申飭陶正靖並使衆人知所做戒至於陶正靖係任蘭枝之門生朕問任蘭枝始知之並未向他入問及乃伊書寫朕旨作爲問陶正靖而知之其居心詐僞避重就輕欲於筆墨之中逞其伎倆朕豈不讀書之主於字句抑揚間不能辨別其用意之所在乎據此朕之所疑者確中情事矣且伊奏稱年老耳聾一時誤聽是儼然以舊臣自居試問伊自登仕籍以來爲國家宣猷效力何事亦不過周旋世故依違觀望如魏廷珍之輩爲仕途巧宦耳卽此刻傳見大臣等而任蘭枝係進呈旨意之人竟在外逍遙自如以致諸臣等候良久屢經尋喚而後至是又何心任蘭枝陶正靖俱著交部嚴加議處尋議革職得旨任蘭枝從寬留任陶正靖降五級調用八月命往盛京監收穀石七年正月調兵部尙書七月仍調禮部尙書十年以老致仕十一年卒

張照

張照江蘇婁縣人康熙四十八年進士改庶吉士五十一年散館授檢討五十四年入直南書房雍正元年五月遷贊善六月遷侍講七月轉侍讀九月遷右庶子十月充福建鄉試副考官二年轉左庶子三年二月遷侍講學士四月充日講起居注官疏言聖諭廣訓一書請令學政轉頒各州縣學俾童蒙誦讀府縣考覆試時背錄一條方准錄取奉旨允行四年四月充雲南鄉試正考官八年二月遷少詹事九年七月擢內閣學士十年七月奏言臣祖淇曾以田千畝爲義田贍族未經奏明立案旣爲公產轉恐爭競請官爲存案載入縣誌不得擅賣擅買違者雖臣子孫亦以盜賣官田論疏入上允所請立册存案並敕部旌獎以彰義舉尋議贈淇如其子原任吏部侍郎等官十二月擢刑部左侍郎仍兼內閣學士尋署順天府府尹十一年四月授左都御史暫署刑部尙書兼管順天府府尹七月奏請更定律例一夫毆妻至死審無故殺別情如無承祀之人准留承祀枷責完結一竊盜三犯通計贓五十兩以下罪止滿杖者從重擬遣五十兩以上罪止徒者擬絞監候一承審官重刑疊夾致斃笞杖人犯二命以上徒流人犯四命以上者以故勘論擬斬監候一斬絞人犯在獄如強橫不法及犯賭博等事照原擬卽行正

法提牢官議處禁卒責懲一支囚糧每石腳價銀五分以贓罰銀給發移戶部查核一刑部現審左右二司郎中員外主事缺出揀選調補遺缺歸銓下部議行十二年五月授刑部尙書以預修大清會典書成議敘加一級十三年五月刑部議覆福建民藍厚正毆斃胞兄一案照以援擬失當降一級留任十三年正月充皇清文穎館副總裁五月貴州九股生苗不法揚威將軍哈元生副將軍董芳分剿上命照爲撫定苗疆大臣照抵黔倡分地分兵之議因施秉爲適中地遂以其上爲上游用滇黔兵專屬哈元生以其下爲下游用楚粵兵專屬董芳於是進剿之兵紛紜撤換哈元生董芳欲將村莊道路盡劃上下界文移辯論日久無功八月今上御極尋命照來京以湖廣總督張廣泗往代諭曰從前經理古州苗疆原係鄂爾泰獨任其事後來逆苗煽動張照在京時見皇考申飭鄂爾泰因其向來料理原未盡善繼有解任之旨張照遂以私意揣度過甚其詞彼時廷議新疆不可棄置張照卽在預議之列皇考深以爲然今張照以爲密奉棄置之諭旨轉告將軍哈元生因降旨棄絕乖謬已極諭張廣泗知之十一月諭曰張照辦理苗疆事務本係自請前往乃到黔以來挾詐懷私擾亂軍務罪過多端伊到京時著總理事務

王大臣會同刑部審擬具奏張廣泗劾照立意阻撓與元生互相攻訐置應辦之事不理致大兵雲集數月毫無成功命革職拏問乾隆元年九月廷議依律擬斬諭曰張照浮躁性成又誤聽傳聞之言立意與哈元生齟齬朕念哈元生從前征剿烏蒙曾經效力業已從寬免死張照亦一體釋放尋命在武英殿修書處行走二年二月授內閣學士入直南書房十二月充經筵講官四年三月請終養上慰留之五年五月授刑部右侍郎十月轉左十二月奏言律例刊校頒行尙須一年各省未發新書擬罪必遵舊例請於舊例輕而新改重者仍待奉到日遵行不必駁改舊重新輕者刑部卽引新書改正使一年之內溥海內外早被恩光特旨允行六年二月請假歸省九月回任十一月上以朝會樂章句讀與樂音不相比合敕莊親王同照查明律呂正義源委又壇廟樂章恐不合律併查奏尋合疏言律呂正義一書編摩未備請重修律呂正義後編與前書並垂萬世壇廟朝廷樂章應遵聖訓將新舊所定並宋朱子六經圖及明朱載堉樂書式考定宮商字譜備載於篇使律呂克諧尋考易曉其民間俗樂亦宜一體釐正下部議行七年二月疏言軍流遣犯例應僉妻如子孫願隨往者聽並不在應遣之列向來旗人由旗

咨部文內註明隨往字樣至民人刑部據文轉咨多不註明至配一例羈管本犯身故隨往子孫不得援奉恩例請嗣後該管衙門僉遣時卽於文內註明隨往字樣以免濫行羈管本犯身故妻子願歸給照回旗回籍仍報部存案又遣犯在配本身既不許他往子孫又一例羈管困頓飢寒情殊可憫請嗣後遣犯在配所生子孫該犯在日如有附近謀生者准呈明給限前往逾限不回查究在配所生子女或許嫁他處或寄養於人悉聽自便又各邊鎮賞旗爲奴人犯在籍子孫本非例應僉遣如往遣所省視情殷依戀或窮途艱苦不能卽歸旗主藉其力作歲月寢久並沒爲奴甚屬冤抑請嗣後到配省視者赴該管衙門報名存案回籍日卽給印票放行如旗主刁留計陷照律治罪部議從之四月擢刑部尙書五月管理樂部先是雍正五年八旗佐領等有指扣兵丁錢糧印子錢者世宗憲皇帝諭禁定枷責追利入官之條雍正十三年都統李禧請旗民一體嚴禁借債人自首免罪並免償放債人治罪仍追利入官民間爭首告冀免至是照疏言八旗佐領等官盤剝該管兵丁放印子錢者仍遵例擬追外如止重利放債悉依違禁取利本律治罪禧所奏自首免償例已經律例館刪除不准引用部議從之十月中允于

振請釐定文廟樂章上命照撰擬進呈頒發曲阜及各省學宮八年十月諭曰朕登極詔內四品以上官例得恩廕刑部尙書張照因彼時緣事未與今特加恩補行給與恩廕九年十二月丁父憂上以照父彙義方有素訓子成名特諭於本籍賜祭一壇十年正月照奔喪行至江南徐州卒漕運總督顧琮以聞諭曰張照才品優長兼諳法律學問充裕詞藻清新侍直內廷勤慎素著前聞伊父訃音抱病星馳朕切諭其以禮節哀毋致毀瘠今聞在途溘逝朕心深爲憫悼著加太子太保吏部尙書應得卹典察例具奏尋賜祭葬如例謚文敏二十四年諭曰前因查閱蔣洲署中所藏字跡書冊見有張照獄中所題白雲亭詩卷詞意怨望因念張照爲受恩已故之人卽已付之炎官以保全其始終未曾明降諭旨昨命大學士蔣溥向伊子張應田寓中查取張照所遺筆札則更有未經朕覽列入集中者毋論不日不月等語極爲狂誕而一則曰丞相再則曰鄂伯若以伊之獲罪悉由於鄂爾泰之構陷者伊旣以此憤嫉之詞公然付之剞劂傳之後世無知者觀之將謂實有其事故朕不得明白宣示鄂爾泰經理苗疆一事朕與和親王每日親承皇考訓諭其中端委實所深知張照之奉命經略原令訪察鄂爾泰事蹟乃張

照一入四川妄自尊大不以苗疆重務爲計立意阻撓於董芳則極口贊揚於哈元生則痛加醜詆且私致書於哈元生等令參鄂爾泰以致張廣泗哈元生元展成等將伊乖張謬妄並致書囑等款紛紛陳奏夫以國家經略大臣膺節鉞重寄而乃挾私僨事至於如此按以軍法立置重辟實所應得使非朕深知張照素與鄂爾泰嫌怨豈僅付法司擬以監候爲此格外矜原乎乃張照尙不知痛心悔改妄生不平之鳴耶朕爾時深見苗疆之事惟專任張廣泗庶可集事卽不得不將張照撤回以防牽制嗣念張照辦事尙有小才出之囹圄之中棄瑕錄用不數年由內閣學士洊擢尙書供奉內廷時得召對不啻家人父子在伊素性乖謬不愜人望一時諸人未必不以朕爲寵遇過優而朕並不以此少弛其恩禮其感激又當何如耶卽如在獄時所處本非順境抑鬱之狀猶或人情所有迨至再躋顯秩疊受殊恩苟有人心則從前骯髒激勵之詞亦當猛省剴削而必將此刊刻流傳其居心又可問耶使張照仍在卽應治以國法今其人已死姑免深究伊子張應田所得廕生官職亦從寬免其革退四十四年上念照資敏博學尤工書御製懷舊詩列照於五詞臣中詩曰書有米之雄而無米之略復有董之整而無董之弱

羲之後一人舍照誰能若卽今觀其蹟宛似成於昨精神貫注深非人所能學三朝直內廷受恩早且渥其詩喜談禪學蘇太相著以苗疆獲罪意實別有託平苗事既久復用仍遷擢性敏才本高未免失行薄使生前明時標榜必致錯本朝無所施小哉張與鄂四十七年十一月諭曰昨閱進呈一統志內國朝松江府人物祇載王頊齡王鴻緒諸人而不載張照其意或因張照從前辦理貴州苗疆曾經獲罪又其獄中所題白雲亭詩意感憤經朕明降諭旨宣示中外因而此次纂辦一統志竟將伊姓名里居概從刪削殊屬非是張照不知朕辦理其案之公衷而反挾私怨恨誠非大臣公忠體國精白一心之道然其文采風流實不愧爲鄉賢卽董其昌亦豈純全之正人君子哉使竟不登志乘傳示藝林致一代文人學士不數十年竟歸泯沒可乎況從前張照之獲罪固疑爲鄂爾泰傾陷其獄中憤怨之詞亦大都指摘鄂爾泰者居多蓋鄂爾泰欲置伊於死地朕若聽信其言張照豈獲生全彼不知朕非信讒之主而鄂爾泰又豈能讒張照之人卽如朕初政時戶部尙書缺出果親王保薦右侍郎託時朕以海望乃左侍郎資俸旣深皇考眷注亦優特予擢用夫鄂爾泰之力必不能過於果親王果親王尙不能薦用一尙

書豈鄂爾泰能構一尙書致死耶嗣念張照究係可用之材因出之囹圄不數年間由內閣學士洊擢刑部尙書供奉內廷朕之待張照終始成全原不以一眚之微始終擯棄可謂極儒臣之榮遇卽將來國史中亦當令載筆之臣將伊事蹟詳晰編入何此時纂辦一統志轉佚其名耶總之張照雖不得謂醇儒而其資學明敏書法精工實爲海內所共推重瑕瑜不掩公論自在所有此次進呈之一統志卽將張照官秩出處事蹟一併載入

沈德潛

沈德潛江南長洲人乾隆四年進士改庶吉士七年授編修八年遷左中允累遷侍讀左庶子侍講學士充日講起居注官九年充湖北鄉試正考官遷少詹十年晉詹事充武會試副考官十一年三月授內閣學士八月請假歸葬得旨不必開缺御製詩賜之曰我愛德潛德淳風挹古初從來稱晚達差未負耽書方藉通元筆胡懸韋孟車其如感風木暫許返林閭南國欣歸陸東門漫擬疏江鄉春意嬾能不憶金除命給德潛二代封典十月諭曰朕尙留心詩賦不過幾餘遣興偶命屬和其中才學充裕如沈德潛等間或一加超擢而躁進之徒競思進獻若借此

可爲梯雲之捷徑不知沈德潛優陞閣學朕原因其爲人誠實謹厚且憐其晚遇是以稠疊加恩以勵老成積學之士初不因進詩優擢雕章琢句專事浮華此風一熾必有藉手捉刀希圖僥倖者傳諭知之十二年四月命在尙書房行走六月假滿赴職賜詩曰朋友重唯諾況在君臣間我命德潛來豈宜遽引年瀧岡表阡罷白駒來賁然卽此至性肫令我愈以憐晝錦非所誇孝烏或致焉席前陳民瘼不負予諮延兒輩粗知書善爲道孔顏尋擢禮部侍郎十三年充會試副考官尋諭曰沈德潛年力就衰著以原銜食俸在尙書房行走十四年詔原品休致賜人濩官帛命有所著作許寄京呈覽尋進所著歸愚集上南巡諭在籍食俸賜詩曰水碧山明吳下春三年契闊喜相親玉皇案吏今詞客天子門生更故人別後詩裁經細檢當前民瘼聽頻陳老來底越精神健劫外胎禽雪裏筠是冬以祝皇太后六旬萬壽詣京十七年正月回籍十月進所撰西湖志纂二十二年上南巡加禮部尙書銜疊前韻賜詩曰前席何曾隔六春三千里不間疏親星垣帝友豈無友吳下詩人尙有人咨度瘼情期達隱平量句義欲肱陳步趨望九雖稱健靈壽聽教手握筠二十六年詣京祝皇太后七旬萬壽上命集在朝諸王文武及致仕

大臣年七十以上者爲九老凡三班並繪圖德潛列致仕九老之首時德潛進所撰選刻國朝詩別裁集請御製序文上以德潛選次未當命儒臣重爲精校去留賜之序曰沈德潛選國朝人詩而求序以光其集德潛老矣且以詩文受特達之知所請宜無不允因進其書而粗觀之列前茅者則錢謙益諸人也不求朕序朕可以不問旣求朕序則千秋之公論繫焉是不可以不辨夫居本朝而妄思前明者亂民也有國法存焉至身爲明朝達官而甘心復事本朝者雖一時權宜草昧締構所不廢要知其人則非人類也其詩自在聽之可也選以冠本朝諸人則不可在德潛則尤不可且詩者何忠孝而已耳離忠孝而言詩吾不知其爲詩也謙益諸人爲忠乎爲孝乎德潛宜深知此義今之所選非其宿昔言詩之道也豈其老而耄荒子又不克家門下士依草附木者流無達大義具巨眼人捉刀所爲德潛不及細檢乎此書出則德潛一生讀書之名壞朕方爲德潛惜之何能阿所好而爲之序又錢名世者皇考所謂名教罪人是更不宜入選而慎郡王則朕之叔父也雖諸王自奏及朝廷章疏署名此乃國家典制然平時朕尙不忍名之德潛本朝臣子豈宜直書其名至於世次前後倒置者益不可枚舉因命內廷翰林爲

之精校去留俾重鈔版以行於世所以栽培成就德潛也所以終從德潛之請而爲之序也十月諭曰今年恭逢聖母皇太后七旬大慶在籍諸臣來京叩祝具見悃忱獻歲之初朕恭奉安輿時巡南服諸臣甫及旋里復當出境迎鑾僕僕道途於林下高年諸多未便可諭諸臣今冬曾經赴闕者明春無庸赴省候接在兩浙者不必至江南在江南者不必至東省如沈德潛卽於蘇州錢陳羣卽於嘉興餘均視此爲例副朕體恤至意二十七年駕過常州德潛偕錢陳羣來賜詩曰去歲入都祝慈壽皤然九老領林泉清詞還擅香山會底事便教故里旋更止遠迎塵跋涉所期重晤得流連論文兼及蒼生隱虛席誰訾宣室前三十年上南巡晉階太子太傅賜其孫維熙爲舉人賜詩曰吳中今古老人科比似徵明定若何書畫雖輸詩勝彼功名已過壽如他遊山有興仍清健處世無爭祇善和明說九旬有三歲那更年格尙嫌多三十二年賜人漉三十三年亦如之三十四年八月諭兩江總督高晉浙江巡撫永德前經降旨將錢謙益之初學集嚴行查禁嗣據奏到陸續收繳銷燬因思沈德潛錢陳羣二人平素工於聲韻其收藏各家詩集必多在錢陳羣於錢謙益詩文似非其性之所近且久直內廷尙屬經事諒不至以應

禁之書轉視爲可貴若沈德潛向曾以錢謙益詩選列國朝詩別裁集首經朕於序文內申明大義令其刪去但既謬加獎許必於其詩多所珍惜或其門弟子狃於錮習向欲奉爲瓣香妄以沈德潛齒宿德尊謂可隱爲庇護愆戾存留亦未可定果爾豈沈德潛不知恩重不復望朕爲之慶百歲耶沈德潛錢陳羣自退居林下以來朕恩禮優渥所以體恤而矜全之者無所不至伊二人寧不感戴殊榮勉思仰副若其家尙有錢謙益初學有學等集未經呈繳者卽速遵旨繳出與二人毫無干礙斷不必虞及前次收藏之非妄生疑畏豈朕成全兩人至此而委曲令其繳出轉從而加之罪責乎高晉永德將此旨密諭沈德潛錢陳羣知之九月德潛病卒高晉覆奏德潛家並無未繳錢謙益詩文集諭曰沈德潛積學工詩耆儒晚遇受朕特達之知嗣以年高引退特許歸里俾得頤養天和爲東南搢紳領袖前者屢次南巡見其精神強健疊沛恩施年來復時予存問方冀壽躋百齡益承優眷今聞溘逝深爲軫惜著加恩贈太子太師入祀賢良祠又御製詩曰平生德弗愧潛修晚遇原承恩顧稠壽縱未能臻百歲詩當不朽照千秋節終宣命加優典論定應知有獨留吳下別來剛四載悵然因以憶從頭賜祭葬如例諡文愨四

十三年江南東臺縣已故舉人徐述夔著一柱樓集詩詞悖逆經縣民首告集內載德潛爲述夔作傳下大學士九卿議請追奪德潛階銜祠諡卹其墓碑諭曰沈德潛所作傳內稱一柱樓編年詩已付梓並云品行文章皆可法是沈德潛於徐述夔悖逆不法詩句皆曾閱看並不切齒痛恨轉爲之記述流傳尙得謂有人心者乎沈德潛自中式進士及選入翰林時朕因其平日學問尙好格外施恩又念其留心詩學且憐其晚成是以不數年間擢爲卿貳又令在尙書房行走而伊自服官以來不過旅進旅退毫無建白並未爲國絲毫出力衆所共知及乞休後給尙書銜晉贈太子太傅並予在籍食俸恩施至爲優渥沈德潛理宜飭躬安分謹慎自持乃竟敢視悖逆爲泛常爲之揄揚頌美實屬味良負恩且伊爲徐述夔作傳自係貪圖潤筆爲囊橐計其卑污無恥尤爲玷辱搢紳使其身尙在雖不至與徐述夔同科亦當重治其罪今伊業已身故不加深究然竟置而不論俾其身後仍得享受恩榮則凡在籍朝紳又將何所警惕乎著照所請行以昭炯戒四十四年御製懷舊詩列德潛五詞臣末詩曰東南稱二老曰錢沈則繼並以受恩眷佳話藝林志而實有優劣沈躋錢爲粹錢已見前詠茲特言沈事其選國朝詩說項

乖大義製序正厥失然亦無訶勵仍予飾終恩原無責備意昨秋徐案發潛乃爲傳記忘國庇逆臣其罪實不細用是追前恩削奪從公議彼豈魏徵比仆碑復何日蓋因毫而荒未免圖小利設曰有心爲吾知其未必其子非己出紈袴甘廢棄孫至十四人而皆無書味天網有明報地下應深媿可惜徒工詩行闕信何濟

汪由敦

汪由敦浙江錢塘人原籍徽州雍正二年進士改庶吉士散館授編修六年丁父憂以纂修明史奉旨在館守制十年充日講起居注官十一年四月遷左贊善八月遷侍講十三年七月轉侍讀十月授四譯館少卿乾隆元年充山東鄉試正考官尋命尙書房行走擢內閣學士二年六月廷臣傳言李紱授倉場侍郎張坦麟授江蘇巡撫御史劉元燮疏請嚴禁妄傳上命總理王大臣詢問元燮元燮稱聞由敦亦曾至坦麟家稱賀由敦因具疏辨諭曰汪由敦如果有其事雖強辯無益如實無干涉則不辯自明亦當靜聽乃朕甫交總理王大臣詢問伊何由得知劉元燮奏中有伊名乎卽此亦足見其耳目頗多必招搖生事不安分之人也著革去內閣學士在侍讀學士上效力行走十二月補翰林院侍讀學士五年復授內

閣學士六年三月充文穎館副總裁五月遷禮部右侍郎九月調兵部左侍郎十月充順天武鄉試正考官七年二月充會試副考官經筵講官九年三月調戶部右侍郎晉工部尙書八月充順天鄉試正考官十二月調刑部尙書十年教習庶吉士十一年兼署左都御史在軍機處行走十三年因定擬誤繙清文一案罪名過輕部議革職得旨從寬留任十四年二月金川奏凱議敘加太子少師四月充平定金川方略副總裁十一月署協辦大學士事十二月大學士張廷玉致仕將歸乞皇上一言爲配享太廟券謝恩不親至傳旨令廷玉明白回奏次日廷玉早入朝諭曰昨朕命寫諭旨時大學士傅恆及汪由敦承旨而汪由敦免冠叩首奏言張廷玉蒙聖恩曲加體恤終始矜全若明發諭旨則張廷玉罪將無可道此已見師生捨身相爲之私情及觀今日張廷玉之早來則其情顯然若將二人革職交王大臣質訊未有不明者軍機重地顧師生而不顧公議身爲大臣豈應出此汪由敦著革去協辦事務留尙書任贖罪以觀後效十五年三月諭曰汪由敦革職留任之處加恩准予開復上閱永定河工命由敦同大學士傅恆總督方觀承會勘南岸建壩事宜合疏言臣等自北岸八工抵河南岸由下七工至上六工緣

隄審視形勢查上六工舊有草壩四應葺張仙務雙營二處舊壩分洩漲水下七
工向未設壩今細閱馬家鋪及冰窖以東隄外多係鹹地廣袤閒曠距村莊遠可
瀦水應增建草壩二分減水勢入河身漸致淤塞其中流涸出之處現有民居請
禁增造房屋得旨俞允四月同莊親王等釐定皇朝禮器圖六月永定河南岸三
工衝開月隄諭赴固安會勘搶築事宜八月四川學政朱荃匿喪賄賣生員事發
部議由敦曾保薦荃應革職諭曰汪由敦本應革職但念其人尙勤慎學問亦優
著在兵部侍郎任內效力贖罪尋充順天鄉試正考官十一月上念由敦在內廷
行走勤慎阻勉恩賞其長子承沆廕生并令分部學習十六年七月兼管戶部侍
郎事八月調戶部右侍郎十二月命同大學士高斌等查勘天津一帶河工十二
月合疏言永定河身北高南下冰窖下口應量加疏濬並酌疏王慶坨南引河分
數支則蓄水之地益廣由南埵龍尾東入鳳河隄清水一道宜加草壩緩勢東岸
隄工再培高免漲漫南埵中汛當下游水滙處應加培以障河淀再冰窖口門內
河身西折處挑濬引河紮接埧灣尤屬順捷詔如所議行十七年晉工部尙書十
八年以誤准開銷喜峰口修墊道路銀部議降三級調用得旨從寬留任十九年

二月同蔣溥等修盤山新志四月加太子太傅十月兼管刑部尙書事二十年五月平定準噶爾議敘軍功加三級七月充平定準噶爾方略正總裁九月調刑部尙書二十一年六月調工部尙書十一月署吏部尙書二十二年實授二十三年卒遺疏入諭曰尙書汪由敦老誠端恪敏慎安詳學問淵深文辭雅正節任部務供奉內廷夙夜在公勤勞匪懈前以偶撻寒疾當命加意調治並賜醫藥以冀速痊忽聞溘逝深爲軫悼卽日朕親臨奠醊著加贈太子太師入祀賢良祠並准其入城於賜第停設賞內庫銀二千兩經理喪事應得卹典仍著該部查例具奏御製詩悼之曰贊治常資理論文每契神在公誠匪懈卽世信何因言行遺編簡老成謝摺紳奠臨摠一切底計日當辰尋賜祭葬如例謚文端是年冬上以由敦書法秀潤命翰臣排次墨蹟摹勒上石名時晴齋法帖十四年御製懷舊詩及五詞臣由敦列刑部尙書張照之次詩曰由敦亦工書用工過於照而實不能及則以天分料古學實勝之雅正弗輕掉任職本謹愿書愈夙夜效乃以師生誼獲罪所自召不可聽其然小懲大戒劭然亦旋重擢改過斯堪教飾終仍加恩善善欲長道五十二年由敦子戶部侍郎承霈敬進其父詩文集上題句當序詩曰時晴

書草壽苕華子舍茲呈遺藁嘉詩與古期歸雅正文非時調去浮誇席前我偶懷
賈誼書讀爾休慙趙奢舊日西清劇談輩祇今誰在惹咨嗟承霈現官順天府尹

彭啟豐

彭啟豐江南長洲人雍正五年一甲一名進士授修撰入直南書房七年閏七月
署日講起居注官充河南鄉試副考官十年充雲南鄉試正考官十三年二月遷
左中允六月充江西鄉試正考官十月充順天武鄉試副考官乾隆元年充山東
鄉試副考官三年遷侍講五年遷右庶子六年六月充江西鄉試副考官七月遷
侍讀學士九月遷右通政尋遷左僉都御史十一月疏言臣由江西驛路經宿州
州境蒙恩賑卹水災知州許朝棟不實心經理饑民戶籍六七口僅登記三四任
甲長胥吏索取報冊錢鳳陽知府梅疏健並不到廠親查敕下兩江總督那蘇圖
查奏尋奏覆許朝棟照料不周已飭員前往協辦七年遷通政使提督浙江學政
十一月條陳學政事例一請定條對經義畫一章程乾隆元年諭令學臣於歲科
考試文藝後就諸經中舊說異同別彙處摘錄發問依義條對後陝西學臣嵩壽
奏請於四書經義外摘錄本經四五行令作講義大都敷衍塞責且既試條對又

作講義亦屬繁複請嗣後不用講義欽遵諭旨
在御纂諸經中專取先儒異同令其條對一請嚴甲商濫保商童之例查浙省商童由鹽道錄送學政衙門收試雖有廩保商結爲憑往往招別籍之人冒考頂替請嗣後甲商如有混保冒籍入場者照不應律治罪一請隨場出題考試歲貢查向例考貢之年出題一次考究將卷彙齊送部伏思先後一題則考過一棚凡陸續赴考者預知題目皆可宿構請嗣後各屬就近送考隨時命題不拘先後一題例庶得各展所長一鄉場對讀不敷請兼用四等武生查鄉場對讀例用五等文武生浙省科場需用二百名不敷則用樂舞生或臨期招募臣思考居四等原無不許鄉試之例四等文生有礙場期固難對讀若四等武生鄉試在十月中並無妨礙請嗣後各省如五等生員不敷對讀兼用四等武生俟對讀後免其錄遺准入場鄉試當亦踊躍從事下部議行十二月遷左副都御史八年遷內閣學士均留學政任十月擢刑部右侍郎十年四月疏陳浙省利弊四事一浙省山高水駛猾吏奸民侵占蓄水之湖洩水之溝以爲田地上年藩司潘思榘疏請禁占官湖部議除已報墾地畝餘蓄水處劃界限不許再墾然如餘杭南湖發源天目注茗下灌杭嘉湖三郡自前撫朱軾加

意濬治今已沙淤其他會稽餘姚慈谿等湖皆僅存其名請敕督撫次第開濬一江南漕米每石收費五十四文半給運丁半歸州縣爲修倉鋪墊人工飯食紙張以及折耗等費浙省杭嘉湖運丁設有漕截一項由州縣徵給而州縣漕費並未議及收漕賠累爲苦每石漕米私加一二升至五六升蠹役乘機竊取運丁嚇詐勒加請敕漕臣援江南例每石收錢二十四文爲州縣修倉鋪墊等費嚴禁浮收一浙江額設均平夫銀供夫役差徭之用差簡可以敷用差繁每苦賠墊欵差馳驛官員照勘合定數易以應付本省官員來往吏役任意多索或卽折銀請敕兵部按官員大小差使煩簡覈定人夫名數俾州縣有成例可遵一浙省黃巖太平地多斥鹵產鹽甚旺兵丁借端挨戶搜查稍有食鹽存積多方嚇詐一不遂欲卽指爲私煎私售甚或並數家數人之鹽湊數扳誣祈敕合省文武大臣禁兵弁借名搜緝指食鹽爲私鹽下部議行尋丁父憂十五年五月授吏部右侍郎八月提督浙江學政十八年調兵部左侍郎二十年二月疏請終養得旨昨因論臣工終養一事降旨宣諭今日嵇璜彭啟豐各具摺呈請終養此奏若在降旨之前出自伊等至情迫切固當曲體允從之特以面聆朕訓感發天良則所請乃導之自朕

而伊等本未有迫不及待之情此亦如禮部鄉賢在可准可不准之間其去留朕得而權衡之又當各視其人矣彭啟豐才本中平辦理部務亦屬竭蹶且伊係內廷翰林以文學爲職而上年扈蹕和詩視前遠遜所學日漸荒落著照所請准其回籍終養二十六年十月署吏部侍郎二十七年四月報滿實授五月諭曰昨引見京察一等各員覈之各堂官保列名單其中等第參差率不甚相遠惟吏部郎中阿敏爾圖各堂官俱列一等而彭啟豐獨列爲二等不免有心示異非偶然品題高下之比阿敏爾圖係滿洲世族朕習見熟知伊果有出衆長才堪膺重任外而封疆內而卿貳當已早經擢用豈尋常曹司必待留心甄擇而定者況京察等次不過就本任職守而言並非卽爲一生定評卽如阿敏爾圖在部郎內安分供職而又能持正無私顧惜顏面若選司之銓務銀庫之出入以該員素守論之實可信其無他彭啟豐之意不過以其望族所在非特爲區別何以知其獨立不懼彭啟豐人不如其學學不如其文亦從無一言建白一事指陳乃欲於隨衆具摺之中小示異同如此獨立誰則不能朕衡量人才如各部院兼攝大學士尙書侍郎等亦祇令竭其分各抒己見並不倚爲黜陟其間或同或異原不加之責備試

問吏部各堂官列阿敏爾圖於一等是保爲封疆乎卿貳乎卽彭啟豐之斤斤示異若此爲京察大典乎爲取巧市名乎其事固不煩言而易曉第恐不能見用之人妄生議論以爲卽如彭啟豐之不與人同究可謂能自立崖岸或人謂因有此奏始有此旨中外得悉朕甄才用人之意然朕之勤政與否能識人與否二十年於此矣天下宜共悉固不待朕之朝綸暮綍以口舌化天下也六月充浙江鄉試正考官十二月遷左都御史二十八年六月遷兵部尙書充經筵講官三十年充順天鄉試正考官三十一年諭曰史奕昂朕念其爲大學士史貽直之子且曾任藩司辦事尙無貽誤服闋來京候補其階級與侍郎相等是以擢用兵部侍郎偶值召對之次諭及兵部大臣大學士尹繼善在軍機處行走不能每日進署託言年齒近邁且係初理部務彭啟豐又屬碌碌無能爲之人鍾音蔣耀亦未能練習部務汝與期成額尙能辦事應隨處留心此原不過令其於日行事件稽覈司員勤惰查察書役弊端而已乃伊恃有此諭遽爾沾沾自喜大言不慚遂欲獨侵事權放恣自用竟似朕以部務專任伊一人者昨期成額奏伊在部面斥彭啟豐有不稱尙書只宜爲司員之語今詢之彭啟豐堅稱史奕昂並無此言但其平日有

願爲外任之意及召詢鍾音則稱實係共聞因令彭啟豐面爲質對伊始唯唯承認史奕昂此語本屬無稽彭啟豐亦何妨直陳不諱而乃自居蘊蓄不言人過甘效唾面自乾則不但選愼無能其居心並欠誠實此又彭啟豐之結習未除也史奕昂姑從寬降爲三品卿銜令其回籍彭啟豐學問尙優辦事本非所長今復意存模稜並不據實奏對殊失大臣之體史奕昂兵部侍郎員缺卽著彭啟豐降補三十三年京察諭曰侍郎彭啟豐才識拘牽服官竭蹶著以原品休致三十六年詣闕恭祝孝聖憲皇后八旬萬壽賜遊香山詩詔分大臣爲三班九老致仕者九人啟豐與焉四十一年上東巡啟豐迎鑾山東恩賞給尙書銜四十九年卒

清史列傳 卷二十

大臣畫一傳檔正編十七

鄒一桂

鄒一桂江南無錫人雍正五年進士改庶吉士散館授編修十九年充廣西鄉試副考官尋授雲南道監察御史十二年疏言民間嫁娶及契買奴婢不用官媒惟戶婚詞訟或入官發賣之人始用之然亦止令書名畫押近不法之徒私養婦女覓主局姦吞騙無所不爲請敕步軍統領順天府五城各衙門訪拏嚴禁並定地方官失察處分下部議行十三年提督貴州學政乾隆三年奉旨留任四年疏言黔省漢苗錯處雍正三年前學臣王奕仁奏准歲科兩考於定額外加進苗童一名卷面填寫新童字樣查歸化已經百年之苗俗尙文風與漢無二請准入漢童內應試其歸化未久者照例歸入新童六年疏言歲科考一二等生員例得幫增補廩黔省歲案幫補以行文科考日爲止與各省同科案幫補則於鄉試前科冊解部日卽停是歲案得缺倍多科案得缺至少請改於下屆行文歲考日停止以

昭平九部議均從之七年疏言刑部向例秋審結案者歸北監現審未結者羈南所司獄禁卒例不更換益以結案之犯恩旨於每月初二十六兩日許家屬入視家人在監者每日准出入買辦而未結之犯案情未定概不許人出入以杜傳信串供今臣查視南所北監已未結雜收不無滋弊請敕部分禁於收禁時立檔開明已結未結人犯字樣庶易稽查得旨照所請行是年遷禮科給事中八年七月疏言近見奉旨發議之事科道於部議未上之先攙越瀆陳徒滋繁擾應請申飭諭曰科道職司言路凡有見聞自應陳奏但如鄒一桂所奏攙越瀆陳則大不可嗣後遇有交部議事件如科道不待部覆參差具奏者該部於議覆本內將伊等意見參差之處聲明請旨九月疏言樂舞生向來多弊是以定例令州縣官會同教官選補文童取隣族結冊送學政查核現經禮部覆准河南學政林枝春條奏改由學臣錄取此法一行恐不肖學臣藉以網利請照舊例補送下部議行九年與給事中陳大玠先後疏劾革職巡撫許容不宜仍署湖北巡撫上嘉納之十年四月遷太常寺少卿九月疏言監獄重犯雖防範不得不嚴然律載獄具全圖鐵索鈕鑰俱有定式獄官果遵式慎選禁卒不時查點安有越獄之虞從前禁卒人

等因需索故以防範爲辭或用桎牀以束其身鐵簫以直其項觀音圈以攀其手足種種非刑經部議嚴禁載入則例乃日久另創新制囚徒無分多寡概令排頭仰臥於腳鐐手鐐之中橫穿長木鎖逼兩端壓其手足不能屈伸轉側搔抑痛癢實與桎牀無異獄囚多緣斃命該管上司以脫監處分最嚴並不嚴禁以穿木束因爲通例直省類然晉豫尤甚請敕督撫臬司諸臣嚴禁部議從之十一年遷大理寺少卿十二年授僉都御史十三年遷大理寺卿一桂工繪事所進圖畫多邀御題十五年遷內閣學士十七年八月充會試副考官十二月擢禮部右侍郎十八年轉左十九年同部侍郎張泰開保舉一桂子志伊爲國子監學政詔下部議泰開以瞻徇革職一桂降三級留任二十年以瞻徇尙書王安國左都御史楊錫紱准其父入祀鄉賢祠降二級留任二十一年上以一桂年老不勝侍郎之任調補內閣學士二十三年十二月疏請致仕允之陛辭御製詩二章賜之其一曰懷鄉念切老年索弗許翻嫌不近情一响陞辭雙淚下原猶戀闕可憐生其二曰簪纓歸里榮依舊花鳥怡情樂正賒吳下詩人應好在白頭相聚話烟霞時沈德潛致仕家居上憶及之故云二十六年來京恭祝皇太后萬壽蒙恩預九老會賜游

香山二十七年三十年上南巡一桂兩迎駕賜畫禪頤壽額三十六年復來祝萬壽預會賜遊如前命加禮部侍郎銜在籍食俸三十七年歸里道卒諭曰禮部侍郎銜鄒一桂供職有年人亦醇謹前以老告休昨冬來京見其精神尙能如舊特加恩准其在籍食俸俾資頤養令於春和就水程南歸頃聞行至山東汶上縣地方患病溘逝殊爲可憫著加賞尙書銜仍著該部照尙書應得卹典察例具奏尋賜祭葬如例

董邦達

董邦達浙江富陽人雍正元年拔貢經刑部尙書勵廷儀保舉命在戶部七品小京官上行走七年鄉試中式十一年進士改庶吉士散館授編修乾隆三年六月充陝西鄉試正考官九月奏言陝西官卷額中六名今科卷數少祇遴中四名餘二名於民卷補中不敢濫取官生足額疏入報聞九年六月充日講起居注官尋授右中允十二月遷侍講十年遷侍讀學士十一年以與修明史綱目告成議敘紀錄三次十二年正月命南書房行走七月擢內閣學士九月皇清文穎告成議敘紀錄三次十月丁母憂十三年九月諭曰內閣學士董邦達丁憂回籍將逾一

年著照從前尙書梁詩正之例來京在內廷行走給與俸祿服闋時遇缺補用十五年補原官十六年三月充會試副考官十二月遷戶部右侍郎十八年六月充江西鄉試正考官九月調工部右侍郎十九年九月充武會試正考官十二月以失察寶源局匠役竊銅奉旨降三級從寬留任二十二年九月調吏部右侍郎十月充經筵講官二十五年充武會試正考官二十六年遣祭中嶽嵩山及太昊伏羲氏諸陵二十七年遷都察院左都御史十二月晉工部尙書二十九年調禮部尙書三十一年正月復調工部尙書十月命紫禁城騎馬三十二年仍調禮部尙書三十三年因工部任內誤准浙江製造步兵烏槍降一級留任三十四年五月以老病奏請解任得旨董邦達年逾七旬衰病乞休自合引年之例但伊挈家久居京師既不能遽回本籍且禮部事務本不甚繁著加恩准其給假數月俾得安心調攝不必解任七月卒諭曰禮部尙書董邦達久直內廷奉職勤慎前以衰病乞休特加恩給假調理以冀漸痊今聞溘逝深爲軫惜應得卹典該部察例具奏又諭董邦達病故所有伊前在禮工二部尙書任內應賠銀兩著加恩寬免尋賜祭葬如例謚文恪邦達工繪事御製詩題詠甚多嘉慶十二年三月諭曰高宗純

皇帝實錄告成正總裁大學士董誥前後在館八年始終其事尤宜特加優獎董誥之父尙書董邦達從前未經入祀賢良祠著加恩准其入祠子誥官至文華殿大學士

金德瑛

金德瑛浙江仁和縣人乾隆元年一甲一名進士授修撰五月命在南書房行走三年五月充福建鄉試正考官六年六月充日講起居注官旋充江南鄉試副考官十一月提督江西學政八年六月遷侍講七月疏請童生府試宜做生員科舉例文章每入學一名府取五十名武童每入學一名府取十名或逾數濫送聽學臣裁斥又凡各府學無租者聽府學之廩生貢士報名附縣學冊後酌量多寡分給部議從之十一月遷右庶子九年十一月諭曰金德瑛在江西學政任甚有操守取士公明著留任十年二月疏言翰林爲儲才之地庶吉士務期學有根柢器量明達庶無負教養可備將來任使是以每科命滿漢大臣二員教習庶吉士五六十員而內閣部院大臣政務殷繁但能總其大綱舊有分教之例以俸深翰林爲之俱由掌院分派時設時止今館選屆期乞令大學士掌院於翰詹中品學優

瞻資俸較深者揀選引見簡畀分教得旨俞允四月轉左庶子十三年二月擢侍讀學士三月遷少詹事十五年六月充福建鄉試正考官十月遷太常寺卿十六年十二月命致祭女媧氏等陵十七年二月疏言女媧氏陵前寢殿中塑女像侍嬪御詢之士人據爲求嗣之神實爲黷褻應毀舊像立木主下部議行四月提督山東學政十九年三月擢內閣學士二十一年二月遷禮部右侍郎六月充江西鄉試正考官二十二年三月充會試副總裁二十三年二月提督順天學政五月疏言生員三年歲考黜陟優劣攸關八旗中效力當差駐防及丁憂者皆由學預詳或臨場患病亦必由學申明病痊日補考立法綦嚴茲臣按試八旗查閱清冊見滿洲文生與考者二百四十六名而無故不到者二百五十六名漢軍文生與考者一百七十六名而無故不到者二百八名詢之教授茫無以應概以患病爲辭臣思患病之人豈轉多於與考之人皆由本生不自聲明教官姑爲容隱臣見將無故不到人數分別滿洲蒙古漢軍八旗縷晰名單咨各旗都統按名查覈請敕限兩月內查明咨覆到臣以便應去應留清晰造冊詔如所請二十四年七月疏言向來直隸鄉試對讀生不敷順天府添雇貧生因此四五等生員內或老病

跋涉資斧艱難先期押赴致有逃避不到者並私雇查出褫革者似屬可矜擬酌爲變通除甘親身供役外如果老病四等發銀四兩五等八兩解交順天府官雇充用議行二十六年五月擢都察院左都御史九月奏言向例提審各官於朝房東西分行坐陳招冊於前刑部書吏二名南北侍立在北之吏先按一省名冊依次唱某囚係舊事某囚係新事稍徐曰某囚情實緩決可矜在南之吏續唱亦如之招冊繁多旬餘竣事日不下四十冊案幾盈千其閒情實可矜者無多餘皆入緩決而陳案十居八九其中改輕改重者多在新事而積年緩決之案罕有軒輊且一案之定由臬司而巡撫而三法司初獄已愼至九卿益加詳焉若經三審緩決猶待後此勘定是何時乃成信讞耶請嗣後巡撫每年仍造全冊送刑部存案備考而刑部分九卿招冊惟以三次秋審爲斷則近事愈見精詳庶獄益昭矜愼上是之十一月奏請恭讀恩詔有致祭古帝王闕里及五嶽四瀆二條例用侍郎及三四品京堂至十七人之多然臣就其中思之尙有可酌兼者如嶽瀆一條祭長白山混同江者由廣寧陟醫巫閭之陞而不兼舉其禮蓋襲明制北及醫巫閭而止而本朝發祥之地江山尊於嶽瀆禮官但議增祀弗加詳考耳祭浙江南鎮

者由山東則泰山沂山東海之祀可兼祭衡山者路出河南則嵩山淮濟二瀆亦可兼但使典禮明備不在多員且可省車馬供億之繁部議從之二十七年正月卒於官

秦蕙田

秦蕙田江蘇金匱人乾隆元年一甲三名進士授編修命南書房行走六年充順天武鄉試副考官七年命尙書房行走八年閏四月遷侍講六月遷右庶子八月遷右通政十一月擢內閣學士十年遷禮部右侍郎十二年五月丁本生父憂十三年四月奉旨秦蕙田服制將滿著仍以禮部侍郎調用十五年調刑部侍郎二十九年充經筵講官二十二年正月擢工部尙書四月署刑部尙書七月疏言工部爲工程總彙辦法難易不同委辦司員每意存趨避請照刑部現審案件掣籤均派之例將應派各員設名簿以工程大小分別等次一百兩以上滿郎中員外籤掣三十兩以下筆帖式籤掣仍註簿堂官留心體察功過示懲勸得旨允行二十三年正月調刑部尙書仍兼管工部事尋加太子太保四月疏請將各省流丐遞籍編甲收管以清逃盜之源諭曰秦蕙田所奏甚是實爲清獄訟息事端之良

法但此輩轉輾流移城市村落所在多有必一一拘查押送責成原籍保甲人等收管事理頗屬煩瑣不若就所在地方設法查禁嗣後地方官遇流丐在境務須督率保甲人等留心訪察遇強橫不法者嚴拏懲治庶於聽其營食之中卽寓禁其滋事之意十月疏言向例各部院赴閣傳鈔事件係當月司員專責而當月止滿員一人遇漢字事件假手鈔寫每致草率遺漏請增派漢司員一人下部議行二十四年御史觀成挾嫌誣奏民人張九違禁晒麪一案蕙田擬罪失當部議革職奉旨寬免二十五年充會試正考官二十八年充會試正考官二十九年四月以病請解任諭曰秦蕙田不必解任題奏事件照常辦尋常咨行事暫且不必畫稿俾得從容調攝八月復請解任回籍諭曰秦蕙田以現在病尙未痊奏請開缺給假回籍就醫著照所請准其給假南旋既可乘便就醫而江鄉水土於伊調攝自必相宜可以日漸痊愈刑部尙書不必開缺其事務著劉綸兼署九月卒於途遺疏入諭曰秦蕙田奉職西曹恪勤素著前以患病告假准其回籍就醫尙冀痊可茲聞在途溘逝深爲軫惻應得卹典已飭部查例具奏著再加恩賞給銀一千兩經理喪事以示優卹尋賜祭葬如例諡文恭三十年聖駕南巡幸寄暢園上憶

及蕙田御製詩有養疴旋里人何在撫境愀然是此間之句

曹秀先

曹秀先江西新建人乾隆元年進士改庶吉士散館授編修時恭修世宗憲皇帝實錄秀先充纂修官兼經史館校勘六年丁父憂九年服闋補原官充山東鄉試副考官十年遷浙江道監察御史尋請假回籍十七年仍補原官八月秀先胞姪舉人曹詠祖與監試御史蔡田交通關節事發時田詠祖俱正法部議曹秀先應革職諭曰曹秀先與曹詠祖交通關節之事經王大臣等審明並不知情且搜獲時卽認係伊姪筆跡據實舉出尙無大咎但伊姪在京夤緣作弊不能約束教訓失察之罪實所應得曹秀先加恩免其革職著降二級留任十八年近畿蝗生秀先疏請御製祭文頒發有蝗郡縣敬謹膾黃祭告乃稽古典舉蜡祭文州縣雇募捕蝗錢糧令同城教職佐雜會同給發並嚴飭不得假手吏胥致滋混冒諭曰曹秀先請頒發祭文所見甚爲迂謬蝗蝻害稼惟當實力撲捕此人事所可盡至於祈神報賽禮亦宜之若欲假文詞以期感格如唐韓愈祭鱷魚其鱷魚之遠徙與否究亦無稽未必非好事者流附會其說朕非有泰山北斗之文筆似此好名無

實之舉深所弗取所請不必行餘著議奏尋議蜡祭不必行餘如所請十九年轉刑科給事中二十一年丁母憂二十五年服闋補吏科給事中巡視南城二十七年擢鴻臚寺少卿二十八年遷光祿寺少卿二十九年遷通政使參議三十年擢國子監祭酒充浙江鄉試考官尋視江蘇學政三十二年擢內閣學士三十三年遷工部右侍郎留學政任三十四年六月命赴浙江會同巡撫永德審長興縣監生李公麟控庫書陳維商等私加火工飯食一案分別治罪如律十月充經筵講官三十五年調戶部右侍郎兼理工部右侍郎事尋調吏部右侍郎充江南鄉試正考官三十六年扈駕東巡遣祭尹吉甫墓請御製詩表其墓許之尋命祭告東嶽及少昊金天氏諸陵暨闕里三十八年充四庫全書館副總裁三十九年進所輯山莊正雅集御製詩賜之卽以爲序詩曰憶年十二始來斯聖祖恩深最受知豈意肯堂肩仔已恆勤養志色難思惟滋夕惕朝乾勵卻匪風吟月弄爲哀輯事成慚正雅那更表語頌浮規八月充順天鄉試正考官十二月晉禮部尙書四十二年上書房行走賜紫禁城內騎馬四十二年命在上書房總師傅上行走四十二年以隨同尙書永貴指名保題主事李淑芳議革職詔從寬留任四十四年

五月扈蹕熱河召見奏請建承德府學並頒發書籍允之四十五年三月充會試正考官四月偕考官尙書德保等奏言會試向例房官閱卷止迴避本省自戊戌科改分南北兩項尋以多寡不均奏明通融辦理臣等伏思此例一行以一人迴避八九省闈中臨時調劑既費周章且既顯示以迴避之門卽隱導以揣摩之漸於防閑中亦有關係請仍舊例爲便臣秀先上年奉命會議兩項分卷當時實爲防弊起見今日擊卷數多寡不齊諸多周折不敢迴護誤公下大學士九卿議行四十六年禮部恭擬壬寅年祀祈穀壇日用次辛諭曰所議甚多不當天子父天母地祇承之義不可稍弛從前雍正七年恭奉皇考世宗憲皇帝諭旨以定例正月上辛若在初五日以前則改於次辛但元旦朝賀乃朕躬之禮儀若因此而展祈穀之期於心實有未安著於上辛行禮煌煌聖訓實萬世不刊之論朕御極以來遇正月初三日以前上辛因必須隔年齋戒是以改用次辛其有初四日上辛亦改用次辛行禮者則因聖母皇太后祝釐初祉朕於元辰恭率王公大臣拜賀東朝儀節不容稍闕至明歲正月上辛並非向年可比矣該部何亦改次辛況冬至南郊禮成有於次日受賀者所謂禮緣義起而義以方外尤必敬以直內如爲

臣下意在尊君不敢輕易朝正令典亦當備查往例具奏請旨乃禮部遽行題達何昧昧一至於此所有禮部堂官著交部嚴加議處尋部議秀先應革職命從寬留任四十七年四月常雩天鏡及更衣幄次陳設不備奉旨嚴責下部議革任加恩寬免仍註冊十月因纂輯明臣奏議體例乖舛下部嚴議尋詔免十一月諭曹秀先不勝總師傅之任著回原衙門辦事四十九年六月秀先卒諭曰禮部尙書曹秀先由翰林洊擢正卿曾在上書房行走教皇子書學問優長奉職勤慎茲聞溘逝殊爲軫惜著加恩晉贈太子太傅其任內降革罰俸處分俱予開復所有應得卹典仍著該部察例具奏尋賜祭葬如例諡文恪

喬光烈

喬光烈江蘇上海人乾隆二年進士以知縣卽用四年授陝西寶雞縣知縣九年調渭南縣知縣十年遷乾州直隸州知州十一年遷同州府知府十六年遷山西河東兵備道二十三年遷直隸按察使二十六年遷河南布政使二十七年遷貴州巡撫疏言黔省地處偏遠新任之員往往在途逗遛請嗣後官員赴任中途患病阻滯統以三月爲限如在限外卽有文結仍作逾限議處其引見差回之員照

此辦理又黔省各郡苗多民少性情樸魯外來匪徒設法哄誘爲害多端請嗣後黔省拏獲漢奸匪徒應徒罪枷杖者遞回原籍通飭各屬備案如私逃入黔將本犯及窩留之人從重究擬又以都勻府屬生童向附平越應試見在赴試人多請於都勻專設考棚均得旨允行二十八年五月調湖南巡撫以湖南嶽麓書院屋宇淺窄兼年深傾圮請改作增建報聞十一月疏稱洞庭濱湖居民築圍墾田湖地漸就堙塞恐致水勢衝決除不礙水道者准其存留餘俱挖開寬口聽水衝刷責成水利縣丞州判等不時巡察每年該管州縣巡察四次府二次道一次巡撫開年一次察明奏報毋令奸民再行私築上是之二十九年四月奏言長沙協標守城額兵分防州縣並水陸塘汛本屬無多如遇鞞靶接至不敷差撥撫標額兵例不派防外汛請將城守營所派防守省城庫獄兵五十名改於撫標派守其長沙協原派兵另派貼防兵少各屬塘汛如所請行九月新寧縣民指控書役舞弊知府王錫藩不卽查辦僅發回本縣鎖禁致縣民罷市光烈未經參劾又未親往辦理論曰知府職在率屬而庸劣無能至此該撫僅以參處知縣了事於王錫藩並無一語指劾喬光烈身爲巡撫於此等大案卽當減從星速自行督辦庶奸民

不致漏網庸吏亦知所提撕乃僅卸責監司深居不出其徇庇怯懦實負簡用之恩著交部嚴加議處尋以不能防範王錫藩乘閒自縊照部議革職三十年正月授甘肅布政使三月卒

傅恆子福靈安

傅恆滿洲鑲黃旗人姓富察氏曾祖哈什屯內大臣祖米思翰戶部尙書父李榮保察哈爾總管俱追封一等公傅恆李榮保第十子乾隆五年授藍翎侍衛歷遷頭等侍衛七年授總管內務府大臣管理圓明園事務八年擢戶部右侍郎十年六月軍機處行走十一年七月轉左十月授內大臣十二年二月充會典館副總裁三月晉本部尙書議政處行走兼鑾儀衛事六月充會典館正總裁十三年授領侍衛內大臣四月加太子太保協辦大學士六月充經筵講官時大兵征大金川逆酋莎羅奔經略訥親總督張廣泗等久無功九月命傅恆暫管川陝總督經略軍務尋晉保和殿大學士賜詩曰壯齡承廟略一矢靖天狼番部蕞爾蠶王師武必揚慰予西顧久嘉汝赤心良捷伐敕么寇撫循集衆長斯能成偉績用幹不庭方佇看銷兵氣敷天日月光賜花翎二十藍翎五十銀十萬兩備犒賞軍前諸

將奏章許於沿途開看上御瀛臺賜食及將士詩曰大清聲教暨遐陬豈有來王
稽蜀酋贖武開邊非我志安良禁暴藉卿謀行軍吉值初陽復賜食恩同湛露流
轉瞬明年擒娑虜還教凱宴侑封侯十月傳恆敗行上親詣堂子行告祭典禮遣
皇子及大學士來保等送至良鄉視傳恆飯十二月諭曰經略大學士傳恆自奉
命以來公忠體國殫竭悃忱紀律嚴明軍行甚速途次衝風冒寒晨夕馳驅兼辦
一切諮詢機務刻晷鮮暇常至徹夜無眠今日披覽來奏甫入川境馬匹遲誤減
從星發竟至步行苟非一秉丹誠心堅金石安能若是將來迅奏膚功自當優議
酬庸之典而目前之勞瘁實屬超倫著交部從優議敘部議加太子太傅特命加
太保仍加軍功三級傳恆疏辭不允初小金川土舍良爾吉奪其兄澤旺印烝於
嫂阿扣莎羅奔之侵沃日也良爾吉實從之後詐降爲賊謀張廣泗惑於漢奸王
秋言使良爾吉領蠻兵我師舉動賊輒知之是月傳恆使副將馬良柱誘良爾吉
來迎至邦噶山聲其罪斬之阿扣王秋並伏誅事聞諭曰前據張廣泗力言良爾
吉王秋不可輕動卽軍前諸臣皆明知其罪而疑畏不敢先發今經略大學士傳
恆甫至軍營卽取兩年逋寇如檻豚罔豕以快人心而警番衆非謀猷明斷識力

堅定曷克臻此卽此已當優敘但經略大學士於從前議敘之旨具摺懇辭若仍交部議敘無以善體沖挹之美其卽以前日所賜雙眼孔雀翎爲此番酬庸之典如仍執意謙讓是不遵朕旨也是月傅恆奏臣於月之二十一日抵卡撒軍營所云左右山梁不過兩坡相對地非甚廣賊所守各礮亦不甚大不知何以用兵二年不能進取及閱營地規模狹小與賊相望且雜處番民市肆中無以示威嚴占地利臣相度移舊壘前令總兵冶大雄總理營盤以肅軍紀臣惟前之誤在於專攻礮卡賊險礮林立大兵至守益嚴毋論攻其有備克取爲難卽數日克一礮亦數年不能竣事今當奇正兼施因機制勝或以奇兵統出其後或以偏師另行取徑賊出則直挫其鋒不出則專搗其穴又各路剋期齊進腹背皆兵寢食無暇自必內潰而酋可擒矣疏入俞旨報聞是月傅恆率總兵哈攀龍哈尙德等攻右山梁下巴朗平礮及色爾力石礮連克之上以金川水土惡劣馳賜傅恆人參三斤並及諸將帥有差十四年正月命班師召傅恆還朝諭曰金川用兵一事朕本意欲禁遏兇暴綏輯窮番並非利其人民土地而從前訥親張廣泗措置乖方屢經貽誤是以特命經略大學士傅恆前往視師傅恆自奉命以至抵營忠誠勞勩超

出等倫辦事則鉅細周詳鋤奸則番蠻懾服整頓營伍則紀律嚴明鼓勵戎行則士氣踴躍且中宵督戰不避風雪大著聲威誠克仰副委任朕思慕爾窮番何足當我王師經略大學士傅恆乃中朝第一宣力大臣顧因荒徼小醜久稽於外朕心實爲不忍即使擒獲渠魁掃蕩巢穴亦不足以償勞此旨到日傅恆著卽馳驛還朝詔封傅恆一等忠勇公賞給紅寶石帽頂四團龍補褂嗣傅恆請從卡撒一路直攻噶拉依又言攻克賊巢旦夕可必一篲之虧誠爲可惜堅請進兵并懇辭公爵繳還原旨俱不允諭曰經略大學士忠勇公傅恆帥師進剿番酋忠誠奮發志期殄寇執奏再三朕揆勢度理以允降班師休兵息民爲經國遠計彼匈奴未滅何以家爲者乃驃姚貳師輩武人銳往立功之概大學士輔弼元臣抒誠贊化名耀旗常正不必與兜鍪閫帥爭一日之績示以詩曰三面姑開格蜀夷來調說鼎佇期之集思廣益卿誠踐勤遠勞民我不爲武豈贖兵應戒彼績惟和衆孰同斯功成萬骨枯何益壯志無須效貳師又賜詩二章其一曰安邊底績本丹忠請命番酋勢已窮上將有心期利執大君無物不包蒙那須一月聞三捷早覺千忻達兩宮晉國勤勞予厪念速歸黃閣贊元功其二曰歐鳥何庸盡覆巢好生天地

德含包歌成宵雅八章句著得同人九四爻兵洗蓬婆春澹蕩首稽獾狁面頰
蜀民安撫勸籌畫心契元良泰陞交是月逆酋遣頭人至卡撒稟訴乞降並畏死
意傳恆令曰莎羅奔耶卡親縛來營者當待以不死逆酋復遣頭人至丹壩乞降
總統提督岳鍾琪入賊巢挈酋日等由勒烏圍噶拉依至經略軍二月初四日莎
羅奔耶卡除道營門外設壇翌日率衆降傳恆升帳受之莎羅奔等焚香作樂泥
首請罪誓遵六事無犯隣封歸土司侵地獻馬爾邦兇酋資送內地人納軍械供
犒役傳恆傳旨赦其罪莎羅奔等獻傳恆佛像一白金萬傳恆卻其金不受初六
日傳恆發軍營奏至諭曰經略大學士忠勇公傅恆奏報莎羅奔耶卡俯首就降
獻捷班師朕不勝欣悅此皆上蒼孚佑宗社貽休有以默相朕躬皇太后懿訓詳
明有以啟迪朕志荷茲福庇感慶實深經略大學士忠勇公傅恆丹忠壯志勇略
宏猷足以懷柔異類迅奏膚功卽諸葛之七縱威蠻汾陽之單騎見虜何以加茲
實爲國家嘉祥上瑞前已晉爵封公酬庸更無殊典所賜四團龍補褂著祇受服
用再照元勳揚古利額駙之例加賜豹尾槍二桿親軍二名優示寵章俱不必懇
辭自去歲之徵兵命將與今歲之決策班師初不意番酋畏威懷德革面洗心一

至於此固朕宵旰憂勤事無大小先機籌畫恰合機宜亦由經略大學士忠勇公傅恆秉心忠亮克承訓示成此殊勳可見作善者昌將來數十年贊化調元懋襄邛治實嘉賴焉其傳諭諸王滿漢文武大臣並宣示中外知之製詩曰止戈爲武信其然我澤如春經略宣共喜捷音來玉闕何殊俘虜自金川番酋路左心傾服軍士行間氣倍鮮單騎汾陽休比擬都因忠赤格穹天嗣傅恆疏辭四團龍補服諭曰經略大學士忠勇公傅恆因朕賞給四團龍補服具摺奏謝并請於朝賀大典之日遵旨服用其尋常仍服公品級補服此固出自大學士忠勇公傅恆謙沖本意然朕此番獎賞實出至公且具有深意不可不爲明晰宣示蓋論大學士公傅恆平定金川之功自不可與揚古利額駙開國之功並論但彼當開創四征之始今屬守成無事之時以大學士公傅恆之忠誠智勇練達宣力令與同時同事亦必能懋建殊勳可信其易地皆然也夫軍旅之事國家不能保其必無大臣身係安危爲社稷所倚賴如張廣泗不過封疆外吏其人亦不足論至訥親爵位既崇又任用有年朕之加恩超越儕輩上年命伊視師實寄以心膂如朕親行不意辜恩貽誤一至於此爲大臣者若惟是偷安自逸任意乖張國事其何賴焉朕既

用以自愧更因以滋懼是以明正典刑不肯曲宥而大學士公傅恆見朕縈懷西顧欣然請行仔肩重任自奉命西征冒涉風霜均勞士卒登陟巖阻晨夕辛勤拜發封章裁決軍務常至達旦且事事妥協周詳至則申明紀律誅賊腹心雪夜督師攻碉毀卡必期焚巢掃穴一舉蕩平大振聲威賊番震懾始稽顙歸命出於至誠迨承朕旨納降班師星馳就道諮詢庶務仍係丙夜辦理奏覆此所謂誠貫金石信格豚魚是以時未七旬兵不血刃而番酋洗心革面永矢歸誠從此邊徼敉寧閭閻樂業而中外大臣咸知所取法股肱一體休戚相關夙夜匪躬緩急足資倚任實我大清萬年無疆之慶國家酬庸盛典原非朕所得私今茲豐沛殊恩昭示風勸亦爲朝廷遠大之計不僅爲金川平定一時一事而然在大學士公傅恆實應欣承無愧不然則莎羅奔番蠻小醜卽迅奏膚功亦與當年岳鍾琪之樹績青海大學士鄂爾泰之綏靖苗疆等耳朕於臣工刑賞大典悉有權衡銖黍不爽天下臣民宜所共悉所賜大學士公傅恆照宗室公式之朝帽頂及四團龍補服并於朝賀典禮之時時常服用不必懇辭其尋常人朝入部辦事應從所請隨宜卽用公品級補服以成謙挹之美三月傅恆凱旋命皇長子率諸王大臣等郊勞

既至上御殿受賀行飲至禮賜傅恆詩曰卡撒功成振旅歸昇平凱宴麗晴暉兩階干羽欽虞典六律宮商奏采薇湛露應教頌朵殿甘霖更慶遍春畿持盈保泰咨詢切偃武修文凜敕幾又諭曰朕賜大學士忠勇公傅恆四團龍補服先經大學士傅恆奏請於朝賀大慶日遵旨服用尋常仍用公品級補服朕諭以入朝入部辦事姑從所請以成謙挹之美今日朕陞殿禮畢後大學士卽易補服朕思章服之榮原以旌有功而勵臣節從前勳舊大臣蒙賜者皆時常服用若僅用於朝賀典禮之時而尋常入朝又旋易本爵服色殊覺參差非禮嗣後入朝著卽遵前旨時常服用其入部及在家聽其自便以終成大學士之謙吉尋敕照勳臣額亦都修國維例建宗祠祀傅恆曾祖哈什屯祖米思翰父李榮保春秋官爲致祭追諡李榮保曰莊恪賜傅恆第東安門內落成賜詩曰驃姚賜第落成新歌凱歸來得意春上將鷹揚今奏績諸軍鳧藻久懷仁攸芋君子熊羆夢畢駭酋渠匍匐臣從此坐調熙世鼎敷予教澤萬方均二十年六月準噶爾平諭曰西路興師之舉人心狃於久安在廷諸臣惟大學士傅恆與朕協心贊畫斷在必行著加恩再授一等公爵以爲力矯積習爲國任事者勸傅恆疏辭諭曰大學士公傅恆以加賞

公爵具摺奏辭情詞懇摯及召見又復面陳再四至於泣下并稱金川之役叨封公爵已爲過分觀其不自滿假信出至誠實將來可以永承恩遇之道朕心轉爲嘉慰俯允所請用成厥志所有平定金川及準噶爾奏捷兩次功績著併於現封忠勇公敕內以昭懋典仍從優加等議敍部議加六級後圖功臣百人像於紫光閣傅恆冠首御製贊曰世胄元臣與國休戚早年金川亦建殊績定策西師惟汝予同鄼侯不戰宜居首功七月充平定準噶爾方略正總裁三十二年命經略雲南軍務至師期前往御製言志詩曰征緬非人事竟乖重資經略重臣差待之一歲無消息懾以三軍或畏懷中止誠難存國體邊防欲靖豈兵佳佇期指日大勳就後舞前歌振旅皆三十四年二月傅恆啟行懇辭親遣經略儀注命閣臣頒敕命於太和殿上賜傅恆及出征諸將士食卽席製詩曰緬酋弗靖擾滇邦螳臂居然試蕊撞健騎重驅厄魯部驍材兼選黑龍江弼予中國原無二平彼今時豈有雙就事熟籌應一往於浮得挈勝千扛必能合衆成城奏早具牽牛袒肉降湛露和風士鳧藻佇看飲至酌金缸三月傅恆抵雲南四月至騰越上親書扇以賜曰炎徼熾煩暑軍營區畫頻大端應悉記細務不辭親世上誰知我天邊別故人勸

斯風到處揚武并揚仁初上以賊踞老官屯之險敕造舟并奪賊船順流直擣副將軍阿里袞等以邊外峽紆湍險舟楫不通沿江亦無辦工所奏止者再後特遣傅顯佐三泰往視所言與阿里袞等同傅恆至軍詢之撫夷李景朝土司線官猛等知蠻暮近地有山曰翁古多木旁有地曰野牛壩野人所居地涼爽無瘴野人樂受值執役甚恭使傅顯佐莅事滿洲綠營兵并從行奴僕更番運料至江岸七月竣狀聞諭曰所辦甚是他人斷不能似此滿洲兵騎射素嫻進剿時自宜資以馬力至於習勞之事則與綠營兵丁既同隸行間原不應區分彼此向特因綠旗惡習恇怯無能臨事每多退避是以有犯必懲若其服役辛勤當與滿洲兵一體愛惜以均勞逸前此領兵大臣惟知體恤滿洲而於奔走服役專派綠營不復念其穢勤豈一視同仁之道今傅恆於運送船料令滿洲兵輪流乘騎分擡不使綠營偏於勞瘁并以大臣官員跟隨之家奴等乘馬安行於理未協亦同例分派輪擡籌辦實爲公當綠營兵稍具天良有不知感激奮勉願爲國家出力者乎此實從來所未籌及自非公忠體國與朕同心之大臣豈能酌理揆情均平安協若此凡有領兵之責者皆常奉以爲法傅恆如此存心必蒙上天垂佑迅奏膚功自可

預卜朕深爲嘉悅至於造船一事水陸并進實征緬最要機宜乃朕屢次詢問而阿里袞並以該處崖險澗窄斷難行船爲詞卽朕今年特派傅顯佐三泰等前往專辦此事亦以沿江一帶實無造船處所覆奏傅恆至永昌卽遣人往勘則於銅壁關外野牛壩地方卽係造成船隻之處樹木足供船料且氣候涼爽可以屯聚兵丁而野人又極恭順服勞無異內地編氓同此沿邊僻壤非自今日始通何以前此并無一人見及而傅恆得之便於取攜可見事無難易人果專心致力未有不成者無如諸人皆預存畏難之見於胸中遂以爲隔閡不可行以今日傅恆所辦觀之向所謂斷難籌辦者然乎不然乎將此宣諭中外知之上賦造舟行曰造舟造舟何處禡乃在銅壁關外野牛壩緬匪險據老官屯必資水軍順流下用是屢敕預刳木率以難成中止罷經略盡心博訪諮得地得材命工價猶然邊外豈異區事在人爲語非假野人效順氣爽涼頗覺炎瘴輕往夏忠誠天佑有如斯我亦爲之額手謝昇至蠻暮乃入江諸事從公堪獎藉閩人使船如使馬鼓勇艤艫凌波駕水陸兼進緬豈當定知袒肉牽羊迓安民和衆武常經不爲所欺不妨赦猛拱大頭目脫猛烏猛及所屬達羅頭目脫猛殼來降請備船濟師傅恆令脫猛

烏猛賚檄諭各土司八月師發騰越渡戛鳩江據西岸遂抵允帽九月脫猛烏猛以夷日賀丙之父賀洛及擺夷四十戶來降請探賊猛拱後土司渾覺亦率頭日滲籠籠滲籠朋降貢馴象四上賜傅恆詩二章獎之其一曰猛拱輸誠舟濟師朱波早自失藩籬烏梁海暨先收附準噶爾斯易掃夷身先諸軍共辛苦心嘉碩輔佛肩仔秋霖中喜瘴江渡巴僂兵行兩月期其二曰伊犁耆定久戈弢詎緬昏狂事疥搔昔實謨猷贊帷幄今資奔走效弓刀東山那學謝安逸上蔡還過裴度勞佇待紅旗飛報捷重開紫閣勒勳高十月傅恆取道猛拱破猛養寨獲臘泥拉賽誅之設臺站留瑚爾起兵七百駐之遂至南董干攻南準寨獲頭目等木波猛等三十五人師次暮臘猛養頭目扎達布棄猛拔營逸哈坎大兵長驅至新街賊遁傅恆夾攻於東西岸射殺賊目一斬級五百餘獲蠶一船一寨三糧械無算西岸奪寨三斬級五十奏至諭曰此次初與賊人接仗卽射殪頭目殺賊衆多又連破賊壘奪獲蠶幟軍械米糧等物軍行甚爲順利且官兵俱各勇往朕心甚爲嘉悅應加恩示獎送部分別議敘傅恆以所獲緬蠶進上賦誌事詩曰師會新街可進航賊人迎拒據蘆塘數番斫陣賊鋒挫兩隊奪舟我武揚斬將舉旗嘉此衆水凶

土劣慮其方老官屯得當振旅觀象玩辭易義長十一月傅恆進圍老官屯克毛西寨酋懜駁遣頭目諾爾塔乞降傅恆以其地氣候惡劣疏請允降諭曰緬甸僻在炎荒中朝以化外置之乃歷任總督自張允隨廢弛邊備嗣是愛必達吳達善等亦因循致滋邊釁而劉藻辦理莽匪侵擾九龍江事由思南退回普洱輒行畏懼自戕緬匪遂鴟張無忌此歷來貽誤情形也至命楊應琚前往調度乖方致賊匪入關騷擾土司其種種欺謾屢飭不悛取罪實在於此及再命明瑞往仍令以總督經理邊情並未遽欲興師遠涉而所統八旗勁旅一萬二千又分其半與額爾登額由旱塔一路取道合剿迨明瑞自錫箔蠻結拔寨殺賊乘勝深入轉戰至小猛育爲時已久屢促額爾登額移兵往援乃敢抗延不赴又復紆道內地明瑞等猶沿途接仗期殿全師竟以策應不前捐軀以殉其事遂難中輟彼時緬酋懜駁雖曾具書軍營懇停進剿而所遣乃內地被留之兵丁許爾功等八人并未專派大頭目賫表乞降此則國體所關豈宜輕納是以置之不答然猶冀其悔罪輸誠尙可宥其既往非必欲勞師動衆爲犁庭掃穴計也詎待至一載逆酋猶頑梗怙終我國家當全盛之時豈可任小醜跳梁不示懲創況滇省綠營恆怯積習久

爲賊匪所輕而阿里衮等亦未能相機部署是以調遣吉林索倫等慣能殺賊之人并閩省水師同赴滇省水陸夾攻又因大學士傅恆屢請前往督辦其實心體國經畫有方體察形勢所言始爲可信遂命爲經略往莅其事此朕不得已用兵之苦心也至傅恆於七月間自騰越進兵視前此師期較早兩月賊匪未及預防因得由戛鳩一路統兵直進收取猛拱猛養而其所經山徑崎嶇江河紆阻越險濟軍備嘗勞瘁且因敵刈糧不藉內地轉餉及至新街會兵策勵將士無不賈勇爭先於江岸沙洲連奪賊砦殲賊五百餘并殪其頭目獲取舟航器械皆望風披靡如此殫誠宣力不畏艱險實從來大臣所罕觀者及進次老官屯率衆攻剿而賊所拒甚固遂克毛西寨誅戮賊衆絕其糧援復悉力圍其大寨勢可計日而取但其地水土惡劣官兵多生疾病卽領隊大員亦間有染患身故者將士等不用之於戰陣而徒令其嘗試毒厲於心實有所不忍是以半月前卽迭傳諭旨決計撤兵今傅恆等奏緬酋懜駁奉有蒲葉書遣老官屯大頭目諾爾哈賚詣軍門籲請貸其聲討傅恆等移檄使受約束義正詞嚴姑從所請賊衆甫經創屺諒不敢遽萌故智至傅恆請罪一摺以爲力違衆議執意請行將此次出兵引爲一人之

罪殊爲未喻朕意此次出兵非好大喜功而傅恆承命經略職分應爾設以爲辦理非是朕當首任其過其次方及傅恆豈宜獨以爲己責昔皇祖於吳三桂一事諭令廷臣集議而主撤藩者惟米思翰明珠數人後逆藩抗命衆皆歸罪議撤之人皇祖諭曰朕自少時以三藩勢焰日熾不可不撤豈因吳三桂反叛委過於人大哉聖言足爲萬世法守傅恆此事即可援以爲例前於傅恆收服猛拱時曾賜三眼孔雀翎以示褒寵傅恆懇俟功成後再用今既未經攻克賊巢前所賜翎卽著繳回仍用伊原戴之翎卽此於伊請罪之意適足相當想王大臣等亦當誠心允服也上賦誌事詩曰大勝新街武略張勵師進取靖豺狼雖云示創蠻江地適有相求貝葉章已自畏威而懷德底期肉袒與牽羊樊鄉悉怛非嘉畫渾覺優恩俾樂康十二月緬酋懜駁遣其大頭目十四人獻方物於軍三十五年二月班師三月傅恆還至京七月卒諭曰大學士一等忠勇公傅恆才識超倫公忠體國德心孚契襄贊深資自早齡侍直禁近親覘其器宇非常洵膺委任旋以金川建績錫爵酬庸用是擢冠綸扉綜理庶務蓋誠靡懈罕有其比西旅之役獨能與朕同志贊成大勳及崇爵再加堅讓不受尤足嘉焉昨歲進剿緬甸傅恆堅決請行朕

以萬里懸軍情難深悉而廷臣更無可當斯寄者因授爲經略統率勁旅專征傳
恆自夏鳩濟師以後身先士卒艱瘁備經用能收服猛拱迨會師蠻暮襲擊新街
斬馘塞旗賊皆潰竄遂進攻老官屯時傅恆已身染沈疴猶力疾督勵兵衆晝夜
兼攻剋期可卜逆酋畏懼具書懇請解圍而朕亦因其地水土惡劣軍中多病先
期降旨撤兵并遣醫馳驛往視春間傅恆於天津行在復命見其形神頓異隱慮
難以就痊猶冀其安居調理以臻勿藥詎自五月以後病勢日益加劇漸成不起
每朝夕遣使存問賜以內膳羹糜俾佐頤養復間數日親臨視疾見其有增無減
軫念彌殷今聞溘逝深爲震悼所有衾襚之屬業經從優頒賜似此鞠躬盡瘁尤
宜入祀賢良祠賞給內帑銀五千兩治喪並著戶部侍郎英廉經理其事朕仍親
臨奠醑其應得卹典著該部察例具奏上親臨其第酌酒製詩曰瘴徼方欣輿病
迴侵尋辰尾頓增哀鞠躬盡瘁誠已矣臨第寫悲有是哉千載不磨入南恨半途
乃奪濟川材平生忠勇家聲繼汝子吾兒定教培又命喪葬儀節視宗室鎮國公
例行賜祭葬有加禮諡文忠十一月諭曰大學士忠勇公傅恆曩者金川奏績時
以其祖父世篤忠貞流光鍾慶曾諭令建立宗祠自其曾祖哈什屯以下官爲春

秋致祭傅恆令其一體入祠酬庸俎豆三十六年上巡畿輔駐蹕天津行宮傅恆前歲復命處也追憶之詩曰去歲滇南力疾迴恰斯面晤憶生哀樸齊卽景依然也前席言人何往哉自古同爲閱世客祇今誰是作霖材自憐無助涓埃者後進方當竭力培三十九年上以蹕途所經賜奠其墓詩曰佳城咫尺蹕塗旁莅止因之酬桂漿已歷廿年資輔弼又驚三載隔陰陽先茲與汝應相恨後此願予轉自傷無忘昭陵雖有例那教賜奠痛文皇四十五年上賦懷舊詩以傅恆在綸扉二十三年日侍帷幄蓋誠素著年未七十鞠躬盡瘁以喪甚傷惜之詩曰世臣更近戚丹誠素所信命之習政事幹材亦日進金川往經略旌旗改觀奮然其時其勢未宜深入迅耶卡旣怖讐特許歸降順凱旋贊黃閣章服三錫晉西師兩用兵同心卻衆論坐謀無不協用歲大功建其後征緬甸力請往抒蓋猛拱旣收服官屯進圍困祇以水土劣兵役多病頓值彼悔罪請爰撤師旅振然因受瘴深兼悔墮功悶遂以永辭世飾終典空絳嗟我社稷臣所期寧在近年少長於余騎箕惜且恨傅恆子四人長福靈安多羅額駙乾隆二十一年傅恆請派往軍營效力授三等侍衛在乾清門行走如所請往軍前二十四年從定邊將軍兆惠剿賊於葉爾

羌紘功擢二等侍衛八月詔來京準噶爾大功告成上以福靈安非披堅執銳之
歲卽能奮勇行陣屢著勤勞擢頭等侍衛賜緞六端銀百兩二十七年給雲騎尉
世職三十一年授正白旗滿洲副都統署雲南永北鎮總兵四月赴木邦軍營守
龍陵會緬匪犯猛卯檄副將哈國興馳援賊退遮罕事聞上嘉之六月卒於任諭
曰副都統福靈安去冬奉命前往雲南朕因其從前征剿回部宣力行閒諳習軍
務是以暫留彼處令其察看軍務以便回京時面奏嗣以其行走奮勉勇往任事
特授爲副都統并令署永北鎮總兵統兵進剿今據明瑞奏福靈安前從永昌力
疾趨赴木邦中途病勢加劇復回永昌調理不痊於六月初旬身故朕心深爲軫
惜著加恩交部議卹所有應得卹典該部察例具奏其靈櫬還京著妥爲照料辦
理賜祭葬如例所遺雲騎尉世職以其姪襲傳恆次子福隆安和碩額駙封一等
忠勇公官兵部尙書別有傳又次子福康安現官協辦大學士吏部尙書仍留兩
廣總督任封一等嘉勇公又次子福長安現官工部尙書隆安子豐伸濟倫現襲
一等忠勇公爵官副都統在御前侍衛行走

兆惠

兆惠滿洲正黃旗人姓吳雅父佛標官至都統雍正九年兆惠由筆帖式在軍機處行走補內閣中書十三年遷內閣侍讀乾隆二年遷兵部郎中四年遷內閣侍讀學士六年擢內閣學士七年遷盛京刑部侍郎兼攝兵部事九年調補刑部右侍郎十年授正黃旗滿洲副都統十一年授鑲紅旗護軍統領十三年五月因定擬誤繙清文一案罪名過輕部議革職得旨從寬留任六月兼管戶部侍郎事八月派赴金川軍營督辦糧運十二月奏言卡撒左右山梁色爾力等路貯糧僅供兩月現調兵前來迅速臣將附近之崇德牛廠及美諾糧二萬餘運往籌備臣觀望軍營諸將惟護軍統領烏爾登總兵哈攀龍勇往副將下頗多庸員又聞各省派兵時將備間以家丁冒名糧或占額兵役使統俟經略抵營告令酌辦諭曰俱屬公論可告之經略大學士傅恆秉公澄汰以歸核實又奏奸棍買餘米射利詔嚴禁毋滋弊十四年大軍凱旋奉旨覈軍需錢糧十五年正月授正黃旗護軍統領嚮道統領十一月調戶部左侍郎十六年八月命赴山東勘傳鈔尙書孫嘉淦偽稿一案暫署巡撫事九月還京十七年充經筵講官十八年二月命赴西藏辦事防準噶爾四月奏言駐藏五百兵同時換班不便請分爲二起一於頭年五月

起程七月抵藏一於次年二月起程四月抵藏得旨允行十九年議剿準噶爾命兆惠協理北路軍務並總理糧餉二十年二月請同哨探兵進剿諭留烏里雅蘇臺辦事在領隊大臣上行走三月準噶爾台吉噶爾藏多爾濟降諭兆惠以牲畜給之十月總理北路臺站十一月調赴西路巴里坤辦事兼理額林哈畢爾噶臺站定邊右副將軍薩喇勒自伊犁被陷復歸二十一年正月兆惠聞其至吐魯番約與進剿奏入諭曰兆惠辦理甚合機宜昨曾降旨令管特納格爾臺站今著傳諭伊到特納格爾若事繁卽留辦事如易料理卽同達爾黨阿領兵進剿在參贊大臣上行走其巴理坤一應事務著和起照兆惠所定章程悉心經理三月大軍再定伊犁上以定西將軍策楞辦事未協諭兆惠駐伊犁五月授定邊右副將軍六月命籌伊犁善後事宜七月請定吐魯番界編回人莽阿里克所屬佐領允之先是侍衛託倫泰赴葉爾羌喀什噶爾撫諭大和卓木布拉呢敦小和卓木霍集占久未返兆惠奏遣副都統阿敏道以索倫兵百及厄魯特兵三千收服阿克蘇庫車烏什各回人且偵託倫泰信是月霍集占送託倫泰還兆惠飭阿敏道馳往撫諭又奏言定西將軍達爾黨阿進兵哈薩克索阿睦爾撒納臺站馬多爲嗎哈

沁所竊臣現遣兵搜捕並知會達爾黨阿於撤兵還時沿途緝之得旨嘉獎十月
奏偵霍集占有悖逆狀密飭阿敏道速進兵報聞是年冬達爾黨阿自哈薩克撤
兵還厄魯特宰桑之從征者謀煽亂未發噶爾藏多爾濟詭以叛賊巴雅爾刦掠
告兆惠遣將軍和起調諸厄魯特兵協剿而噶爾藏多爾濟之姪扎那噶爾布及
宰桑呢嗎哈薩克錫喇達什策凌回人莽阿里克等陰通巴雅爾中途肆逆和起
被害兆惠以孤軍遠駐伊犁聞信整師東旋擊賊自濟爾哈朗移兵甫至鄂壘扎
拉圖突遇達什策凌等乘夜奮擊殺賊千餘噶爾藏多爾濟扎那噶爾布等糾衆
邀歸路連戰不退遂被圍二十二年正月巴里坤辦事大臣雅爾哈善以聞詔趣
侍衛圖倫楚以兵八百馳援二月雅爾哈善續遣索倫兵往迎諭曰兆惠係駐劄
伊犁等處辦事大臣適遇厄魯特等背叛奮勇剿賊甚屬可嘉著封爲一等伯世
襲罔替並將御用荷包玉韞鼻烟壺加恩賞賜尋授領侍衛內大臣戶部尙書兼
鑲白旗漢軍都統是月兆惠還抵巴里坤疏陳上年十一月由濟爾哈朗至本年
正月三十日至特納格爾沿途剿賊屢戰狀諭曰前因副將軍兆惠領兵剿賊全
師而出遣人調取援兵於雅爾哈善奏到時曾降恩旨今覽所奏沿途與賊交戰

甚爲勞苦兆惠等所領並非進剿之兵且馬匹無多官兵等竟能同心奮勇遇賊盡行剿滅振旅而回實堪嘉予此次奮勉行走暨陣亡受傷官兵查明分別賞卹圖倫楚所領兵曾經出力者一併交部議敘兆惠等奏偵巴雅爾及扎哈沁等潛牧木壘以兵往捕上嘉兆惠等以遠道旋歸奮勇不怠賜御用玉鞞荷包鼻烟壺會巴雅爾遠遁乃詔還同定邊將軍成袞扎布分路翦滅厄魯特賊衆三月偕參贊大臣鄂實等由額林哈畢爾噶路進剿時扎那噶爾布已殺噶爾藏多爾濟等又爲台吉達瓦所殺而獻其首於軍門適阿睦爾撒納自哈薩克盜馬竄歸伊犁掠扎那噶爾布牧兆惠檄參贊大臣富德往追而自駐濟爾哈朗弗與俱上訓飭之五月諭曰成袞扎布兆惠奏綽和爾得木齊阿穆呼朗等投赴軍營暫行安撫所辦尙合機宜惟伊等並不以擒阿睦爾撒納爲要務而亟以辦理回部爲言殊不知緩急務迅速辦理毋負委任六月奏擒獲阿睦爾撒納之姪達什策凌及宰桑烏巴什並遵旨策應富德報聞七月奏擒獲巴雅爾於塔爾巴噶臺及其孛哈薩克汗阿布賚畏威歸順表獻馬匹下部知之八月奏言遣圖倫楚擊敗哈薩克錫喇賊衆於阿爾噶凌圖侍衛愛隆阿擊前掠臺站之都爾伯特台吉納木奇降

其衆報聞是時阿睦爾撒納竄入俄羅斯而遣往撫諭回城之副都統阿敏道爲
逆回霍集占所戕九月命兆惠等籌剿回部尋奏請於烏魯木齊屯田且便與哈
薩克市馬詔如所請十二月成袞扎布改北路左副將軍詔授兆惠爲定邊將軍
二十三年正月奏言沙喇擊勒厄魯特賊衆萬戶請先剿除再赴葉爾羌喀什噶
爾上察其有畏難之意以參贊大臣雅爾哈善爲靖逆將軍專辦回部諭軍機大
臣曰辦理沙喇擊勒賊衆已派兵五千自屬裕如兆惠等宜加意擒剿不留遺孽
若仍不能集事惟兆惠是問又諭曰厄魯特性反覆無定往往自相戕害從前達
瓦齊在伊犁時人心尙且離散今豈有堪爲統率之人哈薩克錫喇等小醜焉能
使賊衆服從且衆厄魯特已與嗎哈沁竄伏一處必互相爭奪大兵乘其潰亂迅
往襲擊立可奏功兆惠等勿因其烏合之勢過爲疑慮卽遵旨相機辦理二月奏
言臣欽奉訓旨敢不益加奮勉口糧現未全到擬卽剋期進兵諭巴里坤辦事大
臣速運三月奏言臣等前慮賊衆會合以抗拒我兵我皇上先機洞鑒謂烏合之
衆不能久聚萬里之外誠如日觀臣與副將軍策布登扎布等分剿策布登扎布
以兵千二百趨博羅塔拉及賽里木淖爾臣與巴祿等亦以兵千二百趨博羅布

爾噶蘇副都統瑚爾起等趨尼勒喀侍衛達禮善等趨齊格特夜發布拉克約相俱會伊犁並行文北路堵截尋又奏賊衆紛紛潰逃狀報聞伊犁附近有庫隴癸山叛黨思克圖塔爾巴布圖庫特克爾得克四宰桑據險藏匿兆惠偵知之遣侍衛扎延保投誠厄魯特達什車凌收其牧羣而自以八十餘騎夜入山口剿之時曉霧迷漫布圖庫特克爾得克脫走餘悉就斬獲捷聞上嘉獎交部議敘四月奏報叛賊輝齊鄂哲特等就擒賊牧俱殘破準噶爾之事將竣請由伊犁進剿回部上以哈薩克錫喇等未獲訓諭之五月奏言臣於四月十三日渡伊犁河抵格根喀爾奇喇詢嚮導云由特穆爾圖淖爾踰巴爾琿嶺假道布魯特一月可至葉爾羌喀什噶爾諭曰前屢降諭旨令兆惠將伊犁等處叛賊渠魁全行擒獲再往回部今來奏業已遄行自毋庸復返但當沿途休息馬力與雅爾哈善會合並卽招降布魯特人衆兆惠等奏布魯特頭目圖魯起拜鄂庫等赴軍前乞降臣等譯敕書卽行收復七月遣侍衛達桑阿烏爾登託倫泰先後護布魯特東西二部使者入覲命速赴回部與雅爾哈善合兵進剿會雅爾哈善圍庫車霍集占自糾衆來援爲我軍擊敗冒死入城復脫走雅爾哈善坐疏縱革將軍職詔趨兆惠馳往代

將其軍九月諭曰據兆惠奏遵前旨領兵八百名速赴回部一抵庫車卽與雅爾哈善協心剿賊斷不肯半道而回有靦顏而所奏施誠勇往深得領兵大臣之體軍旅爲國家重務以滿洲大臣身膺簡畀統率戎伍正當踴躍自效公爾忘私我朝簡策所垂忠勤代著遠軼前古乃近來漸染惡習臨事心懷觀望或聞撤兵慶若更生曾不知奉公體國之意謂何此風深可痛恨今兆惠毅然以剿賊自任其器識實出諸臣之右且計其具奏時尙未知有雅爾哈善失機債事不堪任用令伊往代之旨乃如此陳奏深爲嘉悅著加恩賞戴雙眼孔雀翎兆惠等奏言臣抵烏克蘇降回衆五千餘戶烏什伯克霍集斯及其子漢咱帕爾亦攜衆獻城降臣遵旨令舒赫德以侍衛駐阿克蘇臣卽率大軍赴葉爾羌疏入獎賜荷包鼻烟壺兆惠既至葉爾羌奏我兵三千餘行戈壁千五百里馬力疲乏急需接濟馬三千俾得更換剋期而進先是上念我軍長途跋涉特派索倫察哈爾健銳營及陝甘綠旗兵繼進並傳諭副都統阿里袞侍郎永貴於巴里坤豫選馬三千送庫車備調至是阿里袞接兆惠咨請親送軍前允之諭富德率大軍策應兆惠永貴巡查臺站亦赴阿克蘇十一月舒赫德馳奏兆惠於黑水被圍敕富德阿里袞及舒赫

德等速往援舒赫德奏言兆惠遣索倫侍衛五十保等兩突圍賫送奏稿內稱臣等於十月初六日直薄葉爾羌城賊緣邊畫溝立隊自固我師以少擊衆所向披靡三戰斬殺甚夥賊擁竄入城不出臣遣愛隆阿堵截喀什噶爾援賊並迎將軍納穆扎爾參贊大臣三泰軍謀賊輜重在城南英峨奇盤山計乘虛襲之十三日取道城東渡黑水未及半而橋圯我師渡河者纔四百騎霍集占悉醜類二萬餘來戰而地皆沮洳人馬不能如志且戰且踰河退保大營然我師人知效命殺賊千餘營中現餘兩月糧深壕高壘以待援師輕敵妄進之罪在臣兆惠一人實難道疏入諭曰辦理回部一事原因賊酋霍集占等向爲厄魯特拘囚阿巴噶斯之地自大兵平定伊犁出諸陷穽之中俾仍長其舊部何啻起死肉骨而狼子野心不知感戴生成輒敢負恩反噬甚至戕害將軍所遣之副都統阿敏道及隨從百人若不興師問罪何以振國威而申天討迨我師已得庫車兆惠勒兵請進風聲所過知阿克蘇烏什等城相繼歸化其回部大頭目霍集斯等復效順前驅惟霍集占奔竄葉爾羌是以兆惠率師乘機直入洵爲有進無退之良將且我滿洲勁旅所向披靡無敢抗拒卽如今夏兆惠富德等攻城略地所領僅千人而左右哈

薩克東西布魯特各處回衆不煩攻剿不待招徠早已爭先納款其回部一路之阿克蘇等城無不勢如瓦解將謂乘勝長驅直入葉爾羌喀什噶爾亦屬甚易數年來平定準噶爾降哈薩克布魯特實爲極盛之會而遽有此大兵被圍之信蓋實因我師晝夜馳驅未免馬力不足以致一時困守待援所幸先事綢繆於六月間卽次第派遣索倫察哈爾健銳營及陝甘之綠旗兵前往策應馬匹糧餉亦已籌運在途其時初不知兆惠今日之奏報也可見蒼穹垂佑默啟朕衷實深感悚有此部署計現陸續俱抵葉爾羌矣兆惠與援師合力其氣培增從此掃穴犁庭兇渠就縛庶幾上申國憲下慰忠魂軍務可告成事至若身膺闕寄奮勇直前計不反顧乃我滿洲大臣從來敦樸舊俗今兆惠統軍深入志在滅此朝食自不暇輟轉以爲身謀忠誠勇敢朕實深爲嘉予兆惠著由一等武毅伯加二字晉封爲武毅謀勇一等公加賞紅寶石帽頂四圍龍補服以彰獎勞賞功之典其在事之大臣侍衛等俟兆惠回至阿克蘇時查奏優敘御製詩紀其事詩曰我軍取烏什酋長歎復獻元戎乘良機率衆直前進其奈隆冬時枯草經蹂躪以此馬不肥奚堪供斫陣況臨彼巢穴螳臂注一奮借一誘我軍萬騎逞驅趁我師纔千餘

鼓勇無退寸橋圯度四百忠義人爭勸殺賊至千餘矢盡接短刃涉淖退保營相持城下頓壯士遊七人星馳兩致信舒赫德留守諸回靜以鎮羽檄催後師繼進期颺迅畢齊阿克蘇赴援雪深恨夷考兵興來曾無遭挫軻此番客主殊不幸致事償兆惠稱輕敵請罪誠不吝此非退縮比誰逆料利鈍終能寡敵衆允由效忠蓋奚忍更加罪褒嘉章服晉諸臣諸軍士行賞以功論畫後促後軍直前金鼓振欲藉士敵愾仰冀天助順捷音共春來平回鴻績建十二月舒赫德奏言回人托克托默特自葉爾羌來稱布拉呢敦由喀什噶爾糾衆五千合霍集占衆圍困大兵三十餘日忽聞布魯特掠喀什噶爾將軍縱火攻奪賊營二兩賊酋疑將軍與布魯特有約欲議和將軍執其使以矢射書傳諭云爾等果欲納款必先入覲否則不允後賊酋亦射書願送口糧撤圍相見將軍不報又聞軍營脫出之厄魯特言營中掘得米粟百六十窖疏入諭曰兆惠舉動雄偉甚屬可嘉著加恩賞給御用朝珠金黃帶荷包此帶可常時服用二十四年二月定邊右副將軍富德奏報臣遵旨馳援兆惠於正月初六日行至呼爾璜遇賊騎五千麾衆夾擊轉戰五日四夜會參贊大臣阿里衮督解馬亦至分翼謹呼馳突直至初十日黎明斬殺無

算布拉呢敦脇中槍傷昇入城旋潛回喀什噶爾兆惠營中聞槍礮聲知我援兵集厲兵邀擊賊衆且遣索倫卒及回人四約期夾攻兆惠亦奏言臣等自上年十月十三日被圍相持三閱月賊引水灌我營或以葦帚蔽體及掘溝潛伏俱爲我兵擊退狡計百出不得逞帳旁及林木內拾鉛丸數萬卽用以還擊仰賴聖主威福上天神佑靈蹟甚多安營處近戈壁而有深林伐木給用初憂乏水因賊灌營反獲接濟掘井泉輒湧出至正月初旬井水忽涸又獲藏粟二十餘窖官兵意氣奮發毫無懼色現於正月十四日與富德合兵還阿克蘇兩疏入上覽奏獎慰御製詩曰圍解萬里遠懷紓午夜頻將軍誠善守天意本先仁少挫終能勝知難在審因勞哉惟衆士予曰有良臣更議擣虛策相籌應變神兔營終詎脫蠖屈乃求伸重賞斯寧吝明征要必伸舞干雖美事何以謝軍人又御製黑水行曰喀喇烏蘇者唐言黑水同去年我軍薄回穴強弩之末難稱雄築壘黑水待圍解詎人力也天帡幪明瑞馳驛踰月到面詢其故悚予衷蜂屯蟻聚張數萬三千餘人守從容窖米濟軍軍氣壯奚肯麥麩山鞠藭引水灌我我預備反資衆飲用益豐銃不中人中營樹何至析骸薪材充著木銃鐵獲萬億翻以擊賊賊計窮先是營內所

穿井圍將解乃智其中聞言爲之悵諸臣實鞠躬既復爲之感天眷信深崇敬讀
皇祖實錄語所載曾聞我太宗時明四總兵來戰正夜大霧彌霧敵施火礮樹
皆燬都統艾塔往視攻回奏敵礮止傷樹我兵曾無傷矢弓匪今伊昔蒙帝佑觀
揚前烈勵予冲詎人力也天帡幪大清寰海欽皇風尋兆惠疏辭封爵及章服諭
勿辭並以其母年老時遣人存問是時霍集占黨侵和闐命速發兵援之四月上
以兆惠等籌調兵馬過多諭速相機進剿並加意擢節糧餉六月大軍分路進布
拉呢敦棄喀什噶爾霍集占棄葉爾羌遁降其衆四萬餘戶撫定之捷奏至得旨
嘉獎諭速追擒兩賊酋七月大敗霍集占於阿爾楚爾及伊西洱庫爾淖爾逆酋
兄弟竄巴達克山我軍蹙之勒令擒獻未幾均被戮十月巴達克山汗素勒坦沙
獻霍集占首安集延霍罕博洛爾諸部相率歸順諭曰將軍兆惠等勵衆選兵先
後追剿屢獲全勝賊勢窮蹙巴達克山諸部皆感恩歸誠恐後今既奉檄自效逆
酋授首從此邊陲寧謐各部落永慶生全將軍等凱旋至京時朕當親臨郊勞兆
惠已晉公階並迭賜章服其加賞宗室公品級鞍轡以示寵異再著加授一子爲
三等侍衛十一月奏言回部平定各城永息干戈而安撫新降仍須駐兵彈壓請

於葉爾羌駐一千喀什噶爾駐一千莫噶薩爾駐五百阿克蘇烏什等處亦酌派兵駐守並令各城伯克輪班入覲允之二十五年二月命爲御前大臣紫禁城內騎馬先是上命築壇於良鄉城南行郊勞禮至是兆惠率從征將士凱旋覲謁如儀上撫勞賜御用朝珠及馬禮成隨駕還京上御豐澤園幄次凱宴賚銀幣尋命圖形紫光閣御製贊曰濟爾哈朗喀喇烏蘇兩番襲迫均保無虞以智濟險以誠感愚卓哉崇勳闢我皇圖二十六年七月奉旨協辦大學士事務兼管刑部尙書八月命同大學士劉統勳赴豫勘築楊橋決口等處奏疏濬賈魯河及開放各事諭獎其悉中機宜二十七年復同劉統勳等勘江南運河酌濬高寶諸湖歸江之路詔如所議行二十八年二月上以直隸濱水窪地秋霖積潦未消命兆惠往勘海口廣宣洩並督同御史永安等相度天津靜海文安大成等處疏濬事宜三月奏報各工減水日數寸涸出地畝已漸播種皆總督方觀承經理遲誤之咎疏入敕部察議十月加太子太保十二月奉旨會同兩江總督尹繼善等籌濬荆山橋河道二十九年四月順勘直隸河工事竣還京十一月卒上親臨其第酬酒卽以其子扎蘭泰許尙公主爲額駙御製詩悼之曰重坎昔已濟百年今忽消大星落

昨夜密席尙前朝一痛嗟何極千勞憶匪遙恨無執手訣城闕鎖深宵諭曰協辦大學士戶部尙書一等武毅謀勇公兆惠質性精勤材猷明練西陲之役稟承廟略式界元戎盤錯屢經膚功懋集是用酬庸錫爵協贊禁廷入直宣勞正資倚任昨偶嬰微疾遣醫診視方意稍加調攝卽冀就痊遽聞溘逝深爲軫悼卽親臨奠醑加恩晉贈太保入祀賢良祠並賞給內帑銀五千兩治喪伊子尙在年幼並派同族工部侍郎官保及內務府司官一人代爲經理應得卹典該部察例具奏十二月賜祭葬諡文襄三十年上南巡至良鄉郊臺詩曰庚辰曾是勞旋師卽貺臺陳得勝旗自此西瀛盡來賀每循南路引餘思固資衆力成勳績實藉元戎善指麾享澤何期騎箕尾不禁觸境一生悲四十四年御製懷舊詩列兆惠於五功臣中詩曰西師歷五年準回兩進討凡兩阻兆惠皆經了而皆安然出蔽功荷大造設非忠誠篤加以勇略昭焉能合衆志成城錫箔保耆定贊絲綸章服元勳表謂當永承恩太平佐有道長予纔三年何不同予老兆惠子扎蘭泰尙和碩和恪公主授和碩額駙襲一等公爵兼散秩大臣

阿里袞

阿里袞滿洲鑲黃旗人姓鈕祜祿父音德官領侍衛內大臣謚愨敬乾隆二年阿里袞由二等侍衛授總管內務府大臣四年八月授鑲紅旗滿洲副都統十二月授兵部侍郎五年六月左都御史陳世倌疏劾山東巡撫碩色奏報沂州歉收分數失實諭阿里袞偕僉都御史朱必塔詳勘疏言沂州府屬之蘭山郯城二縣俱被水患蟲傷而水災尤甚地方官將被水稍輕者議以勘不成災最重者止報五六分照例蠲免十分之一見在應徵錢糧窮黎實難措辦請將上年待徵錢糧緩至後兩年完納其勘不成災者亦緩至次年徵收民借社倉穀石向例秋後還倉不必催追動帑買補災民出境鄰省設法養贍咨送回籍冬月加意撫綏所賣子女力能取贖買主不許勒指下部議行十月調戶部侍郎十一月署兩江總督楊超曾劾江西巡撫岳濬與知府董文煒劉永錫徇情納賄命同江南河道總督高斌鞠實濬坐革職餘論如律六年七月兼管武備院事十月疏言盛京內務府三佐領下未入旗檔者六七千丁請冊報內務府存案嗣後比丁年卽照納差之三千八百餘名添差則差輕易納無隱漏弊奏入如所請時戶部侍郎梁詩正奏八旗兵丁分置邊屯事命同大學士查郎阿往奉天一帶相度地勢再行定議尋合

疏言寧古塔將軍所屬吉林烏拉之東北拉林阿爾楚克及阿爾楚哈之東飛克圖等處平疇沃壤五穀皆宜江繞於外河貫於中山木取資不盡黑龍江將軍所屬齊齊哈爾之東南呼蘭地方地脈深厚五穀皆宜江河圍繞山場樹木俱便又吉林烏拉之西南黑爾蘇站周圍至一統河地脈肥饒五穀皆宜河流貫注林木尙足採取吉林烏拉之西南刷煙站及白都納之東八家子至登額爾者庫五穀皆宜材木稍覺不便黑龍江將軍所屬呼蘭之東佛忒喜素素地方材木豐裕江河通繞但地勢高下各異其不宜屯墾者黑龍江將軍所屬墨爾根黑龍江地寒暑早齊齊哈爾沙磧地多零星不成片落寧古塔將軍所屬吉林烏拉地方旗民耕種餘地無多三省地方山多地窄霜雪早深寧古塔地重山圍繞其東烏蘇里隨分陽春一帶係產蕩之所俱不便移駐七年五月議政王大臣議以拉林阿爾楚哈去船廠甚近地肥饒廣潤五穀皆宜最爲膏腴之地請先移駐滿兵一千名屯墾種地將來著有成效由近及遠漸次舉行上如所請七月兼管奉宸苑事八年四月湖南巡撫許容劾糧道謝濟世狂縱各款總督孫嘉淦請革濟世職御史胡定以許容挾私誣陷入奏上命阿里衮會鞫得容冤誣鍛鍊嘉淦瞻徇扶同狀

復濟世職容論罪嘉淦革職命阿里袞署湖南巡撫六月調署河南巡撫十月授山西巡撫十一月河東鹽政吉慶奏山西民間買田有擇地勒配輕糧弊敕阿里袞妥議因言晉省富民乘貧民之急田取其上賦納其下遂至賠糧無已嗣後將地畝數目田則糧額詳書契紙赴縣查驗覈其賦之上下輕重與實徵紅簿無差者聽其過割從前田糧有避重就輕者限二年內自首更正照則收糧免究二年後別經發覺按數計贓以枉法論田地入官賣主並知情不舉之中閒人等照例杖懲庶富民知儆貧民無累詔悉心妥協爲之十二年調山東巡撫十三年閏七月仍調山西蒲州府民與陝西朝邑縣民以爭黃河雞心灘地互控詔偕陝西巡撫陳宏謀會勘阿里袞疏言雞心灘介秦晉間本屬官地墾種者晉省居多秦省較少請將灘中熟地並未種之灘鹹地以六分給晉民四分給秦民耕種從之十五年擢湖廣總督先是總督永興布政使嚴瑞龍疏參巡撫唐綏祖巧詐營私累商肥橐各款十六年四月命阿里袞同河南巡撫鄂容安會鞠尋奏綏祖無贓款惟縱容鑪頭私買銅鉛添鑄屬實部議革職議上諭曰嚴瑞龍駕詞誣捏永興率入彈章自應分別反坐唐綏祖家產著給還來京候旨九月調兩廣總督十八年

二月廣東東莞縣莫信豐等黨同逆首王亮臣糾黨散筭謀居蘭蕙山爲不軌事
覺阿里袞馳赴增城搜捕逆匪二百七十餘凌遲正法如律上嘉之下部議敘旋
丁母憂回京九月補戶部侍郎十月兼管工部事務十九年授步軍統領二十年
正月署刑部尙書六月署工部尙書補鑲白旗漢軍都統十月授戶部尙書二十
一年五月命爲領隊大臣赴西路軍營九月定西將軍達爾黨阿率師至雅爾拉
賊迎拒阿里袞等領左右翼兵陣斬五百七十餘擒十一人追至努喇復遇賊二
千餘奮勇鏖戰擒宰桑扎南布戮賊三百四十餘上嘉之尋召回京二十二年正
月命爲領隊大臣辦巴里坤事二月從兄達爾黨阿軍營獲罪詔以阿里袞襲果
毅公爵諭曰逆賊阿睦爾撒納及阿布賚逃竄達爾黨阿帶領西路官兵追捕相
距里許爲人所給以致遠遁同事諸臣無所辭其咎阿里袞著降補戶部侍郎六
月授正白旗蒙古副都統九月沙拉斯嗎呼斯等游牧復叛掠臺站阿里袞帶兵
二百前往同都統滿福進勦由阿斯罕布拉克和什特克取道至哈喇沙爾搜剿
山僻賊衆進抵搭本順和爾納木噶獲男婦二百餘口諭曰前因阿里袞進兵遲
延交部議處經部議革職朕諭以且觀後效今旣自知罪愆奮勉行走著加恩免

其革職十二月滿福爲叛賊郭多克哈什哈車凌等誘害沙拉斯嗎呼斯游牧逃庫車等處阿里袞遣熟識路徑之人取近堵截師次哈喇沙爾西南庫爾勒二十三年正月疏報沙拉斯嗎呼斯賊由呼爾塔克山逸至羅卜淖爾我兵往剿路擒嗎呼斯得木齊額默根等二月詔阿里袞所帶兵丁歸雅爾哈善隊諭曰前閱阿里袞所奏伊等追剿沙拉斯嗎呼斯等賊向呼爾塔克山前往嗣素賚瑪報稱阿里袞已回俟剿殺藏匿之瑪哈沁等即可撤兵伊等如果因馬匹口糧不足不妨奏明撤回既稱向前追剿而究未得賊人蹤跡不過於中途遷延行走卽謂爲追襲巧詞飾說可乎四月阿里袞自魯克察赴巴里坤上以阿里袞辦理沙拉斯嗎呼斯賊未能奮勉詔革侍郎仍以副都統革職留任五月奏巴里坤種地人犯分屯築堡酌量安插上以阿里袞不諳事體申諭之八月疏奏雅爾哈善永貴等議於哈喇沙爾托克三關展烏魯木齊等處屯兵三千六百名外增二千四百名酌於收穫後分駐哈密巴里坤又哈密所設卡倫兵請酌裁調往屯田查黃廷桂奏有哈密夾山路徑可至吐魯番而巴里坤糧餉均由哈密運送請將撤回屯兵俱駐哈密以節運費再哈密駐兵二千所設卡倫七十三除塔勒納沁等三十二卡

倫仍須安設其一顆樹等三十九卡倫均可撤又聽差各兵內亦可裁減抽調六百名遣往屯田軍機大臣議如所請時將軍兆惠領兵薄葉爾羌城以四百餘人渡黑水衝剿小和卓木霍集占賊衆二萬餘道遠馬乏堅壁固守三閱月先是上命選馬三千餘濟軍以阿里袞爲參贊大臣自哈密進發尋遷吏部侍郎十二月擢兵部尙書正紅旗蒙古都統二十四年正月副將軍富德統兵至呼爾璦遇賊騎五千轉戰五日四夜會阿里袞督解馬亦至乘夜分翼斫陣賊潰戮千餘人餘悉負創遁逆酋大和卓木布喇哈尼敦脇中槍我兵復進屢敗賊衆將軍兆惠全軍出諭曰阿里袞前雖未著成勞今送馬濟軍如期集事且會同剿賊朕心深爲獎許著賞給雲騎尉世職七月逆賊霍集占逃阿爾楚爾阿里袞偕參贊大臣明瑞阿桂等衝擊賊大潰八月阿里袞等領兵五百駐伊西勒庫爾淖爾西堵截拔達克山要隘復分兵守淖爾南賊據淖爾北阿里袞等攻奪其家屬輜重逆回二千餘乞降復選兵二百踰嶺追剿逸賊九月命以參贊大臣留葉爾羌辦事十月賞戴雙眼花翎二十五年四月命回京賜紫禁城內騎馬阿里袞行次雅木扎爾聞賊掠臺站圍城堡卽回哈什哈爾時伯克邁喇木妄稱阿睦爾撒納已取阿克

蘇糾賊千餘由伯什克勒木來犯阿里袞率兵力戰賊入城堅守復以槍礮攻圍邁喇木夜遁牌租阿巴特阿里袞追及之於和羅木魯克擒邁喇木及呢雅斯諭曰阿里袞聞賊回搶掠臺站卽回哈什哈爾擊敗賊衆撫定回人應機立辦阿里袞著交部議敘伊子拜唐阿豐昇額著授爲藍翎侍衛又諭曰阿里袞奏倡亂回人邁喇木呢雅斯等俱已擒獲此次辦理迅速甚屬可嘉伊子豐昇額著加恩授爲三等侍衛次子倭興額著授爲藍翎侍衛十月授領侍衛內大臣命圖形紫光閣御製贊曰富德入援次呼爾璊趨行戈壁馬不進焉以馬濟軍敵營夜襲同事建績曰鄂博什二十六年十一月署禮部尙書十二月充經筵講官二十七年命爲御前大臣兼上駟院卿二十八年兼管滿洲火營器大臣六月署陝西巡撫十月加太子太保二十九年授戶部尙書協辦大學士三十年兼管禮部事務三十三年正月授參贊大臣往雲南軍營三月署雲貴總督尋授副將軍駐永昌七月疏言緬酋向來恭順內地人往來貿易以資其用今擾我土司抗我大兵則中華一切貨物不許絲毫透漏永昌普洱一帶千餘里山路叢雜恐潛行偷越嗣後奸民販貨出口拏獲卽行正法隘口兵丁得財賣放罪亦如之疏防照例治罪失察

文武官弁查明參革上是之又疏奏雲南省城距永昌千餘里山嶺陡險過兵運糧崎嶇難行是以撥糧二十五萬石到永者僅一萬三千石請將藩庫報銷閒款項內動支二三萬兩修理道路糧運庶免遲誤文報亦不稽延敕速行妥辦八月又言沿邊土司地廣民稀往往年歲豐收賣與內地商販經緬匪蹂躪夷散田蕪蒙恩調駐重兵夷民俱已復業請於今冬借給銀兩購買籽種牛具普行耕種秋成按照時價交米還項不敷兵糧卽在各土司地方採買以省內地輓運之費官兵裹帶之勞得旨嘉獎九月阿里袞會雲南巡撫明德奏滇省銅廠向例糧道專管遇有奏銷布政司雖會銜無稽察之責糧道駐省城銅廠三十餘處近者數百里遠者千餘里耳目難周查本地道府州縣鄉保是其管轄山廠設有透漏卽可調撥兵役拏究至金銀鉛廠二十九處係布政司兼管本地道府無稽查之責請將銅鉛金銀各廠係州縣管理者責成州縣專管本府稽查係府廳管理者責成本府專管道員稽察係府道管理者責成本道專管各廠事務統歸布政使總理報銷至糧道不管銅廠止辦兵糧事務太簡驛鹽道繁請將驛鹽道所管之雲南武定二府改歸糧道管理如所議行三十四年二月以軍營馬匹疲瘦諭責阿里

衰不能殫心籌畫交部嚴議應革職詔留任五月疏奏騰越沿邊一帶緬匪闖入遮放隴川猛卯及戶臘撒等處臣選熟習擺夷言語兵弁令向沿邊土司偵拏既可使內地情形不致透漏並可詰緬匪往來作何防備奉旨如此留心更有何可諭六月疏奏黔省換補習舟楫兵撥補赴滇可得數百水師之用九月偕經略大學士傅恆合疏言猛拱土司渾覺等來降令趕辦牛馬糧米接濟軍營並以猛拱人與堂札爲嚮導進攻阿瓦渾覺獻象牙牛隻等物並採買早稻運送軍營上嘉之四月師至蠻暮十月至新街時傅恆偕副將軍阿桂領兵新街東岸賊三千餘船百餘迎拒阿里衰同伊勒圖據憂鳩江西岸派滿洲吉林綠營兵七百餘進剿賊寨藏百餘人我兵奮勇衝入賊遁又一寨藏賊三四百貴州把總姚卓殺賊一奪旗一我兵鼓勇進剿賊棄壘逃賊踞寨者復五百人我兵放槍追擊賊堅壁不出日暮不能固守潛逃擊斃二十餘人奪寨三殺賊五十餘諭曰初次接仗卽能如此獲勝覽奏甚爲欣慰十二月以疾卒於軍諭曰尙書果毅公阿里衰久侍禁廷敷歷中外公誠恪慎宣力有年前此平定西陲懋著勞績曾經圖像策勳是以征緬之役特命前往滇南俾膺副將軍之任去歲因其身患瘡疾遣御醫馳視

並賜藥餌調攝旋即得痊而精神未能全復朕心方爲厯念昨自夏鳩進次猛拱所至頗稱勞瘁及在新街分兵剿賊奮勇奪壘純蓋足嘉乃因體弱遘疾猶統舟師前進正冀其速愈以副委任遽聞溘逝深爲軫惻所有應得卹典該部察例具奏禮部議上賜祭葬如例命人祀賢良祠諡襄壯三十五年諭曰尙書果毅公阿里袞宣力殫忱克彰勞勩昨歲賜卹時曾令入祀賢良祠今思其先世額亦都遏必隆並以崇勳建有宗祠得膺祀典阿里袞亦應附入邀榮而其父領侍衛內大臣音德尙未列入著與阿里袞一併入遏必隆宗祠用獎勵蓋該部卽照例行四十四年御製懷舊詩列五功臣中詩曰昨歲秋之仲盛京謁陵園三大功臣墓陪葬其間存茲阿里袞者額都四世孫勇豈匹其祖忠實一例肫兆惠阻黑水回衆如蜂屯爾時舒赫德統兵速入援又被狂狙阻進退至兩難適值阿里袞送馬繼進邁率兵亦弗多乘夜賊營掀賊駭自天降鹿羣逃奔西軍俱歸善重進鴻功全後復往征緬受瘴惜隕身一再忘軀勞思之輒淚捫幸而子善繼金川建殊勳凱旋以病終悲惜何忍言阿里袞子四長豐昇額官戶部尙書襲果毅公以軍功加繼勇號次倭興額官雲麾使次色克精額襲雲騎尉次布彥達賚襲兄豐昇額

子爵見任鑲紅旗滿洲副都統

舒赫德

舒赫德滿洲正白旗人祖徐元夢禮部侍郎加尙書銜謚文定有傳雍正六年舒赫德由筆帖式授內閣中書十年遷侍讀十三年遷監察御史在軍機處司員行走乾隆元年七月四川巡撫王士俊密疏四事上閱疏內有近日條陳惟在翻駁前案語發王大臣等閱看舒赫德因劾士俊妄發狂論請明正其罪詔逮問治罪詳士俊傳二年八月奏八旗生齒日繁盛京黑龍江寧古塔三省土沃可墾若將八旗閒散分居三省則京城既多勁旅而根本重地更添丁壯請敕三省將軍勘所屬可墾若干畝駐兵若干酌定人數按戶攤給並請照舊例設公庫各省稅務歸併旗員旗地典於民者贖還見在公中收租地方賞無地之家以十年爲期次第舉行議如所請交三省將軍詳酌妥議公庫前定議酌借一年俸餉俟二年後酌量請旨關稅歸併旗員交戶部定議收贖民典旗地前奉旨俟二三年後舉行存公租地交八旗定議得旨俞允又諭曰舒赫德條奏將各省稅務歸併旗員管理甚無識見彼意以爲旗人生計艱難若管理稅務則可需餘潤以資養贍不知

國家設立關隘原以稽察姦宄利益商民並非爲收稅之員身家計也朕日以砥勵廉隅訓勉臣工尙恐其不能遵奉而可以謀利之見爲之導乎況當日旗員管理關務者亦指不勝屈惟視此長以爲利藪故貪黷之風侵蝕之弊不一而足因而身罹重譴籍其家產累及子孫是今日旗員之貧乏未必不由於當日收稅之所致也豈可使之復蹈前轍且各省委辦稅務率多道府等官並無滿漢之別如滿洲有任道府廉潔自愛者何嘗不可派委而必定以爲例乎總之爲上者施逮下之仁惟有勵以忠勤示以節儉固其根本之圖爲下者皆當早作夜思宣力供職以永受國家惠養之恩方可爲之計長久蓋厚其生計之道不可不思而長貪風以爲惠下則利未見其爲利而且貽害於後日此理甚明非所以教旗員之道亦並非愛旗員之心也初雍正年間京師設官米局收買八旗兵米存貯平糶復議裁市民買米囤積弋利價日昂舒赫德奏請復設從之三年五月遷內閣侍讀學士四年七月擢副都御史十月奏請秋審緩決五次以上者分別減等發落從之十二月遷刑部侍郎六年三月兼辦步軍統領事務十月條奏八旗三營事宜一內城九門外城五門設銅鐵礮一千九百餘請令工部兵部擇其合用者分置

各城殘缺者修整八旗演礮時載往盧溝橋驗放一步軍營向無帳房披甲等巡邏修道遇嚴寒雨雪侵膚請每旗滿洲給帳房二十蒙古漢軍各十一三營盛甲旗幟年久敝壞應酌留朋扣銀修整每營設鳥槍百帳房八十一內外營馬草料俱有定價惟三營草豆每月由五城司坊官開時價報戶部戶部始行支放兵丁先期稱貸拮据應請每馬月給銀二兩五錢戶部按月支放七年六月奏言八旗捕盜步軍校滿洲三員蒙古漢軍各一員輪流值月不能徧及遇盜案與本旗副尉一體議處一八旗地方遼闊一人值月不能徧及雖有議處之條實無弭盜之益請分滿洲旗爲三捕盜步軍校三員分管蒙古漢軍捕盜步軍校各一員各管本旗地方以專責成均下部議行十二年五月調戶部侍郎十三年四月兼理兵部授正黃旗漢軍都統九月調鑲紅旗漢軍都統軍機處行走十月充會典館總裁授兵部尙書尋調戶部管三庫十二月赴四川軍營疏言沿途驛遞絡繹蒙聖諭酌設筆帖式領催兼司站務而正腰各站經管知縣仍委之書役恐多遲誤請再派筆帖式領催駐站親行遞送從之時大學士傅恆經略金川軍務十四年正月命舒赫德爲參贊加太子太保師旋留辦軍需奏言督撫咨商皆要務所設驛

站應嚴考覈請飭各督撫將省會相接之衝驛未設專員及遠近不接向無驛站之處如何接續抽設酌限日行里數定爲章程報部存案其接連外國要隘亦酌設驛站俾軍務不致稽阻下部議行軍需奏銷歲事命往雲南湖廣河南查閱營伍軍裝並勘雲南金沙江運銅水道六月奉勘金沙江自新開灘上至黃沙坪銅運無阻其上游四十餘灘多險蜈蚣嶺等十五灘危險異常仍須陸運總督張允隨奏報一律開通請交部嚴議所糜帑八萬餘兩著原辦人賠補詔免察議上游糜費銀准將下游節省銀抵補其不足者令張允隨及承辦各員分賠時古州總兵哈尙德因被水請移建城垣上以城未便輕遷敕舒赫德相度議奏九月覆奏古州上通都勻下接黎平城西有山水三穿城達江江水倒漾山水爲所阻不能由涵洞宣洩屢致水患擬於城外掘溝引水入溶江其傍南一水去江較遠仍由水洞入城將城內行水溝掘寬建石閘隨時啓閉可免水患無庸移城得旨如所議行十月調兵部尙書十五年六月奏言定例額兵百名內扣名糧二分充營中公用奈繕治軍械巡防路費多不敷該管官每借支存公銀給兵領餉時按名坐扣餘餉不敷養贍似應酌給公費查東南山多馳驟難施馬兵可稍減西北馬兵

十居其八亦可酌裁籐牌兵全無實用請敕督撫提鎮各就營伍情形酌議將公費名糧於馬兵籐牌兵內舊例每百名扣出二分之一外加增數分以備公用廷議允行十二月赴浙江會勘海塘十六年四月會勘永定河七工下口詳見方觀承傳十月會審杭州將軍覺羅額爾登焚賊案鞠實解宗人府治罪十七年正月偕侍郎玉保赴北路軍營防範準噶爾十八年七月以達瓦齊戕喇嘛達爾札自立準夷內亂撤防守兵詔舒赫德回京九月命馳往銅山辦理黃河決口尋疏言正河斷溜淤墊俟水落挑河引溜進掃期冬末竣工至洪湖漲溢工多汕刷督官兵搶護將下游之舊南關白家墩等壩王營減壩開放決范公隄數處以資暢洩奏入報聞又奏言洪湖輒工不能經久惟石工爲有益查江南之洞庭龍潭等山場及山東嶧縣之花山產石料並近水次易運分咨兩省採辦於明歲二月到工請簡熟諳工程大臣帶工員來江辦理上命侍郎嵇璜德爾敏往蒞其事十二月奏張家馬路及二閘浸口合龍大溜復歸故道得旨下部優敘加二級時都爾伯特台吉策零烏巴什等率衆投誠準噶爾宰桑瑪木特追之闌入北路卡倫旋逸出上命舒赫德赴鄂爾昆軍營先是有旨令將軍大臣等於薩喇勒查拏瑚圖克等

之便招諭準噶爾烏梁海十九年正月舒赫德奏報參贊達青阿誘擒瑪木特薩喇勒擒獲烏梁海得木齊扎木參瑚圖克等疏至諭曰舒赫德等奏準噶爾達瓦齊復作台吉烏梁海不願歸順已令薩喇勒暫駐作卓克索地方宣揚兵勢另籌辦理等語竟未喻辦理此事之旨前令將烏梁海收降招服者非因達瓦齊訥默庫濟爾噶爾彼此構釁乘亂而始辦也特因烏梁海追逐策零直入我卡倫若不懲治必致肆意妄行是以令於此時或許歸降或行驅逐一經辦定於地方長久有益原與達瓦齊之復作台吉與否全無關涉朕曾降旨軍營將軍大臣毋得偏執已見致令薩喇勒辦理周章今觀此奏豈非故掣其肘乎若爲薩喇勒馬力疲乏卽令其在駐紮處暫爲休息未始不可達瓦齊復作台吉之處何必齒及此尤朕所不解也再瑪木特已經釋放伊若感恩自必來歸如不歸誠必將此事告知伊台吉豈肯晏然卽已勢必遣使前來索取逃人策零等彼時非發兵征討更無善策在舒赫德等以爲已將瑪木特釋放若札木參等亦照此釋放便可無事獨不思堂堂天朝有如此辦事之法乎今準夷正值力弱舒赫德乃如此畏怯若遇彼猖獗時伊等不過收入喀爾喀一籌莫展而已俟烏梁海辦竣之後瑪木特若

不來歸亦必一律辦理今應如何防範瑪木特之處亦宜預爲留心此時惟遵朕屢次所降諭旨飭諭薩喇勒悉心妥辦舒赫德儻再行從中阻撓決不寬恕其罪三月奏準噶爾烏梁海已遠徙鄂羅斯界投誠之策零等暫在推河拜達里克庫爾奇勒等處種地游牧詔回京面領諭旨仍赴軍營四月諭曰舒赫德此次差往軍營辦理一切舛謬從前行文準噶爾達瓦齊一事自應奏聞請旨遵行乃一面具奏一面卽行擅發甚屬錯誤曾將應行察議之處暫行存記今令舒赫德等查奏原任貝勒額林沁公格勒克巴木丕勒未至調遣地方一案伊等公然爲之奏請寬免此等奉調遲誤之罪軍務攸關豈得因其曾效微勞卽從寬宥乎況此原係伊等應行查參之事乃並未奏參已屬寬縱及朕諭令查奏復敢巧爲開脫舛謬已極著交部將伊前次存記之案一併嚴察議奏部議革職得旨舒赫德著將從前所有加級紀錄盡行銷去從寬免其革職七月輝特台吉阿睦爾撒納來歸舒赫德與定邊副將軍策稜疏奏將阿睦爾撒納等大台吉留軍營候旨眷屬移住蘇尼特上斥其辦理舛謬諭將阿睦爾撒納等妻子撤回令會集一處在烏里雅蘇臺附近游牧居住復諭曰舒赫德自去年命往北路軍營所辦諸事動輒乖

張其查拏瑪木特擅入卡倫一案有準噶爾札那噶爾布差人投書詢問舒赫德並未奏聞請旨竟擅自致書達瓦齊其舉動冒昧實出意外朕彼時降旨嚴行申飭及來京時面加訓諭伊亦自知錯謬因未行治罪嗣因策零烏巴什歸誠知準噶爾篡奪相仍人心離散實有可乘之機特命策楞爲定邊左副將軍並令舒赫德在熱河面領訓誨指授極爲詳明伊二人自到軍營畏葸猜疑毫無籌畫凡所部署事事不合機宜卽如阿睦爾撒納窮蹙來歸尙未接見卽議令將兵壯屯駐軍營同來眷屬悉移置於戈壁之南相距數千里使其父母妻子分析離居豈在天理人情之內在阿睦爾撒納等甫經歸命焉知天朝將伊等分遣安插究屬何意斷不能不生疑畏且並不候旨竟稱一面奏聞一面辦理此何等重大事而率意妄行乃爾耶至阿睦爾撒納稱有德濟特台吉率衆一千戶亦傾心向化因爲水所阻又阿睦爾撒納胞兄及其親子爲瑪木特所拘並求給與口糧馬匹前往救應接取成袞札布薩喇勒努三俱以爲可行而策楞舒赫德悉堅執不允薩喇勒係熟悉彼處情形之人旣以爲可行伊二人必欲執拗不知其出何肺腑方今準夷迭遭內亂所屬部落叩關內附者接踵而至正可以大示懷柔永綏邊境

之時策稜舒赫德身膺重寄何顛倒舛謬至於此極蓋舒赫德因朕有十月間令伊進京之旨遂一切苟且辦理其不肯接濟阿睦爾撒納等恐致遷延不得歸家之故又自以同列大臣才具大率與彼相若而伊親信已久卽辦事不當不過申飭議處未有可代其任者國家簡用大臣寄以專闔重任而乖張僨事如此實爲深負朕恩舒赫德著革職以閒散在參贊上效力贖罪家產俱著籍沒其子舒常著革職發往黑龍江披甲在京諸子著拏交刑部以爲大員負恩者戒旋赴鄂爾昆塔木爾處經理阿睦爾撒納等遊牧二十年正月命以章京銜協理烏里雅蘇臺事務二十一年給副都統銜九月巡臺站至努兌木倫沿途查拏掠馬之厄魯特護送運往軍營口糧牲隻至額爾齊斯有掠臺站之烏梁海竄鄂羅斯向之索取奏至上嘉其辦理尙合機宜令來京補正紅旗漢軍副都統伊子舒常並授三等侍衛二十二年二月授兵部尙書兼鑲黃旗漢軍都統赴巴里坤參贊軍務七月因奏防範沙喇斯游牧內移上以舒赫德藉作歸計訓飭之十二月諭曰從前舒赫德在軍營時屢獲重譴朕皆曲爲寬宥因今春西師兩路進剿不得其人將伊喚回加恩起用凡一切機宜朕俱詳晰面諭切屬不可復行退縮令其到軍營

時傳諭將軍成袞札布善爲協同辦理詎意舒赫德到軍營進兵以來所辦諸事俱不奮勉將軍成袞札布本係蒙古伊雖歷經戰陣之事然未面領訓諭則舒赫德理應盡心相助乃伊等此次所辦之事違失機宜甚多卽如伊等進兵時旣將克勒特烏魯特等遊牧招服卽當將馬匹收取以益我兵力使賊無所逞其叛逆伎倆方得制御之道伊等方且諭彼避入山中以爲恐被作踐致使賊有餘力俟我兵旣過卽行叛去以此一端而論卽可見其諸事全無成算及朕降旨責諭方且東遮西露往來通途以致疲馬力於無用之地此皆舒赫德並不將朕諭旨詳晰曉諭將軍成袞札布之所致也蓋兵法忌怯弱而舒赫德巽懦性成兵法忌諱飾而舒赫德最工文過合計伊前後罪譴卽正以典刑亦不足蔽辜但西路進兵以來事雖未能就緒尙無挫軍威而損國體之處若卽將伊正法伊反得諉過於將軍成袞札布矣朕念成袞札布去歲擒叛賊青滾雜布之功看伊顏面貫舒赫德以不死然其不足復用所謂下愚不移亦屢試而知之矣舒赫德著加恩免死革職令爲兵丁在軍營自備資斧效力贖罪再伊子舒常亦因加恩舒赫德復授爲侍衛著仍發黑龍江二十三年諭給舒赫德頭等侍衛銜駐防阿克蘇十月將

軍兆惠追剿逆回霍集占深入被圍命定邊右副將軍富德往援授舒赫德參贊大臣會於巴爾楚克舒赫德以阿克蘇通葉爾羌喀什噶爾要隘應設卡倫令回人辦納糧米上嘉之授副都統旋擢吏部侍郎遷工部尙書鑲紅旗滿洲都統賜戴孔雀翎十二月簡阿克蘇銳卒并諸路兵先至者馳援兆惠軍二十四年正月與富德合軍至呼爾璊賊騎五千餘迎戰擊敗之轉戰五日四夜戮賊千餘會參贊大臣公阿里袞督解馬匹亦至乘夜呼突斫陣賊大潰兆惠聞槍礮聲知援至夾擊逆酋布拉呢敦脅中槍昇入城遁喀什噶爾時參贊大臣巴祿阿桂在巴爾楚克亦悉精銳往軍營策應捷聞得旨嘉獎七月舒赫德移駐葉爾羌命阿桂駐阿克蘇辦事嗣以阿桂護送屯田回人赴伊犁巡查邊徼舒赫德仍駐阿克蘇先後奏定回城賦稅臺站酌設伯克阿克蘇鼓鑄騰格以四分存公六分散給回人阿克蘇庫車哈喇沙爾烏什和闐設筆帖式專理回務派陝西同知通判管糧餉牧羣差務分駐侍衛三年更代均得旨議行二十六年命圖形紫光閣御製贊曰屢授重寄亦屢左遷厲厥意懦策厥材賢白衣白水信安衆進援爵秩重晉二十七年十二月諭於戶部飯銀內每年賞銀五百兩二十八年三月充經筵

講官兼署工部尙書步軍統領加太子太保二十九年命與侍郎裘日修往訊福建提督黃仕簡奏參廈門洋行陋規案因所辦未得要領奉諭旨指示覆審督撫無收受陋規事惟屬員代購物件屬實詔解總督楊廷璋任巡撫定長從寬留任道府同知落職治罪有差詳見楊廷璋傳三十年正月暫兼管戶部事務充國史館副總裁三十一年二月署陝甘總督時議修西寧鞏昌所屬縣及嘉峪關外燉煌玉門巴里坤城舒赫德奏定章程四條一估計工段立標籤以便勘驗一舊坍卸料物分別應用一工員依限程功督辦總辦各員不時嚴催一在工佐雜分段經理聽督工大員稽察分別勸懲詔如所議又奏言甘肅賑務緊要部撥城工銀經過多係災區請令州縣就近截領給賑藩庫另撥項給辦城工免稽遲而省運費復撥兵先往穆壘耕作備次年送到民戶口糧籽種之需其各省發遣新疆人犯奏准伊犁三人烏魯木齊一人週流派撥七月署戶部尙書三十二年二月充三通館副總裁十月命偕侍郎邁拉遜往審湖南桃源縣生員林鳳鳴控知縣狄如煥及湖北棗陽縣監生張舒控知縣永利福藉差苛派二案均鞫虛抵罪如律因奏雲南大兵不日凱旋各站額設夫馬外應添若干請動司庫銀發給其各屬

專雇夫馬至站差竣覈銷如有不敷按糧均派毋許私行攢湊銀錢以息浮言而杜奸弊三十三年正月暫署步軍統領二月授參贊大臣命赴滇與阿里袞鄂寧籌辦軍務進剿緬匪旋以密奏籌辦情形有設法招致投誠語諭曰昨舒赫德鄂寧密陳籌辦情形一摺甚屬舛謬內如計算進兵馬匹一事拘泥成數每兵千名應給馬三千九百通計需馬十萬餘匹其說甚誕試問前者平定準夷回部豈此么麼可比然用馬何嘗至如許之多卽康熙年間征剿吳逆滇黔一帶未始不調集兵衆亦不聞辦馬竭蹶若此滇省籌辦糧馬原不無少有拮据朕前閱鄂寧奏摺卽已洞鑒所以密諭舒赫德往辦此事并屢諭該督撫從長計議乃舒赫德一到滇省卽張皇其詞匆忙入告有似滇省之事朕總不知藉彼奏而朕始悉其端委者然有是理乎至摺內稱設法招致緬匪投誠所見尤屬荒唐無恥迥非情理所應有進剿緬匪一事朕初無必欲辦理之意屢降諭旨甚明因楊應琚措置乖張其勢難以中止遂令明瑞往葳其事明瑞統兵采入督率將士擊斬披靡獨以勒登額逗遛債事屢促赴援喪心不顧以致賊匪抄出前路窺伺大營明瑞自率札拉豐阿觀音保等殿後擁護秉志堅貞預存不肯中道輕還之意是以親冒鋒

鎬甯爲臨陣捐軀陸續回營弁兵所損不及十之一二凡在軍營莫不共見共聞至見在籌辦機宜原欲從長審慎並無急於爲掃穴殲渠之計第將軍參贊旣勤事效節誼難置之不問而國體所係應行應止亦當隨時制宜如機有可乘則整兵繕邊厚集繼進無妨稍需時日使將來不必辦理朕卽明降諭旨暫行撤兵中外聞之孰不以爲光明正大若如舒赫德所奏乃漢唐宋明庸懦無能之君臣所爲我堂堂大清勢當全盛簡卒俯糧殄此醜類於力有何不給而肯效掩耳盜鈴恬不爲恥耶且緬匪每以詐降爲狡獪長技楊應琚等已屢受其愚卽此次賊衆自知得罪天朝懼干申討或有遣人乞降之信尙當嚴加拒斥責令兇酋束身歸命或遣大頭目齎表輸誠庶可允其代表朕亦屢經諭及舒赫德在京早熟聞之卽起程前朕慮其偏於將就完局曾面加訓誡伊亦自以更歷已久必不敢再致荒唐爲對何一離朕前竟爾自相刺謬至是幸而當今綱紀肅清一切皆稟承朕旨伊等欲爲此鄙謬之舉尙不敢不先行入告朕得及時飭駁急令停止朝廷一舉一動皆臣民耳目所屬何所庸其粉飾況軍國重務豈可自欺欺人設無知之徒聞有此奏疑朕授意舒赫德所爲無論朕不肯受且朕何如主若於此等事稍有遊移則前者底定西陲何以克奏膚功於二萬餘里之外哉舒赫德向在左右

承朕指示調度辦事尙能妥協一行奉差輒難專任此次所奏竟爾復蹈故轍著
交部嚴加議處部議革職並革雲騎尉世職命給都統銜授參贊大臣赴烏什辦
事三十六年土爾扈特汗渥巴錫台吉策克伯多爾濟並喀鄂拓克台吉烏巴什
舍楞等全部歸順命往伊犁經理撫輯尋授伊犁將軍舒赫德遵旨籌辦安汛設
站養贍撫綏應行入覲之台吉大頭目驛送入京查明部落戶口安置伊犁其餘
部衆俱量擇善地分編以居俾烏魯木齊塔爾巴哈台兩處大臣就近統理事聞
上嘉之十一月授戶部尙書先是定議移西安滿洲兵二千駐防巴里坤居西北
城原駐綠旗兵移東城三十七年五月舒赫德會同總督文綬奏言西北城低窪
積水滿漢官兵商民同居城狹人衆勸於東門外半里許建滿城一座官署兵房
四千八百間地近屯田泉甘土沃使兩城形勢聯絡廷議允行九月奏言沙拉博
山鉛廠以廢員委辦而廠中所撥遣犯恐聚積滋事請令屯田官一員總理撥屯
兵四十供驅策遣犯百名一半開礦一半輪流種地官給牛種耕具官員三年議
敘遣犯分別減年卽准爲民從之是月授領侍衛內大臣三十八年二月子舒寧

責斃家人二命特諭改發伊犁交舒赫德嚴行管束四月加太子太保七月晉武英殿大學士兼管刑部事務充國史館四庫全書清字經館總裁正白旗滿洲都統十月賜黑狐端罩總理吏部及戶部三庫事務仍兼刑部如初以原銜充經筵講官三十九年三月兼翰林院掌院學士九月命往江南籌辦黃河老壩口隄工因壽張奸民王倫假邪教糾衆據臨清舊城命先赴山東偕額駙拉旺多爾濟左都御史阿思哈及巡撫徐績擒剿分兵三路舒赫德與拉旺多爾濟自德州進阿思哈由高唐州赴梁家淺會合巡撫徐績進直隸總督周元理由故城進會兵至臨清賊退踞廢城土岡阿思哈徐績率兵掩擊斬戮數十人賊竄入城副都統伍什布侍衛伊琳等入城殲戮侍衛音濟圖春寧擊賊於塔灣舒赫德拉旺多爾濟赴舊城東南隅與阿思哈徐績兵合令委署翼長保倫等進舊城搜剿薄暮列兵土城周圍巡警令侍衛納木札在北衝要堵賊去路殲賊數百生擒百餘村民俱縛賊來獻王倫自焚死有名賊目孟燦梵偉等俱檻解伏誅舒赫德疏陳善後事宜一賊平示諭良民歸里酌給口糧資送一舊城民房被燬酌給貧民修費一難民回籍寒冬難傭工覓食照被災極貧例給四月口糧一城外村莊焚掠一空本

年錢糧請緩至明秋起徵漕米及民借倉穀麥本等項緩至明秋分兩年帶徵附近州縣照此辦理一首逆及有名賊目房地入官變價入於本案動用一民間馬牛被掠請動帑買牛五百頭聽小民領用一年後將原價交官歸款十一月敘功加三級賜御用貂皮冠黑狐褂諭曰大學士舒赫德辦理山東逆匪王倫一案迅速剿除安輯良善經理諸務俱能竭盡心力動合機宜深可嘉尙著加恩授爲御前大臣賞戴雙眼孔雀翎其從前所得雲騎尉世職仍著賞給四十年五月教習庶吉士四十一年二月金川平命繪入前五十功臣圖像御製贊曰土爾扈特安集邊城命入綸閣速定臨清金川之役未悉端委書旨承行時亦贊理三月奏山東民李承納呈控丁元明鑽通伊子舒寧奪開煤窯承納轉託贊善王燕緒關說見將舒寧拏交刑部諭曰舒甯先因獲罪發往伊犁交伊父舒赫德管束嗣復加恩准帶回京乃竟怙惡不悛敢與人交往圖利玷辱伊父顏面實屬敗類適王燕緒隨駕在此因命軍機大臣及侍郎和珅巡撫楊景素會同詢問舒寧與丁元明夥開煤窯竟屬實有其事舒寧係大學士之子本不應交涉外事卽或丁元明原係山主應用開採之人亦非舒寧所得干預若其理曲情虛恃有舒寧之勢爭占

他人竊產則舒寧之罪更重如審訊得實其人豈可復留今兩造具在一經研訊無難水落石出至舒赫德自請治罪之處尙可從寬舒寧之生事不法非伊意料所及且於接呈之後愧憤惶悚卽將伊子拏送刑部據實具奏所辦尙是設舒赫德敢於容隱別經發覺則其首領亦不能保但不能管束伊子咎有應得著交都察院嚴加議處旋議革任詔免舒寧發伊犁充當苦差交舒赫德自加責處再行發往李承納圖占煤窯營謀架控罪亦如之七月充文淵閣領閣事四十二年充蒙古源流臨清紀畧正總裁四月卒諭曰舒赫德老成端重練達有爲朕御極之初卽膺任使宣猷中外四十餘年前此平定回城懋著勞績嗣於西陲撫輯歸順遠藩東省剿捕悖逆匪衆悉心籌畫動合機宜實爲國家得力大臣自簡任綸扉日直內廷兼綜部務勤勞匪懈倚畀良深茲以聖母孝聖憲皇后山陵大禮扈從前來至期應恭點神主襄事乃於十九日忽感時疾卽派太醫院堂官診視頻加存問以冀速痊遽聞溘逝深爲震悼卽賞給陀羅經被遺額駙福隆安帶領侍衛十員往奠茶酒俟進京仍親臨賜奠加恩晉贈太保入祀賢良祠其任內革職降級之案概予開復伊子舒常已諭令馳驛來京治喪應得卹典該部察例具奏五

月上臨奠祭諭曰大學士舒赫德應得封典著加恩仍行給與諡文襄賜祭葬如
例子舒常見官左都御史

梁詩正子敦書

梁詩正浙江錢塘人雍正八年一甲三名進士授編修十年充山東鄉試正考官
十二年尙書房行走充日講起居注官尋遷侍讀十三年六月遷侍講學士十一
月丁母憂乾隆元年諭曰向來翰林丁憂者有在京修書之例梁詩正著來京在
南書房行走三年六月補侍讀學士十月充順天武鄉試正考官十二月遷內閣
學士充經筵講官四年正月遷刑部右侍郎五月調戶部右侍郎五年閏六月詩
正父文濂年七十奏請二品封典上允所請御製詩賜之曰舊日文章彥熙朝卿
貳班重邀花誥寵不異彩衣班堂有槐三木門如水一灣更思躋壽世希瑞遍塵
寰十一月轉左侍郎六年三月充皇清文穎館副總裁尋條奏變通二款一八旗
閒散人丁宜分置邊屯以資生業也查旗人除各省駐防與近京五百里俱聽屯
種餘並隨旗皇上至仁如天凡爲旗人資生計者委曲備至而旗人仍不免窮乏
蓋生齒日繁若不使自爲養而常欲官養之勢有不能臣謂非屯田不可今內地

已無閒田興盛二京膏腴未盡闢世宗憲皇帝時欲令黑龍江寧古塔等處分駐旗人耕種查辦已有成議未及舉行今不早爲之所雖現在尙可支持而數百年後旗戶十倍於今以有數之錢糧贍無窮之生齒使僅取給於額餉之內則兵弁之開支不足供閒散之坐食欲增給於額餉之外則民賦斷難稍加國用在所必需待養者衆固無餘財給之分戶日繁京師亦無餘地處之惟有酌派戶口散列邊屯使世享耕牧之利以時講武且可充實駐防一綠旗增設兵丁宜量停募補以減冗額也查現在各省馬步兵餉較康熙年間漸增至五六百萬在各營鎮每處浮數千百名不覺其多在朝廷合計兵餉則冗額歲不下數十百萬各省錢糧大半留充兵餉其不敷者隣省協撥而解部之項日少向來各營多空糧自雍正元年徹底清查此弊盡除是近年兵額但依舊制亦比前有虛實之別況直省要害之地多滿洲駐防與各標營鎮協聲勢聯絡其增設兵額可以減汰者宜酌定數目遇開除空缺卽停止募補於將來營制漸有節省而現在兵丁實無裁汰之苦奏入上嘉納之十一月管理吏部右侍郎十年擢戶部尙書十二年充文獻通考總裁十三年調兵部尙書十四年二月晉太子少師十一月兼刑部尙書十二

月兼翰林院掌院學士命協辦大學士十五年正月遷吏部尙書教習庶吉士五月御史歐堪善疏劾詩正徇庇行私各款諭曰歐堪善參奏梁詩正一摺朕召軍機大臣吏部堂官掌院學士及該御史面加詢問高山係梁詩正房師至帶領引見吏部祇據投供人員依次擬缺大學士公傅恆因在軍機處承旨知其現在直隸修城而該司以修城無案可稽部選自遵成例帶領引見單內夾片聲明則高山之引見道缺係該堂官公同辦理其不出於梁詩正一人瞻徇師生情分不待辯矣保舉金烈一事亦該堂官公同商辦其不由科道與例不符曾於摺內聲明梁詩正並將不合例之處先期商之傅恆及詢歐堪善以金烈有無夤緣梁詩正形跡令其回奏據稱並無可指此二款雖有師生同鄉之嫌初無曖昧徇私實跡至姚範陳兆崙列入京察一等則姚範人本平常不堪超擢之選陳兆崙前次京察一等現係丁憂並不在京供職此則梁詩正不無徇其翰林輪班引見臨期越次更換每不過一二員或因偶爾遘疾亦事之所有若如歐堪善摺內所指已有五員此中不無高下其手著問明更換情由是否出自梁詩正之意再行交部察議梁詩正協辦閣務專領銓曹其供職內廷不過筆墨之事初非格外加之寵

任若謂其招權納財植黨營私則是伊福薄不能承受恩典矣且朕何如主而大臣能恣行其胸臆乎至小小瞻徇情面則不獨梁詩正舉朝大臣恐俱未能盡絕且如張廷玉掌院幾三十年似此攙越引見之事不知凡幾何以並無一人參奏然卽有其事亦復何關政治在梁詩正有此一二可議卽被參奏得以知所做省未始非福歐堪善之言當以爲感而不當以爲怨也時御史儲麟趾疏參四川學政朱荃匿喪上以詢詩正詩正奏對未晰交部察議尋議革職命從寬留任十二月恩賞其子舉人敦書廕生分部學習十六年扈蹕南巡詩正父年八十特晉一品封典給假留侍旬月十七年疏請終養賜以詩曰遺榮空合道未老暫抽簪甚悉忠勤意寧知孝治心歡承備鐘鼎跡異樂泉林翻祝歸朝晚卿家慶倍深二十二年上南巡詩正迎鑾命在籍食俸二十三年六月丁憂九月特命署工部尙書二十四年正月調署兵部尙書四月命在紫禁城內騎馬八月充順天鄉試正考官二十五年七月教習庶吉士九月實授兵部尙書協辦大學士兼翰林院掌院學士充經筵講官二十七年充順天鄉試正考官二十年六月命爲東閣大學士兼管吏部尙書十月晉太子太傅詩正以次子敦書任貴州知府俸滿當來京引

見奏請留部得旨以戶部郎中用十一月詩正卒諭曰大學士梁詩正老成端重奉職恪勤侍直內廷晉階綸閣方資簡任遽聞溘逝深爲軫惜著皇五子前往奠醑並加贈太保入祀賢良祠賞給內庫銀一千兩治喪念伊子梁敦書尙未到京寓次乏人著派內務府司官一員前往經理喪事應得卹典該部察例具奏尋賜祭葬如例謚文莊二十九年諭曰原任大學士梁詩正靈輓歸里沿途文武官弁在二十里以內者著俱赴舟次治奠並遣人護送俾得穩抵故里以示優卹四十五年上追念內廷詞臣資望最久者莫如詩正及故刑部尙書張照御製懷舊詩列詩正於五詞臣首詩曰未可甘盤倫祇宜顏般等信稱館閣材句每有清警踐更旣已深遂亦絲綸領一夜無病逝入閣實未永持身恪且勤居家儉而省內廷行最久交接一以屏不似張揮霍故率稱其冷翻以是嘉之吾豈蔽近倖詩正子二長同書原任侍讀次卽敦書由廕生分工部學習乾隆十六年遷奉天府治中奉旨留部以員外郎用十七年補刑部員外郎二十年授貴州同仁府知府二十四年調遵義二十八年俸滿特命以戶部郎中用尋丁父憂服闋補戶部郎中三十三年調吏部郎中三十四年授江蘇常州府知府三十五年遷湖南岳常澧道

三十八年調驛鹽道四十一年九月遷福建按察使十一月調湖南四十三年調廣東四十四年擢湖北布政使四十六年奉旨來京另用四十七年二月授左副都御史五十年七月遷工部右侍郎八月署兵部右侍郎五十一年卒

蔣溥

蔣溥江蘇常熟人大學士廷錫子雍正八年進士改庶吉士直南書房尋特賜廷錫一等輕車都尉世職命溥承襲十年丁父憂回籍既葬諭卽來京供職十一年授編修十二年遷侍講十三年遷左庶子充日講起居注官乾隆元年遷侍講學士四年擢內閣學士五年授吏部右侍郎尋轉左六年正月上慮各省督撫尙有積習未除者命大學士九卿留心訪奏溥密陳所聞各條一督撫各立門戶引用私人公事從此推諉又或外託和衷營私瞻徇姑容不職屬員貽害地方一督撫新任必極言前任廢弛地方凋弊以爲日後卸過地並見已振作或前任陞遷者則曲爲彌縫擯棄者更吹索其疵一參劾屬員定例督參撫審撫而承審各員惟論聲勢如原審者已失勢則巧爲開脫若現任或要津必附會鍛鍊督撫亦瞻顧不問一督撫意旨易爲屬員窺伺逢迎如昔年河南墾荒陝西開井祇以

迎合上司奉行不善閭閻滋累疏入上多採納敕各省督撫毋蹈前轍二月兼署刑部左侍郎六月充浙江鄉試正考官試竣疏言直隸場規內簾設監試二凡薦卷必由察核以昭慎重內簾每日供給亦由票取驗發今浙省內監試一惟在闈旁觀不與薦閱事供應悉主考票取分撥不能專心閱文請照京省場規辦理下部議通行七年二月充經筵講官六月疏言凡條奏發九卿會議有主稿衙門酌定或駁或准會議日書吏誦稿一遍以待公商但其中原委曲折一時難悉請於定議前兩日將議稿傳鈔俾各詳勘至當然後可剖晰暢言至會議命盜案刑部向不先定稿惟俟議時平反至不關人命之案亦宜與各衙門一體先令主稿傳知庶爲審慎下部議如所請行八年閏四月命署湖南巡撫事御製詩賜之曰簡畀羅英俊咨時切治安江湖襟帶地風俗易移難穀賤籌農苦棉輕慮歲寒承流敷渥澤應共洞庭寬十月實授湖南巡撫九年三月疏言永順一府及辰州屬之永綏乾州鳳凰三廳苗民貪暴之習未除至寶慶府之城步靖州之綏寧苗峒狡惡者尤多邇年臣宣布天恩嚴禁兵役擾累仍整飭武備不得懈弛苗民漸知守法諭曰御苗之道首以不擾爲要次則使知兵威之不敢犯此奏頗得之四月奏

劾按察使明德於巴陵縣生員方宣點被盜一案不細加研鞠意存諱飾下部議革明德職六月劾驛鹽道謝濟世老病不能率屬敕濟世勒休回籍八月疏言向例道府州縣政績聽自造冊申送不免鋪張失實應將州縣自註之冊令本管府州核加考語呈本道核轉知府直隸州事實本道轉造道員事實兩司轉造俱呈督撫查覈佐雜政績向不造報或有任意縱肆者請令該管州縣造冊送府州轉送司道查察呈督撫存案不致有名無實九月疏言苗峒舊設義學令內地生員訓導恐不肖者混入滋事地方官同教職慎選充當具結通報查考俱下部議從之十月疏奏同學臣甄別教職衰頹荒疏者十三員咨部罷斥上以辦理甚是各省督撫多姑息將原奏鈔出寄付閱看先是給事中胡定奏請湖南濱湖荒土勸民修築開墾部議令該撫查奏至是溥疏言近年湖濱淤地築墾殆遍奔湍東爲細流洲渚遍加堵截常有湖水衝決之患現在沅江之萬子湖湘陰之文洲圍土民請築墾臣親勘文洲圍倚山面江四圍俱有舊隄今若就臨江東西二港建壩設閘使水不入則圍內可墾田萬畝計費不過數百金士民自願興工已議舉行至萬子湖四面受水廣袤八十餘里費大難築並於上下游水利有礙臣以湖地

墾築已多當防湖患不可有意勸墾上是之十年授吏部右侍郎軍機處行走十一年兼理戶部侍郎事十二年充會典館副總裁十三年三月充會試副總裁四月擢戶部尚書諭曰戶部事務頭緒繁多尚書蔣溥著專辦部務不必兼軍機處行走十五年晉太子少保十六年兼管三庫十七年充文獻通考館正總裁十八年協辦大學士兼署禮部尚書掌翰林院事十九年命偕汪由敦董邦達修盤山新志盤山在蘇州向訛爲唐韓愈送李愿歸之盤谷而不知彼實在濟源溥等承輯新志亦二三其說而未歸一是上特爲考證以正其誤溥工寫生有父廷錫遺法每進呈多蒙御題有師承家法間圖出右相丹青有後生之句二十年兼署吏部尚書二十三年因秋審錯擬原任湖南布政使楊灝緩決一案奉旨嚴議銷去加一級仍降一級留任二十四年授東閣大學士兼管戶部尚書二十五年充會試正總裁先是溥弟洲在山西布政使任內以罪誅其無著帑項溥奏懇分年代交至是特旨寬免二十六年卒諭曰大學士蔣溥居心純正奉職克勤簡任綸扉綜理農部兼領翰林院久直內廷謹慎小心從無少懈前因患病增劇屢賜醫藥朕親臨看視尙冀就痊茲遽溘逝深爲軫惜著加贈太子太保入祀賢良祠並賞

銀二千兩治辦喪事朕親往奠醑以示恩眷應得卹典該部察例具奏尋賜祭葬如例謚文恪子櫟由編修歷官兵部左侍郎賜榮現官戶部左侍郎襲一等輕車都尉

官保

官保滿洲正黃旗人姓烏雅雍正十年由刑部筆帖式擢堂主事十一年遷員外郎乾隆五年遷郎中七年授江南江寧府知府十一年三月總督尹繼善奏官保不宜外任詔以京員用七月補刑部員外郎十三年轉郎中十九年改監察御史二十年遷刑科給事中命巡視臺灣二十二年二月擢漢軍鑲黃旗副都統五月命往西藏辦事二十六年正月授刑部右侍郎十一月轉左二十七年三月調滿洲正黃旗副都統二十八年以刑部侍郎兼管工部侍郎三十年調工部侍郎三十一年四月復往西藏辦事先是西藏糧務通判吳元澄私挪藏庫銀買運貨物虧空銀萬八千餘兩歷任駐藏大臣俱失察官保訪知參奏上命官保同駐藏大臣瑪常革吳元澄職在藏地審明正法並遵旨查失察大臣駐藏職名入奏上嘉官保沿途留心抵藏後卽查出此事實屬急公交部議敘加一級三十二年授正

紅旗蒙古都統三十三年六月署理藩院尙書七月授刑部尙書仍署理藩院事兼正紅旗蒙古都統尋調正紅旗滿洲都統十一月兼署禮部尙書十二月充經筵講官三十四年正月署戶部尙書是月協辦大學士二月協理步軍統領刑名署理戶部三庫事務命紫禁城內騎馬六月上駐蹕熱河命留京辦事九月巡按興平倉奏言興平倉新收漕糧粳米八廩內三廩俱乾潔五廩米色較潮潤若不預籌恐霉變虧折查乾隆二十四年江浙漕糧偶被風潮總漕楊錫紱奏准先行支放今興平倉新漕米色潮潤五廩請先支放以免虧缺交倉場侍郎妥協辦理得旨俞允嗣經倉場侍郎實麟黃登賢查驗五廩內米色果灰暗潮潤上以總漕梁燾鴻不能查察交部嚴加議處實麟黃登賢率行收倉交部察議尋議燾鴻降三級調用實麟登賢俱降一級留任九月命偕禮部尙書王際華戶部侍郎英廉總理平糶事宜官保以西城麵廠虧短將監糶侍郎蔣元益參奏並遵旨查中東南北四城麵廠情形嗣查奏北城麩麵短少曾經報出中東南三城監糶大臣未能豫行查辦請與會同辦理之御史一併察議諭曰此案短少麩麵緣由北城據實報出所辦尙是該城監糶大臣等免其交部中東南三城未能豫行查辦自應

察議但官保等祇知各城監糶之應與處分不知北城早經報出伊等不卽妥辦以致屢生事端其咎更無可辭官保王際華英廉一併交部察議部議俱降一級留任十一月實授戶部尙書三十九年調刑部尙書兼議政大臣三十六年五月充國史館正總裁六月兼署兵部尙書三十八年調吏部尙書四十一年正月以患病年逾八旬請將內閣吏部等事務俱行開缺諭曰官保宣力有年尙能誠謹供職今以老病懇請解任著以原官致仕三月卒遺疏上敕部查應給恩典照例具奏賜祭葬諡文勤子萬寧現任貴州布政使凝德任獨石口副將

劉綸

劉綸江蘇武進人乾隆元年由廩生舉博學鴻詞試第一授翰林院編修二年恭修世宗憲皇帝實錄充纂修五年遷侍講六年六月充日講起居注官尋充陝西鄉試正考官九月授太常寺少卿七年三月遷通政司右通政十月轉左八年遷太僕寺卿九年在內閣批本處行走十年遷大理寺卿十一年授內閣學士十二年命編詞林典故十三年充武會試正考官十四年九月署兵部侍郎充續文獻通考副總裁入直南書房十月充國史館副總裁十一月擢禮部右侍郎十二月

調工部兼理兵部十五年命軍機處行走充平定金川方略副總裁十六年土默特貝子哈木噶巴雅斯郎圖不按原議年限逐種地人民直隸總督方觀承入奏命綸偕貝勒羅卜藏侍讀學士麒麟保查勘六月合疏言出口民價典旗地者應遵原議三年五年限外撤還原主嗣後不得私典他如領地耕種爲佃戶受雇力作爲傭工皆萍寄謀生初無占地之意應許暫行餬口更有領地開荒之民積累辛勤始得成熟與價典不同俟年滿日先還莊主所需自種之地有盈給種以償前勞市肆舍宇定租價以息爭端留商賈工匠以免驅逐游手木頭城三座塔二處居人稠密許照常居住不得添增於三座塔設巡檢一以資彈壓從之七月充詩經館副總裁九月丁父憂十八年補戶部右侍郎十九年正月兼理順天府尹事二月充經筵講官二十年六月準噶爾平定軍功議敘加三級七月充平定準噶爾方略副總裁十二月浙江按察使富勒渾參奏調任巡撫鄂樂舜授意布政使同德勒派商銀命綸赴浙同浙閩總督喀爾吉善兩江總督尹繼善會審二十一年二月覆奏鄂樂舜受銀屬實擬絞候同德並未知情富勒渾誣參擬杖流上以富勒渾所參重款已實不應議罪綸等定擬過當下部議革職奉旨寬免留

任四月命專辦部事不必兼軍機處行走二十二年教習庶吉士二十三年奉旨
仍在軍機處行走二十四年六月奏言薊州寶坻等處蝻子萌動臣等現在督捕
惟是一邑村落甚多州縣官事繁未能周遍派千總外委同佐雜分捕參將大員
偕監司巡察勤惰以示勸懲疏入報可閏六月擢都察院左都御史十一月平定
回部功成議敘加三級二十五年八月充恩科順天鄉試正考官十一月命偕刑
部侍郎伊祿順赴西路勘將軍嵩阿禮剋兵糧餉送等款得實論如律二十六
年五月署兵部尙書六月教習庶吉士二十七年賜紫禁城騎馬二十八年五月
調戶部尙書仍署兵部教習庶吉士六月命協辦大學士十月加太子太保二十
九年兼署刑部尙書三十年丁母憂三十二年補吏部尙書協辦大學士事三十
三年六月兼署戶部十月充經筵講官三十四年三月充會試正考官四月以中
式舉人梁泉卷被勘部議革任得旨寬免三十五年八月充順天鄉試正考官十
一月充三通館副總裁三十六年二月晉文淵閣大學士兼工部尙書五月充國
史館正總裁三十七年充會試正考官三十八年卒遺疏入諭曰大學士劉綸品
行端醇學問博雅久直禁廷簡畀閣務勤勞夙著倚任方殷今春患病屢遣侍衛

御醫存問診視復特賜人蔭俾資補益昨復沈劇倍增厯念茲聞溘逝深爲軫惜著加贈太子太傅入祀賢良祠其任內降革之案均予開復賞銀一千兩辦理喪務派皇十二子帶領侍衛十員往奠茶酒所有應得卹典仍著該部察例具奏尋賜祭葬如例諡文定子躍雲現官禮部左侍郎

清史列傳 卷二十一

大臣畫一傳檔正編十八

于敏中

于敏中江蘇金壇人乾隆二年一甲一名進士授修撰八年充日講起居注官九年二月遷左中允七月充山西鄉試正考官十二月提督山東學政十一年遷侍講十二年九月典山東武鄉試十一月調浙江學政十四年八月轉侍讀十一月奏言浙省生員游幕在外欠三考者七十餘人請定限咨催回籍補考諭曰朕前降旨生員欠考至三次以外者皆行黜革但念該省士子逾限尙係初次且有七十餘人之多伊等向來讀書入泮亦非容易若盡行除名情有可憫著加恩免其黜革勒限催回原籍補考一次若仍借端規避不赴考者卽行黜革十五年入直上書房十六年三月遷侍講學士九月充武會試副考官十七年九月轉侍讀學士十一月遷少詹事十八年二月遷詹事七月授內閣學士九月提督山東學政十九年擢兵部右侍郎二十年二月轉左七月充經筵講官二十一年丁本生父

大臣畫一傳檔正編十八

卷二十一

一

二

憂奏請歸宗持服二十二年六月起署刑部左侍郎十一月奏村莊道路設汛分防或以阻遠偷安或以偏隅生玩請令防兵晝則瞭望稽查夜則支更巡邏往來絡繹擊柝相聞俾征途倚以無虞姦宄望而斂迹并責成汛弁按季輪巡統轄之副參遊都等員分年巡查下部議行二十三年五月以嗣父于枋在籍病故奏請回籍治喪二十四年正月御史朱嵇劾敏中兩次親喪蒙混爲一愬然赴任諭曰于敏中守制回籍陳請歸宗原爲伊本身生母起見若非歸宗則於例不得受封此亦人子至情至回籍後復丁母憂伊聞命暫署刑部侍郎時未經具摺奏明此一節原未免啟人訾議但于敏中才力尙可造就刑部侍郎缺出一時未得其人是以降旨起用凡遇宴會不令預列此正與從前用蔣炳莊有恭爲巡撫同一不得已之苦心而該御史輒以侍郎巡撫意爲區別豈外任封疆不妨從權而內任部務竟不必需人辦理耶閏六月授刑部左侍郎調戶部右侍郎二十五年命在軍機處行走充方略館副總裁二十六年二月充會試副考官十一月轉左侍郎仍兼錢法堂事充經筵講官二十七年命紫禁城內騎馬三十年擢戶部尙書七月充國史館副總裁九月諭曰于敏中之子于齊賢屢應鄉試未能中式因念于

敏中侍直內廷有年僅有一子年已及壯加恩照伊尙書品級賞給廕生三十三年加太子太保三十六年協辦大學士三十八年閏三月充四庫全書正總裁八月晉文華殿大學士兼戶部尙書九月充國史館三通館正總裁十一月命在上書房爲總師傅兼翰林院掌院學士三十九年七月內監高雲從漏洩硃批記載事覺詞連敏中曾向訊觀亮記載及伊買地受騙具控曾懇敏中轉託蔣賜棨辦理等事上親詰敏中敏中奏高雲從面求轉託實無允從並以未能據實劾奏引罪諭曰內廷諸臣內監等差使交涉事所必有若一言及私情卽當據實奏聞朕方嘉其持正重治若輩之罪又豈肯以語涉宦寺轉咎奏參者卽于敏中侍朕左右有年豈尙不知朕之辦事而思爲此隱忍耶再高雲從供有于敏中曾問及觀亮記載之語于敏中以大學士在軍機處行走日蒙召對朕何所不言何至轉向內監探問消息卽自川省用兵以來于敏中書旨查辦終始是其經手大功告竣在卽朕正欲加恩優敘如大學士張廷玉之例給以世職乃事屬垂成而于敏中適有此事實伊福澤有限不能受朕深恩于敏中寧不痛自愧悔耶因有此事相抵于敏中著從寬免其治罪仍交部嚴加議處尋部議革職詔從寬留任四十一

年正月金川平諭曰大學士于敏中自辦理軍務以來承旨書諭夙夜殫心且能鉅細無遺較衆尤爲勞勩其前次過失尙可原恕著賞給一等輕車都尉以示格外恩眷著世襲罔替七月充文淵閣領閣事四十三年三月充會試正考官奏言同考官評閱硃卷向用藍筆近科改用紫筆紫與朱色近設改易點乙數字亦難辨別內簾書吏繕寫文移檔案並用紫筆尤覺非宜請仍舊例用藍筆上從之四十四年十二月故諭曰于敏中才練學優久直內廷小心謹慎自簡畀綸扉辦理平定金川軍務承旨書諭懋著勤勞因加恩列入功臣特予世職以彰優眷恪恭匪懈倚任方殷前因其喘疾較甚諭令乞假加意調攝卽派太醫院堂官前往診視並賜人蔘俾資培益用冀速痊復屢遣大臣存問昨聞病勢沈劇倍增廬念茲聞溘逝深爲悼惜著加恩入祀賢良祠應得卹典該部察例具奏尋賜祭葬如例謚文襄四十五年六月敏中孫德裕訐堂叔時和挾制家產擁貲回籍等事上命大學士英廉嚴訊查辦並以時和先行回籍或隱占敏中原籍貲產事詔江蘇巡撫吳壇查辦嗣吳壇奏時和吞占家產屬實請將時和發往伊犁充當苦差其所侵銀物酌給德裕三萬餘兩餘留充金壇開河費允之復以蘇松糧道章攀桂曾

爲敏中覓匠修葺花園吳壇奏議革攀桂職發軍臺效力諭曰于敏中受朕深恩乃聽本省地方官逢迎爲之雇匠蓋房若在生前必當重治其罪今既完名而歿姑不深究以示朕終始保全之意至章攀桂逢迎鄉宦罔顧官箴卽發往軍臺亦所應得但尙未出貲幫助亦姑不深究章攀桂著革職免其發往軍臺四十七年詔以敏中孫德裕承襲一等輕車都尉並加恩以主事用五十一年諭曰朕因幾暇詠物有嘉靖年間器皿念及彼時嚴嵩專權煬蔽以致國是日非朝多裨政復取閱嚴嵩原傳見其勢燄薰灼賄賂公行甚至生殺予奪皆可潛竊威柄顛倒是非實爲前明奸佞之尤本朝家法相承紀綱整肅太阿從不下移本無大臣擅權之事卽原任大學士于敏中因任用日久恩眷稍優外間無識之徒未免心存依附而于敏中亦遂時爲招引潛受苞苴苴然其時不過因軍機大臣中無老成更事之人而福康安又年輕未能歷練以致于敏中聲勢略張究之于敏中亦止於侍直樞廷承旨書諭不特非前朝嚴嵩可比實並不能如康熙年間明珠徐乾學高士奇等卽寵眷聲勢亦尙不及鄂爾泰張廷玉安能於朕前竊弄威福潰亂是非耶朕因于敏中在內廷供職尙屬勤慎且宣力年久是以於其身故仍加恩飾終

並准入賢良祠以全終始迨四十六年甘肅捐監折收之事敗露王直望等侵欺貪贖罪不容誅因憶及此事前經舒赫德奏請停止而于敏中於朕前力言甘肅捐監應開部中既免撥解之煩而閭閻又得糶販之利實爲一舉兩得朕以其言尙屬有理是以准行詎知勒爾謹竟如木偶爲王直望所愚遂通同一氣肥囊殃民竟至釀成大家設非于敏中爲之主持勒爾謹豈敢遽行奏請卽王直望亦豈敢肆行無忌若此是于敏中擁有厚貲亦必係王直望等賄求酬謝種種弊混難逃朕之洞鑒此案發覺時設于敏中尙在朕必嚴加懲治雖不至如王直望等之立置重典亦不僅予以褫革而已也因其時于敏中先已身故不加深究曲示矜全但于敏中於此等營私舞弊朕不爲已甚不肯將其子孫治罪已屬格外恩施若賢良祠爲國家風勵有位昭示來茲盛典攸關豈可以不慎廉隅之人濫行列入朕久有此心茲因覽嚴嵩傳觸動鑑戒恐無知之人將以嘉靖爲比朕不受也于敏中著撤出賢良祠以昭儆戒六十年五月諭曰昨國史館進呈于敏中列傳朕詳加披閱于敏中以大學士在軍機處上書房行走有年乃私向內監高雲從探問記載又於甘肅監糧一事伊爲之從中主持恣意開捐以致釀成捏災冒賑

鉅案因此案發覺時于敏中先已身故不加追究但于敏中簡任綸扉不自檢束既向宦寺交接復與外省官吏夤緣舞弊卽此二節實屬辜恩非大臣所應有使其身尙存必當從重治罪今雖已身故若仍令其濫邀世職又將何以示懲于敏中之孫于德裕見官直隸知府已屬格外恩施所有承襲輕車都尉世職著卽撤革以爲大臣營私玷職者戒

程景伊

程景伊江南武進人乾隆四年進士改庶吉士十年散館授編修十三年三月充會試同考官遷侍讀六月大考二等遷侍讀學士十四年正月命在上書房行走十五年丁母憂十八年七月補侍讀學士仍在上書房行走九月充日講起居注官十月充武會試正考官遷詹事十九年遷內閣學士二十年擢兵部侍郎二十三年十二月民人潘濬控天津鹽商牛兆泰欠引地價銀鹽道王愷伯之壻張曾效持京札十餘封爲兆泰囑託經大學士傅恆查奏各札與本案無涉諭曰朕斷不以尋常書札往來之故處分伊等但侍郎程景伊札中有承乏中樞晨夕內廷殊多曠廢今秋未與木蘭之役稍得專心職業等語亦可謂無可致之殷勤訴中

情之充誦者矣大約小翰林輩方進本衙門行走則以入直內廷爲捷徑及積久受恩滿志又以晨夕入直爲苦此卽韓愈所謂丁寧婢子者也今程景伊自問兵部之事朕果賴彼以理乎本不過旅進旅退可有可無之人伊豈不自知而靦顏爲是語乎似此居心安可授經皇子著解退其上書房行走俾其專心部務以觀其作何盡職二十四年閏六月調禮部右侍郎七月鄉試屆期八旗大臣子弟應試者並不循例自陳程景伊與禮部尙書伍靈安等代爲請旨朦混具奏部議革職詔改革職留任十一月以西陲大功告成命祭告炎帝虞帝陵二十六年九月充武會試正考官二十八年四月奏言外籙官有年老抱病難勝任者已派員幫辦嗣後請令該堂官開送時將老疾者驗明扣除上是之十一月充續文獻通考副總裁二十九年二月疏言壇廟致祭向例俱有撰定成文其中亦宜因時變通如本年三月祭歷代帝王廟皇上親詣行禮上年奉詔廟易黃瓦典禮攸崇應請敕翰林院另擬祭文進呈欽定以申昭格如所請行三十年正月署吏部侍郎十月授吏部右侍郎兼署工部左侍郎三十一年正月調工部侍郎十一月仍調吏部侍郎三十四年擢工部尙書充經筵講官三十五年調刑部尙書三十六年二

月調吏部尙書三十八年八月協辦大學士九月充三通館副總裁十月命紫禁城內騎馬十一月充國史館副總裁三十九年十月充四庫全書館總裁十二月覆勘各省鄉試卷奏四川頭場首題又日新康誥曰六字牽上連下全無義理卽欲避熟趨生以防雷同剿襲何至如此割裂請敕禮部定議有似此命題小巧者據實查參議處上是其言下部議四川考官罰俸如例四十年教習庶吉士四十年四月上東巡回鑾駐蹕黃新莊景伊與在京大臣官員迎駕未候召見俱已退班上以景伊係協辦大學士永貴係吏部尙書二人既散衆人遂尤而效之命交都察院議處尋議降二級留任上責都察院徇情改爲革職留任四十二年五月命景伊與修明史各本紀十一月諭曰前因四庫全書館呈進各書每多稽緩經總裁等議設總校六員分司校勘各總裁仍隨時抽閱以專責成本日召見程景伊據奏應進各書經總校閱看後如總裁等全爲檢閱不特耽延時日且總裁等轉得有所推諉若不將如何抽看之處定有章程亦非覈實之道此後總裁等於每十本內抽閱二本黏貼總裁名簽其未經抽閱者於書面黏貼總校名銜如有錯誤各無可諉等語所奏自屬可行嗣後四庫館校閱各書卽照此辦理各總

裁等務宜悉心校勘毋致再有舛誤十二月充玉牒館副總裁四十四年十二月晉文淵閣大學士兼吏部尙書暫兼管吏部事務並充文淵閣領閣事國史三通館總裁是月濟寧州參革知州藍應桂呈請捐復景伊未詳覈情節率標先行侍郎和珅以應桂身爲州牧縱兩壻冒籍實屬私罪不應准其捐復奏參諭曰程景伊於藍應桂捐復一事不與各堂官商酌竟標先行准其捐復辦理實屬錯誤朕姑不深究著交都察院議處尋議降一級抵銷四十五年正月上南巡命景伊留京辦事三月教習庶吉士五月上回鑾召見景伊病後衰弱溫諭安心調理勿勉強行走七月卒諭曰大學士程景伊品行端醇老成練達歷膺部務懋著勤勞簡任綸扉正資倚畀昨因其抱恙未痊特命加意調攝並屢次存問方冀速痊今聞溘逝深爲軫恤著派散秩大臣帶同侍衛十員前往奠醊應得卹典該部察例具奏賜祭一壇諡文恭

梁國治

梁國治浙江會稽人乾隆六年舉人七年考取內閣中書十三年一甲一名進士授修撰十七年充日講起居注官十九年十一月遷國子監司業二十一年五月

充廣東鄉試正考官十一月揀發廣東以道員用二十二年三月補惠嘉潮道二十五年十月署糧驛道二十六年十一月卓異引見命署理都察院左副都御史二十七年六月充江西鄉試正考官九月提督安徽學政十一月擢吏部左侍郎仍留學政任三十年正月調江蘇學政九月廣東總督楊廷璋巡撫明山參奏糧道王槩浮收倉米國治署任內亦有情弊奉旨革職並管倉家人一併解粵質審嗣審係失察家人舞弊已革職毋庸議三十一年二月特授山西冀寧道三十二年十月擢湖南按察使三十三年九月擢江寧布政使三十四年四月以失察署穎州府知府明福畏罪自縊部議降一級調用諭從寬留任五月奏外省督撫提鎮藩臬等凡有奏事之責者新舊交代全憑文案惟廷寄諭旨事須謹密者皆由內署密辦向不移交後任無憑查核請嗣後毋論正署逐任交代下部議行上以江寧等屬錢糧未清各款尙多諭令梁國治查奏旋覆奏江寧之山陽阜寧清河安東銅山五縣節年積欠三萬至八萬爲數較多計自乾隆十一年起至三十二年止未完積欠正雜款銀共四十五萬餘兩三十三年未完正雜款銀十萬一千餘兩緣自乾隆二十六年江寧分設藩司節年均有偏災雖屢蒙恩蠲緩其應徵

蠲贖及熟田正雜銀因附近災地民力未能充裕或儘完本年新糧積欠帶完無多或兼徵口糧籽種舊欠未能併輸卽如三十三年分奏銷核計徵完積欠銀十八萬七千餘兩正雜項款又有未完銀十萬一千餘兩臣擬於三十四年秋成起按各屬舊欠多寡酌量年歲情形分年分限設法帶徵務期逐漸清楚仍專立稽查積欠印冊按款按限隨時稽查督催交代時仍將查辦印冊面交後任接辦得旨俞允七月擢湖北巡撫奏請陛見諭曰且赴新任不必來湖北吏治不堪之極汝應加意整頓若循分供職卽屬負恩必不輕貸十月特命署理湖廣總督兼署荊州將軍三十五年八月疏言湖北近年糶賑兼施缺額穀五十餘萬石向例糶穀照市價每石銷銀六錢五六分至七錢不等賑穀每石例給銀五錢現在糶缺未買之穀止五萬餘石賑缺未買之穀積至四十八萬餘石賑缺因水旱平糶每歲舉行若因賑缺未補勢必下年不敢出易賑貸愈形支絀惟有籌平糶之盈餘補賑缺之不足通融妥辦請動支司庫銀二十萬兩無論本省鄰封公平購買其價不得逾每石六錢五分之數如市價較賤隨時遞減仍以五錢開銷再向來平糶僅照市價酌減原未籌及盈餘但青黃不接較之新穀登場時無論豐歉價自

相懸請嗣後每逢平糶務令核計上年買補原數日於酌減外每石盈餘銀一錢方准出糶在小民買食已比市價較減倉儲可期足額上嘉之下部議令每石先發價銀六錢分給各州縣購買有餘繳還不敷核實找給三十六年正月奏查本案動給司庫正項銀二十萬兩今按照市價所買穀石應請據實卽於所發正項內照數造冊報部毋庸另動別項致啟挪移其例銷之外現存糶價盈餘不敷撥補卽飭令各州縣於青黃不接時如穀價每石較買補時貴至一錢以上卽行酌減平糶將盈餘留存一錢同現存糶價盈餘清還原動正項餘銀俟將來買補奏入報聞六月奏德安府同知賈鍾琪經吏部推陞福建福寧府知府該員才具中平不能展拓實難勝知府之任但其平日頗屬謹飭奉職無過可否准其以知府銜留任諭曰梁國治奏賈鍾琪才具中平難勝知府之任請飭部毋庸再選自應如此辦理至將該員請以陞銜留任並不聲明送部引見可謂知其一不知其二也此等論俸推陞人員大率循分供職者居多第因在任事簡職閒處分本少是以俸滿陞遷較易其中原未必皆出色之員昨因推陞知府內經該督撫驗係堪勝任者向令其出具考語恐久之或滋弊端曾降旨停其註考令送部引見定奪

至此等不能勝任府缺之員其人材較彼尤遜若不送部引見竟准以陞銜留任是庸材既得以藏拙且省其正署交代往來跋涉之勞安坐而得叨榮頂帶爲若輩別開捷徑於事體殊覺非宜恐衰朽無能者並得藉以姑容戀棧其弊更無所底止嗣後各省推陞人員該督撫驗係堪勝任者仍遵前旨辦理外其不能勝任之員亦著一體送部引見或仍令回任或留部另用候朕臨時分別降旨其向例陞銜留任未免過優應改照卓異人員例加一級以示平允著爲令七月疏言江浙等省赴漢口買鉛向例並不查奏嗣後黔粵等省每年應運漢口鉛俟一運完竣請照京局之例將各該省委員於何時運到計若干斤何時售買若干并於何時運回查明有無遲誤及偷盜短少等弊一體奏報得旨是知道了九月調湖南巡撫十月奏湖北施南府屬之宣恩來鳳咸豐利川四縣自乾隆元年改土歸流設縣分治四年前督臣德沛奏准四縣共酌取生員一二名附於首縣恩施縣學管轄今每縣童生各有三百餘名利川至有五百餘名請每縣酌取入學七名利川酌取八名府學酌增一十二名教職卽於府學及首縣宜昌府各學裁撥廩增俟人文再盛另請增設下部議行十一月京山縣民嚴金龍滋事國治奏請同總

督富明安前往查辦諭曰此係總督之事汝應在省鎮靜同往謬矣三十七年三月以失察嚴金龍聚衆滋事部議降一級調用諭從寬留任三十八年三月疏言湖南湘鄉安化二縣煤礦夾產硫磺從前酌量存磺多寡時開時禁自乾隆三十五年封禁後省局存磺無幾請將該二縣封禁煤礦仍行開採煤則聽民買用磺則官爲收買俟一二年後酌量收積多寡辦理奏入報聞五月奉旨留心體察提督李國柱據實奏聞國治覆奏李國柱實年七十七歲見其精神壯健營務頗爲幹練辦理赴川兵丁各事宜均能剋期料理奉硃批知道了又奏現在派兵赴川並修理軍裝配造火藥費用數倍常年司庫現存賞辦兵差銀十萬餘兩可否照一年應扣各糧通行借給仍分三年扣還歸款諭曰梁國治所辦甚是兵丁調赴川省一切修理軍裝器械均須墊辦情形不免拮据自應酌劑以示體卹其湖北陝甘雲貴四川等省俱有添派之兵如有所存公糧不敷支用者亦照湖南酌量妥辦著各督撫等實力查辦具奏該部卽遵諭行又奏外省委署道府總兵副將出缺委署僅止咨明吏兵二部查道府鎮協署事近或數月遠輒經年若隨時奏聞庶不敢存代庖之見於彈壓官吏兵民更爲嚴肅部議從之八月疏言向例

各營將弁自出征後均聽軍營陞用本營缺出仍係督撫照常拔補是循資按格者轉得坐致陞遷而冒敵衝鋒者專待軍營缺出無以鼓勵戎行嗣後本營缺出請與出征將弁一體輪陞令軍營大臣隨時知照各該督撫得旨所奏是該部速議行十一月奉旨梁國治著來京在軍機處行走十二月署禮部侍郎三十九年正月入直南書房二月命纂辦日下舊聞考六月補戶部右侍郎辭免管理錢法堂事八月轉左侍郎十月賜第一所十二月署經筵講官四十年四月充殿試讀卷官四十一年十月命紫禁城騎馬十一月賜青狐端罩十二月充經筵講官四十二年二月充四庫全書館副總裁三月京察加一級八月充順天鄉試正考官十一月擢戶部尚書四十五年三月京察加一級四月敍平定金川功得旨梁國治著加三級四十六年五月教習庶吉士四十七年二月以定擬鎮迪道巴彥岱收受餽送罪錯謬部議降三級諭從寬留任八月加太子少傅四十八年四月京察加一級七月協辦大學士四十九年七月上以底店賊匪剿辦淨盡梁國治等承旨繕寫鉅細無遺交部議敍尋部議軍功加三級五十年與千叟宴聯句賞賚五月晉東閣大學士兼戶部尚書五十一年二月京察加一級十二月卒諭曰梁

國治學品端醇小心勤慎敷歷中外簡直內廷襄理機務洵擢綸扉方資倚毗前以感患痰喘屢遣御醫診治並派御前侍衛豐紳濟倫前往傳旨詢問令其安心調治以冀速痊茲聞溘逝深爲軫惜著晉贈太子太保派皇十七子帶領散秩大臣一員侍衛十員前往奠醊仍賞給銀一千兩俾治喪事其任內降革罰俸處分均予開復所有應得卹典該部查例具奏尋賜祭葬如例諡文定

嵇璜

嵇璜江蘇無錫人父大學士曾筠自有傳璜於雍正七年欽賜舉人八年中式進士改庶吉士散館授編修十二年擢右中允十三年轉左諭德充山西鄉試正考官乾隆元年充陝西鄉試正考官命南書房行走三年丁父憂六年服闋七年擢左庶子充日講起居注官尋遷翰林院侍讀學士八年三月轉通政司副使七月遷都察院左僉都御史九年正月奏督撫簡閱標兵祇就趨走應對定將弁能否且有倚爲耳目授以採訪之權者驕縱怠忽廢職之由請欽派大臣前往近省簡閱邊省或於駐防將軍副都統內選派再苗疆屯兵防範稽查是其專責乃漫無覺察於有名案犯既不能躡緝又食用諸費皆取諸苗且虐使之伏祈敕諭苗疆

督撫飭屬整頓得旨直隸山東武備尙屬整飭著先派大臣由河南一路稽查上下一帶餘著候旨又奏河工疏築事宜應浚毛城鋪壩分洩漲水於順河集等處開河引溜至黃河岸因積水漫淹山岡老土衝刷頗多宜修築留新黃河韓家堂各處舊有口岸以洩盛漲議行七月奏直隸州縣工役每爲奸蠹包攬扣剋致工程不能堅實目下以工代賑若吏胥恣意中飽於民艱尤無裨益請嚴禁夫頭包攬務取無業貧民給散工價得旨允行十二年正月遷大理寺卿十三年四月授都察院左副都御史六月擢工部右侍郎十四年十二月調戶部右侍郎尋轉左充經筵講官十八年十月江南黃淮並漲上宣防八事一銅山下清口上河身宜挑浚也查決口奪溜河身必淤應將銅山下及早挑挖一高堰等處石工宜修也黃河入湖石工多罅漏應趁冬春逐一修補並加築垣坡土戩一歸仁隄岸隔斷睢湖諸水舊設三閘相機啟閉應及時修補以資障禦一河流自山東入江南由廣而狹閘壩減水卽古人疏分遺意日久頽廢宜酌其可復者復之一明臣劉天和製平底方船設二百斤重五齒鐵耙於船杪沿流拖濬使沙不停積河底日深今清口上河身本淺宜倣其法以濬之一下河向屬淮揚道事繁實難兼顧應設

分巡道以專責成一江南黃河險要在上游五廳大溜至非埽無以禦之應於冬間辦運分貯隨時接濟一河工向設堡夫應令聽汛官督率於遠處取土不得近空隄根致多積水又南河關鍵尤在五壩治水之道宣洩與隄防相表裏欲固隄防宜講宣洩之法疏入下廷臣議行適會欽差尙書舒赫德等奏請派熟諳工程之大員修理隄防上命嵇璜偕工部侍郎德爾敏前往督修十一月奏高堰工程有輒石之殊年分有新舊之異當因地制宜修砌石工隄外築攔水壩水深者一二丈於隄身開槽修砌俟新工過半再拆舊石至舊有輒工見盡改砌石工較輒倍重應將椿木加添再舊修石隄止用石二進石後用輒二進輒與土不能固結一經風浪搜空易坍見於輒石後加築灰土三尺以禦衝刷報聞十二月奏串場河爲諸水總匯以閘門之深較壩面之廣尙虞來水多而出水少請白石礮閘南六十里內建閘二並將查丈之古河間長七千三百丈闊八丈俾直達海口其山寶境內涇澗等河亦分洩運河道並應挑濬順利得旨覽奏俱悉俟繪圖貼說奏來益詳明也十九年正月偕大學士劉統勳等奏高堰高澗龍門古溝四處深塘兜灣實爲頂衝從前石工外俱有草壩應修復以資保固報聞三月偕德爾敏等

奏堰盱所需石料輓運維艱今將坍卸舊石搭用並有根底堅固祇須砌上截者視原估可減四萬餘丈上嘉之閏四月奏報隄工竣諭曰高堰爲全淮保障所關甚鉅上年異漲衝刷間段殘缺朕心深爲焦勞念係石工鳩役庀材辦理匪易今自興修以來未逾半載刻期告竣俾運道民生均資利益諸臣各能體朕宵旰憂勤之意協力同心克副委任宜加優敘以獎勤勞侍郎嵇璜等俱著交部議敘九月充武會試正考官十月轉吏部右侍郎二十年二月諭曰昨因論臣工終養一事降旨宣諭今日嵇璜彭啟豐各具摺陳請終養此奏若在降旨之前出自伊等至情迫切固當曲體允從茲特以面聆朕訓感發天良則所請乃導之自朕而伊等正未有迫不及待之情此亦如禮部鄉賢在可准可不准之間其去留朕得而權衡之又當各視其人矣彭啟豐才本中平辦理部務亦屬竭蹶且伊係內廷翰林以文學爲職而上年扈蹕和詩視前遠遜所學日漸荒落著照所請准其回籍終養嵇璜在諸侍郎中才具尙可辦事且一時出兩缺亦未得其人仍著照舊供職伊面奏以去歲奉差南河曾告假歸省見伊自差竣回京已及半載何前此默無一言而今日於訓諭之後遂若是亟亟焉適合昨所降旨所謂情見乎辭無可

置辯矣朕辦理諸務一秉大公毫無成見而確有定衡恐不知者以同請而去留各異妄生疑義將此宣諭中外知之十二月以母病請假歸得旨俞允二十二年江北淮徐揚等處被水璜在籍奏請採買小麥運江平糶上從之二十三年正月諭曰吏部侍郎嵇璜前以伊母老病懇請回籍今詢其母病已見全愈著前往南河爲副總河協同白鍾山料理河務伊父大學士嵇曾筠久任河工見聞所及諳練非難伊母雖年近八旬而常淮帶水儘可輕舟迎養固無異在家侍奉也上南巡賜詩曰淮黃近多事簡畀冀堪勝習矣吾知夙僉惟汝尙能母儀迎養便父訓熟聞曾佇俟成功奏憂心日所增並賜奕世宣勤額四月諭曰河工爲運道民生所繫朕宵旰憂勤時深廬念茲者翠華南幸於高堰清口及徐州等處工程親臨閱視並與司河務諸臣詳加籌酌見今伏汛將至且近河皆積歉之區貧民甚多以工代賑於窮黎有益而於工程亦易集事白鍾山身任總河工務是其專責但以目今時勢所有應疏應築事宜同時並舉朕意分任大臣以專其事當可速收實效嵇璜前奏請於昭關添設滾壩一座滾壩之下復開支河南關舊壩改建滾水石壩此項工程並一應支河卽著嵇璜率同何煇董其事六月奏淮揚運河東

隄減入下河之水自邵伯以北者歸海之路如草堰劉莊伍祐新興等場皆得地勢之宜分注鬪龍港新洋港歸海但劉莊之大團閘至新興之石碓閘相距五十里應於伍祐場之沿窪口蔡家港地方添建石閘二挑上下之支河引歸新洋港入海至沿海港口則射陽湖勢太灣曲洩水不暢應挑通使徑入海又串場河以西水道多淤塞如泰州之孔家溝鹽城之岡溝河皮家河三處須疏濬深通高寶運河之東隄原設十餘閘年久傾圮應折修以利啟閉此皆下河歸海之路也惟下河州縣本係水鄉形如釜底若高郵諸壩之水太多盈科漸進已不免於泛溢查湖河之水歸海紆迴而歸江徑直多一分入江卽少一分入海瓜儀一帶地勢兜灣洩水不暢且山盱五壩寬三百三十丈蓋以蔣家壩八十丈而歸江閘壩只八十餘丈來水五倍於去水惟藉芒稻河爲尾閘須挑河築壩使湖河水勢相平然後將各壩開放則湖水旣減可爲容納來水地遇伏秋五壩過水漸多宣洩不及方將高郵湖諸港放入運河由車邏南關二壩減洩則歸海之水自少下河田畝可無虞諭曰嵇璜奏湖河宣導機宜并應疏應修各工一摺頗中窾要運河減洩之水歸海路遠歸江路近然亦有不能歸江之處此皆南巡得之目擊者今

分別緩急因水利導俾田畝資其灌溉水漲不受淹浸所言頗合朕意但向來地方官各州縣局守一隅不能通盤籌畫而大吏又因循草率憚於動帑興工每致臨時竭蹶節節補苴迄無成效今會全局而熟籌之綢繆於先事其中改紆爲直移遠爲近濬淺爲深所奏應疏應修各工具有條理不必更行交部著照所請交與尹繼善白鍾山普福等會同嵇璜於應動工時次第興舉所需帑項照例分別動支該督等當督率屬員妥協辦理俾下河民生永有裨益八月秋汛安瀾議敘加一級十一月奏高郵運河東隄添建石壩工成諭曰據嵇璜奏高郵運河東隄添建石壩已經完竣并請酌定水則如上游五壩過水漸多車邏南關二壩過水至三尺五寸開放五里中間若車邏南關二壩過水至五尺再開放新建石壩視水勢之大小以爲啟閉自無壅潰之虞等語所見深得蓄洩機宜蓋湖河水勢以五壩爲來源以江海爲去路而歸江之路近於歸海況下河一帶地本卑窪必視歸江諸閘壩實有宣洩不及之勢始可以次啟放今春南巡時親臨指示令將車邏南關二壩常行開放俾河水得以隨時減洩而又早關歸江之路以達其流下河田畝遂獲豐收此已試之明效自當酌定水則以時啟閉著照嵇璜所奏過水

尺寸立誌壩旁以垂久遠尋奏高郵官河北澄子南澄子均有淺阻應挑浚又壩下引河內灘嘴應砌高寶諸湖之支河宜加疏挑騰空湖面多留山盱五壩過水地硃批甚好具見留心應妥速爲之十二月因徐城增築石工汛速完竣議敘加一級又奏車邏南關壩脊高於高郵湖面二尺七寸應將芒稻閘常年啟放則江湖脈絡貫通下河無虞淹漫上嘉其奏諭曰據嵇璜奏稱芒稻一閘爲諸湖入江之路宜洩通暢下河州縣自可永免水患等語此實經理下河之要鍵朕去春南巡時所諄切指示令早關歸江之路者正謂此也芒稻一閘乃歸江第一尾閘向因淮南鹽艘皆由灣頭河轉運必須芒稻閘門下版方可蓄水遄行以致不能啟放合宜前據該督等奏聞東有舊越河一道應令鹽艘從越河直走金灣北閘是洩水與運鹽已自分爲兩途芒稻閘自可常年啟放矣但終恐狃於蓄水運鹽之習仍不免因循觀望夫蓄水運鹽不過可省絳挽之勞所費在富厚商人而下河數州縣之民生攸繫此其輕重豈不較然耶嗣後芒稻閘應永遠不許再下閘版俾得暢洩歸江則諸湖自可減退遇伏秋大汛亦足以資容納而下河一帶永蒙樂利之休矣該督等將此旨勒石閘畔俾後來司事者知所遵守焉五月偕督臣

尹繼善奏報上下江水利工程全完議敘加一級九月調禮部尙書二十四年四月請假歸省旋請在籍終養二十五年八月來京恭祝萬壽十月歸至清江浦奏臣見河臣保護下河事宜竊惟歸江之路尙有應行籌辦者查運河東隄之金灣滾壩口門寬四十丈而尾閘仍歸入六閘河勢易於淤阻應請於金灣壩下開挑引河並將董家溝淤淺疏挑以注江則尾閘更暢又查廖家溝石羊溝董家溝三壩應改低三尺以芒稻西閘爲準庶就下之勢益順諭曰此係卿在京曾奏之事原以待明年南巡舉行今既改期且督河諸臣已有挑濬之舉則及時陳奏實爲允當有旨交尹繼善等勘議二十六年來京恭祝皇太后萬壽二十九年十二月丁母憂三十二年服闋署禮部尙書五月實授七月授河東河道總督八月奏楊橋大壩爲豫省第一要工稽料堵閉時虞滲漏北岸河灘順直旣不能挑引河以分溜大壩迤東又徧地飛沙不能建越隄惟有將壩身裹戩培厚以當重門保障又從前堵築楊橋漫口係就鄭中越隄頭盤築壩臺進埽合龍遂改越隄爲臨河大隄該處土性純沙實難恃以無恐應選擇淤土幫築裹戩諭曰自應如是矣但期帑歸實用久資鞏固可也尋奏回空糧船已過濟寧南下月內可全出東省境

其濟寧以上之蜀山南旺馬鬮馬場等湖水櫃應及時收蓄見將出水斗門閘座槩行堵閉儲水以備灌輸至濟寧上下運河東岸獨山湖十八水口亦次第堵築不使涓滴外洩再徵山湖見深一丈二尺一寸較奏定水誌多尺許來春濟運甚爲寬裕得旨覽奏俱悉三十三年五月諭曰前因彰寶摺奏有運河水勢較小之語而嵇璜亦會奏及當卽傳諭該總河令其查明覆奏隨據奏到四月初旬得雨五寸各幫已銜尾過行乃今日倉場侍郎等具奏又稱濟寧等處糧艘過津前後脫幫自一二日至四五日不等情形迥不相符此實近年希有之事運河糧艘全賴諸湖水櫃啓閉應時以利浮送而先期酌量調濟尤係河臣專責前此李清時經管有年辦理妥協從未聞以湖水淺澀致轉漕或有濡滯至春末夏初雨水較少亦北方常事況今春已得雨數次而糧艘脫幫轉致多稽時日若此豈藉口雨澤稀少遂可以爲卸責之計況嵇璜到任以來於瀦蓄宣洩事宜旣已辦理不善於前及降旨詢問又復自行掩覆於後是何意見著嵇璜明白回奏尋奏糧艘脫幫因員弁催償不力得旨交部察議九月授工部尙書十一月諭嵇璜見在來京著專辦工部事務不必在南書房行走三十四年正月因河東總督任內未甄別

佐雜諭曰河東佐雜額缺多至八十九員嵇璜在任已及年餘理應悉心澄汰何至甄別無一人明係膜視察吏姑容瞻徇嵇璜著交部嚴加議處部議降三級調用補都察院左副都御史五月以會讞時刑部錯擬罪名隨同畫諾降一級留任三十六年遷工部右侍郎三十八年五月擢工部尙書八月調兵部尙書十二月充經筵講官三十九年充四庫全書館正總裁四十年三月充會試正考官四月出闈未赴香山行宮候召見部議降三級調用得旨從寬留任十一月賜紫禁城騎馬十二月調工部尙書時璜弟嵇璇官廣西明江同知因失察逃民出口應議處左江道秦廷基爲請於督臣李侍堯侍堯據實以聞命撫臣熊學鵬嚴訊奏入諭曰據熊學鵬奏到審明情節則秦廷基袒庇嵇璇實因畏懼尙書嵇璜已自認不諱殊出情理之外業將審擬一摺交三法司覈擬具奏矣至嵇璜不過一尙書且非朕深爲倚任之人何至卽令外間畏憚若朝中尙書聲勢卽可傾動至此則日在朕前之大學士舒赫德于敏中又當如何此必嵇璜好與外官交接以致依草附木之輩輒爲瞻顧伊弟以示迎合用情雖此案審無嵇璜囑託情弊原可無庸深究設有其事必將嵇璜重治其罪斷不曲爲寬貸然身爲尙書竟令外省揣

承意指必其平日有以致之可不知所愧懼乎在廷大臣受朕恩眷理宜小心謹飭以副任用卽如于敏中程景伊王際華俱朕所親信者伊等亦必謹慎自持看來漢尙書中惟嵇璜不免與外吏稍通聲氣前此裘曰修亦閒或有之然任事不久未至爲衆所屬目是以不蹈過愆而嵇璜見有此案則顯然昭著矣若就嵇璜辦事而論較之王際華實有過之無不及而小心謹慎之處則遠不如朕所以於嵇璜不肯委以重任且時加訓飭提撕俾知儆覺諸臣等各撫心自問朕所評論果皆切當否乎朕臨御四十年一切人情物理何事能逃朕洞鑒若內而大學士外而督撫不過二三十人居心行事尙不能察見底裏其何以知人任使撫馭海宇乎幸常紀綱肅清之時內外諸臣尙不敢稍有縱越卽有未能精白之處亦不敢於朕前嘗試此卽諸臣之福嵇璜嗣後惟當改悔思愆深自斂抑毋負朕教戒成全之意四十二年京察議敘加一級四十四年十二月兼翰林院掌院學士尋調吏部尙書協辦大學士四十五年京察議敘加一級六月教習庶吉士九月授文淵閣領閣事兼國史館正總裁四十六年二月充三通館正總裁十二月命管理稽察欽奉上諭事件處尋諭曰本日據阿桂李奉翰韓鏞覆奏嵇璜前奏令黃

河北流仍歸山東故道其事必不可行各摺已批交該部知道矣此事前據嵇璜在熱河面奏朕揣度形勢以爲其事勢難行是以遲回久之更翻治河諸書以博訪衆論皆稱黃河南徙自北宋以來至今已閱數百年未可輕議更張卽以見在青龍岡漫口情形而論其泛溢之水由趙王河歸大清河入海者止有二分其南由南陽昭陽等湖匯流南下歸入正河仍有八分豈能力挽全河之水使之北注此事勢之顯而易見者從前孫嘉淦亦曾有此議究以形勢隔礙難行其說遂寢今因漫口復決是以降旨詢問阿桂等令各就所見據實覆奏俱稱揣時度勢斷不能行其詞若合一轍且稱始而南流八分者今則全歸江南地形北高南低水性就下惟應補偏救弊以復其安流順軌之常山東地高於江南若導河北注揆之地勢之高下水性之順逆斷無是理等語或阿桂等揣合朕意故爲此奏而嵇璜尙爲素悉河務之人其前奏使河流仍歸山東故道之語亦必中有所見卽使其事難行而其言爲要工起見究屬因公且治河之策本應集思廣益正不妨博採周諮以期詢謀僉同折衷至當著大學士九卿科道等再行悉心妥協會議具奏尋議上寢其事四十七年八月加太子太保十月命在上書房總師傅上行走

四十八年京察議敘加一級賜詩曰遣暇石渠舊蹟披西清廣和繚然思率登鬼
籙嗟前後祇賸嵇山不動移四句六如真弗舛電光石火訝如斯得存碩果喻君
子較彼韋平似勝之四十九年璜子承豫官雲南劍川州知州以承辦軍米遲誤
革職奉旨交部帶領引見尋諭曰該員係大學士嵇璜之子念嵇璜年老嵇承豫
著加恩以主事用令其就近侍養毋庸再行引見九月諭令每冬日出後進朝詳
伍彌泰傳十一月賜黑狐端罩尋因河源紀略成議敘加二級五十年正月入千
叟宴三月四庫全書成議敘加二級五十一年京察議敘加一級時璜以精力衰
乞休賜詩曰願老何須以老悲古稀猶此日孜孜旰宵未倦依然興爾我同庚可
不思一去已憐一爲甚再隨應識再非宜漢家災異三公免君合臣綱我弗爲五
月上幸避暑山莊命留京辦事十月有疾上遣御醫診視尋愈賜詩曰邇日籌瀛
髮率宣重臣掄俊統軍先採薪喜愈談前席碩果權休稱避賢同閣四中今獨在
懸車一發漫頻連卻云慶八旬乞返首肯同鄉待戊年五十四年京察議敘加一
級三月以上書房行走諸臣曠班諭曰書房設有總師傅並不專司訓課其責專
在稽察與總諳達之於衆諳達無異師傅內有怠惰不到者總師傅自應隨時糾

効方爲無忝厥職今該師傅等竟相率不到至七日之久無一人入書房其過甚大而總師傅復置若罔聞又安用伊等爲耶此而不嚴加懲創又復何以示儆嵇璜年老衰邁王杰兼軍機處行走情尙可原著從寬交部議處劉墉等俱著交部嚴加議處部議降二級調用命改爲降三級從寬留任五十五年四月諭曰大學士嵇璜係雍正庚戌科進士服官有年精神矍鑠茲當庚戌會試已屆周甲之期與新進士先後同年實係人文盛事著照從前史貽直之例重預恩榮筵宴以爲藝林佳話復賜詩曰本天希遇兩恩榮戊茂前庚逮後庚祖節昔同唐真果身階今似漢韋平可知襲慶緣修德所喜力行不務名黃閣重逢錫褭什絲綸盛事紀皇清復諭曰內外文武大臣特恩賞紫禁城內騎馬用資代步但年老足疾之人上馬亦覺艱難如大學士嵇璜雖經賞馬仍恐難於乘騎嗣後已經賞馬之大臣因有足疾艱於步履者仍加恩准令乘坐小椅旁縛短杆用兩人舁行入直以示朕眷念大臣恩加體恤至意八月上以嵇璜年屆八十賜詩曰誕日原當六月初後移稱慶實謙虛還鄉未可便從爾戀闕依然尙憫予賜馬賜輿堪贊閣曰來曰使未懸車同庚待我歸政後南北應同林下居再賜韋平錫慶額賜聯云綸閣恩

榮聯後甲杖朝風采耀長庚五十六年十二月賜肩輿入直五十七年京察議敘加一級十月諭曰嵇璜年逾八旬精力不能兼顧翰林院掌院學士事務著彭元瑞管理五十九年四月諭曰據福寧奏保舉堪勝知府之武定府同知嵇承羣曹州府同知陳文駿二員並聲明嵇承羣係大學士嵇璜之子等語外省保舉自應簡拔寒峻況前降諭旨令督撫等各保舉一二員送部引見如該撫因一時乏人卽保薦一人有何不可且該省同知直隸州知州不下十餘員其中豈無一二才具堪膺方面之選者而必須將嵇璜之子嵇承羣登諸薦剡殊屬非是大學士之子朕所素知如果才堪任使原可量加酌用卽如阿桂之子阿迪斯見任侍郎和珅之弟和琳前因辦理糧餉軍務認真出力洊擢尙書然此皆朕特加簡擢並非因人保薦始行用至卿貳也朕臨御五十九年因材器使一秉至公大學士子弟從不准臣工等互相保薦致啓黨援之漸今福寧輒將嵇承羣保奏雖於摺尾聲明究不免瞻徇情面福寧著交部議處嵇承羣不准送部引見七月卒諭曰大學士嵇璜老成端謹歷練有年簡任綸扉齒逾八秩方冀長承恩眷用資倚任前因患病告假卽命皇八子帶領御醫親往診視茲遽聞溘逝深爲軫惜著賞給經被

以昭飾終令典加恩晉贈太子太師派皇八子帶領侍衛十員前往奠醊並賞給銀一千兩辦理喪事其從前降革處分悉予開復所有應得卹典該部察例具奏至伊家屬扶柩南歸並著加恩照例遣官一員護送回籍以示優眷尋賜祭葬如例謚文恭子承謙官翰林院侍讀先卒承豫見任兵部郎中承閑見任廣東廣州府同知承羣前任山東武定府同知丁憂起復仍赴山東今借補泰安府通判

伍彌泰

伍彌泰蒙古正黃旗人姓伍彌其先巴賴都爾莽奈居察哈爾部落太宗時來歸隸正黃旗授頭等男爵崇德六年隨征錦州陣亡贈三等子生哈岱任內大臣累敘戰功晉一等子謚勤壯生阿南達官副都統謚恪敏生阿喇納官吐魯番副將軍贈三等伯謚僖恪入祀賢良祠阿喇納生伍彌泰雍正二年十二月由廕生襲三等伯三年三月授公中佐領九年九月擢散秩大臣乾隆四年十一月授正紅旗蒙古副都統十一年六月授鑲白旗蒙古副都統十五年賜伯號曰誠毅二十二年三月授涼州將軍仍兼散秩大臣十二月奉旨伍彌泰著仍帶將軍職銜前往西藏辦事二十四年六月代回授正藍旗蒙古都統九月授江寧將軍二十七年

四月奉旨伍彌泰不勝將軍之任著仍在散秩大臣上行走七月奉旨協辦伊犁事務十一月諭曰阿桂明瑞奏哈薩克等貪得無厭仍越境游牧理應加以懲創但自明瑞外領隊之伊勒圖鄂津伍彌泰等俱未爲諳練軍務今授愛隆阿伊勒圖爲參贊大臣五岱爲領隊大臣計伊等前抵伊犁已屆領兵驅逐之期明瑞與愛隆阿五岱分路前往酌派伊勒圖鄂津伍彌泰隨行學習二十八年正月奉旨往烏魯木齊辦事八月奏修築精河屯堡告竣請旨頒賜嘉名尋賜名曰綏來堡十一月奏三屯種地兵丁每兵糧地二十畝見在收穫米麩十四石至十五石不等應否將辦理屯田官員及兵丁等加恩諭曰著照所請官員等交部議敘兵丁賞一月鹽菜銀兩又奏瑪納斯精河橋梁見屆農隙應派兵乘時修造報聞二十九年八月諭曰伍彌泰李景嵩仍留烏魯木齊同五福辦理屯田貿易事務奏事時伍彌泰列名在前十月諭曰烏魯木齊遣犯甚多著伍彌泰加意約束若少有疏懈致脫逃滋事惟伍彌泰是問三十一年九月代回命署鑲黃旗蒙古都統旋兼署正白旗漢軍都統三十五年八月授內大臣十月奉旨馳驛前往西寧辦事三十六年九月奏洞庫爾番人行囊被郭洛克賊人搶掠除率兵追獲外尙有未

獲物料續派兵奪還烏槍腰刀馬匹疏入諭曰伍彌泰此奏甚屬糊塗洞庫爾行囊既被郭洛克賊人搶奪卽當痛加誅戮但殺賊一名搶回什物尙有未獲牛隻等物顯係隱匿未報青海之人本怯懦無用伍彌泰前此並未查明又如此怠忽從事甚屬糊塗無用著嚴行申飭三十八年正月諭曰伍彌泰叩賀新年摺於正月初三日始到伊等豈不知至京程途自應計算日期於正月初一日到京方是乃遲至初三日方到甚不曉事伍彌泰著申飭十一月諭曰莽鵠賚駐藏六年有餘遣伍彌泰往換伍彌泰駐紮西寧辦事已滿三年照例遣人更換茲乏往藏更換莽鵠賚之人派伊往換該處再駐三年滿六年卽行更換伍彌泰抵藏後凡奏事行文書銜著伍彌泰列前伍彌泰接奉此旨不必前來請訓四十一年七月召還擢理藩院尙書兼議政大臣九月授鑲白旗漢軍都統十月授綏遠城將軍十二月調西安將軍四十二年大學士公阿桂等議奏伊犁將軍伊勒圖請將屯田隻身兵三千陸續撤回改爲眷兵一摺奉旨著伍彌泰妥議具奏十一月奏請令陝甘督臣於兩省綠營內裁撥眷兵三千分三年陸續往伊犁駐紮四十五年九月奉旨照料班禪額爾德尼進京賜紫禁城騎馬十一月回西安將軍任四十六

年三月諭曰據勒爾謹奏蘭州撒拉爾回匪蘇四十三等搶據河州城勒爾謹因兵力尙少見在屯兵狄道州俟各路營兵調齊卽行進剿等語見已傳諭西安提督馬彪帶兵二千名迅速前往並諭西安將軍伍彌泰寧夏將軍莽鵠賚各選集兵一千名預備儻須調用卽令前往協同剿捕伍彌泰等旋奏臣等於三月二十五日馳驛前往並選兵一千分起迅赴河州又伍彌泰見挑西安滿兵一千預備親自帶兵接應所辦與昨降諭旨相合甚屬可嘉時大學士公阿桂尙書和珅先後奉命督師上以阿桂和珅未到之先西安至蘭州一帶需人調度諭曰伍彌泰帶兵前進計此際已抵甘省所有一切調度應辦軍需糧餉各事宜卽著伍彌泰悉心經理並著傳諭尙安就近卽速馳赴隨同伍彌泰辦事仍將如何經理之處一而迅速覆奏一面通知阿桂和珅尋偕馬彪等奏初二日抵蘭州會同勒爾謹商酌追剿事宜諭曰前此因未見勒爾謹奏報恐有阻隔而和珅又未能刻卽到彼是以傳諭伍彌泰令其籌辦一切原因彼時無人料理起見今勒爾謹既到蘭州而和珅亦趨程前進所有調度官兵及軍需糧餉各事宜自應仍令勒爾謹經理一俟

阿桂和珅到彼卽會同商辦伍彌泰仍止專司帶兵剿賊俾事權歸一辦理方有章程又偕勒爾謹馬彪等奏官兵於四月初八日分路一由黃河南岸衝賊營一由賊之東南山梁進見在賊不過千餘各路官兵雲集無難剋期蕩平所有派出京兵四千請停止上從之尋奏西寧文報由平番抵省城北河橋雖經賊燬渡船不至阻礙逆回據華林山緊要隘口俱派兵嚴防軍餉儘敷應用奏入諭曰本日據伍彌泰奏新疆文報各摺於見在剿賊事宜並無一語提及勒爾謹則並未出名齎奏殊不可解此時官兵已逾一萬賊匪僅止千餘何難一舉殲淨自初八日後在彼坐待何事況兵貴神速豈宜如此觀望不前竟欲待和珅到彼再行商辦乎看來伍彌泰止知帶兵前往蘭州其實毫無主見不免意存怯懦著傳旨嚴行申飭尋命阿桂兼程前進五月初二日隨阿桂在龍尾山架礮擊賊旋齊集華林山梁盡據賊卡六月十五日阿桂督大軍直逼華林寺仍令伍彌泰駐龍尾山以壯聲勢首逆就戮逆回平先是馬彪等遣投出新教回民海潮宗往賊營曉諭被羈因降賊至是阿桂奏馬彪遣該犯前往時伍彌泰正在總辦並未據奏請議處諭曰阿桂奏此次官兵殺死逆黨阿渾五人內查出海潮宗一犯係四月中旬伍

彌泰仁和馬彪遣赴賊營曉示被留住卽稱阿渾與首逆同坐議事伍彌泰等身任將軍提督俱有奏事之責既經遣人赴賊曉諭又復被留未回何以並未陳奏甚屬錯謬伍彌泰仁和馬彪俱著交部議處部議革職詔寬免四十八年五月命補授吏部尙書協辦大學士事務七月充上書房總譜達尋授鑲白旗蒙古都統十二月充經筵講官四十九年正月上巡幸江浙命留京辦事七月授東閣大學士九月諭曰朕年來寡寐每日夙興原可於養心殿視事諸臣自家入朝趨直住居稍遠者其起身必當更早大學士嵇璜蔡新伍彌泰俱著加恩令其於日出後進朝如遇風雪沍寒之日卽不入直亦可其三品以上七旬之臣准此以示朕優眷老臣之意五十年正月入千叟宴五十一年春賜詩曰少長余一歲看如長我年依然可綸贊何必說車懸步履昨稱蹇精神今復痊願留二三老作伴廟堂前閏七月卒諭曰大學士伯伍彌泰老成端謹奉職中外敷歷多年簡任綸扉兼司旗務實心宣力倚毗方殷茲聞直宿禁城陡患痰疾輿回私宅卽聞溘逝殊深悼惜著加贈太子太保派散秩大臣一員帶同侍衛十員前往奠醑仍賞給銀一千兩俾治喪事其任內降級罰俸處分均予開復所有應得卹典著該部察例具奏

尋賜祭葬如例諡文端子伍彌烏遜襲三等誠毅伯兼佐領任兵部侍郎鑲黃旗滿洲副都統塔爾巴哈臺參贊大臣嘉慶元年緣事革任其世職弟景文襲三年卒仍伍彌烏遜襲

楊廷璋

楊廷璋漢軍鑲黃旗人世襲佐領雍正七年由筆帖式授工部主事遷員外郎中十一年遷廣西桂林府知府乾隆二年遷左江道十五年擢按察使二十年遷湖南布政使二十一年擢浙江巡撫二十二年上南巡賜以詩曰監司經久任自是悉民情要以能倡率寧惟貴潔清艱難九年蓄生聚五方盈飢溺吾心切勤哉撫恤誠諭曰西湖之水海寧一帶田畝藉以灌溉今聞沿湖多有占墾將來湖身日漸壅塞海邑田畝有涸竭之虞於水利民生均有未便除已經開墾成熟者免其清出外嗣後不許再行侵占廷璋尋奏此項田地多礙水道若仍准留恐日漸淤塞請概令開挖歸湖照蘇隄式沿岸栽柳以防侵占根株盤結亦可固隄上嘉之二十三年三月奏請仁和錢塘蕭山三縣江塘照海塘例以土十丈爲准按段編號立石仁錢二縣江塘除民房隄岸外餘二十餘里照海塘例每二里設堡夫一

建堡分防從之九月諭曰戶部據楊廷璋咨梁詩正見在丁憂應否仍在家食俸因爲具奏請旨甚屬非體見任官員遇有事故尙卽停俸在家食俸者自不待言此非爲節省乃教孝之大經也國家優眷臣工特昭異數梁詩正曾以尙書協辦大學士豈每歲必需較此俸入者料梁詩正身爲大臣其見處苦塊中必不至鄙陋見小若此楊廷璋或據地方官之請輒爲咨部則不惟不知大臣養廉之義且獨不爲梁詩正稍留地步耶楊廷璋不免有心徇情著交部察議尋議降三級留任二十四年三月奏言台州府屬太平縣黃巖場沿海未墾沙塗徹底清查於適中地立界迤南者歸竈迤北者歸民築塘試種戶以百畝爲率分限起科可得腴產十萬畝得旨嘉獎四月授閩浙總督九月奏請酌改要地塘汛及巡哨章程一福州府屬南湖北二十里螺洲大頭崎等處濱臨建江向設中房汛外委一兵二十四今南洲已設專汛請將中房汛留兵五名巡防所裁弁兵於螺洲大頭崎各設塘汛一分駐羅星塔東西港口東岸專設塘房將洋峙塘同石龍臺兵八名分駐烏龍江對岸有後邊塘改遷於峙口山與烏龍江汛對設一烏龍江大頭崎流尾新岐四汛江面遼闊巡船窄小請將南臺水師營大船四崇新汛大船一改駐

適中之江邊塘令烏龍江把總一崇新汛外委一麪嶺千總一山水寨把總一峭門汛外委一撥兵駕船巡緝又麪嶺塘小槩船五酌裁四閩清口塘小槩船二酌裁一撥於朐頭汛後邊塘甘蔗塘新設港口塘四處各一餘撥還崇新汛並將烏龍江等處原設小哨船移還南臺水師營一遊巡官兵分界自閩安鎮至烏龍江口屬流尾巡船自烏龍江口至大頭崎屬烏龍巡船自大頭崎至新岐屬大頭崎巡船自新岐至芋原屬新岐巡船自流尾至南臺大橋屬江邊塘巡船各遊巡會哨一駕駛巡船應於羅星塔等前五塘汛水師兵內酌派專司並令教習兵丁有練熟者准於水師營通融考拔均從之十一月奏言內地洋船赴番貿易每冒混請由臣飭屬查明換給的實姓名年貌執照查對相符方准放洋回棹時人數缺少卽嚴究勒限追回以杜越販偷漏諭勸其實力整頓十二月奏言臺灣穀賤妨農內地歉收民人每偷渡就食查禁終難盡絕不若酌寬米禁內地米增價必平減應請往來臺廈之橫洋船准放米二百石穀倍之塘船准帶食米六十石米船自臺灣鹿耳門口出收入泉州廈門編號給照開報米數令商及船戶呈驗繳銷如所議行二十五年正月奏請水師副將參將照陸路例不准本省人補本省缺

游擊都司守備等官照陸路守備例以隔府別營缺題補部議允行先是督臣楊應琚因臺灣地近生番飭查勘驗按界挑溝築土牛以杜私墾至是廷璋奏請酌定章程一彰化縣沿山番界車路旱溝外各有溪溝水圳山根爲界其無溪圳處則挑溝築土牛爲界淡水廳一帶前僅於隘口立石今酌依山傍溪並挑溝堆土牛分界一彰化縣沿邊定例番地聽番自墾如新截入彰化界內廣福寮等十四處並舊界內廣福新莊等五處及新舊界內兼有之再斗六一處應照例還番耕管但番黎少諳耕墾佃民又遷移失業今酌議除番民自耕田均照產管業升科惟柳樹浦一處該番得價賣出應入官其廣福寮等處以各社通事土目爲管事以各墾戶爲佃人照臺例分別納租餘粟勻給衆番一彰化沿邊設隘寮十處淡水設十八處其守隘兵糧彰化於該番社租粟內撥給淡水向無租粟各社曠埔未墾者尙多應查出報墾以資隘丁口糧疏入報聞二十六年三月奏言鳳山縣屬阿里港諸羅縣屬斗六門地扼要請將鳳山縣萬丹縣丞移駐阿里港臺灣縣新港司巡檢移駐斗六門從之五月廷璋同福建巡撫吳士功奏參提督馬龍圖借用公項銀聞臣等察出往盤將銀數歸補應照知人欲告而自首例減等定擬

上責其辦理錯謬於馬龍圖舞文掩飾置之不問究係先出何人之意著據實明白回奏廷璋等覆奏定案時楊廷璋主稿而督參撫審吳士功爲政敕革士功職發巴里坤效力廷璋革職從寬留任又奏參黃巖鎮總兵林洛受網戶賊派兵代爲守網致淹沒兵丁並捏報匪船掠劫命革林洛職定罪如律二十七年上南巡賜以詩曰西粵昔開府南閩今建牙兼知亦舊制勝任得卿嘉政有羣黎感身無大耋嗟老成方倚賴調攝意須加十二月奏言湖州府藉太湖爲尾閭今烏程長興所屬泖港淤淺請開濬寬深俾歸太湖港口詔如所請行二十八年十月加太子大保十二月授體仁閣大學士仍留總督任二十九年三月奏言晉江縣屬之西倉地處海濱乾隆五年移駐同知一員距縣窻遠請將同知移駐石獅街較西倉更爲適中從之時廷璋來京陛見福建水師提督黃仕簡奏廈門索出入船隻陋規文武衙門朋分收受請簡大員清查上命尙書舒赫德侍郎裘日修前往尋查得廷璋令歷任同知代購物件未經發價狀諭曰舒赫德等查訊道府廳縣俱有與總督楊廷璋墊買物件銀兩此項並非黃仕簡前奏溫泰所開總督一萬巡撫八千之本文係屬案外枝節但既經訊出自不應置之不問舒赫德等應向溫

泰究詰一切收受實數如果該督一萬之數實無指證而墊買之項特係府廳以陋規爲之墊辦在該督原有應得之咎朕亦不能爲之迴護卽審擬之大臣亦安得謂之吹求督撫等以上司而派屬員卽已自干不合況價值更有賠墊情事旣確安得復貸其處分見令該督回閩舒赫德等可就近詳悉覈對不難立見分曉卽楊廷璋亦不能稍存諱飾也六月舒赫德等奏仕簡所開一萬八千之單屬洋行所開督撫衙門八千圓係行戶年例貼費其各員代廷璋買物貼價亦係各員名下陋規不在八千圓數內諭交部嚴加議處解任來京候旨尋議革任奉旨從寬授散秩大臣諭曰楊廷璋令屬員代買人淺珊瑚珍珠等物衆供僉同固已毫無疑義若不加之懲創則他省或致效尤滋甚豈可爲訓朕特念楊廷璋年齒就衰平時尙能悉心任事不忍遽加擯棄此朕格外施恩薄懲示警十月授正紅旗漢軍都統十二月授工部尙書三十年六月署兩廣總督三十一年四月小鎮安土司怕懷隘外有被交趾攻散之沙匪竄入官兵緝獲廷璋奏俟審明押赴隘上照會該國王遣頭人公同正法未幾交趾夷日報該國隘口聚匪搶掠見督兵擒捕懇內地堵截廷璋復奏聞派將弁嚴守卡隘不使外匪竄入諭曰楊廷璋此論

似是而實非交趾素屬恭順謹守藩服原不宜無故加兵卽其見在剿捕夷匪並未干涉內地亦不過攔其竄逸而止設夷匪竄入隘口自當協力擒捕付彼處分以示懷遠之道或交趾兵目藉緝匪爲名擅至邊境滋擾豈可輕縱不究僅以驅逐出口了事又或內地人犯逃匿彼境卽應向其索取儻索而不予卽當聲其罪而追攝之又豈可置之不問乎此等邊地夷情惟應審度事理之當辦與否因時制宜若務爲持重鎮靜之說則養癰貽患其弊有不可勝言者將此通諭各督撫知之五月崖州安岐黎糾衆滋擾客民廷璋檄鎮道擒捕治罪奏杜後患事宜一客民久居黎地有田園廬墓者自爲一村編保甲立甲長稽查約束一錢債非違例取息令欠戶清釐重利盤剝者追餘息充公禁客民入黎放債一黎民交易飭附近州縣汛地設墟場定期交易一令黎峒總管曉諭熟黎普行薙髮一貢木貢香派總管黎頭運送地方官選買給價一凡出入黎峒之人盤詰明白放行遇催徵錢糧公事票差黎頭飭令交出禁差役入黎滋擾得旨允行七月奏言鎮安府屬小鎮安土司原設土巡檢職微難以控制應與歸順州湖潤寨州同一併裁汰改設鎮安通判駐筍小鎮安整飭化導宣化縣那南寨與金城寨相近併歸金城

巡檢管理卽以那南巡檢改爲湖潤寨巡檢小鎮安之南隴連山地險僻請於界連安南及土富州之那波者賴者欣等三村各建卡撥兵怕懷大隘近安南爲小鎮安門戶應撥兵巡緝添設把總一打面梁壤接滇省應將南燕山一卡移建以資扼要部議允行十二月命赴永昌幫辦軍務三十二年二月奏言總督楊應琚疾已愈臣遵旨仍回廣東三月授刑部尙書三十三年正月命紫禁城內騎馬廷璋時年八十御書協中延慶額賜之八月授直隸總督加太子少保十月奏言正定縣城西南近河向築隄壩今秋溥沱驟長逼城應於斜角隄頭增築新隄五百七十六丈至柏棠閘止環抱禦水並拆修護隄埽壩斜角隄東接築挑水壩五座河神祠前築魚鱗壩俾河流仍復舊軌又奏言藁城縣東北溥水汕刷應自西北城角起順岸築埽工三百六十丈用椿葦埽鑲築堅厚埽後加築土埽保護城垣又奏勘任邱沿淀情形楊各莊等處極窪水漲難洩請改種稻田文安大窪東面界連大城縣舊有隄埽滹滏盛漲注子牙河水高隄頂宜加倍修築文安積水未涸應於龍潭灣等處開隄洩放並從之三十四年正月請撥通倉米十二萬石分運各災屬平糶詔加恩撥運通倉米二十萬石以爲加賑糶借之用四月奏言溥

沱河故道由晉州之東張岔口東流經東鹿之木邱傾井等村入深州歸衡水縣入滏陽縣合流岔河由東鹿之小王村至冀州亦會入滏河乾隆二十四年南徙由東鹿西南之曹家莊等村至寧晉縣之營上村歸滏河以致舊河淤墊東鹿向距河遠上年滹水漲溢復行故道木邱傾井等村復成巨浸河面寬深間有應裁彎取直處已開挑完竣惟東鹿護城隄埝年久坍塌亟應修築奏入報聞十一月奏言四旗廳見存米九千餘石久貯虞致霉朽熱河廳應購米萬三千餘石定價每石一兩熱河見在市價每石一兩九錢九分不敷採買查四旗原買米價每石八錢四分請將四旗見存米撥給熱河既無需增價而四旗又可照原價稍盈於兵精帑項有益詔如所請行三十五年春上巡天津賜以詩曰總督而兼巡撫事歷來保定此掄賢八閩威望原騰舊三輔循聲俾繼前練士安民惟要矣疏河導淀尙勤旃春巡本務茲愍示供帳寧當謂力宣閏五月以北運河一帶淺阻請運通糧船配留天津北倉命截留二十萬石七月奏言武清東安寶坻寧河永清香河六縣雨多被淹貧民待哺甚殷復請將被災六分以上者八月內先普賑一月俟冬初再賑並請照例兼用銀米其米卽天津截留漕糧內動撥從之詔再撥通

倉米二十萬石部庫銀五十萬兩以資分給尋奏言各屬常平倉穀尙未買足今歲天津舊欠復經蠲免各州縣倉廩所存尙恐不敷得旨再加恩撥通倉米二十萬石俾得寬裕賑給貧民口食益資接濟九月奏言唐三營倉向貯米萬二千石乾隆四年熱河總管巴圖奏定五年一次照例除減耗車脚餘米運至熱河喀喇河屯貯倉搭放兵餉仍將熱河同知添買兵米撥二千石運赴唐三營倉歸款五年後仍照前運至熱河喀喇河屯倉往返滋糜費請將唐三營米於此次運交熱河喀喇河屯之後毋庸再爲撥抵將唐三營空倉歸熱河四旗二廳分貯採買米穀唐三營原設千總一兵三十移駐布達拉廟又奏言古北口爲畿輔重鎮兵精向藉口外販運應請撥熱河廳穀六千石四旗廳穀四萬石喀喇河屯穀一萬四千石運古北口建倉存貯並移駐滿缺同知一員經理停密雲縣採買兵米卽於古北口倉內動支並允行十月奏直隸各屬需賑銀約八十餘萬兩又奏溇沱河向設歲修之項河流南徙停止今河又北徙請仍撥項購料隨時修防奏入報聞十二月奏言熱河應買明歲兵米時價稍昂請撥八溝米運熱河備用俟來年價平買補完倉從之三十六年八月奏言蒙古游牧地方向禁民墾而克什克騰旗

隙地無礙游牧蒙古兼可租牧養贍請照土默特佃種收租例除害游牧不准私墾餘聽自便廷議允行十月授刑部尙書十一月恭遇孝聖憲皇后八旬萬壽廷璋與九老之列奉旨賜入香山宴十二月卒三十七年正月諭曰楊廷璋久任封疆老成歷練前因年逾八旬畿輔事務殷繁恐未能鉅細周到是以用爲刑部尙書見其精力尙未頽邁於部務自可從容經理乃於去冬偶感風疾遽聞溘逝深堪軫惜著加恩晉贈太子太保應得卹典察例具奏尋賜祭葬如例諡勤愨

永貴

永貴滿洲正白旗人姓拜都父布蘭泰官古北口提督世襲雲騎尉永貴於雍正十三年由筆帖式授戶部主事乾隆四年遷本部員外郎十年遷郎中十一年三月授湖南辰沅永靖道十二年三月擢雲南布政使十二月調浙江布政使十四年七月署浙江巡撫十五年十二月疏言行銷浙鹽之温州台州寧波等府及江南所屬松江府向以地近場竈私梟滋事經督臣李衛奏明發帑交地方文武官收買場竈餘鹽名爲帑鹽嗣因武官領辦較多有浙江提標松江提標黃巖鎮樂清協平陽協寧海營等武職衙門經辦鹽務責以巡緝稽查由是商別疏銷從前

立法未周致有奉行不善今條列八事一向來武職請領帑本徑赴道庫支領差弁給竈收鹽文武不相統屬不能隨時稽察恐啓侵挪扣剋之弊嗣後除地方並無文職及不領帑本各營無庸置議外其温州台州所屬之黃巖鎮樂清協寧海營均會同該縣具批由道詳准給領寄貯縣庫給竈時營員會同鹽大使移縣支領覈實給發仍令各縣場將收發銀數報鹽政各衙門其帑商課程鹽本外輸等項亦令會同徵收起解支發一各營赴竈收鹽均令會同鹽大使遵照官秤收發仍按冊報鹽政各衙門以杜私售浮收之弊一收發鹽銀各營俱係副參承辦仍歸巡撫節制惟黃巖鎮係鎮臣經理應改委該鎮中軍辦理責成鎮臣督察其各處司廩巡緝收鹽之弁俱令詳巡撫給發委牌一辦帑鹽銀應於歲底令各員會同盤查其黃巖縣帑鹽係黃巖鎮中營協辦寧海縣長亭場帑鹽係寧海營協辦均令台州府會同黃巖鎮盤查樂清縣長林場帑鹽係樂清協協辦令温州府會同温州鎮盤查其浙江江南提標中營所辦責成兩處提督率同寧波松江二府盤查其温州台州二府令溫處道寧紹道盤查崇明場令太倉州盤查仁和場令杭州府盤查青村下砂袁浦三場令松江府盤查但有挪移虧缺將會辦盤查文

武各官分別參處著賠一各商請領鹽引每商以四百引爲率務令全納課程方准領運完足前帑再領後鹽其給發竈價非實在無力窮戶不得預行借給一黃巖鎮收發鹽斤照浙江提標例令該鎮委定弁目專司經理廣爲銷售所賣引鹽餘利量給飯食公費外餘歸帑鹽盈餘項下報撥充餉其欺隱侵蝕者照侵盜錢糧例罪之一武職辦鹽地方有失察私鹽案副參等照兼轄官議處委辦備弁照專汛官議處其實力緝獲私鹽者按所獲分別議敘一各府協營所收經費見令據實開報其巡鹽兵役虛糜廩祿者逐一裁汰分別應留應革奏定章程有浮收侵扣者嚴參究處下部議行十六年閏五月實授浙江巡撫先是上年浙省溫台等屬偏災命照例蠲賑永貴奏以知府金洪銓專辦賑務嗣因洪銓辦理不善永貴奏請勒令休致總督喀爾吉善復奏洪銓玩視民瘼應革職留浙江效力贖罪御史范廷楷亦以永貴徇庇洪銓劾奏諭曰金洪銓玩賑誤公非尋常闖茸之員可比該撫僅請休致實屬瞻徇是以朕見喀爾吉善之奏即將該知府革職留省效力而傳諭切責永貴者不啻至再至三矣且永貴辦理未妥之處不獨金洪銓一事其籌畫災賑諸務種種張皇竭蹶第以封疆重任一時難得其人且浙省見

多被災之處驟易新任反於辦理賑恤之事無益若循例議以降罰使該撫與該督各存意見轉無補於救災濟民是以姑從寬貸惟於其果能實力妥協辦賑與否以定永貴之去留耳是年浙東各郡旱永貴先後奏入疊奉恩諭暫弛海禁以通商販截留本省及江蘇漕糧八十萬石又借撥江蘇湖廣福建江西米五十五萬石以資賑糶並令江浙二省就近報捐俊秀收納本色折色以補倉儲十二月諭曰浙省今年春旱成災本重巡撫永貴竟至張皇失措茫無定見於附近之江南江西福建湖廣山東等省既已四出告糶不已甚至欲委員遠赴奉天採買米糧且稱賑糶所需必得三百萬石之數方足以資接濟從來辦理賑務斷無因一省被災遂欲竭數省之力以供其用者故朕降旨訓飭乃聞永貴在浙竟至有心諱飾將來於賑糶諸務必欲多得擢節則是該撫從前並非爲民總屬爲己其意不過欲多得米石遂可有恃無恐縱事不竟行亦得藉以謝災黎且以杜朕責防人彈封疆大臣豈宜如此存心耶然朕猶以爲百姓起見不妨姑留之以觀後效今乃一變而有諱災之意是其辦賑不妥矣朕子惠元元痾瘵在抱一切政務寬嚴時酌其中至於賑恤災黎每不惜加恩格外則十六年如一日此天下臣民所

共知者若以永貴一人辦理不善竟至災民失所非朕勤求民瘼本懷且使各省督撫聞風效尤漸啟諱災之習所關於民生休戚者甚鉅實難再爲寬容永貴著革職來京候旨十七年正月發往北路軍營效力贖罪四月命辦理糧餉二十年十一月上以其辦理奮勉賞按察使銜署臨洮道仍命往巴里坤辦糧餉事務二十一年五月賞副都統銜兼參贊大臣九月命籌辦西路臺站是年冬厄魯特宰桑達什策凌等煽亂定邊右副將軍兆惠駐伊犁由濟爾哈朗赴特納格爾沿途剿賊二十二年二月永貴抵巴里坤具以軍中狀聞諭嘉官兵同心奮勉賞永貴三等輕車都尉世職尋賜玉韞荷囊鼻煙壺三月偕兆惠等由額林沁畢爾罕路進剿五月領兵追賊扎那噶爾布尼瑪至孟克圖嶺未獲上訓飭之十月協辦軍務命署西安巡撫未至任詔往魯克察克辦理屯田事務二十三年三月以侍郎銜留軍營辦事是月奏派兵三千六百在烏魯木齊關展託克三哈喇沙爾等處墾種可收三萬六百石諭勸其親往察勘董勸並較量收成分數酌籌來歲增兵墾種事宜旋奏託克三增兵四百哈喇沙爾增兵二千又奏昌吉羅克倫各增兵千五百墾種從之八月授刑部侍郎十月奏關展等處收穫較上年多六千餘石

除備續墾各處籽種外餘穀三萬五千八百餘石足敷官兵口糧七百有奇仍俟次年早收小麥青稞接濟諭令悉心經畫時兆惠兵抵葉爾羌需用馬匹詔永貴巡查臺站前至阿克蘇卽留駐辦理運送馬糧事務二十四年六月命回京九月行至庫車適布政使德舒解送回人爲厄魯特瑪哈沁所戕永貴奏調率阿克蘇兵搜捕諭令與護軍統領努三協殲逆黨十月回部全平命來京二十五年六月調倉場侍郎十月疏言每歲漕艘抵通必於石壩另換剝船由五閘轉運進京自大通橋下至通州通水關計四十餘里從未大加挑浚河身愈高隄岸愈卑雨大則衝隄潰岸雨少則淺阻膠舟漕運因之遲滯雖每年歲修終無實濟不如爲一勞永逸計大挑一次嗣後歲修可省過半詔如議速行十二月授左都御史二十六年正月命往克什噶爾辦事六月奏回部三十一城阿奇木伯克請分別鑄給印信又奏擇伯克子弟及回人可造就者賞戴金頂學習辦事俱從之十一月授禮部尙書二十七年授鑲紅旗漢軍都統二十八年二月疏言回部地畝取漑溝渠有赫色勒託庸庫森提斯袞等河惟赫色勒布伊提斯袞汗阿里克王處分引圖巴里克河之水尙不足用請自赫色勒河東南浚渠四十餘里引水入赫色勒

布伊以資灌溉又查託庸河水湍急衝刷地畝派伯克等添建土石隄壩並鑿山石以弱水勢報聞五月奏遣託木齊圖等向霍罕額爾德尼索所占阿濟北鄂斯等處地額爾德尼遵約歸還上嘉其辦理妥協下部議敘加一級八月還京二十九年六月充經筵講官三十年二月烏什回人滋事命往哈什哈爾辦事八月烏什平命駐劄烏什辦事三十三年十月署伊犁將軍十二月調吏部尙書三十四年十月調禮部尙書先是厄魯特有放馬兵盜哈薩克馬轉誣哈薩克一案辦事大臣巴爾品爲人蒙蔽任意審斷至是奏請治罪上以永貴旣查出此案情節不卽奏參根究飾詞卸罪殊屬取巧交部嚴議降三級調用三十五年四月理藩院尙書增海奏涼莊滿洲兵丁應賠損傷馬匹銀兩永貴誤將熱河官兵俸餉坐扣詔責仍交部嚴加察議五月諭曰永貴自署理伊犁將軍以來未能實心任事所辦哈薩克馬匹一案伊明知巴爾品被人蒙蔽乃隱忍不奏經朕降旨詢問始行奏聞又涼州莊浪兵丁應賠倒馬銀兩將並無干涉之熱河官兵俸餉一併扣存亦未據聲明具奏是以令伊來京自應卽予革職但永貴平日尙屬謹慎不至竟當廢棄著加恩補授左都御史革職留任效力贖罪不准戴用翎頂閏五月授鑲

黃旗漢軍都統八月授禮部尙書革職留任准用頂帶不戴花翎十月署鑲黃旗蒙古都統十一月充經筵講官三十六年五月充國史館副總裁三十八年正月署戶部尙書四月署兵部尙書七月仍署戶部十月命紫禁城騎馬四十一年正月兼署吏部事二月回禮部辦事仍署吏部四月上巡山東旋蹕在京王大臣迎駕未候召見而退敕交宗人府都察院議處議上上以宗人府議處王公等俱罰俸二年而都察院於程景伊永貴僅議降二級留任實屬徇情改程景伊永貴革職留任仍議處都察院堂官十二月充玉牒館副總裁四十二年四月恭逢孝聖憲皇后山陵禮成命永貴暫署大學士敬襄點主大典署理禮部尙書五月補吏部尙書七月命在阿哥總譜達處行走賞戴花翎九月管理禮部事務四十三年二月禮部奏儀制司員外員缺主事內別無合例擬陪之員請以李淑芳提補引見諭曰李淑芳在給事中任內當山東逆賊王倫倡亂之初卽奏稱係饑民聚處滋事朕以所言如果有據則地方官之諱災釀亂罪難輕道因諭大學士舒赫德於剿捕賊匪時留心體訪嗣後舒赫德覆奏細查壽張等縣收成俱八九分且逆賊初時搶掠各鄉米豆糧食所在多有是饑民釀變之說實係荒唐及賊黨要犯

就獲解京命軍機大臣會同九卿科道在刑部公鞫各犯並無供有因災起事者朕集衆親鞫復令李漱芳自向各犯詢問亦無以是對者是李漱芳前奏之妄衆皆曉然伊又曾奏直隸亦有饑民地方官在盧溝橋堵截不令他往而給事中范宜賓尋襲其說入告因派侍郎高樸袁守侗帶同李漱芳范宜賓前往良鄉及黃村東壩各處並未見成羣乞食流民皆李漱芳所目擊實無人爲之隱飾也是李漱芳肆行妄言悉屬毫無風影而造作無稽轉欲爲賊捏詞卸過更不知其是何肺腸卽治以袒惡惑衆之罪亦所應得但朕從不肯因言民隱事加罪科道然李漱芳心術如此豈宜復居言路爲世道人心之害范宜賓已革職發往新疆效力而李漱芳從寬以主事改用已屬格外加恩且其時曾經明降諭旨中外共知永貴豈轉未聞之李漱芳見爲主事已邀寬典正宜令勉效力以贖前愆豈宜曲爲寬徇復爲升用昨永貴等奏將李漱芳充會試副提調朕以不過禮部應辦之事遂行點派孰意永貴等竟以此試朕見朕前日允其所請今卽請將李漱芳升補員外郎並云無合例擬陪之員冀李漱芳之必得是永貴全不思李漱芳前此之罪由自取一味心存迴護必欲令其遷官員外之不已勢必復以郎中保題耶

中之不已勢必復行保送御史此乃明季惡習乃永貴竟敢以此等伎倆巧爲嘗試其視朕爲何如主乎朕披閱禮部奏摺以其事必係永貴主意及召見侍郎阿肅不待詢而伊卽稱爲永貴所誤朕因永貴歷任年久是以用爲尙書乃伊見朕屢沛渥恩漸無忌憚竟以沽名取悅爲事其居心尙可問乎永貴深負朕恩著將所有職任悉行革退並拔去花翎加恩賞給三品頂帶自備資斧前往烏什辦事永貴至烏什後若不痛改前非實心任事必將伊在彼正法以示炯戒三月詔永貴所有輕車都尉仍留於本身九月奏請烏什地方照阿克蘇例設立義倉從之先是葉爾羌辦事侍郎高樸勒買回衆金珠寶石不發價值並私採玉石爲阿奇木伯克色提巴勒底所控詳見高樸傳永貴赴葉爾羌質訊屬實疏入諭曰高樸貪婪無忌罔顧法紀實出情理之外已另降諭旨將高樸革職嚴審卽於該處正法矣吏部尙書員缺仍著永貴補授朕於臣工功罪一秉大公至正如高樸貪黷負恩若此較伊父尤甚不能念係慧賢皇貴妃之姪高斌之孫稍爲矜宥也永貴原因市恩李淑芳身獲重譴之人今辦理此事公正可嘉因復加恩擢用此諸臣所共知共見禍福惟視其人之自取朕不稍存成見於其間十月賞戴花翎十二

月授參贊大臣四十四年正月回京二月授鑲藍旗滿洲都統九月命紫禁城騎馬十月充經筵講官四十五年三月協辦大學士五月調鑲藍旗漢軍都統四十八年五月卒諭曰協辦大學士吏部尙書永貴老成端謹練達精誠敷歷中外勤勞懋著雖近覺精神稍衰尙能照舊辦事遽聞溘逝深爲軫惜著派散秩大臣帶同侍衛十員前往奠醊其任內降革罰俸處分准予開復尋賜祭葬如例諡文勤子伊江阿襲職見任山東巡撫

三寶

三寶正紅旗滿洲人姓伊爾根覺羅乾隆四年繙繹進士授中書五年襲世管佐領九年遷內閣侍讀十三年隨尙書舒赫德往金川辦理臺務軍功加一級十六年授湖北驛鹽道二十一年來京授戶部郎中二十三年派往北路軍營經理達什達瓦游牧二十四年五月授直隸布政使疏言州縣承修工程事竣報銷奉部覈減國帑攸關皆例應追繳之項知府直隸州爲親臨上司例有督催之責請嗣後州縣等官名下有應追覈減銀兩該管府州不卽嚴催完解者於揭參州縣遲延之日卽將督催不力之府州職名一併開送照督催交代不力議處其順天府

四路同知所轄州縣與知府同亦應責成照例議處至各州縣如升遷降調事故離任令接任官查明其任內並無未完覈減各項出具印結入於交代案內儻不行出結將接任官照不行詳查例議處部議准行二十六年七月上巡幸熱河因橋道船夫俱未修整齊備部議降調命以道員職銜往哈密辦事二十八年十二月回京二十九年六月授四川布政使七月調湖北三十一年調湖南三十二年派查雲南一切緊要軍務三十五年七月調貴州布政使三十六年擢山西巡撫三十七年九月疏言西安將軍富僧阿奏西安兵移駐巴里坤事宜移會各省查山西巡撫向有親丁步糧四十分經前撫臣諾岷奏請在太原駐防滿洲蒙古餘丁內挑取四十名給與支食以資生計又經前撫臣阿里衮以太原駐防餘丁支食親丁名糧係作爲養育兵丁體制實爲未協應照部咨將駐防餘丁原支山西巡撫親丁隨糧四十分裁汰可否仰懇聖恩俯念太原駐防生齒繁盛增設養育錢糧俾其餘丁得資養贍第查晉省右衛養育兵每名月支銀一兩五錢米一石二斗五升今裁隨糧增養育若卽援數議設未免太優查西安駐防養育錢糧每名月支餉銀一兩粟米三斗請仍按原額四十分之數增設養育兵四十名每名

卽照向辦月支銀米例遇折色之月給銀三錢錢糧不致加增而旗人均沐聖主
養育之恩於無既矣照所請行三十八年正月調浙江巡撫七月疏言杭州府屬
之海寧縣所轄民戶四十萬餘額徵地丁銀六萬五千有奇歲完漕南米六萬三
千零兼有修防塘工事件實屬繁疲難兼三要缺湖州府屬之安吉州所轄民戶
止八萬四千餘額徵地丁銀一萬六千餘兩歲完南漕等米亦止六千餘石實屬
簡僻中缺請將海寧縣升爲州安吉州降爲縣又查海寧州城西北三十里之長
安鎮商貨畢集兼爲嚴緝私鹽竊匪要地離州稍遠必得專員彈壓請將該州州
判移駐部議從之四十二年五月擢湖廣總督十月諭曰三寶升總督已在本年
恩詔之後應照巡撫職銜請封念其平日辦事尙屬認真著加恩給總督封典四
十三年十二月疏言查閱營伍情形衡州協副將海福年非強壯不能振作但出
師金川著有勞績若以旗員補用尙能勝任請給咨送部引見又沅州協副將洪
昌運年力漸衰請勒令休致諭曰海福洪昌運同係副將俱年力衰頹自應一併
勒令休致今三寶以海福身係滿洲請以旗員補用於洪昌運則竟請勒休顯係
偏護旗員有心軒輊非所以示公允況海福在金川出兵如果勞績懋著自必得

受世職該旗必照例辦理非查覈軍政之督撫所應議及者也且三寶以滿洲身任總督於闔屬滿漢官弁均宜一視方足以飭營伍而昭勸懲乃於滿漢副將一例兩辦其何以使衆心帖服耶三寶著傳旨嚴行申飭四十四年正月授東閣大學士兼禮部尙書仍管湖廣總督事三月奏湖北安陸府城外舊有富民河一道年久淤塞經署湖北布政使福川奏請借項興挑臣覆查此河備旱潦通舟楫商民兩便見當微旱後貧民得備餬口自當遵旨妥爲辦理疏入報可是月調閩浙總督四十五年五月疏言浙江海塘老鹽倉一帶柴塘四千二百餘丈蒙聖主親臨閱視諭令改築石塘實爲萬年經久之計臣親往覆勘此時正遇大汛見在柴塘足資抵禦沿塘各工俱屬穩固惟潮神廟前大盤頭西藏字號起柴塘朽腐將盡潮水臨塘殊關緊要見在石塘採料興建尙須時日應將此處趕緊鑲修築塘百丈至柴塘四千二百餘丈改建石工自應籌度萬全見今柴塘旣臨大汛未便更動而退後多係田廬臣與司道等面加籌酌似應緊靠柴塘內下椿築砌石工以柴塘爲外護捍衛更爲得力民居亦屬相安俟秋汛後擇吉興工又諭旨指示應修海寧城之石塘內有工二十九丈地勢較高兩旁魚鱗舊塘原十六層其城

東八里文字號至陳文港密字號百五十餘丈地勢稍低兩旁魚鱗舊塘原十八層今應各照舊層數以期一律鞏固諭曰前因浙江海塘改建石工恐該處民或視柴塘爲可廢任意拆毀竊用致損城郭田廬曾明降諭旨令該督撫嚴飭地方文武各官將見在柴塘照前加意防護以爲重關保障將來石工告竣之時亦可留爲外衛此旨尙未據三寶奏到茲據三寶摺內乃稱與司道等面加籌酌緊靠柴塘之內下椿築砌石工既以柴塘爲外衛則捍衛更爲得力等語三寶此摺與朕降諭旨相符其是否曾經接奉前旨著據實覆奏三寶尋奏前因石塘工鉅曾飭該管廳備悉心籌畫先據稟請從柴塘退後數丈建築石工須拆去民房八百餘間殊非仰體聖恩保護田廬至意臣逐一履勘似應於緊靠柴塘內築砌石工嗣於五月間恭讀諭旨杭州老鹽倉一帶改築石塘仍留柴塘以資保障臣當卽欽遵飭地方文武將柴塘加意保固報聞六月命來京入閣辦事八月兼正藍旗滿洲都統十月充經筵講官四十六年正月因王直望在浙江巡撫任內聲名狼籍未行奏參議革職得旨從寬留任四十七年四月繕寫清字零壇祝版模糊部議革任詔寬免十一月在上書房總師傅上行走四十八年調鑲藍旗漢軍都

統四十九年五月隨駕熱河以疾歸六月卒諡曰大學士三寶歷任督撫宣力有年簡擢綸扉謹慎供職方資倚任此次扈從熱河因其邁疾卽遣太醫診視并令回京調養茲聞溘逝殊爲軫惜其任內降革處分均予開復所有應得卹典著該部查例具奏尋賜祭葬如例諡文敬

莊有恭

莊有恭廣東番禺人乾隆四年一甲一名進士授修撰命在尙書房行走五年充日講起居注官累遷侍講學士九年遷光祿寺卿尋丁父憂十一年特擢內閣學士十三年提督江蘇學政十五年正月授戶部侍郎尋充江南鄉試正考官八月仍提督江蘇學政十六年授江蘇巡撫十七年二月疏言泲墅關向委佐雜四員協查但未定更代之期盤踞日久弊竇叢生且啟劣員戀關曠職之端嗣後請半年一代著爲定例得旨允行十月暫署兩江總督十一月疏言太倉鎮洋沿海田廬全賴海隄保障雍正十年前撫臣高其倬議自寶山湖口港歷鎮洋太倉常熟至昭文之福山港築土塘三萬四千七百餘丈時因經費不充僅於湖口港至劉河南岸沿邊頂衝處建土石塘工餘至今未辦今歲七月東北風潮劉河以南賴

塘隄得無恙以北頗至損傷築隄捍田斷難再緩現據士民自請挑築但民力一時難集若陸續興修又恐工程及半遇伏秋大汛不能捍禦仍棄前功應接築土塘九千四百七十餘丈請酌借庫銀一萬六千兩給紳士自募夫役春融動工官爲鼓舞勸懲務令汛前告竣所借銀按畝扣輸不過升米之值二年即可完款詔如所請初有恭爲江蘇學政時浙江人丁文彬者偵有恭出獻所著文武記太公望傳等逆書有恭以爲病狂不究至是文彬復挾其書至山東呈衍聖公孔昭煥昭煥告巡撫楊應琚以聞有恭自請治罪上以有恭故縱逆罪罰學政養廉十倍十九年御史楊開鼎條奏江南收漕之弊敕有恭覆奏有恭疏言江南收漕向爲積弊淵藪而蘇州松江常州鎮江太倉爲尤甚雍正中前撫臣尹繼善竭力剔除漕政爲之一清年久法弛故智漸萌臣到任後同督臣鄂容安酌定條例勒石漕倉遇收期飭糧道及各道府不時周巡臣與督臣仍委員弁微服查訪胥吏稍犯立拏嚴究至楊開鼎所稱需索不遂借詞米不如式勒令曬晾篩颺臣按此弊官民皆可藉口而偏信反得售奸蓋漕糧上供天庾自應乾圓潔淨倘不如式非特盤驗不符糧道運官俱干參處卽朦混交納而不堪久貯必致貽誤倉儲糧戶良

頑不等往往以青腰白臍潮嫩雜碎之米強交令換卽造作浮言挾制自應分別
察究又不得但責官吏取悅刁民也上獎其所言公正二十一年丁母憂特命給
百日假回籍治喪於伏汛前至准署江南河道總督事有恭奏泰興縣捐職州同
朱昉主使斃命按律應絞昉呈請贖罪臣業經批准尙未結案諭曰莊有恭此奏
觀之實爲駭然豈有入人死罪並未奏聞擅自飭司准其收贖至離任後始含糊
具奏之理現命尹繼善等據實查辦其有無染指雖尙未定然觀其專擅妄謬如
此大失人臣敬事之道已令其家居待罪尋尹繼善及新任巡撫愛必達奏朱昉
贖罪一案有恭不遵成例遽行批准專擅之罪百喙難辭又有恭監試秋闈察出
張穀孫等賄謀聯號擅批議罰又嚴凝裕鬪蟋蟀事有恭亦批罰贖俱未奏其所
罰銀分貯江寧吳縣泰興等庫命革有恭職解京治罪二十二年四月大學士九
卿擬有恭罪應絞諭曰莊有恭簡任巡撫辦理地方案件自有憲典可遵乃惟以
重罰爲事自朱昉一案而外如張穀孫之聯號嚴凝裕之鬪蟋蟀不一而足其意
以爲行之旣熟將來自可操縱由己莊有恭自應案律治罪然此案則實無贓私
入己情弊著從寬免死發往軍臺效力伊現有母喪仍加恩准其回籍料理事畢

前往軍臺不准捐贖六月命戴罪署理湖北巡撫二十四年調浙江巡撫二十五年二月劾署杭州將軍伊領阿副都統劉揚達違例咨取轎役工食經臣駁回伊領阿等仍自乘用命革伊領阿劉揚達職有恭交部議敍紀錄一次三月疏言海寧塘工宜乘此浮沙刷盡分別修築又紹興之南塘嘉興之台塘並關緊要臣於二月初赴山陰勘宋家樓工係三江曹娥二水交會之所又適當潮汐衝刷爲南塘首險前於二十一年改建石塘四百丈現俱鞏固隨由山陰至蕭山之龔長等山越南大疊至海寧之中小疊登文堂葛畧諸山按海寧南門外西過戴家石橋工長二千一百六十丈東至陳文港工長二千九百八十丈雖石塊參差殘缺然根址堅實若一律拆建無論費帑不貲轉恐不如舊工之固無庸一概興修其必需修築者千六百餘丈現在分別加工自陳文港東至尖山下有韓家池柴塘四百一十丈亦應一律拆修勘畢後臣卽循海而北由海鹽至平湖遍歷乍塘按海鹽東臨大海南有台駐北有乍浦諸山山趾角張縣城以一面當潮汐衝城外石塘最爲險要上年八月風潮稍大塘工間有衝塌臣已指示隨時修補至海寧應修建千六百餘丈亦分緩急臣就其殘缺過甚者七百七十餘丈作爲要工其餘

察看潮形以次接辦諭如議行六月疏言自西塘至胡家兜至海寧南門外三四月間潮退沙漲計長十八里臣前請辦戴家石橋要工四百六十餘丈既有新漲沙形爲之外護應先就迤東工段僱辦再審量沙勢分別緩急庶帑不虛糜工歸實用奏入上曰此佳兆也應致祭海神以昭靈貺九月疏言陳文港緩修塘工十丈照魚鱗作法逐層整砌圓通菴前緩修塘十丈仍照緩修作法如式堅築廿里亭西緩修塘二十五丈修整坦面加用排樁令緊貼塘身報聞二十六年十一月疏請浙江鼓鑄照福建例配用白鉛得旨嘉獎十二月奏言海寧西塘老鹽倉一帶經霉伏兩汛老沙汕刷亟宜先事預防先後拆鑲二百丈自霜降後臣往來察勘見柴石兩塘交接之區水已臨塘自此迤西老沙仍多坍塌請將接連前工之七十丈上緊鑲辦報聞二十七年春上南巡賜以詩曰己未親爲策士文精掄蕊榜得超羣起行不負坐言學率屬偏能先已勤鶴市舊聲猶眷眷龍山新政更慙慙海塘正是投艱處磐石維安勉奏勳九月有恭疏報海寧塘工竣諭曰浙江海寧塘工最爲緊要今春巡幸抵杭之次日卽赴老鹽倉尖山等處相度指示飭令修築柴塘益建設竹篋坦水各工用資保護今據莊有恭奏查勘工程俱已陸續

完竣餘工並皆穩固該督撫率各員僉辦歲事甚屬盡心深可嘉予莊有恭著交部議敘尋議加一級十月調江蘇巡撫諭曰浙江海塘工程莊有恭籌辦甚屬盡心且現有查辦災賑事務亦爲緊要其日行事件照常交護撫索琳接辦塘工賑務仍聽莊有恭專司其事蘇杭一水之地案牘往還本可無虞稽誤至熊學鵬抵浙賑務自能妥辦若海塘工程自不如莊有恭之輕車熟路鄰封伊邇兩撫應始終會辦莊有恭斷不因已經調任稍分畛域十二月特免有恭學政任內應罰未完銀六萬餘兩二十九年九月擢刑部尙書暫留巡撫任十二月疏言松婁二江宣洩太湖爲東南水利第一雍正五年大挑後今三十餘年江身淺窄日甚又一切濱湖港道茭蘆充塞淤占成田若不及早疏治一遇積雨數郡平田可慮臣按上自太湖入運口下至松婁水口應分別開寬疏濬崑山新陽之外壕張家橋青浦之黃渡鎮應開月河以資分洩詔可三十年正月協辦大學士仍暫留巡撫任上南巡賜以詩曰重教任蘇撫近復擢秋卿豈不輕車藉要資法網平蹕塗暫留扈翰幄自歸并德政吳松在何曾讓畢亭八月有恭劾蘇州府同知段成功縱役詐擾累民革職未及擬有恭召還十二月兩江總督高晉奏段成功因瘧不能檢

點案牘致家人婪贓成功實未與知上嚴飭之令巡撫明德據實查奏嗣明德奏段成功家人出票滋擾成功不惟知情且圖染指知府孔傳炯按察使朱奎揚明知成功假病瞻徇未究命革朱奎揚孔傳炯職解部治罪三十一年正月高晉奏莊有恭原參卽有段成功抱病朦混語諭曰莊有恭旣訪知段成功有出票婪索之事具題參劾豈有復信其捏病被朦之理伊彼時若仍任江蘇巡撫決不肯如此姑息了事亦不肯爲此隱躍兩可之語其意不過以五日京兆離任在卽何必結怨故留此罅隙卽使他日審出實情伊可居救之不得之名如得以捏病一節藉端開脫卽可解怨市恩此等卑瑣居心行事尙得爲純臣乎因令內閣檢取原本閱對則有本官抱病家人朦官舞弊之語並詢問莊有恭據稱該司府等審究段成功家人等僉供段成功時適患病係伊等朦蔽所爲隨據揭敘稿題參未能卽將段成功斷非患病之處明白指駁實屬錯謬此語更屬取巧莊有恭若果知其實係患病則又何必嚴參其所以嚴參者蓋恐後任參出朕將問及故不得不參而爲之隱躍其詞耳莊有恭受朕深恩特加擢用乃敢爲此巧於市恩之術此非前任受尹繼善局弄之過是有心欺朕矣莊有恭著嚴加議處部議革任命革

去協辦大學士嗣欽差侍郎四達得有恭授意朱奎揚孔傳炯有意從寬狀疏聞諭曰此事實出情理之外深可駭異矣朕初意莊有恭因離任在卽巧於解怨市恩尙外省所素有之惡習耳是以前部議革任時僅將其協辦大學士革去今閱此奏則此案之上下相蒙實由莊有恭授意指使以致知府臬司扶同狡混其居心欺詐若是實非意料所及莊有恭從前疊獲重罪皆經棄瑕錄用復加恩陞授尙書協辦大學士朕之施恩於莊有恭者有加無已苟稍有天良自應實心圖報乃敢於參審重案授意屬員巧爲欺蔽深負朕恩此皆朕之不能以德感人以明識人深用爲愧若再姑息使過將來何以董正天下督撫哉莊有恭著革職拏問交軍機大臣會同刑部嚴審定擬其前在學政任內應罰未完銀兩曾經加恩寬免莊有恭如此喪心負恩仍著追繳尋諭曰向來各省督撫辦理案件瞻徇欺朦上下通同舞弊習氣最爲惡劣前湖北盜犯張洪順一案經朕澈底查辦嚴加懲治以爲各省督撫自應滌慮洗心奉法惟謹乃未及三年不意又有罔上行私毫無顧忌如莊有恭之甚者可見各省督撫之錮習相仍牢不可破段成功詐擾累民贓蹟已著莊有恭身任巡撫不思秉公參究轉授意臬司知府令其委罪家人

書役巧爲開脫以遂其解怨市恩之計居心欺詐翫法負恩莫此爲甚若不痛加懲創其何以飭吏治而正人心今將伊革職拏交刑部令軍機大臣會同審擬外間無識之徒未必不以此案較之湖北案情爲輕而處之則同不知張洪順祇係細民犯盜愛必達等並非有意袒徇乃因回護已過遂將後案延擱究未敢公然授意屬官乃屬官承其意旨相與顛預了事耳若段成功身爲職官索詐部民情節可惡莊有恭惟知官官相護罔知法紀於查參段成功時輒先授意臬司知府令其從寬開脫遂爾隱躍其詞以患病被朦參劾若非朕留心詳閱洞燭其奸則貪黷擾民之段成功幾至倖逃法網是此案之挾私舞弊實倡於莊有恭其罪更浮於愛必達矣且愛必達已經發遣伊犁並不稍爲寬貸今朱奎揚孔傳炯供詞俱在案情歷歷如繪稍有知識者閱之尙能爲莊有恭置一詞乎昨四達等奏到卽令軍機大臣將朱奎揚等親供交莊有恭閱看伊惟俯首認罪並不置辯其意不屑與屬吏對簿自爲得體不知實小人之尤豈有如此重案聽其含糊認罪而遂可成信讞之理因命軍機大臣等復行傳旨訊問則又供朱奎揚等承審月餘延捱觀望直至莊有恭自行訪有款單札司轉府拘審伊等始將家人書役索詐

得贓各情弊具揭又不將段成功自己標判廳卷回明送看等語所供情節亦係一面之詞難於憑信卽日朱奎揚等拏解到京自可得其底裏設稍有支吾掩飾亦何難加以嚴訊使之水落石出耶外省吏治做壞皆由督撫不能正己率屬上下和同聯爲一氣以行其朦蔽欺詐之伎倆各省皆所不免而江南爲尤甚在伊等相習成風恬不爲怪不思此等鬼蜮形跡難逃朕之洞鑒一經敗露惟有力加整頓執法不撓務在廓除積習俾吏治肅清該督撫等各宜猛省自愛毋得以身試法將此通諭各直省督撫知之二月大學士傅恆等擬有恭罪應斬諭曰據審莊有恭及朱奎揚孔傳炯等供核其情節莊有恭並非袒護段成功而於保舉段成功之和其衷則曲意爲之瞻徇蓋和其衷爲新任巡撫明德弟兄恐事發累及舉主有礙顏面遂爾心存瞻顧上司屬員意會色授各相喻於不言因置段成功受賄情事不復深加結怨妄冀含糊結案外省上下和同官官相護積習最爲惡劣若不急爲整飭將漸啟黨援門戶之弊於世道人心深有關係莊有恭身爲巡撫屬員視其趨向自應依律問斬著監候秋後處決八月命赦有恭罪補授福建巡撫二十二年七月卒諭曰莊有恭已經病故所有伊江蘇學政任內未完銀六

萬餘兩著加恩寬免

達勒黨阿

達勒黨阿滿洲鑲黃旗人父阿靈阿任領侍衛內大臣理藩院尙書有傳乾隆二年達勒黨阿由三等侍衛襲其祖果毅公遏必隆所遺一等子爵五年授鑲黃旗蒙古副都統六年調熱河副都統命御前行走九年擢奉天將軍十年督辦錦州隄工尋奏請每年春季統兵副都統赴旅順操演水師屆三年奉天將軍查驗一次部議如所請十三年四月授刑部尙書兼鑲藍旗滿洲都統尋遷吏部尙書十月以從弟訥親金川軍營獲罪請往效力命隨經略大學士傅恆赴軍營授參贊大臣十四年凱旋敘功加太子少保十九年八月授黑龍江將軍九月從弟果毅公策楞北路軍營獲罪革爵以達勒黨阿襲二十年正月命率索倫巴爾呼兵速赴北路軍營隨大軍剿準噶爾授參贊大臣在哨探兵隊前進五月大軍定伊犁上獎達勒黨阿奮勅令回京協辦大學士九月命仍赴北路軍營授定邊左副將軍偕參贊大臣哈達哈剿叛賊阿睦爾撒納十月命率兵一千赴西路軍營掌定邊右副將軍印尋諭曰據達勒黨阿等奏稱聞西路大兵於明歲草萌時再行進

發此奏甚屬錯謬昨命達勒黨阿領兵前往西路哈達哈留駐北路達勒黨阿至西路時一切會同商酌速奏膚功方合機宜現在冬令進兵較難人人所知然愈遲緩則賊愈固辦理更費周章所謂兵貴神速者此也將軍大臣等倘因難退縮何以鼓士氣而振戎行達勒黨阿等所奏朕因北路已停進兵是以不行深究若伊西路時亦出此言必至搖撼軍心所關匪細決不姑貸十一月改參贊大臣二十一年正月以索倫兵八百赴珠爾都斯迎定邊右副將軍薩喇爾命駐特納格爾辦事二月奏言薩喇爾已抵吐魯番臣與台吉噶爾藏多爾濟等即赴西爾哈阿濟爾罕約會進剿詔獎經理合宜尋以兵千赴安集哈雅偵緝阿巴噶斯賊衆四月阿睦爾撒納竄哈薩克諭曰將軍策楞等擒拏阿睦爾撒納事事舛謬全無籌畫今西路專任達勒黨阿北路專任哈達哈伊二人尙屬勇往著卽領兵前赴哈薩克務期擒獻五月授定邊右副將軍時策楞借口糧乏駐登努勒臺且令達勒黨阿撤兵還駐達勒黨阿以兵已前進糧又充裕不聽事聞奉旨嘉獎革策楞職卽以達勒黨阿爲定西將軍並諭詳察形勢併力擒剿八月達勒黨阿統大軍至雅爾拉偵哈薩克二千餘賊伏山谷中誘之出奮勇督擊斬五百七十餘級生

擒十一人復追至努喇鑿戰斬三百四十餘級生擒十人阿睦爾撒納易服遁九月捷聞賜雙眼花翎哈達哈尋亦奏捷奉旨嘉獎是時達勒黨阿等縱被擒之楚魯克昭華什還諭其汗阿布賚縛獻阿睦爾撒納而楚魯克等詭爲阿睦爾撒納乞命請寬限達勒黨阿信之按兵待阿睦爾撒納得脫走閏九月諭曰阿睦爾撒納背叛策楞玉寶帶兵追緝坐失事機經朕飭催西北兩路之兵始克稍振軍聲哈薩克汗阿布賚等望風奔潰阿睦爾撒納易服潛逃然所獲之楚魯克等兩次縱回傳諭擒獻卒以限期相誑達勒黨阿等遲徊觀望爲其所愚逾月之久賊踪愈遠朕早已料及是以八月望前卽降旨令其班師乃達勒黨阿等於前奉到此旨之先奏請暫回哈薩拉克地方過冬俟明春再進此不過強爲之詞耳事斷難行仍諭令遵照前旨撤回又諭曰前因達勒黨阿哈達哈效力軍前尙知奮勉加恩賞給雙眼翎以示鼓勵乃西北兩路大員會合一處反彼此推諉各存意見殊負委任朕念伊等遠行勞苦不卽從重治其罪然亦無功可錄所賞雙眼翎著一併繳還不准戴用十月命達勒黨阿來京十一月諭曰達勒黨阿等前遣哈薩克楚魯克昭華什等往諭阿布賚而留阿喇勒拜杭吉勒圖於軍營爲質乃不加意

防範致阿喇勒拜等先後脫逃續經拏獲杭吉勒圖又不卽行正法仍復疏縱著
交部嚴議二十二年二月詔革公爵及都統降爲副都統以其從弟阿里袞襲公
爵八月諭曰去歲擒剿逆賊阿睦爾撒納進兵至哈薩克西路以達勒黨阿爲將
軍北路以哈達哈爲將軍旣未能擒獲阿睦爾撒納又致阿布賚脫逃本應治罪
朕意伊等未必有心僨事不過爲賊所愚路遠遲誤之所致是以從寬免其處分
後經詢問在軍營之侍衛官員則咸稱達勒黨阿追阿睦爾撒納相距近一二里
逆賊不及馱載乃遣人託爲哈薩克本欲擒獻阿睦爾撒納惟待其汗阿布賚至
卽便送來達勒黨阿墮其計中專候擒獻並不督兵剿捕且下令不許衆兵前進
直至逆賊捆載脫逃後方遣兵追逐哈達哈則路遇阿布賚旣經後隊官兵呈報
並不勒兵追捕至阿布賚逃去始尾追一次以塞其責衆奏僉同是達勒黨阿哈
達哈之怠玩僨事顯然可見因將伊等公爵革去降秩示譴今訊問拏獲阿逆之
姪達什策凌等供稱阿睦爾撒納於去歲九月下旬自敗走地方潛回又據尼瑪
供稱去歲大兵追及阿睦爾撒納我催促進剿將軍等候阿布賚擒獻以致脫逃
再阿布賚對面安營我兵亦並不迎敵直至逃去始行追逐旋卽撤兵等語與侍

衛等所奏脗合觀此則伊二人不能用朕奮勇之官兵且爲逆賊等所輕視矣達勒黨阿哈達哈俱勳舊子孫受恩襲爵乃身爲將軍專任討賊而因循觀望坐失事機若此實出情理之外且去歲撤兵時伊等奏稱我兵距逆賊逃竄之地速行亦需月餘今於九月初撤兵自葉什勒椿集行五十餘日至巴顏拉鄂南之哈薩拉克地方等語今據達什策凌等所供阿睦爾撒納聞大兵旣撤於九月下旬回至葉什勒椿集行三十餘日至巴顏鄂拉又十五日抵哈薩拉克東之額布根塔爾琿地方共五十餘日等語設果如伊等所奏月餘程途則阿逆復回亦必須兩三月且逆賊必確知撤兵之信方敢起程果與我兵相去月餘往返探聽又三四月矣乃我兵則於九月初撤回行五十餘日始至哈薩拉克而逆賊則自九月盡起程至額布根塔爾琿亦祇五十餘日何如此之速耶則其被賊所欺愈爲顯著觀阿逆今春卽到額林喀畢爾噶此卽伊等因循推諉之明證也況今歲阿布賚遇我兵三十餘人一戰卽降則去歲若稍肯奮勉阿布賚早已投誠將逆賊擒獻矣又伊等擁兵觀望之明證也再兩路官兵會合後自應連爲一體乃伊等竟於相見之次日卽分營行走第三日卽議及撤兵有是理乎伊等卽協力追剿尙未

知獲賊與否況復自分彼此安能集事且知逆賊免脫時伊等俱係將軍若肯親行豈不勝於參贊大臣乃伊二人並不前往止遣阿里袞一人領兵追逐不知將軍所司何事達勒黨阿哈達哈如此種種貽誤若不加罪譴則國家之賞罰何在木當以軍法從事但達勒黨阿本一糊塗無能之人爲賊所愚而哈達哈每圖安逸遇事因循尙非出於有心且係勳舊子孫似此坐失機宜玷辱滿洲更何顏覲列班聯達勒黨阿哈達哈俱著革職發往熱河披甲效力二十三年十月詔宥前罪授三等侍衛十二月率西安駐防兵千赴軍營二十四年正月搜捕沙喇斯瑪呼斯逸賊二月大軍剿回酋霍集占上以達勒黨阿及哈達哈歷練諭由巴里坤送馬至阿克蘇八月定邊右副將軍富德等大敗霍集占於阿爾楚爾及伊西洱庫爾淖爾達勒黨阿均在事有功詔授二等待衛二十五年二月卒於軍營

哈達哈子哈寧阿

哈達哈滿洲鑲黃旗人黑龍江將軍傅爾丹次子康熙五十九年授藍翎侍衛六十年改治儀正累遷冠軍使兼公中佐領雍正九年遷頭等待衛十年二月授蒙古鑲藍旗副都統閏五月調漢軍正藍旗副都統十一月遷蒙古正藍旗都統

十一年命率兵千往駐洪郭爾鄂隆十二年授領侍衛內大臣留軍營十三年北路軍撤調赴呼倫貝爾駐防乾隆元年九月還京授勳舊佐領十二月襲其高祖費英東所遺信勇公爵四年五月授漢軍鑲白旗都統十月調滿洲鑲紅旗都統五年授工部尙書議政大臣兼都統如故六年署步軍統領七年命爲御前大臣尋晉太子少保十年兼鑾儀衛掌衛事十一年以後護謨班詔解領侍衛內大臣御前大臣十三年四月兼管光祿寺事五月因辦理孝賢皇后冊寶不慎議革職得旨從寬留任十二月署兵部尙書及步軍統領十四年奏訪獲糾竊積匪及窩家七十餘名分別枷責發遣報聞十八年疏劾鄭家莊城守尉長春保侵扣兵餉官租鞠實論罪如律十九年命赴北路軍營授參贊大臣二十年二月將軍班第統大軍剿達瓦齊哈達哈奏以喀爾喀扎薩克台吉根敦等留防各汛並管理新舊烏梁海牧接收降衆而自統兵繼進六月達瓦齊就擒軍還阿睦爾撒納叛遁命哈達哈遣員往諭哈薩克汗阿布賚擒獻九月復授參贊大臣同定邊左副將軍達勒黨阿進剿十月請率索倫喀爾喀兵千餘先進上獎其奮勉尋詔定西將軍策楞由西路進剿以達勒黨阿爲參贊哈達哈授定邊左副將軍留屯北路形

勢地爲聲援十二月奏言臣現駐兵布延圖派滿洲察哈爾兵各五百還駐烏理雅蘇臺察哈爾兵二千駐筍卜堪其索倫喀爾喀和託輝特兵七千餘南自伊克斯淖爾北至烏哈爾喀碩分布防守又布延圖科布多多卜克爾齊拉罕距烏理雅蘇臺各千餘里兵丁往領錢糧馬力易疲請將直隸山東所運米徑送各處酌加運價毋概貯烏里雅蘇臺上報可二十一年正月詔由阿爾台進兵四月達勒黨阿代策楞爲將軍諭曰策楞領兵擒拏阿睦爾撒納事事外謬全無籌畫今西路專任達勒黨阿北路專任哈達哈伊二人尙屬勇往著卽領兵前赴哈薩克務期擒獻時北路烏梁海叛遁諭查緝事竣馳會西路兵毋觀望五月申諭趣之六月特楞古特宰桑敦多克及固爾班和卓和克沁等各攜屬潛約烏梁海同遁途遇北路大軍詭乞降哈達哈察其詐斬敦多克擒固爾班和卓等盡戮賊衆諭獎其奮勇授領侍衛內大臣賜戴雙眼孔雀翎七月大軍至嵩哈薩拉克山偵哈薩克賊千餘由巴顏山西行擊敗之復遣副都統銜瑚爾起總管鄂博什侍衛奇徹布等往追斬百餘級獲馬二百匹是役也哈薩克汗阿布賚實親領隊至旣敗乃遁去而阿睦爾撒納亦爲達勒黨阿擊敗潛遁去兩路軍兵合九月遵旨撤兵閏

九月上以哈達哈既遇阿布賚不勒兵窮追致脫走飭繳還前所賞雙眼翎不准戴用十月軍還在參贊大臣上行走十一月召來京二十二年正月命往駐科布多仍授參贊二月論疏縱阿布賚罪詔革公爵及領侍衛內大臣降調兵部侍郎留駐科布多三月調烏里雅蘇臺辦事會副都統扎爾杭阿訐哈達哈前擒固爾班和卓時獲珍珠等物匿不奏事下參贊大臣舒赫德查訊屬虛諭曰此明係扎爾杭阿與哈達哈素不相能爲此傾陷之計朕辦理庶務一本至公豈肯以空言而卽治人之罪且哈達哈之罪並不在此伊身爲將軍帶領大軍任意延遲以致阿布賚脫逃是其罪有應得扎爾杭阿不以此具奏反以全無影響之事有意傾軋此風斷不可長著革職八月諭曰去歲擒剿逆賊阿睦爾撒納進兵至哈薩克西路以達勒黨阿爲將軍北路以哈達哈爲將軍既未能擒獲阿睦爾撒納又致阿布賚脫逃本應治罪朕意伊等未必有心僨事不過爲賊所愚路遠遲誤之所致是以從寬免其處分後經詢問自軍營回之侍衛官員則咸稱達勒黨阿追阿睦爾撒納時相距僅一二里逆賊不及馱載乃遣人託爲哈薩克本欲擒獻阿睦爾撒納惟待其汗阿布賚至即便送來達勒黨阿墮其計中專候擒獻並不督兵

追捕且下令不許衆兵前進直至逆賊捆載脫逃後方遣兵追逐哈達哈則路遇
阿布賚既經後隊官兵呈報並不勒兵追捕至阿布賚逃去始尾追一次以塞其
責衆奏僉同是達勒黨阿哈達哈之怠玩僨事顯然可見因將伊等公爵革去降
秩示譴今訊問拏獲阿逆之姪達什策凌等供稱阿睦爾撒納於去歲九月下旬
自敗走地方潛回又據尼瑪供稱去歲大兵追及阿睦爾撒納我催促進剿將軍
等候阿布賚擒獻以致脫逃再阿布賚對面安營我兵亦並不迎敵直至逃去始
行追逐旋即撤兵與侍衛等所奏脗合觀此伊二人不能用朕奮勇之官兵且爲
逆賊等所輕視矣達勒黨阿哈達哈俱勳舊子孫受恩襲爵乃身爲將軍專任討
賊而因循觀望坐失事機若此實出情理之外且去歲撤兵時伊等奏稱我兵拒
逆賊逃竄之地速行亦需月餘今於九月初撤兵自葉什勒椿集行五十餘日至
巴顏鄂拉南之哈薩拉克地方今據達什策凌所供阿睦爾撒納聞大兵既撤於
九月下旬回至葉什勒椿集行二十餘日至巴顏鄂拉又十五日抵哈薩拉克東
之額布根塔爾堪地方共五十餘日至巴顏鄂拉南之哈薩拉克地方設果如伊
等所奏有月餘程途則阿逆復回必須兩三月且逆賊必確知撤兵之信方敢起

程果與我相去有月餘往返探聽又必三四月矣乃我兵則於九月初撤回行五十餘日始至哈薩拉克而逆賊即自九月盡起程至額布根塔爾琿亦祇五十餘日何以如此之速耶則其被賊所欺愈爲顯著觀阿逆今春即到額琳哈畢爾噶此即伊等因循推諉之明證也況今歲阿布賚遇我兵三十餘人一戰即降則去歲若稍肯奮勉阿布賚早已投誠將逆賊擒獻矣又伊等擁兵觀望之明證也再兩路官兵會合後自應聯爲一體乃伊等竟於相見之次日即分營行走第三日即議及撤兵有是理乎伊等即協力追剿尙未知獲賊與否況復自分彼此安能集事且如逆賊兔脫時伊等俱係將軍若肯親行豈不勝如參贊大臣乃伊二人並不前往止遣阿里衮一人領兵追逐不知將軍所司何事達勒黨阿哈達哈如此種種貽誤若不加罪譴則國家之賞罰何在本當以軍法從事但達勒黨阿本一糊塗無能之人爲賊所愚而哈達哈每圖安逸遇事因循尙非出於有心且係勳舊子孫似此坐失機宜玷辱滿洲更何顏覲列班聯達勒黨阿哈達哈俱著革職發往熱河披甲效力二十三年十一月詔宥前罪授三等待衛十二月率西安駐防兵千赴西路軍營二十四年率兵追捕沙喇斯瑪呼斯逸賊二月大軍剿回

酋霍集占上以哈達哈及達勒黨阿歷練諭由巴里坤送馬至阿克蘇八月定邊左副將軍富德等大敗霍集占於阿爾楚爾及伊西洱庫爾淖爾哈達哈均在事有功詔授二等侍衛十月卒於軍營子哈寧阿於乾隆二年授藍翎侍衛累遷頭等侍衛十九年率綏遠城右衛兵二千餘赴北路軍營尋授寧夏副都統二十年命爲西路領隊大臣二十一年四月隨定西將軍達勒黨阿進兵哈薩克索叛賊阿睦爾撒納授參贊大臣八月赴伊犁協同定邊右副將軍兆惠辦事十一月降酋噶爾藏多爾濟叛哈寧阿隨兆惠由濟爾哈朗擊賊力戰突圍出事聞恩賞三等輕車都尉世職二十二年二月隨兆惠偵擊叛賊巴雅爾及扎哈沁牧於木壘烏蘭烏蘇科舍圖賜玉鞞荷包鼻烟壺各一六月督理額琳哈畢爾噶臺站十月赴珠勒都斯接應都統滿福及巴里坤辦事大臣阿里袞之兵同剿沙喇斯瑪呼斯賊衆尋助總管端濟布剿扎哈沁賊哈勒拜等十一月調漢軍正藍旗副都統仍督理臺站奏言軍營所需馬由碩琳阿畢爾噶一路解送地氣較寒多霜雪乏水草不若由烏魯木齊至吐魯番霜雪少水草佳遠近亦相等臣已行知巴里坤大臣及送馬之員改由此路得旨嘉允十二月襲信勇公爵擢漢軍鑲黃旗都統

二十三年正月靖逆將軍雅爾哈善統大軍剿逆回霍集占哈寧阿授參贊大臣
六月圍庫車擊敗援賊二千餘霍集占糾衆親至我軍分路擊大敗之斬級千餘
霍集占負傷走捷奏至諭部議敍旣而疏報霍集占走入越城七日忽開西門渡
鄂根河而遁副都統順德納實疏縱之應治罪上以此次縱賊雖由順德納然雅
爾哈善哈寧阿身爲將軍及參贊大臣所司何事詔均革職以兵丁效力尋拏解
來京二十四年二月諭曰哈寧阿以軍行失律解京鞫訊據供詞與雅爾哈善相
符且將雅爾哈善種種謬戾乖張失機僨事情節指陳如繪夫雅爾哈善旣爲將
軍而哈寧阿卽其參贊以將軍罪狀如此爲參贊者當以軍國之計爲重據實參
奏乃隱忍貽誤又從而附和之滿洲世僕豈宜出此且哈寧阿又非他人可比自
伊父哈達哈獲罪經朕加恩矜宥並予以自效之途伊苟具有人心念及伊父亦
將倍加感奮矧軍旅重寄三軍之命繫焉顧因循玩視可乎核哈寧阿之罪正與
雅爾哈善等應卽正典刑以肅軍紀第以參贊究屬相助爲理之人前哈寧阿曾
隨將軍兆惠由濟爾哈朗力戰而出雖現在所犯情罪斷難稍貸仍念伊前勞暫
緩正法著監候秋後處決以示寬典十一月諭曰用兵爲國家要務賞罰必期明

允爲將軍者於一切軍務果能奮往直前身親戰陣何事不可成就此內卽稍有見識未到者朕亦必加曲諒若如雅爾哈善等在庫車圍困霍集占如伊等嚴加防守逆賊安能出走且早已竣事乃伊等並不親臨嚴飭轉似特開一路令其脫逃有此情理乎故將雅爾哈善拏問卽行正法參贊大臣乃協同將軍辦事之人將軍思慮所未及參贊卽應指陳若不見聽卽應參奏哈寧阿爲雅爾哈善之參贊解到時亦應正法但參贊職任較將軍究屬有間是以將伊擬斬監候揆之以理此次秋審卽宜予勾因念伊父哈達哈現在軍前若有分外效力之處尙可稍從寬宥昨富德等領兵至巴達克山交界遣使索取霍集占當遣額爾登額時達勒黨阿哈達哈豈不宜告請前往與其遣額爾登額何如伊等一行之爲愈哉況伊等皆獲罪之人朕加恩復用爲侍衛遣往效力不但當感激朕恩卽伊自計亦當奮勉乃竟以侍衛自居與衆爲伍不知愧恥實出意料之外此等大關係處俱未計及哈寧阿豈尙可曲宥耶但朕念費英東不忍將伊孫同衆犯棄市特加恩令哈寧阿自盡著曉諭哈達哈及軍營大臣官兵等知之

愛隆阿 弟巴靈阿

愛隆阿滿洲正黃旗人姓覺爾察由前鋒歷遷侍衛乾隆十七年授正黃旗護軍參領二十年擢黑龍江左翼齊齊哈爾副都統尋調伯都訥副都統二十一年授領隊大臣赴巴里坤軍營二十二年五月偕參贊大臣富德追擒叛賊巴雅爾至愛登蘇遇哈薩克阿布賚部衆突出與戰數次哈薩克既歸附予議敘八月自巴爾楚克至濟爾哈朗接續臺站搜剿賊於沙喇博和什嶺遇都爾伯特納木奇游牧乞降旋遁去愛隆阿追及殺千餘人納木奇遂納款九月收厄魯特宰桑烏魯木游牧百餘戶於察罕烏蘇十月大兵撤回濟爾哈朗命愛隆阿辦理軍務尋駐守濟爾哈朗巴里坤適中地十二月領兵策應阿里袞追剿沙喇斯等賊二十三年正月隨靖逆將軍雅爾哈善進討波羅泥都霍集占先是愛登蘇之戰侍衛奇撤布陣亡至是愛隆阿呈稱前擒巴雅爾與哈薩克對陣奪回奇撤布屍富德未奏定邊將軍兆惠奏言臣等查詢富德從前愛隆阿原報並無奪回奇撤布屍語至擒獲巴雅爾時其領隊行走之處業已聲明蒙恩交部議敘愛隆阿顯係爭功請嚴議諭曰愛隆阿貪功訐告理應從重治罪但伊此次行走尙爲出力加恩免其治罪所有議敘卽著停止又諭曰愛隆阿以羅卜藏多爾濟晉封王爵伊但邀

議敘心懷不足殊不思羅卜藏多爾濟係蒙古台吉愛隆阿何可相比今但停止議敘已屬加恩前令其在雅爾哈善隊內行走此次進兵當知立功自贖若不奮勉效力必將伊從重治罪斷不寬宥六月大兵圍庫車城賊來援愛隆阿等與戰於戈壁剿殺甚衆霍集占親率賊赴救愛隆阿等率吉林及索倫兵追敗之於鄂根河殺溺死者無算御製回纥詩有是時實賴愛隆阿率千騎至皆奇男橫衝截入亂回陣斬將獲醜如囊探之句十月隨將軍兆惠至葉爾羌城率左翼後隊兵與霍集占賊衆接戰時靖逆將軍納木札爾將至葉爾羌愛隆阿領兵截哈什噶爾路來援並巡查臺站至托罕塔罕遇賊剿殺百人十月授參贊大臣與定邊右副將軍富德策應兆惠二十四年正月率右翼兵敗賊於呼爾瑞及葉爾羌河與兆惠合二月駐烏什兼防喀什噶爾三月仍在領隊大臣上行走閏六月兆惠奏言愛隆阿在軍營頗效力前議敘明瑞等遺漏未及得旨補行議敘尋給雲騎尉世職八月隨富德追剿霍集占於西洱庫爾淖爾十一月巡查臺站值瑪呼斯賓巴等賊謀劫察罕烏蘇臺站愛隆阿領兵追襲剿獲殆盡事聞諭曰愛隆阿一聞瑪呼斯餘孽欲行搶掠卽領兵盡剿賊衆此次奮勉更非尋常可比蓋大功旣成

此等逸賊並未責伊專辦即使逃脫伊亦不至獲咎乃聞信卽行俾逆黨不致漏網而臺站得以無虞可謂急公任事大臣官員等果能如此存心何功不就從前賞伊雲騎尉世職著加恩賞給騎都尉二十五年凱旋授正白旗護軍統領兼鑲白旗蒙古副都統二十六年命圖形紫光閣御製贊曰將門傑種拍張撫髀受將軍檄力戰全歸整師再進賈勇陷堅弟巴靈阿盡節軀捐二十七年敍平定準噶爾回部功授一等輕車都尉兼一雲騎尉世職十一月授伊犁參贊大臣三十一年卒子佛爾卿額襲世職現官二等侍衛巴靈阿由親軍校洵授三等侍衛乾隆二十一年三月遷二等侍衛授察哈爾總管三十二年二月給坤督爾巴圖魯號命赴巴里坤軍營尋授領隊大臣八月在博羅齊搜剿厄魯特賊衆遇伏戰歿賜卹如例給雲騎尉世職儒臣擬贊曰見賊輒怒如刺必拔戰博羅齊矢石交戛奮身揮突竟殞賊中旣斃叛首祭以報忠子永安襲職官貴州遊擊

清史列傳 卷二十二

大臣畫一傳檔正編十九

額勒登額

額勒登額滿洲正白旗人姓棟鄂父永常官陝甘總督授定西將軍額勒登額於乾隆六年授三等待衛十三年隨提督岳鍾琪鎮金川列一等功擢二等待衛十七年晉頭等待衛十八年授鑲紅旗漢軍副都統二十年隨征準噶爾五月領索倫兵千渡伊犁河與定邊右副將軍薩喇爾降宰桑得木齊等六月領兵堵禦達瓦齊諭曰此次進兵無折鏃遺矢之勞衆俱降服不應使達瓦齊反得逃遁額勒登額等既豫先領兵堵禦卽將達瓦齊擒獲亦未可定如果遠逃至布魯特境班第須詞嚴義正責其獻出是月霍集斯擒達瓦齊及其子羅卜扎定北將軍班第令額勒登額帶兵接應九月扎哈沁宰桑鄂爾奇木齊背叛命額勒登額相機擒獲時叛賊阿睦爾撒納有屬人葉克明安宰桑扎木參等率所部來歸永常疑懼挾其宰桑置軍中爲質兼程卻走命革職解京治罪並褫額勒登額職在軍營立

功自贖永常道卒二十一年八月阿睦爾撒納逃往哈薩克隨定西將軍達勒黨阿往捕屢與哈薩克接戰多斬獲復授頭等侍衛九月捕賊於雅爾拉哈薩克伏兵山溝盡殲之追賊至庫爾默圖嶺閏九月命在領隊大臣上行走十月授正藍旗漢軍副都統十二月授御前侍衛二十二年二月隨定邊右副都統兆惠剿額魯特叛賊六月至扎哈沁敗賊黨巴哈蔓集收其牲畜又剿博羅通古賊衆敗之時將軍等議撤兵至濟爾哈朗命隨巴里坤辦事大臣雅爾哈善在濟爾哈朗至巴里坤適中之地駐守尋因額魯特賊黨琿齊等乞降縱之歸復叛諭曰額勒登額既將琿齊等傳至軍營卽應看守乃轉爲賊所欺令其復回因而猖獗致總管巴寧阿等遇伏陣亡仍未能奮勇進剿著交部嚴察議奏部議革職諭曰額魯特朝降夕叛衆所深悉而額勒登額受其欺詐倉猝回兵以致琿齊等脫逃但額勒登額追剿扎哈沁賊衆頗知奮勉著革去副都統降爲三等侍衛效力贖罪二十三年二月兆惠偵賊在額卜推河飭額勒登額等合兵圍之生擒賊目達爾扎巴朗額勒登額緣馬踢傷脛不能行命回京調治九月以侍衛瑪常圖倫楚等在巴里坤年久派額勒登額往代十一月噶爾藏多爾濟舊游牧昌吉等處有藏匿之

瑪哈沁額勒登額往捕收獲二十餘人二十四年正月征回部定邊右副將軍富德剿賊於呼爾璊賊酋霍集占領騎五千餘迎戰富德張左右翼令額勒登額等擊之轉戰五晝夜賊潰奏入得旨優敘仍擢二等侍衛八月富德追霍集占於阿爾楚爾分兵爲三破之賊退據高山額勒登額等自山麓橫衝賊巢大破之賜鄂爾楚克巴圖魯名號九月回部平凱旋回京二十五年五月授鑲黃旗蒙古副都統二十七年三月授公中佐領五月論平西域功給騎都尉世職九月授武備院卿十一月授正黃旗護軍統領三十年四月因疾致仕六十年五月卒子德昌襲世職

巴圖濟爾噶勒

巴圖濟爾噶勒厄魯特人乾隆十九年以杜爾伯特部宰桑投誠隸蒙古正黃旗二十年五月大兵征準噶爾達瓦齊擁衆萬餘踞格登山崖巴圖濟爾噶勒與協領喀喇巴圖魯阿玉錫新降宰桑察哈什以兵二十餘往探乘夜衝入大軍繼進賊驚潰達瓦齊遁收大蒙古包及礮六降其台吉二十宰桑四親兵五百兵四千餘諭曰喀喇巴圖魯阿玉錫巴圖濟爾噶勒察哈什等遵令乘夜踰營一鼓先登

所向披靡尤爲實力奮勉俱加恩授爲散秩大臣加賞男爵世襲八月阿睦爾撒納叛阿玉錫奏巴圖濟爾噶勒黨惡執之諭歸部管轄十一月厄魯特侍衛丹津告訥默庫欲逃叛命辦事大臣阿蘭泰擒治并將巴圖濟爾噶勒拏解來京二十一年三月巴圖濟爾噶勒將訥默庫背叛情形據實陳奏免其治罪加恩授三等侍衛五月擢頭等侍衛赴達勒黨阿軍營十一月達勒黨阿奏其效力有勞授散秩大臣二十二年十月解馬赴濟爾哈朗命爲領隊大臣授鑲藍旗蒙古副都統十一月在哨探隊內行走二十三年與侍衛鄂實圍扎哈沁得木齊哈勒拜游牧擒哈哈勒拜及其屬襲執叛賊璋齊於尼勒喀河盡收其游牧四月擒噶勒雜特宰桑特克勒特克隨將軍兆惠等由伊犁進剿回部五月至善斯嶺招降布魯特頭人並所屬六十餘又降阿勒巴齊鄂勒椿等收其馬駝軍械八月招撫塔拉斯布魯特三百餘戶十月諭曰巴圖濟爾噶勒原在富德隊內不必隨往葉爾羌卽同巴祿領兵搜捕哈丹巴阿噶斯餘賊及沿途瑪哈沁等凡奏事行文列名於次不必受巴祿節制巴祿與巴圖濟爾噶勒當和衷協力以期集事若能盡剿餘孽并獲哈薩克錫喇則伊二人之福也十一月命速赴富德軍營十二月至伊拉里

克因馬駝未至兵皆負糧械徒行巴圖濟爾噶勒奏將已到關展之駝僂送續到者速爲接濟得旨嘉獎二十四年正月兵至阿爾吉什時逆賊霍集占黨侵和闐侍衛齊凌扎布請援將軍兆惠令巴圖濟爾噶勒與瑚爾起往擊之三月到和闐賊望風遁偵賊騎七百餘屯踞博羅齊乘霧直前衝擊潰之追越阜窪勒河剿捕百餘收回人四千餘戶撫定齊喇哈克克里雅三城御製博羅齊行紀其事詩曰博羅齊者鄰和闐賊回據險偵我軍先是圍解黑水困元戎遣救掄二臣一爲瑚爾起吉林舊族世受恩一巴圖濟爾噶勒乃厄魯特宰桑其勇誠超羣同心協力速赴援率軍數不能盈千途歷戈壁不毛之地負甲步進無俄延哈勒哈什已垂陷齊凌扎布馳來言夜急行至伊立齊時賊望風先逃奔集兵拯哈拉哈爾賴天大霧彌漫漫乘霧直搗賊營後伺怠奮勇攻中堅斬將搴旗獲輜重孤城恢復餘俱安昔薛延陀禱神能致雪冀困李勣終乃自斃焉此霧或亦敵鮓答翻爲我用成功全易云天所助者順向猶未信今信然持盈知足感帝祐敢肆志詡能開邊尋下部議敘給雲騎尉世職七月霍集占棄葉爾羌遁追及於阿勒楚爾賊伏兩山間我兵分三隊奮擊巴圖濟爾噶勒領左翼自辰至午賊大潰追射殺千餘生

擒五十奪礮械無算賊逸入巴達克山界巴圖濟爾噶勒與伊柱領兵八百於山後堵禦大兵尾至伊西勒庫爾淖爾賊據險守我師整隊發礮樹回轟降賊萬餘巴圖濟爾噶勒以功賞戴花翎給白金九月富德令侍衛賽音圖等往巴達克山勒獻霍集占派巴圖濟爾噶勒駐兵六倫以張聲勢瓦罕伯克率戶口降二十五年凱旋賚銀幣授內大臣命圖形紫光閣御製贊曰杜爾伯特部中傑驍嘉其心直授職本朝凡與交戰義弗返顧師濟和闐不孤恩遇嗣追敘平定準噶爾及回部功加騎都尉世職三十四年授公中佐領三十七年卒賜祭葬如例子二長察克圖襲騎都尉兼一雲騎尉次普爾普由侍衛隨征金川有功授三等奮勇男官護軍統領以平臺灣林爽文之亂奉旨給雲騎尉五十五年卒賜祭葬如例

和起子和隆武

和起滿洲鑲藍旗人姓馬佳氏高祖阿音布國初以軍功授騎都尉世職康熙六十一年和起襲乾隆四年授盛京協領十二年授廣東副都統十四年調寧夏副都統十九年五月命偕侍衛海福率寧夏兵千赴北路軍營二十年正月授寧夏將軍二月定西將軍永常劾和起等所率兵不及額請議處諭曰寧夏兵一千原

定於四月內前赴軍營後因歸於哨探兵隊內令和起等催儻前進伊等隨將輜重留後派兵百名守護止領九百名遄行尙屬奮勉且已具奏在前非無故遲留可比著從寬免其議處七月以達瓦齊就擒撤寧夏兵還仍令和起統之尋命偕提督豆斌爲巴里坤辦事大臣十一月以遊擊王國士運糧遲誤諭曰軍營糧餉關係緊要理應加意辦理何以王國士派委運糧半月僅行六臺必係僅派綠旗兵運送以致如此遲誤和起等辦理甚屬錯謬現在滿洲及索倫察哈爾兵丁調集巴里坤若交伊等運送不但行走迅速且於運糧之便直抵軍營一舉兩得況新降達什達瓦人衆此際應至巴里坤附近地方伊等熟悉路徑與兵丁同運更爲有益此皆和起等應行籌辦之事乃並未籌及所司何事著傳諭和起豆斌等遵旨悉心辦理十二月定西將軍策楞奏屢檄和起等將補給兵丁及甘州肅州續到之馬速解軍前至今未到詔令明白回奏並交部議革職留軍營效力得旨從寬留任二十一年正月特予開復和起奏言涼州寧夏等處所解馬疲斃過多臣派員在巴里坤分收俟臙壯挑用仍先照數補解以利軍營請將委員議處部議從之二月給欽差大臣關防五月諭曰和起在巴里坤辦事甚屬踴勉著馳驛

來京面聆訓示再往軍營同參贊大臣兆惠籌辦一切事宜先是達什達瓦所屬宰桑訥默庫曼集烏達瑚們都等自軍營私回游牧奉旨鞠治六月諭曰現據和起將訥默庫等擅回游牧之處訊明復以伊等係新降之人未諳法律陳奏殊屬錯誤達什達瓦屬人歸誠以來疊施厚恩及派往軍營效力又與內地兵丁一體賞給製裝銀兩乃敢不遵法令擅帶兵回至游牧處情罪甚屬可惡昨經和起等奏到朕卽降旨令將訥默庫曼集等正法其兵丁係聽從指揮加恩寬免所以不將兵丁一併治罪者特因伊等新降姑從寬典至宰桑乃領兵之人豈得曲從寬宥和起等審訊既確復爲此奏其意惟恐訥默庫等正法後致達什達瓦屬人心懷疑貳妄生事端果有此情正當使知法律森嚴不容輕犯安得苟且姑容以示怯懦料和起尙不至此此必出於錫特庫之意著傳旨申飭仍將訥默庫曼集烏達瑚們都卽行正法十一月輝特台吉巴雅爾叛掠扎哈沁五百餘戶定邊右副將軍兆惠令和起率索倫兵百往剿檄吐魯番伯克莽阿里克及厄魯特兵集關展而噶勒雜特宰桑哈薩克錫喇布魯古特台吉尼瑪陰應巴雅爾詭以兵五百會和起望兵至疑之令莽阿里克往偵給告曰我兵也逾時尼瑪等操戈前莽阿

里克白後譟賊衆盜集我兵僅百人負重創和起手刃數賊股中槍徒步轉戰至夜力盡死之遺命索倫侍衛努古德彰全布突出以所戴孔雀翎爲識往告巴里坤大將軍兆惠以聞諭曰和起效命疆場捐軀報國忠節可嘉深爲憫惻著照傅清拉布敦之例加恩贈卹上憫和起義烈御製西師詩有奮勇沙場沒之句尋追贈一等伯賜祭葬入祀賢良昭忠二祠謚武烈賞一等子爵以其子和隆武襲二十三年逆賊尼瑪及其子就擒命於和起墓前伏誅和隆武初襲子爵授三等侍衛乾隆三十六年襲佐領三十七年二月隨護軍統領明亮赴金川軍營七月隨大軍由墨壘溝攻甲爾木山梁十二月大軍分路進剿和隆武爲領隊侍衛時明亮等攻美諾喇嘛寺和隆武沿河夾剿賊潰後復合盡戮之夜克美諾各碉寨三十八年二月分攻納圍正面山梁六月海蘭察剿賊於簇拉角克五岱統兵援和隆武爲接應七月敗賊於鳩寨奪碉五十餘八月授鑲藍旗蒙古副都統十一月克復僧克宗三十九年正月隨富德攻克絨布寨正北之沃什山摩格孟格哩格穆爾德宗進攻卡角是月署古州鎮總兵三月同奎林等裹七日糧分隊取斯第賊迎拒和隆武麾衆力戰矢盡以矛槍格鬪被創事聞奉旨嘉獎賜玉韞荷包六

月調隨征正地九月攻克木什克第一碉賜皮馬褂十一月大軍攻日勞和隆武由周叟繞出其後突入碉寨賊驚潰槍石不及施短刃相搏我兵沿山追剿克戰碉十餘平碉二百餘日旁賊殲焉諭曰此次明亮等攻克日勞碉寨探路籌畫均合機宜而越險攻碉殺賊全係和隆武功績伊父和起盡節捐軀應有是子深爲嘉慰著授爲都統以示優獎和隆武尋偕珠爾格德等剿谷爾隄一帶碉寨盡克之諭曰此次攻得碉寨又係和隆武帶兵前往似此屢次出力實屬可嘉四十年正月授正藍旗蒙古都統四月分攻得楞以南碉卡復與奎林等由薩克薩谷進攻追殺無算六月攻額爾替山梁石城殺賊甚衆諭獎其奮勇出力七月賊據石真噶和隆武與奎林乘運礮聲響分隊突攻據之賊奔潰時將軍阿桂一路兵直壓勒烏圍之頂和隆武等張兩翼亟進爲聲援八月賊恃札烏古險要干丹札木各寨悉衆拒守我兵出不意奪路深入和隆武沿河接應夾攻十月由琅谷攻奪什札古諭曰此次攻碉殺賊官兵均爲奮勉而奎林和隆武二人出力猶多現在西路將領隨將軍阿桂屢次克捷立功建績者甚衆將來自應茂賞而明亮北路久未能進卽此次亦不過尋常小勝不能遽邀錄敘明亮奎林和隆武各宜奮勉

立勳豈可專讓西路成功而不知奮勵但進攻時當共度利害籌及萬全閏十月克札烏古及耳得谷十一月克阿爾古十二月由達撒谷進攻克荒子坪一帶礮卡復攻獨古木思滿賊望風披靡上和隆武鼓勇先登茂著勞績賜諭嘉獎又攻甲維官寨圍之賊遁乘勝克獨松四十一年四月金川平晉封三等果勇侯賞戴雙眼翎尋命將本佐領擡人正黃旗四月凱旋賜御用鞍轡馬一及銀幣命圖形紫光閣御製贊曰襲父卹職少年老成夔雖脫穎竟善用兵掠日旁寨獨擅偉勳楚材繼出旣悵以欣四十三年四月授寧夏將軍十一月調吉林將軍四十七年卒賜祭葬諡壯毅無嗣弟和雙額襲爵

高天喜子仁 人傑

高天喜甘肅西寧人由行伍拔把總乾隆二十一年從征西路軍營有功擢保寧堡守備二十二年正月隨參將邁斯漢援副將軍兆惠於伊犁路遇噶勒雜特賊百餘天喜擊殺之獲其駝馬聞兆惠被圍欲馳救邁斯漢怯不進巴里坤辦事大臣雅爾哈善奏革邁斯漢職上嘉天喜奮勇效力命卽代邁斯漢爲參將十二月遷金塔協副將二十三年三月追擊喀喇沁宰桑恩克圖等於庫隴癸山乘夜攜

礮登敗賊衆諭部優敘五月擢西寧鎮總兵授領隊大臣十月隨大軍赴葉爾羌剿逆回霍集占將軍兆惠以賊輜重屯城南取道城東往襲留天喜督修黑水橋師渡未及半賊突遮天喜聞兆惠陷陣中亟舍橋衝入鏖戰遂與原任前鋒統領鄂實原任副都統三格侍衛特通額俱歿於陣事聞諭曰高天喜奮勇殺賊盡瘁捐軀深可憫惻著照一品大臣例賞給卹典尋賜祭葬諡果義入祀昭忠祠恩賞騎都尉又一雲騎尉世職御製詩惜之曰始由小校出從征優擢奇雄至總兵留後修橋恥苟活復前入陣遂捐生綠旗中止一人實絕域外傳千古名裹血結纓寧讓古詩非獎勇獎忠誠二十四年諭曰原任總兵高天喜隨將軍兆惠攻剿逆回奮勇殺賊捐軀效命已加恩賜卹念其家本寒微自隸行間以勤勞疊膺擢用雖躋方鎮歷任未久其妻子之在甘肅者尤宜格外優卹著總督吳達善於藩庫內賞給銀一千兩以資養贍仍不時加意照看伊子應行引見時卽奏明送部俟朕酌加錄用以示獎勞動功之典二十五年回部平命圖形紫光閣御製讚曰爪牙之將用不拘資感予特達效命何辭百戰百進義弗旋踵怒則面赤是謂血勇天喜長子仁於乾隆三十三年三月襲世職授藍翎侍衛尋發本省以守備用十

二月補涼州鎮標左營守備三十七年引見請隨征金川諭曰原任西寧鎮總兵高天喜前在西路軍營奮勉出力臨陣捐軀勤勞可憫伊子守備高仁預保引見奏懇四川軍營效力著交與溫福聽候差遣遇有都司缺出卽行補用尋授安西提標右營都司三十八年隨剿昔嶺及達札克角屢敗賊衆會木果木軍營潰仁赴援戰歿賜卹如例入昭忠祠子勇忠襲世職候補遊擊天喜次子人傑由武舉於乾隆三十七年恩賜一體殿試成武進士授藍翎侍衛四十一年發本省以都司用四十三年補安遠營都司四十六年隨剿撒納爾逆回於華林寺力戰被創四十八年遷陝西提標右營遊擊四十九年偕總兵蘇林等剿石峯堡逆回復被創諭獎其奮勇賜戴孔雀翎尋遷蘭州城守營參將五十年差赴西寧被雷震卒子勇臣廢千總

馮鈐

馮鈐浙江桐鄉人父景夏官刑部侍郎鈐乾隆二年進士授主事分吏部十年二月補主事四月遷員外郎十月擢郎中十一月授湖南道監察御史十二月奏除漕糧積弊得旨允行十四年授刑科給事中十五年提督福建學政十九年擢貴

州貴西道二十一年九月遷按察使二十二年十一月調安徽按察使十二月遷山東布政使二十三年三月擢湖北巡撫四月調湖南巡撫六月因廣東倉平糶缺額兩廣總督陳宏謀奏准撥運楚南穀石鈐議撥常平倉溢穀四十萬石運赴粵東並請速爲買補以充積貯如所議行七月以兩廣總督陳宏謀委員至衡郴湘潭等處買穀恐致民間米價昂貴奏請於長衡二府屬貯穀內照價卽時撥給得旨嘉獎二十四年正月奏湖南長沙府屬之瀏陽縣向設巡檢一員駐筍梅子園地方離縣止五十里該縣北鄉永安市離縣八十里居民稠密好勇健訟請將梅子園巡檢改移永安市更名永安市巡檢又寶慶府屬之武岡州向設州同一員並無專管政務查該州高沙市一鎮離城六十五里居民不下千戶商販絡繹雖隸該州蓼溪司巡檢巡查不足以資彈壓州同駐筍州城實屬閒曹若移駐高沙市一切俱歸該州同查防所有蓼溪司巡檢另行移駐查寶慶府屬邵陽縣之里田鋪離郡城七十里該地爲赴省通衢人煙輻輳五方雜處若將武岡州屬之蓼溪巡檢移駐該縣里田鋪非惟賊匪等項可以稽查抑且該州縣解勘人犯亦得防範於地方均有裨益下部議行三月疏稱湖南爲產米之鄉通省常平倉共

存正額溢穀積至百四十餘萬石將來秋收穀賤本省再議採買陳陳相因而勢須撥協之鄰省每當需用之時又未能卽受協濟之益請於附近水次各屬常平倉穀動撥三十萬石運赴江南平糶諭曰據馮鈐奏請於湖南各屬常平倉存貯項下動撥三十萬石委員運赴江南平糶協濟該省素稱產米之鄉值茲米穀充裕酌盈劑虛鄰境封疆大吏辦理正應如是見在江省米價甚平秋成亦屬有望尙非急需接濟之時然令米穀流通俾各處倉儲充實於地方亦有裨益著傳諭尹繼善令其通盤熟計該省情形應運至何處存貯以備撥用或不需撥用三十萬石之多卽留一二十萬石其餘穀石另行碾米於明歲漕船北上時搭運至京如果江南無需此項卽全數運京亦可其自湖南運至江省事宜卽著尹繼善咨商馮鈐妥協辦理旋據兩江總督尹繼善奏稱江省連年豐稔米價平減無庸平糶各屬倉糧亦上冬採買此項米石尙非急需應遵旨全數運京於明年江浙漕船搭運諭曰江南旣無需用米之處所有湖南撥運穀石若必運至江省交兌存貯又於明歲漕船進京殊多輾轉著諭馮鈐將此項穀石卽於本處碾米於今冬漕船起運時隨便搭解交通倉兌收自較簡便尋因湖南額設漕船不敷搭解鈐

議將湖北漕船均勻搭配裝載起運得旨允行會值浙省歉收浙江巡撫莊有恭奏請動撥公項銀兩委員赴江廣採買米石上以楚省有應行搭運赴通米十五萬石命就近兌交浙省委員領回備用又諭曰據馮鈐所奏湖南常平倉尙多溢穀且有節年加買穀石若干楚省附近浙省水次各屬倉穀內再行酌撥一二十萬石合前運米石自足敷該省接濟之用而於產米本地民食市價均不相妨最爲妥協該督撫等可卽彼此會商以濟公事嗣因浙省止需二十萬石旋卽照數兌交委員領運回浙四月奏湖南郴桂兩廠向計產鉛十六萬斤近年出產漸微請於例買黔省白鉛二十萬斤外增帶二十萬斤以備缺乏嗣後仍祇運常例之鉛毋庸加帶上允之二十五年三月奏苗疆知府同知等缺向例五年俸滿題升嗣請於五年俸滿後覈其政績可觀地方安謐者保題以升銜註冊俟再滿三年卽行升用但查苗疆人員旣寬以八年之限向例祇用附近應升之缺恐久任賢員轉不如腹地人員升遷之速請嗣後苗疆應升之員無論附近及應題應選應請旨之缺俱准升遷下部議行二十七年十月調廣西巡撫二十八年四月奏粵西幹盧二廠開採年久出鉛漸少請令湖南仍買黔鉛不必赴粵西購運至粵東

一省需鉛無幾仍令赴買諭曰各省鼓鑄錢文並需鉛斤應用該撫雖因該省廠鉛稀少奏停湖南採買而以同一總督所轄之廣東則又仍聽購運未免意存畛域所奏殊未允協且摺內稱將楚南二十八年所需白鉛二十萬斤停其買運是湖南需鉛卽在本年此時諒已委員赴粵又豈可聽其徒手而回致誤該省鼓鑄耶著傳諭馮鈐與陳宏謀彼此會商通融籌辦將見在所存廠鉛酌量配給務令兩省鑄局均無貽誤至幹盧二廠見在出產無多或可於該廠之外設法相度再爲開採使鉛斤益加充裕更爲妥協尋奏稱粵西本省鉛局歲需白鉛及應備湖南廣東二省採買每年需得鉛七十萬斤方可源源接濟見在幹峒盧柳二廠開採年久所出遞年減少查二十七年湖南採買粵鉛委員甫於本年正月內自粵起程運回是湖南二十八年所需鉛斤尙可無須採買至廣東所需鑄鉛若令一併停買則須委員前赴漢口採買旣覺路遠費繁且爲數無多粵西尙有局鉛七十萬斤可以緩買見接准湖南巡撫陳宏謀札稱湖南鑄局尙有積存白鉛一百五萬八千餘斤可供三年之用本省尙有可開之礦自此以後不須採買粵鉛二十八年買鉛之員尙未起程等語除將廣東所需鉛斤仍照原奏令其赴買並飭

各廠員加意督率廠工人等盡力開採毋得透漏以冀礦砂復旺並令該府縣相度形勢於該廠之外另尋砂苗設法開採報聞八月奏廣西潯州府屬之貴縣桂平二縣額糧撥解左江鎮標協營兵食向俱係煮熟穀米緣該二縣地氣潮溼生米貯倉一經夏月易黴蛀但穀經煮熟米必味淡力薄自不若生米之力足而味甘請將貴縣桂平自本年爲始照各屬一律改徵生米民情亦便從之三十年三月調湖南巡撫十一月調安徽巡撫三十一年十二月奏安徽廬州府屬合肥縣爲南北通衢一切解餉解犯絡繹不絕委護員弁有顧此失彼之虞請將廬州府照磨移駐合肥縣之梁園地方其照磨事務歸府經辦理尋部議裁照磨改設巡檢一員駐筍梁園從之三十二年十月奏常平倉穀遇有動用例應隨時買補安徽一省自乾隆二十六年後節次災賑動用及蠲免民欠口糧籽種共缺額六十餘萬石除買補外尙缺五十萬石本年潁州府屬秋收豐稔已撥司庫銀分發各州縣採買查本年安徽省沿江地方閒有偏災未經遇水各屬仍屬豐收見在含山縣之運漕桐城縣之三河各鎮米穀聚集價值平減未便因偶有成災拘泥停買得旨嘉獎三十四年二月諭曰據馮鈺疏參太和縣知縣郭世誼將重價購買之

妾餽送幕友史緯義而史緯義卽係該管之潁州府知府史魯璠之族叔該縣巧爲逢迎該府有意徇庇業經降旨一併革職嚴審究擬並諭馮鈐據實查辦又諭曰馮鈐題參太和縣知縣郭世誼蕩檢不職該管之潁州府知府史魯璠縱庇劣員一疏史魯璠身爲方面大員乃令族叔在所屬署中作幕是其上下通同逢迎挾制諸弊皆所不免此等惡風斷不可不嚴加懲治該撫馮鈐平日豈毫無聞見何竟不早爲參處直待史魯璠告病詳請解任後始以一參塞責外省徇庇屬員陋習每遇劣跡彰著尙欲爲之設法瓦全卽或知其事萬難掩覆不得已始以一挂彈章藉名整飭而其實不過隱售化大爲小化有爲無之術此等伎倆豈能施之朕前馮鈐辦理此案有意取巧故於事後糾彈藉以掩其前此袒庇之咎此而不加以嚴懲則督撫等益以漠視察吏爲得計誰復知所警畏馮鈐著交部嚴加議處復詔解任聽候部議旋議革職發往軍臺效力尋贖罪回籍三十五年八月恭遇六旬萬壽鈐赴闕祝嘏特與按察使銜十一月卒

張若震

張若震江南桐城人大學士張廷玉之姪雍正元年欽賜舉人六年授浙江天台

縣知縣七年升嘉興府同知八年擢台州府知府十年遷鹽驛道十二年超擢布政使條陳海塘修防事宜及清釐各屬南漕積欠均得旨允行七月諭曰浙江鹽務漸不如前若不留心整頓必致廢弛難理程元章力量僅能勉強辦理巡撫事務不能兼理鹽政浙江布政使張若震年力精壯實心任事從前鹽道任內曾經諳練其辦理亦屬妥協著伊兼管鹽政印務凡地方文武官弁有關涉鹽務者准其舉劾若有作弊掣肘者卽著糾參乾隆元年奏辭鹽政養廉充公旋以藩司事繁任重力難兼顧請解鹽政任諭曰兩浙鹽務自來廢弛自李衛爲浙江總督以來留心整理諸事妥協及李衛離浙程元章接任其性辦事迂懦鹽政漸不如前是以皇考諭令布政使張若震兼管前據張若震奏稱藩司之職經管通省錢糧頭緒繁多難以兼顧鹽務且緝私全賴官弁協力未免呼應不靈恐誤公事等語張若震准解鹽政之任俾得專心職守二年二月入覲扈駕至易州恭謁泰陵召見行在諭以不必入京俟山陵禮成卽回本任八月疏請各省歉收酌定遏糴處分下九卿議行四年奏各省衛守備千總請照山東各省例改歸知府管轄五年奏浙省地丁錢糧存留項下支放官俸役食向以錢一銀九搭放造報實屬虛捏

請嗣後統以銀數開銷不必作錢均下部議行六年奏浙省沿海腹裏地方尙有新漲沙塗堪以開墾緣民竈夾雜往往貧民墾種竈戶出而紛爭是以觀望不前請無論民竈俱准開墾以呈報在先爲定給與印照註冊存案得旨俞允七年正月奏請歸養諭曰汝奏固屬應行但巡撫新任汝不便復換俟秋冬閒再奏七月復申前請諭曰張若震以母老多病屢請終養惟情詞懇切准回籍養親尋丁母憂十二年服闋十四年授甘肅布政使奏甘省岷州西和秦州秦安禮縣成縣河州等州縣節年額徵存倉餘糧共二十四萬石有奇見無別項支用除常平倉糧應仍舊積貯外其西和秦安成禮四縣餘糧應各留一萬五千石岷州留二萬石秦州留四萬石河州留三萬石餘均變價解司以備豫買滿兵糧草及撥充兵餉之用嗣後每歲額徵及估兵食之外總按額留之數存貯餘於每年三四月閒變舊存新儻值歉收毋庸變解報聞十五年調河南布政使十六年調西安布政使十月奏請陝省墩臺營房照上下兩江之例酌定歲修銀數交兵丁自行修補汛弁查勘不固者懲革賠修其歲需修費令各州縣於額設公費內按二八月移交汛弁轉給兵丁修理如所請行十七年三月奏請定原籍呈報丁憂之例凡見任

官之父母在籍病故者家屬呈報及地方官詳撫咨部俱以五日爲限庶該員不得遲隱而應題應選之缺亦無稽滯下部議行七月奏甘省地方遼闊窮民多就山澤謀生恐有奸匪煽惑愚民請豫爲稽防其閱久封禁山場不許奸民捏端開墾上韙之十八年擢湖北巡撫二十年奏荊州府屬江陵監利二縣濱江田廬全賴隄垸保障該二縣地方遼闊均止縣丞一員隄務難周應分員督辦所有江陵縣隄工請自松滋縣上古牆一帶令虎渡司巡檢管理襄江直路一帶令潭灣司巡檢管理其荆江北岸等處仍歸縣丞管理監利縣隄工自北大興垸起至永豐垸令分鹽司巡檢管理自蓮花垸至古老垸令朱家河巡檢管理均如所請行又偕總督碩色奏浙江撫臣周人驥咨稱浙省歉收選商赴江漢採買恐湖北漢北地方江浙商人同時採買米價日昂楚人亦受食貴之累請將十八年楚北常平倉加貯穀四十萬石分飭各屬碾米運至漢口委員設局聽浙省官商買運上嘉之二十一年卒

訥親

訥親滿洲鑲黃旗人領侍衛內大臣二等果毅公音德次子雍正五年由筆帖式

襲公爵授散秩大臣命乾清門行走九年命爲御前大臣十年授鑾儀使十一年軍機處行走十三年八月今上御極遷鑲白旗滿洲都統兼理內務府事務十月授領侍衛內大臣命協辦總理事務仍兼都統十二月晉一等公乾隆元年遷鑲黃旗滿洲都統二年正月遷兵部尙書兼議政大臣十二月以總理議敘賞雲騎尉世職三十年正月管理圓明園事務二月管理戶部三庫事務九月協辦戶部事務會直隸總督李衛劾總河朱藻挾詐誤公及貪劣各款命訥親偕尙書孫嘉淦往鞫得實革藻職擬杖流十月同嘉淦疏陳永定河南北岸建築閘壩事宜語詳嘉淦傳十二月調本部尙書四年五月加太子太保六年左都御史劉統勳疏言訥親職掌太多任事過銳諭曰訥親身爲尙書若於本部之事稍涉推諉則模稜成習公事何由辦理但所辦未協之處亦所不免朕時加教訓戒其自滿年來已知恪遵朕訓矣今見此奏益當留心自勉至於職掌太多如有可減之處候朕酌量降旨九年正月命查閱河南江蘇安徽山東一路營伍並驗河工海塘便道查天津河間賑務二月奏天津河間極次貧民遵旨酌議展賑一月從之五月奏言臣勘江南沿海塘工舊有華亭石工長六千七百餘丈俱穩固新建寶山石工

一千三百丈係匠尺量建較部尺爲短參差易滋弊竇請較定頒發尺樣又塘身靠土一面及貼裏合縫處俱與六面琢光之原估不符應核減餘金山奉賢南滙上海各土塘離海稍遠已成桑田且江南沿海地方平洋暗潮水勢較浙江稍緩惟在該管官留心督率相機守護可保無虞又奏浙江潮向由蜀山之中小疊出入其近海寧之北大疊近蕭山之南大疊皆漲沙寬闊杭紹二郡共慶安瀾迨中小疊漸涇大溜悉由蜀山北衝刷浸溢爲患若濬通中小疊故道減大疊溜勢上下塘工悉可安堵卽中小疊難遽開導而潮汐衰旺有期長落甚速暴至固費防護漸退便可施工若於險要處多建坦坡木石戢壩俾挑水漲淤實爲捷法至柴塘一帶但使沙益堅積水不通流不但不必改建石工並可免搶險之費是在相機經理有備無患均議行七月奏言閱過河南江南山東將軍督撫河漕提鎮共十七標惟南陽及蘇松水師二鎮兵最爲生疏餘優劣互見請分別察議申飭從之又疏陳洪澤湖歸江之路應濬鹽河以資輸注歸海之路應申濬場河以資容受天然二壩石工高堰迤下二隄俱可停下部議行先是山東巡按御史李敏第疏請南旺湖地准給貧民租種命訥親會同完顏偉議奏至是訥親奏南旺湖在

運河西湖內高阜悉可種卽遇汶水漲溢退後俱屬腴田應將涸地令貧民租種水大之年免其納租再查前河臣議准於湖中截築長隄而內隄亦多高阜請並給民種原議圻築處停止又疏言外省應行政務由督撫司道行州縣行文出示全無實濟前蒙世祖章皇帝諭督撫於歲終將奏行條款如何施行及行之如何有效具本題達行之既久復成具文臣思州縣各官惟以簿書錢穀爲事其於戶口之貧富地土之肥瘠物產之豐嗇民情之趨向習俗之美惡以及山川原隰橋梁道路漫不經心條教之外官與民旣無餘事納課之外民與官漠不相關浮文常多實意殊少請敕下督撫令州縣官徧經境內鄉村確訪將何事當興舉何事當整頓行之有無效驗據實申報上司卽據爲考覈歲終督撫據實摺奏毋庸彙題似亦崇實效去虛文飭吏治厚民生之一端也均議行十年三月協辦大學士五月充五朝國史館總裁尋晉保和殿大學士七月充經筵講官十一年十二月充繙譯考試官又充玉牒館總裁十二年二月充會典館總裁四月山西刁民安邑縣張遠萬全縣張世祿等聚衆抗官命訥親馳往率同巡撫愛必達嚴勘得實治罪如律并劾愛必達及總兵羅俊有虧職守均請革職在事官弁分別治罪從

之初閩浙總督喀爾吉善劾浙江巡撫常安貪婪命大學士高斌等往審十三年正月高斌等議以常安失察家人勒索請革職上以所審情節不明命訥親往同查審得實解京治罪論如律時大兵征金川逆酋娑羅奔總督張廣泗久無成功四月命訥親馳往經略軍務七月訥親奏言臣於六月初六日抵卡撒美溝軍營初九日往昔嶺相度賊巢山勢伏思賊人因險築碉故能以少禦衆今我兵已逼其碉當亦令築碉與之共險兼示以築室反耕不滅不休之意諭曰訥親築碉共險之策閱之不得其解夫攻守異用彼之築碉原以自守我兵自應決策前進奮力攻取乃轉令攻碉之人效彼築碉是亦將爲株守之計耶且碉不固則不足恃碉固則必勞衆力若以築碉之力移之攻取破彼之碉以奪其所恃不亦可乎蓋能克其碉而守之猶屬因利乘便之意今因彼守險我亦築碉微特勞費加倍且我兵已深入賊境地利氣候素不相習而守碉勢須留兵多則饋遺不繼少則單弱堪虞賊酋凶狡必狃我以持久出我之不意浮寄孤懸客主之情旣別情見形細反復之慮尤深師老財匱長此安窮不可不熟計也況將來金川撲滅之後其地不過仍歸之番是今勞師動衆反爲助番建碉之舉恐貽笑於國人躍然於番

部矣不如速罷爲宜尋命傳諭訥親曰訥親建礪之策朕再四思維不惟有所難行抑且深爲可慮將謂得尺則尺得寸則寸以此爲自固之計獨不思礪樓非可易成即使能成而我兵究以攻取爲事若再行前進其將再建一礪耶向後屢進不已策將安出且調集大兵本圖制勝今不用以克敵而用之建礪必非所願以朕度之此旨未到之先勢將中止倘其意在必成究屬徒勞無益朕一見此摺卽不以爲然及問在京大臣等亦皆以爲不可朕意張廣泗老於戎行豈有不知而亦隨聲附和在張廣泗未必不謂任事經年未著成效今既有經略肩茲鉅任發謀決策經略裁之是非得失經略當之而彼得袖手旁觀遂其推諉之計如此則所係更大矣訥親不可不知此意況朕命經略前往原以總挈大綱以朕坐籌遙度於京師不如可信之大臣親履行間察衆人之情就目前之勢相機指示據實入告尤爲親切朕命訥親前往之本意也至宣猷效力仍當責之張廣泗等使各盡其長即使朕親行亦不過調度指揮而所重自在羣策羣力從來耕當問奴織當問婢若論用兵熟練朕必不肯謂訥親優於張廣泗卽訥親亦必能知此蓋經略統領全軍衆人之謀皆其謀衆人之力皆其力豈必自出所見方爲己功耶

而朕更有深慮者大兵聚久變患易生在固原平居無事之時尙有一夫夜呼倉卒四起之變何況軍中親信僅滿洲百數十人其餘皆調發客兵及土司蠻卒本非世受深恩爲我心膂者此浮寄孤懸孰無家室鄉里之思而勞役不已奏凱無期版築方殷鋒銳莫展肘腋之慮良可寒心在部曲士族固不可不鼓其勇氣而鋒鏑之下人孰甘心驅之太迫變計生焉倘有不測豈不重貽西顧憂耶此所爲反復以思而食不甘味寢不安枕凡思慮所及不得不備細告知訥親使悉知之也金川之役本不容中止況任舉之歿失我大帥如其置之不問何以慰彼忠魂雪我衆憤但憤兵亦將略所忌自宜因時度勢以爲進止倘險地必不可爭或別有出奇制勝之善策如古所稱用間用術或致甘言或懸重購使彼有內潰之機然後可乘其敝溽暑炎蒸瘴癘毒虐暴師日久無刻不勞軫念大學士起居善自愛護并傳諭軍中諸大臣將弁其各慎重閏七月訥親同張廣泗請增調兵三萬於明年進剿訥親又奏言進剿事如秋間不能前進應先期籌畫加調官兵臣思增兵轉餉需費浩繁若酌留現兵萬餘據要害相機攻擊其接壤土司令各於本境自爲防禦似狡寇亦能坐困第久駐終非長策若二三年後再集官兵乘賊疲

困全銳進搗自必一舉成功此二三年內或機會可乘擒獲賊酋亦未可定若以
迅奏膚功而論仍不如明年接辦之可速也奏入嚴旨切責尋訥親同張廣泗會
奏進軍情形命傳諭曰覽所奏各摺幾於智勇俱困金川小醜不意負固難於剿
滅遂至於此官兵攻撲進不能前退不能守卽小小獲勝尙未傷彼皮毛何況批
卻導窾得其要領以成破竹之勢奏內所稱逆番來歲口食不繼可以坐待其斃
我兵果能奮勇攻奪數處賊必內潰又稱賊巢用度果否至於匱乏究難臆度旣
云可以坐斃又云究難臆度始終迄無定見而所稱來歲增兵三萬是否能奏膚
功之處亦非確有所見必不可已之成謀夫兩軍相持兵力無必不能施之地旣
已用兵豈容撤退古有裹氈縋險衣草自蔽種種奇策以成大功者獨非於此等
處施之乎今乃欲待其自斃自斃果有期可待乎如果實有不能剿滅之勢何妨
明言其所以不能之故直請班師今又未能確指其必不可勝而欲以三萬衆嘗
試之爲此無可奈何之說卿等身在我行日擊情形尙不能確有成算游移兩可
朕於數千里外何從批示何從傳諭且大兵有四萬之衆賊止三千餘人何以賊
應我則覺有餘我攻賊惟慮不足日久懸望軍營消息而奏到乃復如是殊非所

料卿等可將實在情形或增兵必可成功或用兵勢有不可詳悉審度歸於一是迅速奏聞勿爲兩歧之說要知闕外之事惟卿等專責朕固不能遙制也九月召訥親來京撤回經略印上召諸王大臣等面諭曰訥親素未蒞師摧鋒陷陣之事實非所長祇以張廣泗調集大兵布置經年當有成算計經略抵營之日正當告捷之時便可籌辦善後事宜自屬訥親所優爲耳初不料訥親至軍於彼處情形既未諳悉將吏人等方且聳聽經略之指揮而伊並無奇謀異算以悚動衆心且身圖安逸並未親臨行陣士氣因以懈弛不思廷臣中平日受恩深重者孰如訥親其應感激圖報者孰如訥親雖朕因伊體素弱屢經降旨令隨時將息此在朕體恤之道則然然以滿洲大臣當此戎馬倥傯之時孰不思同仇共憤翦此朝食而訥親乃因此旨輒安坐帳中不親臨陣朕猶待之數月及見所奏竟稱兵士向礮放槍伊自帳中望見火光是從未奮勇督師矣於理可乎卽謂大臣舉動有關國體當爲意外之虞固不可親冒矢石獨不可臨陣指揮使士心踴躍乎況意外之虞亦屬未然之事一何示怯至此及朕嚴加飭諭如前往督戰卽已奪礮據險設早能如是其克捷又豈僅此乎且自古豈有開關延敵坐獲全勝之理可見前

此實由伊等頓兵不進不能勇往出力而非堅礪之必不可克也訥親既曠日持久了無成績朕不得已欲召之回京又恐於伊顏面有關屢次傳諭詢問且寬其期以待捷音誠使得朕此旨而奮不顧身則自閏七月以至於今尙可有所剿洗以蓋前愆也且獨不思將在外君命有所不受今命伊前往者何意所辦者何事回京將何以報命而乃一聞召入之旨如獲更生並不請命留駐以待事竣惟以入覲得以將實在情形陳奏明歲再往軍營爲詞不知軍營有何必須面奏之情形又有何事爲朕所未悉僕僕往來有是政體乎大臣躬膺重寄豈宜若是乎滿洲大臣身當軍旅又豈曾有是事乎至傅爾丹班第等同在軍中自列名請安而外軍中事宜從無一字奏及因降旨詢問而訥親卽以傅爾丹等覆奏之詞敘入摺內批閱之下不知其孰爲傅爾丹等之言孰爲訥親之言朕因思從前西北兩路用兵大臣等習氣惟以摺奏相傾軋訥親親見其事以此爲戒故不令傅爾丹等紛紛陳奏復降旨詢問而訥親並未覆奏傅爾丹等亦至今默無一語豈訥親並未向伊等傳諭耶夫不使衆人之鼓舌搖唇可也而廣思集益理所宜然今在己旣無奇謀異策可以服衆而同事之人又不使之陳一謀建一議此何心也若

恐他人揭其所短制之使不入告則伊在軍有何事畏人攻訐而必不使人陳奏乎且軍務非他事可比勝則雖欲斥其短而不能不勝則人人指摘欲掩之亦不得也且廷臣中孰有能於朕前公行萋菲者乎自朕臨御至今又曾有受人搖惑者乎凡在大臣等皆不可存此心而訥親尤爲不可若謂朕屢次飭諭或由軍機大臣中有與訥親不相能者覬覦而傾陷之於朕前爲浸潤之譖則是伊等能排擠訥親安知將來又無人排擠伊等乎卽訥親自思數年以來曾有爲所排擠而朕不能覺察者乎且朕於訥親至軍兩月之久見其漫無建立始降旨督飭而前後陳奏自相矛盾之處不可枚舉在訥親平日豈非能辦事之大臣朕亦初不以張廣泗之老師糜餉移其責於訥親而訥親以第一受恩之人誠不料其舛謬若此今若按法以繩人將謂訥親平時宣力如此尙不能免何以示勸若委曲含容人又將謂前此慶復之草率朦混今此張廣泗之稽遲舛謬朕則知之而終於訥親則不知何以示懲二者朕必居一於此朕誠不能辭其過亦實爲抱慙今觀金川窮寇以國家全盛之力何患不能成功今年不捷不妨待之來年惟是大臣如訥親其受恩非他人比此次奉命經略乃諸事錯誤一至於此殊出意外朕實難

以措置特降此旨著訥親明白回奏尋命革訥親職赴北路軍營自備鞍馬效力贖罪諭曰訥親身爲大學士膺此經略重任前駐軍營漫無勝算且身圖安逸並不親臨督陣鼓勵衆心轉以建礪株守爲長策及傳諭欲召取回京伊並不計軍情緊要非克捷無以報命而以面奏情形爲辭亟思回京朕以國體攸關寬期以待伊復無敵愾之志惟事遷延時日以俟歸期至陳奏之事矛盾舛錯不可枚舉與伊尋常之辦事精詳急公黽勉竟似出於兩人夫大臣誼均休戚平時之眷待優隆正欲其緩急足恃能勝艱鉅之任爲國分憂耳若僅以任職勤敏爲能則朕假之事權憑借威柄苟非庸劣皆可優爲卽以操守而論伊係勳封世祿且數年以來朕時加賞賚非他人可比縱饋遺賄賂豈足以動其心是苞苴不入亦不得謂之潔清惟於重大緊要之關鍵方足以見報稱之實心今訥親乃至於此伊卽不自顧惜獨不爲朕用人顏面計乎從前年羹堯隆科多等在皇考時恣肆妄行事發之時皆卽按法治罪朕自臨御以來以恩禮馭下然卽大學士鄂爾泰張廷玉亦未嘗不時加戒飭使不敢縱正所以保全大臣至訥親之受朕殊恩廷臣無出其右乃中外所共知者十三年以來所以教訓成全幸免隕越者以其尙能承

受朕恩耳今伊福薄災生於此緊要關鍵處乖張錯謬一至於此朕反復思之實無以自解論其負恩之罪理應拏交刑部問擬但觀其退縮偷安之意卽就獄亦非所深恥然在朕十餘年加恩眷舊終不忍令其拘繫囹圄著派侍衛鄂實德山齎朕此旨於途次傳諭奉到諭旨之處德山卽押訥親前赴軍營所有前奏尙有面陳情形卽著伊繕摺交與富成齎奏呈覽十月諸王大臣等合詞糾參訥親負恩乖謬請拏交刑部治罪上命遵前旨行翌日諭曰朕自御極以來大臣中第一受恩者莫如訥親金川雖云小醜而老師糜餉克捷無期凡在臣子皆有同仇敵愾之念訥親身爲大學士從前在京時不過於軍機奏到隨常辦理從未向朕奏及逆酋猖獗如此將來作何了局欲請身往視師彼時傳恆卽曾陳奏願效前驅朕以封疆大吏自能辦理不必特遣大臣卽應派往傳恆亦不可居訥親之先未經俞允及經略需人因以付之訥親朕意以伊平日受朕如許厚恩自知奮勉乃起程之時全不踴躍彼其意以爲軍前調集大兵指期克捷勝則引爲己功卽不勝亦可奉身而退至朕用人顏面所關國家軍旅之重皆所不計其隱衷亦不可問及至軍營張廣泗方觀望不前而伊復茫無成算措置乖張朕待之兩月之久

而所奏到乃請建礮與賊共險不思以士卒攻討之力轉使建礮資寇是其第一謀畫既已貽笑衆人矣自是始有申飭之旨然猶望其成功而乃身圖安逸並未親履戎行竟敢奏稱軍士夤夜向礮放槍伊在營中望見火光經朕督飭始行前進而近所奏阿利山之役我兵屢次退回因伊等在彼未至大奔及伊等回營我兵數十人卽鳥獸散將領不復相顧觀此情形是衆未奔而伊等輒已先退又何怪士卒之望風潰散以受恩之滿洲大臣經略重務債事至此尙何地可以自容乎至前後摺奏於所奉諭旨緊要情節概不切實明白回奏惟以浮詞架空了事竟有全未覆奏者卽同事之軍前大臣等經朕再三傳諭終不令其陳奏一字朕因其久無就緒不得已傳諭詢問示以欲召回京本欲激之使知愧奮或有奏功之日正以召之者促之乃伊一得此旨如獲更生卽置軍務於度外託言有面奏情形亟欲回京試思有何不能言之情形而必待面奏乎此不過思家耳以訥親平日之心思智慮且事朕十有三年若謂任其經略無方概行退避竟不重治其罪將視朕爲何如主伊非不慮及此而敢於遽請回京者衆人能知其故乎伊意中明知不稱任使朕必重治其罪然治罪亦不過如慶復之革職家居轉得優游

自逸爲嗣續計向來賞賚豐厚儘足自娛而金川之役傅恆必自請督師朕亦必以此任相屬而彼地險碁林立攻取維艱卽傅恆亦未必遽能奏績不過與伊相等卽能成功亦傅恆之福命所有與伊無所加損如其不成朕又必重治傅恆之罪而眷念舊臣伊必且復用是治罪之條乃伊所預料卽奉到前旨亦無所悔懼惟此旨洞鑒其肺腑伊當俯首無辭始悔其蓄謀之大謬耳此正朕向所謂小聰明是大糊塗也不如此不足成其爲訥親而衆人之不能見及卽其遜於訥親之處是朕從前任用訥親原未爲誤也何以言之若今不能燭照其隱微治彼以罪而心猶不服則是終爲所誤耳朕臨御羣臣常有能肆其欺蔽而不察者乎至所稱回京而奏情形不知以經略之親信大臣奏摺中何事不可備陳如漢文不能盡者則用滿文滿文不能盡者則用漢文何慮朕之不能詳閱耶前已傳旨令繕摺與富成齋回著再傳諭令伊一一據實明白回奏不得因見朕此旨但知認罪負恩奉職無狀浮詞塞責朕向因人材難得欲栽培成就得一二社稷之臣爲國家任事此朕本意卽用訥親爲經略無非欲滿洲大臣歷練戎旅緩急足恃朕已屢經宣示豈有軍旅重事敢於嘗試耶以朕平時之推心任用訥親卽辦事詳慎

操守潔清舉不足言使伊果於此等軍機重務能調度得宜殫忠竭力俾斯役早竣紆朕西顧之憂卽有小過何妨曲成今訥親負恩負國一至於此非朕所及料亦豈國憲所可容若以向日加恩之故翫法曲宥將來何以用人是以降旨將伊革職發往北路軍營效力贖罪此伊自作之孽非朕以喜怒爲賞罰卽皇祖皇考在天之靈皆所默鑒今諸王文武大臣合辭奏請將訥親交部治罪於法本無可道但須俟伊回奏到日再行酌奪降旨嗣訥親兄兩江總督策楞奏請嚴治訥親罪上曰自有處分豈因人言而定耶會訥親回奏至諭曰訥親所奏更復浮混無恥且皆委過於張廣泗訥親以經略大臣軍中調度皆聽指揮功過無可旁貸豈容一切推卸在張廣泗此番罪譴本無可寬但出之他人尙爲有詞訥親則無可委過如摺內所稱各情節訥親身爲經略果實見其非何難據實參奏卽一面參奏一而提問亦無不可觀其遲回不斷並非伊見不及此蓋以一參張廣泗則軍中之事皆伊所仔肩其責愈重惟留以爲卸過之地將來卽或無功而歸尙可借張廣泗爲之代任其責居心若此是豈受恩深重實心任事之大臣所爲乎況伊摺內所稱自任舉失事卽頓兵二十餘日不敢前進是怯懦委靡全無愧憤激勵

之意咎無可辭至所詢伊並不親身督戰在帳中坐觀諸事亦據一一俯認不諱因奏請將伊交部嚴加議處夫遲誤軍機畏縮觀望設令訥親處分他人罪狀有不問以斬決者乎而自乃僅請交部議處此豈降革所能了局者耶且伊兄策楞昨奏稱訥親於國家軍旅大事如此負恩爲國法所不容請拏交刑部嚴加治罪是伊兄尙知其獲罪重大國法難容而伊乃如此陳奏則是伊全不以軍務之輕重介意非天奪其魄病狂喪心則日無國法不畏三尺辜恩負國莫此爲甚此摺著交部收記尙有續降諭旨究問之事俟伊覆奏到日並請降旨十一月命拏問訥親於所在地方拘禁諭曰訥親從前奉命經略金川軍務退縮偷安乖張貽誤已經降旨革職因伊聞召令回京之旨託言有面奏情形故降旨令其將何事必須面陳一一據實明白繕摺交富成轉奏不得僅以引罪泛詞塞責伊接到前後所降諭旨稍有人心回想十三年來受恩如此深重今於軍旅要務貽誤至此自必中懷愧悔慚赧無地或恐懼失措不能置對尙不至於天良盡泯乃朕閱伊回奏之摺曉曉萬言皆不過掇拾歷來軍營中奏報情形非必須回京面奏之事且稱兵氣之所以挫賊志之所以逞皆因去年張廣泗並未深悉賊情進退失宜所

致而又稱張廣泗並無推諉尙可資其策力懇請令與岳鍾琪分路進剿措詞矛盾乖張至此極矣不思伊身爲經略張廣泗旣進退失宜挫損兵氣自應卽行參處乃稱旣不諳軍旅而又奉旨以戎行責成張廣泗夫訥親旣爲經略不任戎行則所經略者何事豈不大成笑柄耶其餘朕所指出安坐帳中自示懦弱師徒奔潰身先回營種種情節皆自承認而猶思留金川效力俟軍務告竣始往北路軍營且妄思覲朕一面窺其隱衷因朕不卽治其罪暫停發往北路降旨詢問是以轉生希冀之念猶欲遷延時日覬望格外之恩是不復知人間有羞恥事矣君臣之際相臨以分相接以情人孰無過苟事在可恕情猶未絕或量與薄譴棄瑕錄用亦所常有至於關係軍國重務賞罰不容稍假朕亦斷不肯爲姑息之主今訥親所犯如此更何晚蓋之可圖桑榆之可收卽伊亦何顏再與朕相見耶至伊所陳金川善後一摺尤爲可嗤伊在軍前毫無寸進以退縮失誤軍機獲罪罷斥賊尙未平何暇計及善後其與古人所謂何不食肉糜者又奚異乎卽其所謂善後事宜亦撫拾朕前此諭及之事此不過偶爾談論將來或應否如此尙在未定軍機大臣等皆共知之而乃自以爲獻善後之計吁其可怪矣訥親受朕殊遇位至

大學士如此辜恩負國罪狀難道內省略無動念此奏更出朕意想之外伊既自出於頑鈍無恥朕亦不得復以待大臣之禮待之此旨并訥親原摺俱發出俾衆共知之又諭曰訥親辦理金川軍務乖張退縮老師糜餉經諸王文武大臣等參奏朕諭令侍衛富成將伊於奉到諭旨處拏問拘禁其舉動言語並令富成逐一據實陳奏今據富成奏稱訥親云番蠻之事如此難辦後來切不可輕舉妄動但此言我如何敢上紙筆入奏訥親此語實爲巧詐之尤伊受朕恩一十三年推心置腹何事不可陳奏如果賊徑十分險峻伊曾身同士卒盡力進取屢冒鋒刃猶不能克再調勁兵更番前往仍不能采入其阻而供億浩繁徒糜帑項則當以實在情形奏聞請旨罷兵況金川之事自因其與澤旺構釁涉及邊圉不得不發兵致討朕實非利其土地人民輕起兵端前後所降諭旨皆訥親同辦之事迨伊與張廣泗久無成功朕又屢次傳諭令其詳悉斟酌倘有不能殄滅之故即可明言其所以然直請班師毋得含糊兩可且於伊奏摺內批示云豈有軍機重務身爲經略而持此兩議令朕遙度之理如能保明年破賊增兵費餉朕所不惜若終不能成功不妨明云臣力已竭早圖歸計以全始終訥親以親信近臣膺闕外重寄

經朕如此諄切指示亦當遵旨據實覆奏朕豈有不加以裁酌允其所請之理且伊果肯侃侃直陳則此局早已可竣何用糜費如許物力是今歲之稽遲皆訥親之貽誤咎更何辭又或慮奏到時爲軍機大臣及辦事司員所知亦宜親筆密緘直達朕覽何得爲之不敢上紙筆入告此等緊要情節不敢入告豈如伊歷來摺奏摭拾浮言自相矛盾者轉謂敷陳之道當如是耶夫而從而退有後言乃人臣所當切戒訥親所稱後來切不可輕舉妄動之語軍機大臣等能窺見其隱衷乎伊之意自知身名決裂且無子嗣計無所出輒思以不必用兵之言博天下迂愚無識者之稱譽而以窮兵黷武之名歸之於朕此其心懷狡詐實出意想之外朕誠不料十三年以來加以隆恩渥澤而訥親之忍心害理竟至於此或上天以此示朕俾知用人之難耶訥親又云皇上祇恐我膽大我如何當得起訥親退縮偷安不敢衝鋒奪險實乃毫無膽量朕方責其過於畏葸過於膽小何嘗慮其膽大昔伊祖額亦都冒險登陣流矢貫脛著於女牆之上猶能負傷血戰不以爲苦爲國家建立大功今其孫委靡至此實朕所不能解又訥親聞雲梯兵過輒云此皆我罪若我今年辦理得安何至聖心煩躁又令如許滿人受此苦累此言尤爲可

駭滿洲官兵有勇知方一聞調遣無不鼓舞振躍志切同仇皆衆人所共見朕方深嘉悅而訥親乃以爲受此苦累伊從軍營中來爲此浮言搖惑衆心俾衆人聞之不知賊境如何險阻如何艱難此惟經略大學士傅恆忠勇奮發金石同堅不爲所惑耳兵丁一聞此言勇往之氣有不至爲消沮者耶明係伊自不能成功而轉忌他人之成功故爲此語巧於離間衆心而不顧國家之大事此其罪可勝言耶著將此旨曉諭中外知之尋命尙書舒赫德馳驛逮訥親赴軍營會同經略大學士傅恆尙書達勒黨阿嚴審定擬具奏諭曰金川用兵以來張廣泗貽誤於前訥親貽誤於後兩人之罪狀雖一而其處心積慮各有不同至於自逞其私罔恤國事則實皆小人之尤矣今日接到富成所奏訥親明白回奏一摺其乖張舛謬之處經朕所指出者悉無可置辨惟思求見朕面不知伊尙有何顏見朕且求赴軍營效力伊曾爲大學士將欲效士卒奔走猶得覬驍騎校耶其頑鈍無恥實甚視此則張廣泗乃剛愎之小人訥親乃陰柔之小人自當償事一至於此矣訥親身膺重寄退縮無能早爲張廣泗所窺任舉敗後遂至一籌莫展且恐固原兵丁生事曲加重賞轉囑張廣泗彈壓而於張廣泗之挾詐誤公又不據實陳奏意欲

留以爲卸過之地伊兩人互相推諉其過惡之剛柔異而其心則皆不可問也夫
訥親張廣泗在大臣中皆練達政事之員使不遇此等重務均可擁高爵而歷亨
衢優游終老何至敗露若此可見人臣居心惟當一秉至誠使能公忠體國自邀
休佑如其懷私自爲雖以訥親之小心謹密張廣泗之熟嫻軍旅而方寸一壞天
奪其魄雖欲倖免而不能豈不真可畏哉訥親張廣泗固不幸而遇此事而朕因
此而益見知人之難則金川之事未嘗非上天昭示之深仁也朕臨御十三年思
與大小臣工共臻惇大之治而水懦易玩亦朕所深戒豈肯曲法縱容爲姑息之
主耶伊等當此軍國重務而深負朕恩實非意料所及今特明正其罪以彰國憲
乃朕賞罰無私大公至正之道十二月張廣泗既伏誅諭曰訥親自辦金川軍務
以來行事乖張心懷畏縮視士卒死傷漠不動念惟安逸自圖娛樂是耽而於道
路之險阻兵民之疲憊從未據實入告今因軍旅重大不容久誤朕特命大學士
傅恆前往經略調遣滿漢官兵飛芻輓粟籌畫多方設令訥親張廣泗早行奏聞
朕必加以裁酌不至多此一番勞費矣今朕於此事頗爲追悔但辦理已成無中
止之勢卽此而論訥親張廣泗誤國之罪可勝誅耶訥親張廣泗二人乃軍前之

勞人憊卒所共切齒張廣泗雖經伏法而士衆尙未親睹訥親若在成都審明待報未免往返稽遲著舒赫德將訥親帶往軍前會同經略大學士傅恆一面訊明一面即將伊祖遏必隆之刀於營門正法令軍前將弁士卒共見之尋以大兵既撤訥親不必速赴軍營卽於所在正法十四年正月至斑斕山伏誅命銷去訥親所得特加之一等公仍以伊先世軍功之二等公令其兄策楞承襲

楊應琚

楊應琚漢軍正白旗人父廣東巡撫文乾自有傳雍正七年應琚由廕生授戶部員外郎八年擢山西河東道尋調甘肅西寧道乾隆十年二月甘肅巡撫黃廷桂疏薦諭曰楊應琚原係一能員若能進於誠而擴充之正未可量也十四年遷甘肅按察使十五年遷布政使十六年擢巡撫十七年六月丁母憂十月命署山東巡撫十八年六月奏墾沂州府屬荒地千三百餘頃諭曰當實力勸課不可始勤終懈七月疏言兵器惟鳥槍弓箭爲要其大刀長槍近則不如腰刀遠則不如槍箭今沂州登州二營所設大刀長槍兵額現飭鎮臣改習槍箭如願兼習者聽庶收實用上是之十一月奏辦運南河料物全竣上獎其奮勉著實授十九年三月

暫署河東河道總督四月調署兩廣總督六月奏粵省濱海澳港多歧全賴捕盜防奸護衛商旅雖內河與外洋稍別亦重在操舟及知風色水性如用篷用槳緩急進退及河流灣曲橫躍尾追皆須練習至外海戰船按期會哨定有成規但必於搶風趁水看雲審潮之法一一習練始能臨事從容現今切實督訓互相稽查生疏立懲報聞八月實授九月奏出洋貿易留番良民概准回籍下部議行又奏瓊州懸隔海洋平糶倉穀不應照內地拘春末夏初之例應視外洋米船有無隨時開閉並於船多價平時買補以濟兵食詔如所議又奏陸路弁兵多請改水師意以外洋巡哨易於掩飾倖進應不准改調得旨此在行之實力得宜耳十月奏暹羅貢使毆傷通事據國王審明屬實擬罰銀兩現派船戶及通事等呈報禮部懇爲轉達查屬國陪臣無上交天朝大臣之體咨呈原文發回以婉詞開導嗣後無任陪臣越中上嘉其得體十二月奏粵西興安陡河卽灘江發源處向因灘水纖細於湘江內漾潭壩激水注灘以行舟復循崖疊石造陡門以蓄洩乃轉運楚米通商之要道也今壩塌土漏湘水不能分注灘江楚船至全州卽不能進於民食有礙又興安城下陡岸亦有衝刷如遇大水恐及城垣至臨桂陡河爲下達柳

州慶遠漑田運鉛要道向亦造陡束水無阻今俱頽淤田無灌溉思恩採鉛解省供鑄轉運維艱現飭確估動帑修築詔如所請二十年正月奏廣東鹽斤賴廣西之米穀西省又藉東省之鹽斤均爲民食攸關偶遇缺乏卽有淡食之虞請預買餘鹽二萬四千包分貯桂林柳州慶遠梧州等府以資接濟十月奏廉州府屬之欽州及珠場新鄉二司巡檢水土惡劣應改爲烟瘴要缺均下部議行二十一年十二月疏言廣東左翼鎮自雍正元年移駐順德離海尙遠查鎮屬有虎門寨城西南達諸番東北通閩浙其城遙對老萬山兀立大洋諸山羅列自老萬山至橫檔兩山對峙中建礮營尤爲天生險隘不特各省商民船必經卽外洋各國商船出入斷難渡越是虎門實粵東門戶宜以左翼鎮移駐改爲外洋水師缺稽查洋艘操練巡防於海疆有裨軍機大臣議行二十二年七月調閩浙總督十二月奏紹興屬山陰之朱家漣爲海塘頂衝應添建石塘從之二十三年加太子太保二十四年四月調陝甘總督五月奏蘭鞏平慶等府二麥旱傷倉儲不敷支給請給銀兩俾民自買雜糧糊口又奏陝甘馬現在最要已飭用心痊養闕額者設法購補諭曰任重事繁之際卿才尙足以當之一切勉力可也閏六月奏伊犁底定駐

兵屯田必先籌畫查木壘一帶水泉疏暢雖可墾地甚多而氣寒霜雪早降與烏魯木齊距遠特諾果爾長吉羅克倫等處在烏魯木齊一二百里內爲噶爾藏多爾濟部落耕種處地氣暄和宜樹藝擬於凱旋官兵內留五千名以四千名分地墾種以一千名備差明年收穫即可運伊犁至籽種農具爲屯田急需之物應就招徠之商駝四百餘按程給值轉運諭曰所見已得大要悉心爲之七月奏請以安西道移駐哈密安西提督移駐巴里坤又奏甘省薪價日昂肅州東北鄉鴛鴦池一帶產石炭距城七十餘里採運轉便請借工本招商開採從之嗣命改補甘肅總督駐劄肅州九月諭曰甘肅專設總督原爲西陲辦理回部告竣之時甘省幅幘遼闊而言今軍務尙未告成一切軍需多由陝省運甘未便遽照新制轉多掣肘所有陝省事務著楊應琚照舊管轄十月奏庫車回民向例每戶歲納布一疋近數年荒歉棉子俱充食種植乏資現購棉子二百斤解庫車給回民令及時布種報聞十一月晉太子太師二十五年二月奏喀喇沙爾以西各臺近水多可墾地畝原有回民居種經逆酋擾害以致空虛今妖氛掃蕩悉歸版圖應募民往居及時開墾并招集遷徙者復業四月奏葉爾羌附近地名巴爾楚克者通喀什

噶爾大路亦有小路通和闐泉裕土潤現召無業回民保聚耕作又距阿克蘇之多蘭回民雖資畜牧亦藉耕作令在大路左近經理溝渠聽其墾藝阿克蘇葉爾羌兩處各派千總一員駐劄庶千餘里長途不至遼闊而東西兩城聲息相通俱得旨嘉獎十二月奏伊犁阿克蘇葉爾羌應設兵備道三總兵三從之二十六年三月疏請撤南路臺站改歸北路哈密不必駐官一切事宜交巴里坤大臣辦理關展一帶屯務交烏魯木齊大臣稽查所有哈密辦事大臣永寧等應撤諭曰前南路設臺原因捕剿逆回而起此時軍務全竣仍歸北路其事原屬可行至哈密無庸駐官之處所見甚爲紕繆哈密迺新附各回部總匯之地將來安集延巴達克山布魯特等回人往來貿易必得特派統轄大臣爲之彈壓料理方能持國體而悉夷情在隨同駐劄弁兵人等或以爲數衆多隨宜減撤固無不可若將任事大臣徑行撤去諸事一歸巴里坤承辦無論道里紆遠鞭長莫及且將來該處經理之員勢必由督撫等派委武則副將文則道員此等不曉外藩事宜中朝政體非辦理張皇卽因循推委有不損威失馭者乎楊應琚向知任事何乃並不計及其中或因永寧等在彼辦事未免掣肘因爲此奏封疆大吏似此心存畛域豈朕

委任重寄之意乎若永寧等果有徇私舞弊之處何妨直參其人不可撤此一任也二十七年六月奏安西府治向設在淵泉縣米糧食物仰給沙州稽之志乘漢晉皆以沙州爲敦煌郡唐設沙州刺史元爲沙州路今爲新設敦煌縣其地田沃土廣物產饒裕遠勝淵泉請以敦煌爲附郭首縣府治軍臺均宜移設較淵泉近百六十里可省輓運之費沿途水草豐茂於行旅亦便二十八年二月疏請烏魯木齊副將改爲總兵四月疏言駐防涼州之滿洲兵現移駐伊犁涼州應留副都統一員莊浪設城守尉一員管轄俱允行二十九年二月奏陝甘督署應遵旨移駐內地三月諭曰前因西陲辦理軍需令陝甘總督駐筭肅州以便調遣迄今大功久竣新疆屯政已酌定章程而該督仍駐肅州距西安會城較遠於腹地屬員案牘控馭轉多隔礙朕意若將總督移駐蘭州巡撫原署則東西道里適均不難居中節制而甘肅巡撫亦可裁汰當經傳諭楊應琚令其熟籌妥議今據覆奏與朕所見膺合著將蘭州巡撫衙門改爲督署令該督移駐兼管撫事無庸更設巡撫所有原設撫標卽改爲督標七月授東閣大學士仍留陝甘總督任八月奏裁涼州同知移設伊犁三十年奏鎮番縣改築土城俱議行三十一年正月諭曰現

征剿莽匪一切軍務均須調度總督劉藻究係書生未嫻軍旅楊應琚久任陝甘籌辦軍需事務伊所熟諳著調補雲貴總督三月疏言莽子時出爲匪養癰已非一日上年莽匪之來分爲兩道一係賊目素領散撰所領從左進攻破九龍江蔓延至猛混一係孟良應襲土司召丙之堂兄召散糾合莽子從右進攻破猛遮與猛混之莽匪會合焚燬村寨劉藻意在含糊發兵又無紀律致賊勢日張今官兵俱調齊經總兵劉德成華封分路夾攻劉德成克復猛混華封克復猛遮現今幹員稽查督催務乘兵威直搗巢穴盡絕根株四月奏搗平整欠賊巢七月奏木邦土司具緬文呈請歸附現因瘴盛難行俟九月內乞兵保護查木邦爲永順各土司門戶若不乘機辦理恐迤西未能寧謐已將調集之兵密爲佈置諭曰乘機辦理亦屬應爲但當鼓勵戎行大破綠旗虛僞習氣耳又奏孟良路通木邦應暫留官兵彈壓堵禦得旨萬里以外不可遙度勉力爲之九月奏緬甸建城於阿瓦又名三江城由永昌往有水陸三路可通中所轄二十餘土司惟木邦蠻暮爲伊門戶緬酋自甕籍牙篡位伊子孟洛孟毒繼立誅求無厭各土司解體臣親赴永昌乘機妥辦又奏副將趙宏榜帶兵八百直抵新街緬匪四五千乘船猝至趙宏榜

領兵拒敵殺賊甚衆緬匪又添二千餘人宏榜與之相持兩日一夜因兵少退回是時新街爲緬甸所據應琚信軍營虛報不言失事緬甸卽莽子先時軍報分爲二以資掩飾是後始祇稱緬甸矣十月奏整賣景線景海各頭目相率歸誠十一月雲南巡撫湯聘奏楊應琚患病奉諭令其加意調攝伊子寶慶府知府楊重穀往滇看視並賞藥丸荷包十二月疏謝並奏總兵朱崙進兵楞木殺賊四百餘上以應琚病尙未愈伊子按察使楊重英卽由江蘇馳往永昌看視並交應琚酌委查辦事務旋奏病體漸愈賞給玉暖手二大小荷包六琺瑯鼻烟壺一朱崙之進兵楞木也遇賊不奮擊賊詭求退兵崙遂退至戶臘撒復退至隴川漸回內地賊因尾後竄入與萬仞岡潛越之賊合擾隴川應琚聞緬甸乞退兵促崙受其降而賊已分路旁軼渡底麻江擾木邦崙按兵不追仍以虛詞報總督三十二年正月應琚據崙所報奏曰官兵自上年十一月至十二月剿殺緬匪幾及萬餘緬酋胞弟卜坑并其領兵大頭目赴朱崙軍營乞降據言屢被懲創人人凜懼情願散兵歸順至蠻暮新街向爲中外貿易之區懇俯准賞給貿易上嚴斥之諭曰朕以緬甸僻在荒陬未嘗有興師勤遠之意因楊應琚閱涉有年必非輕率喜事者故諭

令量勢熟籌以定進止該督自當慎之於始如木邦等實因衆心畔散窘急來歸固可就其已渙之勢設法招徠使其自成瓦解亦應計及受降以後如何撫馭綏靖禦其外患俾之永隸版圖若其間稍慮有棘手之處原無妨拒而不納此所謂可行則行可止則止之要領也乃該督輒前往親受其降及緬匪率衆至蠻暮騷擾以業經歸附之疆自不可聽其蹂躪既已發兵進剿卽當殲賊衆以衛降蠻乃遽聽其頭目一語謂彼酋長乞降請給還已附之地遂欲將就了局方在交鋒之際並未制勝克捷遽思歇手尙復成何事體楊應琚卽未身親軍旅前在陝甘總督任內西陲耆定一事朕如何運籌指示豈竟毫無聞見乎或伊赴滇時本係病後神志昏惰誤聽綠營將弁遂致辦理貽誤亦未可定此次開誠訓諭楊應琚當知感激毋得稍有隱飾以速愆戾時提督李時升逗遛不前甫至鐵壁關卽退駐杉木籠賊益紛擾應琚旋奏猛卯邊外緬匪數千欲至木邦滋擾提督李時升會同朱崙派兵迎剿前後殺賊四千餘諭曰楊應琚前次輕信綠營誑語報殺賊萬餘早知其必係虛妄今又奏殺四千有餘果爾是我軍威大振賊當望風披靡何以猛卯邊境復容賊匪竄入而兵並未聞有出境剿賊之事其爲欺飾尤屬顯然

而前次所奏緬酋遣頭目乞降之語亦全係粉飾捏報楊應琚辦理此事前後錯謬之處屢經開導指示若再不知改悔斷不能曲爲原貸矣二月奏朱崙藐敵輕進上斥其仍屬虛詞三月奏誤聽虛詞辦理舛謬惟有痛改前非不敢再有怠玩諭曰趙宏榜新街小挫自應鼓勵戎行前驅深入楊應琚見事稍棘手憂惶成疾神志昏憤軍營重務惟委之朱崙一人李時升又不親自董率任其逞緣營虛張粉飾惡習屢次誑報楊應琚甘受其愚以辦理軍務之總督竟成軍營報事之人不甚可笑乎李時升朱崙實此案罪魁業經革職拏問楊應琚此次仍不將李時升朱崙嚴行參處種種錯謬均出情理之外若仍令其復膺重任貽誤更大楊應琚著來京旋革職四月雲南巡撫鄂寧奏監軍楊重英現往普洱諭曰前令楊重英馳往雲南軍營其時楊應琚乖張荒謬各罪狀尙未昭著朕念其或因病後心神失據伊子楊重英令其前往襄助乃該省竟稱爲監軍實爲不諳事體楊應琚以總督膺剿賊重寄斷無命他省臬司往監督臣之理況楊重英又係其子豈有以子而監父乎楊應琚或以伊子奉命來滇輒自引爲榮寵遂爾張大其詞不顧稱名之妄而所屬各員轉相傳述加以豔稱不可不亟爲改正現已令明瑞前往

雲南辦理軍務楊重英著交與明瑞以道府銜聽差委至楊重毅前此諭令至永昌侍伊父疾今已回省城將赴湖南原任楊應琚現在自取罪戾雖罪人不孥其子無庸一體坐罪但楊應琚如此負恩誤國其子豈可仍舊服官安享爵祿乎楊重毅著革職同楊應琚進京有問訊之處應琚旋奏楊重毅杖斃原任騰越州陳廷獻家人汪潮命孥交雲南巡撫審鞫治罪五月鄂寧疏劾楊應琚輕率邀功模稜僨事又託名寬大姑息因循以致將弁兵丁毫無約束貽誤軍務及事機已壞愈加掩飾卽如緬匪乞降一事查緬匪連營隴川繞出萬仞關之後並未窮蹙何遽肯傾心納款至所稱殺賊萬餘其時萬仞關失守我軍防禦不暇兵氣大挫安有殺賊甚多之事楊應琚前後檄調官兵共二萬二千有餘忽調忽撤虛糜廩餉駐守之地並不詳考情形信口侈陳明係掩飾一時之計得旨皆實在罪案無可置辯者時李時升朱崙俱逮繫刑部論立斬如律閏七月大學士等審擬應琚應斬決命加恩賜令自盡鄂寧奏楊重毅擬絞監候十一月正法三十三年二月楊重英隨將軍明瑞進剿緬甸明瑞戰歿於猛育重英爲緬匪所執六月副將軍阿里袞奏楊重英轉據賊情具呈軍營諭曰楊重英世受國恩被賊拘執不能捐軀

致命覘顏視息楊重英之子著拏交刑部五十三年六月緬甸奉表歸順雲貴總督富綱飭令其送還重英上命不必向索既而緬甸送還重英富綱奏重英無從順緬甸情事得旨楊重英之子楊長齡著行釋放九月諭曰原任道銜楊重英前在緬甸羈留二十一載念其獨居緬寺並未娶妻生子尙知顧惜名節較之漢時蘇武奉使外域卽在彼娶婦生子者差勝現在緬甸款關投誠奉表納貢業將楊重英送出伊本係無罪之人在途因病身故殊堪憫惻著加恩賞給道員職銜以示軫卹其子楊長齡早經加恩釋放著俟營厝事畢交該旗帶領引見重英子長齡現任三等待衛兼公中佐領

明瑞

明瑞富察氏滿洲鑲黃旗人一等公富文子乾隆十四年由官學生襲世爵授二等侍衛二十一年四月管理健銳營五月命以副都統銜赴西路軍營在領隊大臣上行走時阿睦爾撒納叛竄哈薩克明瑞隨定西將軍達勒黨阿追之再與哈薩克戰多斬獲上嘉之授副都統二十三年四月追擊推素隆集砦逃人八十餘戶降之殲其拒戰者收駝馬軍器得旨嘉獎十一月授戶部右侍郎二十四年三

月授參贊大臣御前侍衛尋諭曰明瑞自到軍營凡遇戰陣領兵奮勇行走可嘉加恩於見襲公爵加賞毅勇字號授爲承恩毅勇公五月隨將軍兆惠剿逆回霍集占於葉爾羌殺功賞雲騎尉世職八月逆酋大小和卓木遁率銳卒九百追及於和斯庫魯克山賊衆六千餘負嵎固守奮擊之賊大敗尋復恃其馬力來拒陣斬賊五百餘級生擒及傷竄者無算諭交部從優議敘十月賞戴雙眼花翎二十五年奉旨明瑞所得之雲騎尉與伊弟奎林承襲明瑞承襲一等承恩毅勇公世襲罔替二十六年伊犁回部蕞功命圖形紫光閣御製贊曰椒室懿親年少志雄謂可造就俾學從戎獨出獨入旣忠且壯屢列宏勳愜予所望五月授正白旗漢軍都統尋轉左侍郎二十七年三月詔赴伊犁九月授領侍衛內大臣十月授伊犁將軍二十八年三月敘平定準噶爾及回部功給騎都尉世職哈薩克汗阿布勒比斯來索逃回伊犁之額魯特明瑞以準噶爾已平額魯特等投回伊犁乃其故土斥責之並請敕下烏里雅蘇臺將軍一體辦理諭曰明瑞所辦甚爲得體從前雖無彼此不留逃人之言但成衮扎布曾將自哈薩克逃出之額魯特給回阿布勒比斯遂欲援以爲例著傳諭成衮扎布等嗣後遇此等事俱照明瑞等所辦

駁之先是明瑞面奉諭旨籌辦塔爾巴哈臺駐兵事宜至是奏屯田兵應駐雅爾城留馬兵三百照管貿易餘馬兵千二百交領隊大臣周圍巡查雅爾與伊犁多往返文移請自額敏河沿至巴爾楚克沁達蘭設大卡倫三各駐兵三十其庫克托木嶺等處酌安卡倫則塔爾巴哈臺一帶聲勢相接見今烏魯木齊駐兵較多於巴里坤請將二處辦事大臣撤回巴里坤提督移駐烏魯木齊總兵移駐巴里坤奏入詔以烏魯木齊大臣移駐雅爾餘如所請二十九年四月奏請伊犁添設理事同知從之十二月疏言雅爾等處駐兵屯田所需軍器於綠旗兵內挑選匠作購備物料所有臨時添加輓車輛之馬俱於牧羣撥用報聞三十年二月烏什小伯克賴黑木圖拉等聚衆五百餘乘夜焚掠據城爲變明瑞派副都統觀音保往援旋聞駐烏什副都統素誠自戕卽統兵進時參贊納世通先帶兵至烏什之鄂托巴什觀音保至納世通派守隘不令進剿復行文止明瑞兵前進明瑞慮觀音保兵旣撥防其進剿兵半係回人及布魯特不可恃仍統兵進奏入上以所辦甚合嘉之三月抵烏什賊衆二千餘來犯明瑞與觀音保等擊之奪礮臺七殺賊二百餘負傷入城山險城堅明瑞設防困之復遵旨查奏素誠狂縱激變及納世

通凌辱回衆副都統弁塔哈掩飾兵敗狀命尙書阿桂赴烏什傳旨將納世通弁塔哈正法賊困守旣久謀夜襲大營我軍偵知之預設備賴黑木圖拉中箭死賊復推其父額巴木圖拉爲阿奇木悉衆死守明瑞簡巴圖魯兵六百餘中夜攜雲梯分道潛往薄其城先登東北隅賊未覺挺刃交下守陴賊驚竄卽舉火繼進循城北至東北毀其堞天明收軍仍偪城築壘斷其樵汲賊糧盡內潰八月疏報稱克復烏什城上以所奏簡略敕明瑞阿桂將入城擒賊情形逐一奏聞尋會奏領兵築堞圍城原充烏什商伯克沙布勒縛首逆額色木圖拉及助逆要犯四十二人以獻首逆有名賊犯分別正法其被賊拘及匠孺婦女萬餘口分起解送伊犁諭曰賊人戕我大臣官兵以死拒守及長圍久迫始縛獻首惡希冀苟免誅戮準以天理人情豈復可赦惟盡以軍法從事始足申國憲而儆愚頑今伊等旣從事姑息著將送往伊犁人等卽交伊二人養贍交部卽嚴加議處又諭曰素誠等苦累回人各情節從前得之俘囚之口今額色木圖拉等正犯旣經就獲理應嚴訊起釁緣由及素誠所犯是否屬實使情罪確鑿以成信讞乃伊等概置之不問輒將賊黨正法有是理乎明瑞阿桂此次辦理錯謬不得不交部議處以示懲創其

在事將弁兵丁仍交部分別議敘部議革明瑞阿桂職詔從寬留任明瑞尋奏酌留兵五百駐守留原協領伊昌阿侍衛舒明阿理工作原御史忠德理糧餉調巴里坤遊擊陳堯典理屯田得旨烏什事竣滿洲索倫兵無須多駐著留滿洲兵一百名索倫兵一百名十月會奏回部事宜一阿奇木之權宜分一格納坦之私派宜革一回人之差役宜均一都官伯克之補用宜公一伯克等之親隨宜節一賦役之定額宜明一民人之居處宜別一伯克等與大臣官員相見之儀宜定議如所請行三十二年緬甸滋擾總督楊應琚以措置乖方獲罪三月命明瑞爲雲貴總督兼兵部尙書議政大臣經理軍務六月奏言永昌騰越至順寧威遠普洱沿邊土境延袤二千餘里旁途側出處處駐兵卽二三萬衆不敷分派臣等酌議土境扼要總區如迤東之九龍江迤西之隴川適中之黑山門應各酌留一營派土練固守委妥員統領選勇幹馬兵士練不時遠偵遇賊隨時剿逐其小路令總區將弁派人時往遊巡庶防兵減而聲勢不分至分路進剿臣訪由九龍江一帶出口至阿瓦賊巢係由東轉南折而西隔越滾弄江下游倍遠新街水路爲緬匪要地必竭力守禦新街以東俱石礮小泐舟不達擬於新街上游伐木造船使木片

沿江下先聲牽綴大兵自永昌騰越出口以宛頂木邦一路爲正兵餘臨期相機或分兩路由猛密等處剋期並進叢雜僻徑隨時出奇設疑使賊疲於奔救無暇他出窺伺我軍裹糧前進較遞運多節省至奏摺文報黑山門遮放以內仍設臺站卽於進剿官兵內選妥幹勇壯數十齎交黑山門轉遞如經過外夷部落有誠心向化者再於其部落留兵設站遞送上嘉之十月授將軍管理總督事務十一月由宛頂木邦進抵白小破賊寨前渡大疊江錫箔卡以西擊敗賊伏兵至蠻結四山環繞賊立十六寨防守用溼木交排實以土環浚深溝外密豎木柵內立象陣伏兵明瑞統兵居中令領隊大臣扎拉豐阿李全踞其東觀音保長青踞其西賊突出犯西隊觀音保長青奮力剿擊明瑞督本隊兵並進斬級二百餘賊退保柵乃留兵二千令副都統伍三泰音濟圖達興阿張兩翼以壯聲勢分滿洲綠旗兵爲十二隊明瑞首先進擊賊驅羣象拒明瑞目受槍傷策馬指揮不少挫官兵奮擊羣象反奔我兵毀柵進無不一當百偪第二柵貴州藤牌兵王連攀柵躍入縱橫賊隊中擊殺十餘人我軍遂擁入鼓勇剿殺自申至戌賊棄寨竄斬級二十餘生擒三十四人獲軍械糧畜無算捷聞諭曰明瑞秉性純誠才優幹濟前者西

陞之役每身先士卒效績宣猷昨歲來京陛見方值緬酋滋事前督臣調度失宜因令節制雲貴並授爲將軍領兵進剿自任事以來凡辦理軍營諸事均能悉心籌畫動合機宜自木邦整隊深入於白小地方統衆毀寨今行次蠻結復親冒矢石殲賊因糧摧堅陷銳以致日受槍傷猶鼓勇直前克揚我武自此酋衆望風驚潰刻日直搗賊巢佇聞捷奏朕心深爲嘉慰明瑞見在所襲之公係承恩世爵今旣屢著殊績自應特沛恩施用示優異著授爲一等誠嘉毅勇公賞給黃帶紅寶石頂四團龍補服所有原襲承恩公著伊弟奎林承襲十二月師次革竜地近天生橋渡口賊豫毀兩旁所植大木於山頂立柵明瑞令達興阿率兵二千仍由大路進佯爲奪取渡口之勢自督兵從閒道繞至天生橋河上流乘霧畢渡進據山梁賊衆驚潰我兵進至象孔取道猛籠土司境就糧遇賊擊敗之士司逃避搜得窖米二萬餘石駐兵三日趨猛密躡賊境數十里屢戰皆捷旋由大山移駐小猛育連攻賊營時參贊大臣額勒登額頓兵旱塔退回虎踞避賊繞從內地小隴川緩行巡撫鄂寧檄援不應賊偵知孤軍併力攻圍我兵火藥糧餉俱匱以疲馬羸作三日糧三十三年二月明瑞令將領分隊以次衝出自冒矢石殿後胸背被槍

陣亡都統扎拉豐阿護軍統領觀音保等亦歿於陣事聞上軫悼特旨照班第例從優議卹御製輓詩曰蠻結之捷鼓勇進孤軍深入心牽縈屢催繼援竟弗援債轅駑馬誠堪驚然猶因糧剿猛密計當兩路兵合并誰料援師竟避賊強弩未破魯縞輕蜂屯蟻雜截歸路將軍體卹諸孱兵攜數勇士獨殿後不虞中要害斯傾嗟哉捐軀因爲國痛惜如失股與肱雙忠雙烈及雙義三逢斯四何爲情要當專祠表勲績俾爾千古存如生恨緬事益難中止雪讐大舉期功成四月柩至京上親臨奠酌旋賜祭葬諡果烈諭曰將軍公明瑞夙秉忠誠歷著勲績昨命統兵進剿緬匪身先士卒屢挫賊鋒乃以懸軍深入而額勒登額等有心逗遛後援不繼因於猛臘地方保護諸軍身留殿後衝冒矢石以受傷身殞已降旨加恩優卹並入祀昭忠祠以酬忠藎從前駐藏大臣傅清拉布敦鋤凶死事曾敕建雙忠祠秩在祀典茲明瑞勤事捐軀義烈尤堪嘉尙著循前例於京師特建專祠舉行歲祀其先後陣亡之都統扎拉豐阿護軍統領觀音保總兵李全王廷玉均予入祠從祀用慰忠魂嗣建旌勇祠御書賜額曰折衝抒藎四十四年御製懷舊詩列五功臣中詩曰凡經百餘戰戰必先衆軍不謂世家胄而有如此人讀書知大義輓勁

鮮與倫短身既精悍謀略兼出羣功難僂指數嘉賚匪因親征緬次猛臘獨入克捷頻恨愚忌功者逍遙河上陳力戰絕後繼終焉捐其身於爾無悔怨於我增悲辛不須讀杜牧謂過使趙君子惠倫襲一等誠嘉毅勇公世爵官至奉宸院卿

珠魯訥

珠魯訥滿洲鑲白旗人姓那爾氏乾隆二十年繙譯舉人二十一年以筆帖式在軍機處行走遷吏部主事二十四年遷員外郎二十七年調戶部顏料庫三十一年正月擢湖廣荊州右翼副都統尋授禮部侍郎五月調工部兼正黃旗滿洲副都統十月署戶部侍郎三十二年正月兼署兵部八月命爲參贊大臣駐雅爾尋赴雲南軍營統綠營兵四千駐木邦土司薨團自莽什率七百餘人來降請於清水河招商復業珠魯訥派弁兵彈壓十二月擺夷猥歇等五十人突出竹木林前鋒瑚什布把總姚俊擊之遂棄械降珠魯訥鞠得猥歇等爲緬賊守城狀盡斬以徇已而賊伏千家寨劫我偵事兵珠魯訥派巴圖魯侍衛色布騰效力總兵索柱等乘夜搜捕賊潛遁派色布騰渡大疊江錫箔城抵將軍明瑞營復令巴圖魯茂漢探錫箔城抵松寨路得旨嘉獎將軍明瑞建橋大疊江兵得濟珠魯訥防賊潛

毀令參將王棟領前鋒護軍十兵五百駐守疏入報聞三十三年正月疏言自木邦至阿瓦城呼橋錫箔結工宋賽順貴應設五臺錫箔隣江險要派滿洲兵四百綠營兵三百餘四臺派滿洲兵二百綠營兵二百每臺撥馬六十以壯聲援上嘉之時珠魯訥派索柱帶兵千人駐天生橋錫箔江等處賊掩至參將王棟等接戰兩日賊驅衆運木造橋我兵衝擊賊乘勢毀錫箔橋索柱等退守葫蘆口賊勢擾木邦珠魯訥派總兵胡大猷領兵五百迎擊西山賊守備龔田守領兵二百迎擊東山賊珠魯訥率兵晝夜攻擊賊詭言退木邦緩我兵未幾賊焚遊擊福珠營綠營兵潰賊夜圍中營珠魯訥手書奏交筆帖式福祿突圍出旋自盡事聞諭曰侍郎珠魯訥以參贊大臣駐劄木邦策應軍營因索柱領兵赴天生橋遇賊退回並棄錫箔橋梁不守以致賊匪尾大滋擾木邦珠魯訥悉力拒守禦戰相持經十餘日尋以所統兵丁俱係綠營怯懦成習見旁近小營失火紛紛潰散珠魯訥獨力不支卽於營內自盡雖與臨陣捐軀者相去一間其情亦屬可憫所有應行優卹之處該部查例具奏賜祭葬如例命入祀昭忠祠

德福

德福蒙古正藍旗人姓巴魯特氏乾隆十三年由前鋒派往金川軍營十四年撤還授前鋒校二十年從征達瓦齊二十三年隨將軍兆惠剿逆回霍集占於葉爾羌師旋敘功賞給雲騎尉世職二十六年授副前鋒參領三十二年赴雲南軍營賜戴孔雀翎題補東川營參將將軍明瑞擊賊於蠻結猛育等處德福均在事有功遷騰越營副將三十三年擢鶴麗鎮總兵三十四年偕侍衛巴朗克車德等剿賊於猛戛賊酋苗温等敗遁斬獲甚衆尋隨大軍進攻老官屯賊據寨以死拒德福身先督戰被創死之經略傅恆以聞諭曰總兵德福身先士卒奮勇捐軀深爲軫惻著入祀旌勇祠所有應得卹典該部察例具奏尋賜祭葬如例並命入祀昭忠祠子音德赫廕都司襲雲騎尉

覺羅雅爾哈善

覺羅雅爾哈善滿洲正紅旗人雍正三年由繙譯舉人授內閣中書十年遷侍讀乾隆元年遷御史二年兼公中佐領尋授內閣侍讀學士三年五月擢通政使七月疏言各省謝恩陳情之疏違式例由內閣交通政司轉駁而不彙奏此等章疏固非鉅務但既駁之後應按月彙奏以昭慎重又題奏要務貴詳明勿遺不必更

爲虛文陳謝等疏止期能達情愫而止不得濫用浮詞敷衍大學士等議行八月疏劾御史邱玖華言玖華現參九卿及督撫等議事不公一摺奉旨交議越數日臣聞外人傳說玖華是日另有一摺請將賢良祠大臣之子孫錄用交大學士密議尙未覆奏而玖華輒向人傳說且玖華乃原任侍郎勵宗萬門生宗萬之祖杜訥卽入賢良祠者玖華兩摺并進名爲條陳公事實欲起用宗萬諭曰朕思加恩賢良祠子孫者不過因其家現無出仕之人或給以虛銜或予以微秩亦視其人材尙可錄用然後酌量加恩以示優禮耆舊之意豈有身爲侍郎緣事獲罪因其祖父在賢良祠而卽可復用之理勵宗萬雖至愚亦計不出此至參奏九卿議事不公一摺實切中時弊近日九卿辦事每多瞻顧廢弛如伊摺中所奏情節諸臣見之各當深自慚慙倍加儆省若更遷怒於建言之人則不知愧恥者矣朕意雅爾哈善向在辦理軍機處行走明係伊探聽邱玖華摺奏賢良祠之事而反坐邱玖華以自行宣洩之名以博九卿之歡心不然必九卿中有一二不端之人欲中傷邱玖華而示意於雅爾哈善令其參奏不然縱邱玖華自行宣洩彼係疏遠新進之臣何以悉知交大學士密議尙未覆奏此風斷不可長所當究問明晰以示

做戒著莊親王平郡王大學士九卿詹事科道秉公嚴察議奏尋王大臣等會勘雅爾哈善誣劾邱玖華屬實請革職並與雅爾哈善閒談之右通政陳履平一併革職諭曰朕覽王大臣等所議全未盡心據雅爾哈善原奏內稱邱玖華請將賢良祠大臣之子孫錄用大學士密議尙未覆奏伊輒向人傳說此數語究係出自何人之口並未究詢明白不知爾等所審者何在又雅爾哈善在爾等前供稱陳履平向我說邱玖華另有請用賢良祠之子孫一摺本意專爲起用勵宗萬我問此事大約是揣摩之言勵宗萬做過大臣如何因此便得起用陳履平云此事紛紛成爲笑談如何是揣摩之言夫勵宗萬身爲侍郎豈有因賢良大臣之子孫便可復官之理此朕前日所降之旨而雅爾哈善捏稱爲與陳履平問答之詞藉爲支吾之計詐僞顯然若從前果有此語則其心已疑而不信矣旣疑而不信安得有此參奏之舉以此詰問伊斷無辯處爾等並不置問何也王大臣等皆屢經審詢重大案件之人豈竟見不及此乃將一傳說浮話之陳履平與雅爾哈善一體議以革職明係見朕嚴飭雅爾哈善欲治其罪而爾等遂遷怒於陳履平也且雅爾哈善雖革文官尙有武職陳履平一經革職便屬齊民輕重失倫莫此爲甚王

大臣等如此辦事殊非朕委任之意姑念此案尙非必應澈底窮究之事特降旨曉諭俾各警省雅爾哈善著革職并將佐領革去陳履平著交部議處四年特旨授四川龍安府知府五年丁憂六年補江南松江府知府七年調蘇州府知府九年遷福建汀漳道十年擢福建按察使十三年署江蘇巡撫十四年以題結私銷制錢案寬縱諭曰制錢爲民用所必需私鑄私銷均干嚴例而私銷之罪浮於私鑄其難於緝獲亦較私鑄爲甚邇來錢價踊貴皆私銷之故棍徒潛處作奸形跡詭秘地方兵役幸能跣緝而得之良非易事自應按律定擬以輓其類今雅爾哈善具題上元縣民陳彥章私燬制錢一案雖按例擬以斬決復爲聲明燬錢僅止二次爲數無多情有可原夫燬錢二次已屬積慣私銷祇圖財利罔顧法紀之犯尙有何情可原而乃欲爲之所寬重辟耶雅爾哈善素有沽名邀譽之習朕屢加訓飭毫不悛改此疏尤爲舛謬著交部嚴察議奏尋議降調得旨革職從寬留任十四年疏言旌表節孝所以正倫常而維風化但各省題旌時應爲區別果係節而兼孝或能教子成立或貧無依倚艱苦自守或毀形自矢百折不回奇節卓著非尋常可比者請旨特爲建坊入祠致祭其循分守節以老者准其彙題入祀不

另建坊上以所奏甚爲有見下九卿議行十五年六月疏言京口駐防兵糧向撥丹徒漕米雍正二年改令每石折銀一兩二錢今米價漸增購買未免拮据其不便於旗兵一也丹徒產米不多藉江廣客米接濟從前漕米撥兌兵糧客米俱歸民買今兵民爭購米價日昂其不便於居民二也京口運河本狹商船雲集今丹徒漕船於本境停泊受兌河身半爲所占商船守候多日至由陸路盤運其不便於商旅三也請敕照舊例將京口駐防兵糧仍給本色軍機大臣議如所請八月奏錢糧完欠數上以其向有沽名之習訓飭之十月雅爾哈善欲將經徵未完不及一分之知縣許惟枚等十一員盡參革職咨會總督黃廷桂廷桂因劾雅爾哈善言惟枚等例止停陞罰俸且尙有初參二參之別今盡請革職人必以爲欽奉嚴旨非巡撫本意其居心殊屬巧詐奏入得旨嚴議應革職詔從寬留任十一月命來京署戶部右侍郎十六年授浙江巡撫十八年以承審江南提塘陳公綬傳送僞稿與浙江提督吳進義一案並不親鞫致牽合附會失實部議革職詔留任十九年五月命仍署戶部右侍郎軍機處行走十月補兵部右侍郎兼副都統二十年七月充經筵講官尋充平定準噶爾方略副總裁九月赴北路軍營授參贊

大臣二十一年三月命赴西路軍營五月駐巴里坤辦事七月奉徙布庫努特降衆於烏蘭烏蘇與前降之噶勒雜特人同牧未幾綽羅斯降酋噶爾藏多爾濟輝特降酋巴雅爾相繼叛噶勒雜特人哈薩克錫喇等同時煽亂降回莽噶里克亦附逆雅爾哈善偵擒其黨色梯巴勒氏於哈密會莽噶里克子白和卓自京還抵哈密亦遂執之十二月疏報和碩特降酋沙克都爾曼濟無故徙牧逼巴里坤聞其與綽羅斯叛黨扎那噶爾布通臣派兵夜襲其營戮之並斬賊衆四千餘以杜後患又派兵赴魯克察克擒剿莽噶里克諭獎雅爾哈善宣力軍營實心辦事給內大臣銜二十二年正月命來京二月調戶部侍郎兼鑲藍旗滿洲都統四月復赴軍營授參贊大臣六月駐濟爾哈朗總辦軍務九月擢兵部尙書十二月總理屯田尋移駐魯克察克二十三年二月命爲靖逆將軍同參贊大臣哈寧阿等剿逆回霍集占五月大軍圍庫車六月敗援賊於托木羅克尋霍集占由葉爾羌糾衆親至我軍迎擊敗之斬首千餘級霍集占負傷遁獲其蠶諭曰逆酋霍集占率衆數千親援庫車大臣官兵等斬馘塞旗逆酋負傷僅以身免深屬可嘉著交部議敘但稍有不愜朕心者當此賊人破膽若能乘勝追逐必獲渠魁夫我兵尙有

遠攻葉爾羌喀什噶爾以擒霍集占罪人斯得則各城望風款附今霍集占自來送死我兵既奪其藪逆酋負傷僅免此則擒賊之一大機會且雅爾哈善等駐兵高岡以望形勢彼時雖不知霍集占親來之信而賊藪續經認識又有俘獲人口供詞若遣哈寧阿領兵追襲逆酋未必卽回巢穴或被逼入沙雅爾阿克蘇卽移庫車之兵併力攻擊與直取葉爾羌等城何異若慮賊人出城追襲則亦如剿殺援兵之例更覺便於剿賊乃徒以兵少坐失機會朕甚惜之尋雅爾哈善等奏圍城日久請預籌撤兵事諭嚴防禦毋畏蕙霍集占之敗遁也爲我軍所截入庫車城潰圍不得出泐八日副都統順德訥請縱其出走擊之霍集占遂夜引四百騎出西門渡鄂根河而遁雅爾哈善劾順德訥疏縱罪得旨順德訥著革職以兵丁效力但此舉雖順德訥罪無可道雅爾哈善哈寧阿身爲將軍參贊大臣所司何事伊二人深負委任俱著革職以兵丁效力八月雅爾哈善復劾提督馬得勝庸懦失機請革職諭曰前據雅爾哈善以逆回霍集占遁出庫車並未追捕將順德訥參奏今又以綠旗兵暗掘地道反爲賊所覺致焚死兵丁且兵丁內竟有竊物私逃者將馬得勝參奏可見軍營調度乖方全無紀律已非一日雅爾哈善坐視

賊酋竄逸順兵城下不異守株待兔前後奏報情詞矛盾惟圖左支右吾始參順德訥以卸過繼參馬得勝以諉咎並無一語引罪殊不思身在元戎指麾諸將者誰之責歟此而不置之法國憲安在已降旨命兆惠前往庫車一帶辦理回部兆惠至軍營日即將雅爾哈善等拏解來京是月奏克庫車諭曰雅爾哈善進兵庫車屢次失機貽誤前已降旨宣諭矣今據奏庫車賊酋阿都卜克勒木率衆夜遁所餘老弱出降現在順德訥往追俟回營時再行進兵夫以八九千官兵駐守三月之久俟賊酋逃去城中窮蹙出降始得其城雅爾哈善其尙何顏以得城奏報耶辦理回部一事從前因逆賊霍集占等係我兵平定伊犁時出諸厄魯特拘禁之中俾仍長舊地而狼子野心旋復戕害我副都統阿敏道負恩肆逆不得不行剿滅而雅爾哈善在巴里坤辦理沙克都爾曼濟一事頗能乘機奮勉是以屢加優擢今春進兵卽授爲將軍伊旣膺討逆之任自應倍加勇往以擒獲叛賊爲務詎意懈弛債事竟有出於意料之外者前此霍集占親率賊衆來援庫車屢經挫衄乃旣不能擒獲於臨陣復不能覺察於入城一任其潛入潛出並不措置而徒以堵截之責委之順德訥而已不預至掘城一事用綠旗謬計復全聽之馬得勝

轉至爲賊所覺橫開一溝傷我兵卒種種坐失機宜以如許兵力圍一彈丸之城而賊首出入自如不知統兵大帥身在何處朕彼時觀其情形怠玩若此早知庫車城中爲賊腹心拒守者必將盡行狡脫僅餘老弱而後得之當卽屢降諭旨令其加意防守勿致逃逸今觀所奏庫車頭目阿卜都克勒木領衆夜遁惟餘老弱出降一一不出所料可見雅爾哈善於霍集占脫逃時不親往追擒馬得勝掘城時又不能躬行相度及回衆出降尙不入城查閱亦不急行進剿數月以來惟事坐守軍營老師糜餉直待賊人兔脫鼠竄相率盡出而後得一空城以報命且忝爲大帥不能身先士卒致一切措置遲誤盡以委之他人初無一語引罪但知高坐帳中以郵符奏報自任若代他人傳述者則雖芻靈木偶皆可勝任何以復簡用將軍爲哉今雖得庫車而城中所存率係飢疲殘廢轉須爲之養贍卽得城亦復何用且伊泰內沙喇斯瑪呼斯等厄魯特及自伊犁逃歸回家所有男子不過一千餘名設賊黨果止此數豈能拒守如許之久又稱回衆供出沙呢雅斯等五人訊明正法此五人者旣係阿卜都克勒木惡黨能鈐制諸人不令出降卽何難與之同竄而必坐以待斃所奏荒唐悖謬如此謂無欺飾情弊其誰信之核其前

後情罪從來誤事之臣未有若是之甚者夫賞功罰罪國有常典雅爾哈善前辦理沙克都爾曼濟時朕以其奮勉可嘉卽授爲內大臣並將伊子補授侍衛今乖謬失律至此雖欲爲伊子曲貸其如國法何已降旨兆惠等將伊拏解來京治罪伊子並著發往黑龍江當差二十四年逮至京王公大臣遵旨會鞫以雅爾哈善老師糜餉失機債事請卽正法諭曰雅爾哈善以將軍征討回部乃自進兵庫車以後種種玩誤乖張失機債事爲從前行師失律諸臣所未有是以將伊拏解來京自軍興以來問夜旁午事事皆朕親理委曲莫不悉知卽其罪狀昭著亦不待再加鞫訊始抵於法實因伊貽誤軍國大事欲令大廷廣衆服刑示儆所以彰國憲而昭炯戒乃朕逐款詰問伊雖一一俯首無辭而猶覩顏求活竟自舉達勒黨阿哈達哈之例冀以披甲效力豈知人世間不知羞恥之人竟有至於此者試問伊獲罪情節與彼二人同乎卽彼二人之從寬亦出於朕耳豈人臣所可視以爲例乎雅爾哈善老師糜餉安坐縱賊前後情節俱伊隨時自行奏報經朕一一親覽洞燭者其恇怯因循居心欺罔之處實難枚舉然其罪之最不可道者一在霍集占竄入庫車則姑付之於不知且寬其西逸之路不卽追捕又明知順德訥之

玩賊養奸不卽參奏直至賽里木降人供出方以一奏委罪一在庫車賊黨阿卜都克勒木等尙未盡去卽不力督攻取授意順德訥有得一空城亦可報命之語此而不明正其罪置國法於何地雅爾哈善罪案已定著卽行正法

覺羅納世通

覺羅納世通滿洲鑲藍旗人由筆帖式授刑部主事遷員外郎調戶部遷郎中乾隆十九年擢雲南布政使二十二年雲貴總督恆文派屬員購金爲雲南巡撫郭一裕所劾諭曰納世通沈嘉徵身居藩臬遇督撫有此等事乃並匿不以聞惟事迎合上司毫不知愧何以爲僚屬表率著交部嚴察議處尋議革職十二月授安徽按察使二十三年四月丁憂回京命以按察使銜往巴里坤辦理糧餉尋復命赴魯克察克辦理屯田九月以署章京巴顏德等追捕竊馬賊未獲納世通不嚴參部議降一級調用尋丁憂來京服闋命補官日降一級留任二十六年七月授工部右侍郎十一月兼鑲黃旗漢軍副都統二十八年正月授參贊大臣命赴喀什噶爾辦事諭以慎持大體不可苟且塞責二十九年三月奏言伊實罕伯克阿卜都喇伊木爲逆賊霍集占等親信及大兵臨城始降降時令人赴外藩貿易漏

洩內地事并通書霍罕謀爲叛逆狀命侍郎五吉往阿克蘇會納世通審實正法納世通尋奏言伊犁官兵至塔拉斯地方爲克特滿圖伯之布魯特誤殺已令阿奇木伯克素勒坦和卓等向尼沙瑪木特呼里游牧索人犯令擒獻治罪諭曰伊犁果有巡查官兵爲外藩戕害明瑞豈有不知卽知之豈不奏聞此事尙未可信納世通等遽遣人查拏殊屬鹵莽納世通奉到此旨如所遣伯克尙未轉回卽續派妥員將此事虛妄之處詳悉曉示令素勒坦和卓等速回九月奏言額爾德尼伯克往攻和濟雅特丕色勒聞大兵前來中途撤回游牧現遣親信回人潛入霍集占偵探諭曰額爾德尼伯克撤兵防範厄魯特等不過因阿卜都喇伊木交通事覺恐大兵問罪欲爲守禦計耳豈敢圖謀喀什噶爾如果有此心則從前阿卜都喇伊木潛通信息其時何不統衆相應朕昨以阿卜都喇伊木罪狀敕諭額爾德尼伯克伊得旨知已免其加兵自然安守游牧若納世通等以全無影響之事偵探張皇恐喀什噶爾回衆聞之轉啟猜疑納世通將此事姑置之不必遣人往探尋復奏言據遣往霍罕偵探回人所告與從前來投之厄魯特及霍罕貿易回人之言相似今奉到頒給額爾德尼伯克敕諭卽派員外郎四十七藍翎侍衛官

長保等恭齎前往并預備賞給緞疋茶布等物諭曰從前納世通奏報額爾德尼情形意涉張皇恒怯朕屢經訓諭至所派四十七等皆未經練事體恐貽外藩嫻笑今又預備賞賚尤爲非體此次敕諭係加恩免罪派人前往尙當嚴詞斥責有何應賞之處看來伊等從前相機辦理不過空言非真有成算也設額爾德尼果有侵擾內地之力何不與阿卜都喇伊木協謀舉事而竟坐視其敗露耶且伊果欲內侵非賞賚所能止遏如其無力則斥責又豈能債事辦理邊務大臣豈可曠曠如此納世通等著嚴加申飭命副都統伯琨往喀什噶爾協同納世通辦事十一月納世通奏言四十七等至霍罕額爾德尼具奏章懇帶回又遣貿易人等投遞呈文諭曰額爾德尼既有奏章縱不親身前來亦應遣頭目齎送乃僅交四十七代進而納世通遂爲陳奏殊乖體制且回人性習狡黠斷不可示以柔弱納世通等嗣後辦理外藩諸事務知大體不可存苟且塞責之見十二月奏言四十七等自霍罕回告稱額爾德尼迎敕甚恭以不能親身入覲欲遣人代爲齎奏並因冬寒不及預辦方物俟來春料里起程諭曰額爾德尼尙屬恭順所奏亦合情理但伊呈書納世通有云我仇人甚多嗣後有讒謗我者祈將其人發來質對以辨

眞僞等語雖屬畏罪之詞究因阿卜都喇伊木罪狀似未顯著致伊蒙冤不白者然納世通覆書卽應將審明各確據逐一指出並以大臣等欲進兵問罪大皇帝天恩念爾平日尙屬守分姑從寬免降敕訓諭仍以嚴詞斥責伊自然知所做畏乃反云阿卜都喇伊木之事業經蒙恩寬免無須再述是其意若以前事爲歉然者殊屬非是納世通辦理此事始終怯懦著嚴加申飭三十年二月烏什回人激變副都統素誠自殺諭曰逆回戕害官兵焚劫倉庫此固素誠等平時辦理不善以致滋事而回人等敢行叛亂斷難曲宥納世通額爾登額等務期大示懲創不可稍存姑息納世通尋奏言臣至烏什與弁塔哈合兵擊敗賊派弁塔哈隊內翼領良福領兵至巴什雅克瑪沙頭兩處卡倫堵賊去路諭曰賊聞我兵陸續前往必畏懼潛逃今卡倫防範旣嚴縱有逃脫者不過往布魯特等部落伊等焉敢容留倘稍有抗違可一併辦理納世通奏言臣親領官兵進攻賊人西面殺賊二十餘名良福兵到卽令前往巴什雅克瑪一帶嚴防臣率兵奪取城西山殺賊三十餘名賊自知罪重據險死守今伊犁兵將到齊俟觀音保到日商選兵丁防守要害乘機擒賊又希卜察克布魯特散秩大臣阿奇木冲噶巴什布魯特比阿瓦勒

聞臣領兵前來各領布魯特兵隨至呼什齊部落那喇巴圖之姪亦願隨軍效力臣加獎諭一體支給行糧上以布魯特回人無給口糧例命納世通等還帑三月奏言烏什官兵現有一千八百餘名已足敷用伊犁事務緊要將軍明瑞無庸前來止須撥馬四五百匹接濟諭曰明瑞係節制各城將軍遇此等情事理應前往查辦納世通行文阻止甚屬錯謬諒明瑞未必因此撤回卽一時所見未到亦必作速再往一切事宜均遵照陸續所降諭旨辦理并傳諭納世通朕命明瑞前往不獨藉壯軍聲兼以查核起釁情節卽烏什平定伊仍有應辦之事何必行文阻止顯係納世通視辦理烏什事甚易易恐明瑞與伊分功懷此伎心何由集事納世通又奏將副都統觀音保所領兵撥往隘口堵禦得旨此奏尤屬非是觀音保所領伊犁兵旣屬可用乃不以之剿賊而置之閒地豈恐觀音保分伊等之功耶將來明瑞到彼如伊等和衷協助自當一體敘功若果此等小見卽幸而竣事亦所不取納世通著傳諭嚴行申飭明瑞尋奏言進剿兵丁半係回人及布魯特業經聲揚進剿復倉卒撤兵沿途回人轉生猜懼臣今駐阿克蘇烏什之間若辦理已竣固善或仍須協助亦卽赴援諭曰明瑞所奏甚合朕意納世通以與賊人攻

戰數次尙未竣事倘明瑞不行前往更當若何看來回人以耕種爲生旣防其要隘不能脫逃而農時又失自然內潰今納世通惟知急攻與賊相持受其誘敵之計翻覺彼逸我勞明瑞至烏什時宜知所鑒尋納世通奏言賊恃險死守難於卽克俟明瑞至會商進剿務殲滅以安各城反側心諭曰納世通此次所奏愈覺不堪明係始以辦理烏什爲易慮及分功今乃知其難又復巧爲遮飾甚屬無恥至所稱安撫各城尤爲悖謬烏什業經反亂尙何安撫之有若指其餘各城則見在回人俱感激朕恩捐輸口糧牲隻領兵協助又何待於安撫蓋納世通方寸已亂將效力回人俱視爲敵國尙可倚以集事乎卽如攻城一事若克一城又有一城不得不急圖進取今死守者止此一城自當俟其困極自潰而納世通等株守城下兵疲力竭如此是納世通等全不曉事此事惟明瑞是賴一切俱自行決斷不可稍有推諉明瑞因劾奏納世通弁塔哈接見領隊大臣等官體統甚尊惟優待辦事各員卽大伯克皆向伊等長跪並多派回人服役昨領隊大臣觀音保領兵赴援納世通卽撥回人二百爲官兵服役烏什回人作亂實因擾累所致諭曰納世通弁塔哈素誠俱受朕深恩身爲大臣各駐專城辦事乃納世通弁塔哈平日

妄自尊大一聽所屬官兵凌虐回人至辦理烏什一事納世通領兵甫至彼處始則恐明瑞爭功行文阻止繼復懇求援助無恥實甚彼時明瑞若竟行撤回尙不知釀成何等事端且正當撫輯未生事之回衆令其傾心出力之時反撥給觀音保回兵二百名以備使令是又具何肺腑卽此撥兵一節其平日之任意苦累更不問可知納世通弁塔哈種種悖謬乖張不可枚舉是烏什之始而激變繼而聽賊猖獗不能剋日平定者皆伊等卑鄙無恥庸妄僨事所致卽傳旨將納世通弁塔哈於軍前正法五月副都統伯琨奏納世通在喀什噶爾時出行圍科派馬匹回人苦累且妄自尊大不常接見回部伯克惟委信主事烏爾袞恣縱勒索諭曰各城駐劄辦事大臣俱深受朕恩爲一城統領大員自應潔己率屬安撫回衆卽偶爾行圍藉以操練官兵原屬可行但祇應帶內地兵丁至於回人俱以耕種爲生乃常派其出圍以致伊等廢時失業有是理乎曾見內地大臣有帶領農民行圍者乎再回部伯克俱係恩賞職銜品級之人該管大臣固不可過於優容亦不可任意陵賤至官員等尤非大臣可比烏爾袞不過一主事竟敢將散秩大臣阿奇木毆辱實出情理之外此皆大臣等平日過於寵信所致若不重治其罪何以

示懲是以降旨將納世通治罪外并將烏爾袞等審明定罪各城辦事大臣嗣後各宜守身潔己善視伯克一切事務秉公辦理屬下人員嚴加約束毋令擾累回衆以納世通爲炯戒布魯特尋縛獻烏什間諜巴布敦等訊供致變之由與明瑞伯琨所劾同御製烏什戰圖詩有曰巴布敦辭實可憑周諮我衆又堪徵哥舒翰旣少恩甚李大宜還耽樂仍一死餘辜眞尙有兩鴛鴦駕愧惟增可同效節加優卹用戒將來示創懲

唐綏祖

唐綏祖江蘇江都人雍正元年由舉人授河南封邱縣知縣二年因生員罷考解任審明開復三年補虞城縣知縣五年遷歸德府知府六年六月遷山東濟東泰武道九月遷山東鹽運使七年遷山東按察使十一年三月召來京以對品京堂用八月授太常寺少卿十二年三月奏裁犧牲所滿所副一增漢所副一從之乾隆元年七月疏言學政選拔貢生率委任教官舊例選拔務在廩生文行兼優今則附生及三等生員概許入選但取身家殷實服飾鮮明儀容修偉士論遂有三種取士之說請敕選人品端方學問優長不得委任教官以開奔競部議從之三

年四月稽查左翼宗學六月授廣西按察使六年正月署廣西布政使十二月奏言官員赴任文憑粵西向例附便差齎送嗣因各省文冊造報過遲吏部行令按季專差齎送廣西往返萬里每季兩人齎送需費數百金無從支給請將繳憑文冊封入巡撫本箱交在京提塘官親投部科部議允通行各省七年十一月實授九年四月廣西巡撫楊錫紱奏綏祖體虛多疾請酌調內地上素悉二人不和諭錫紱所奏不公七月署任巡撫託庸奏參綏祖擅動庫項假公漁利縱屬營私敕革職交託庸審理具奏時錫紱陛見來京上詢知託庸所參各款綏祖曾稟知巡撫通融辦理詔交兩廣總督策楞秉公審理十年策楞覆奏綏祖向係最有擔當者僚屬多怨忌之上年託庸署理巡撫來廣西時正值綏祖陛見赴京乘閒媒孽託庸初任封疆遽爲題參後知事皆因公又奉旨改歸督臣承審慮及審虛遂搜羅款蹟以實原參得旨皆公論十一年正月策楞奏所參擅動庫項各款事皆因公歷經詳報督撫並有先行奏明之案其勒索巧取等款均屬子虛惟託屬員代購人濩屬實應照不謹例革職疏入報聞先是廣西銅鑛二八抽課餘銅官買每百斤給價六兩八錢綏祖請增價十三兩零託庸既劾綏祖因奏改三七抽課餘

銅聽商自售試辦八月不能有濟請仍加二抽課而官買餘銅價增至十六兩二錢敕下部議革託庸職四月授綏祖山東按察使九月授浙江布政使十二年六月奏言御史湯聘奏請嚴禁囤當米穀絲棉部議允行惟是杭嘉湖民以養蠶爲事官糧及一切日用皆藉此立辦閒遇絲客未至需用孔亟向典質銀價長贖回另售起息甚微儻概禁質當富者尙可待價貧者當新絲初出正值官糧追呼奸牙短估售則虧本留則無措是欲禁囤積而牙當反得遂其居奇臣請除大買囤積仍實力查禁外如有在數十斤內照當衣物例分別多寡行息庶商民兩便奏入命告撫臣酌中妥爲之十月浙江巡撫常安參綏祖徇私狂悖論曰常安奏參唐綏祖各款尙非賊私狼籍可比而亟挂彈章一似不可姑容者安知非常安先聞被劾之信因疑喀爾吉善訪伊劣蹟必由唐綏祖開送故摭拾傾陷欲使兩敗俱傷以洩憤耶但既有此奏不可不詳究唐綏祖著解任所參各款及有名人犯交高斌會同顧琮察審定擬十二月高斌等奏所參全虛應開復十三年三月授山東布政使十月遷江西巡撫十四年四月疏言楚蜀江流匯於九江府城正當其衝向築護城石礮撥費修治今北岸陡漲沙洲民請承業升科但聽民承業必

將築埂修圍江流受其迫束勢必直趨南岸府城虞有衝齧請將新洲存爲官洲水盛任其漫流衝復舊泓儻壅聚成洲卽於北岸挑引河俾江水分流以殺其勢南岸石礪不致受衝八月奏沔陽州魏蔡二河中包二十七垸爲內湖外江宣洩要區請於河口設石閘一因時啟閉聽民興修疏入均報聞是月調湖北巡撫暫署湖廣總督十六年正月湖廣總督永興布政使嚴瑞龍先後以綏祖巧詐營私累商肥橐列款糾參得旨革職交新任總督阿里衮審擬三月阿里衮以嚴瑞龍贓私奏參命河南巡撫鄂容安赴楚會鞠尋奏綏祖並無得贓分贓惟縱容鑪頭私買銅鉛添鑄屬實部議革職議上諭曰永興嚴瑞龍等奏參唐綏祖摺內有婪索邱鑑贓銀數至鉅萬一款情罪最爲重大乃係此案關鍵今旣審無實據則嚴瑞龍之愆戾永興駕詞誣捏永興之輕信嚴瑞龍率入彈章之處按律自應分別反坐總因唐綏祖生平居心巧詐器量不能容人嚴瑞龍私意恐爲其所制而適值永興之易被其愚是以多方聳動成此大案著該撫將旨內情節分別定擬永興嚴瑞龍罪狀奏聞唐綏祖婪索屬虛失察之罪本輕所有原封家產著查明給還來京候旨酌量加恩錄用六月授山西按察使十七年五月奏介休縣屬張蘭

鎮離縣治遠商賈輻輳縣令辦理竭蹶靜樂縣固鎮戶口衆多民風較淳應請將固鎮舊設巡檢移駐張蘭所有介休東鄉郝家堡大小田堡南賈北賈等村撥令就近管轄定爲要缺揀選調補命下山西巡撫議尋奏覆應如綏祖議從之十八年十月授西安布政使十九年九月卒於官

阿思哈

阿思哈薩克達氏滿洲正黃旗人雍正四年由官學生考授內閣中書遷侍讀洊擢刑部郎中軍機處行走乾隆十年擢甘肅布政使十四年擢江西巡撫十五年三月疏言各營演放連環槍礮止用火藥須將鉛子裝入演練庶免臨時倉卒營馬原備騎兵衝突各營恐兵偷減草料多委員朋餽惟合操日令馬兵騎射一二次應令自餽俾人馬相習至技藝惟當純熟得用步法架勢不必朝更夕改上嘉其所言得要九月調山西巡撫十六年疏報平陽府旱災未親臨撫恤詔責之十七年十月疏報蒲解等屬被旱偏災平陽紳耆捐銀解河東道庫爲加賑之用諭曰此奏殊屬卑鄙錯謬之至朕實駭聞直省偶遇偏災地方殷實之家樂善好施或自出家廩積貯或出己資糴運米石散給貧民功令原所不禁惟具數報官量

加優敘以爲閭閻任卹者勸耳並非斂貲貯庫藉以助賑也國家賑濟蠲緩重者數百萬少亦數十萬悉動庫帑正項從無顧惜地方富戶所捐幾何貯庫助賑殊非體制此端一開則偏災之地貧民既苦艱食富戶又令出資國家撫恤災黎何忍出此深負朕恫瘝一體之意阿思哈著交部嚴加議處所捐銀兩著發還聽該紳衿等自行辦理復諭曰阿思哈不勝巡撫之任著來京候旨尋部議革職十二月授吏部員外郎二十年三月命以布政使銜往準噶爾軍營辦理糧運四月擢內閣學士七月議敘軍功加一級二十二年署江西巡撫先是江西軍丁自歸州縣編查殷實者多脫漏貧者將屯田典賣漕運幾至貽誤阿思哈莅任卽設法清釐以舊冊詳覈各丁族譜及保甲戶冊脫漏之丁及新生之丁登記無遺至二十五年奏查出軍丁二十七萬五千九百六十三其典賣屯田照直省分減年價回贖旗地例查契覈定銀數令原丁措贖無力則責成領運之丁及同族同船共贖回三百一十一頃又查出隱漏屯地九百二十五頃查設屯原以贍運而軍丁散居屯地皆照田收租所入無多每船十年大造需費千兩每年運費數百兩皆散軍戶族津貼屯田有名無實臣酌將各船原有熟屯及贖回查出各田酌增餘租十

一萬七千七百三十兩連原額租銀一萬二千八百八十七兩共十三萬六百有奇江西十四幫存漕船六百三十八隻除九江吉安建昌贛州等衛原有分貼費銀其餘均酌給餘租銀以爲造船起運之費並將贛衛餘租過多者撥濟撫饒等過少之衛四年委員編查一次軍丁無虞脫漏漕運藉裕轉輸疏入報聞七月實授江西巡撫十一月江西學政謝溶生劾阿思哈婪賄派累命尙書劉統勳侍郎常鈞會同兩江總督尹繼善往審鞫實擬絞二十六年詔免罪給三品頂帶往烏魯木齊效力贖罪二十八年正月命往伊犁協同明瑞辦事六月授廣東巡撫十一月調河南巡撫二十九年十月疏言河陰縣地僻事簡緊接滎澤請裁汰歸併滎澤縣管理增設巡檢一以資彈壓其原設教諭一應改爲滎澤縣學下部議行三十年三月疏言綠營例由步兵挑馬兵薦拔外委把總步兵內有弓箭鳥槍牌礮手等項向例馬兵缺出止於弓箭馬步兵內拔補而鳥槍兵不與是以兵皆弓箭鳥槍兵多庸陋請撥各標營馬兵缺十分之二爲馬槍缺如步槍純熟兼能馬槍者准拔補馬兵兼令學射如馬上槍射合式卽與弓箭馬兵一體考補外委把總則上進有階各思努力從之九月疏言衛河運道在在淺阻濬縣三官廟老

鶴嘴等處砂礪挺據河心重船尤易疏虞向於衛河上下築草壩二十八以束水勢前撫臣胡寶琮奏請疏挖並於淺處建草壩臣查衛河發源輝縣百泉南至新鄉縣之岔河尖與丹水合又百五十里經衛輝城北爲兌漕水次又東北至濬縣會淇水入湯陰內黃界受湯河洹河之水至直隸大名縣境入臨清河夏秋水盛無須草壩冬令源澀草壩亦屬無益不若於上游先期蓄水臨時開放得宜舊以河水兼濟民田有官渠民渠之別夫民田需水多在春夏漕船起運則在秋冬農工已竣民田不須灌溉正可濟運見飭府縣督河員於九月望後起至漕船出境止暫閉外河以上民渠支港使水歸官渠並下游閉開瀦水重運自可疏通原建草壩之處應停止鑿去三官廟老鶴嘴等處砂礪其餘浮沙飭汛員集夫挑挖用刮板隨船疏濬使沙隨水蕩以利漕運十二月疏言河工料物向係沿河州縣領帑按畝派買民多苦累臣酌借司庫閒款銀官爲試辦代買代交於七八月閒委員照應辦數目赴附近產料地方照時價預給見銀約至十月各工開廠委佐雜監同交兌丞倅督察河員隨到隨收不敢稍有浮冒承辦之員得以隨運隨交惟運腳等項及新料虛鬆應扣折耗計每稽料一斤除官價九毫糧戶應貼運費錢

一文較之往年不及十分之一不數日間貼費盡完解司歸款料物比民辦早完月餘疏入均報聞三十一年疏言辦理地方公事例取印結稍不如式卽干駁換府縣多用空白赴上司衙門照寫每借端需索查鄉地鄰佑等類及在官之人本身甘結同鄉官印結原因其人別無可據必須取結爲憑至各衙門事件俱憑印文覈辦結內不過摘取印文數言末增所結是實一語豈印文不足憑轉以甘結爲可信至具題事件既見之奏疏又須加結送部體制亦覺未符請嗣後一切甘結同鄉官印結例不用文者仍舊取結其具題事件及詳咨移文於印文外加結者悉停止事歸便易下部議行三十二年六月疏劾杞縣知縣蔡維英因辦兵差借端累民上以阿思哈並不瞻徇下部議敘七月審蔡維英擬杖傳旨申飭改擬絞候三十四年六月遷雲貴總督八月因河南巡撫任內辦驛解滇於定額外多六百餘頭敕交部優敘九月阿思哈出銅壁關至蠻暮軍營具奏軍糧馬匹不敷情形諭曰前用阿思哈爲雲貴總督以其向在北路軍營辦事諸務尙能諳習乃伊甫至騰越卽奏該處辦糧情形已存畏難之見及至蠻暮所奏糧馬事宜專欲仰給內地竟不知就所到之處實力籌辦一味取巧豫占地步不復具有天良深

負朕委任之意阿思哈著革去總督給副都統銜在領隊大臣上行走以觀後效十二月授吏部侍郎三十五年諭曰阿思哈來京召見奏對時仍申其糧馬難於措辦之說及詰以彰寶到滇後何以購備轉得充裕而前任總督竟至束手無策阿思哈始無辭以對至詰以革職後如何效力之處稱會同大臣督率官兵攻戰其言更荒唐可笑阿思哈既革職留營卽與兵丁無異況以曾受國恩大員獲罪急圖自效理應衝鋒殺賊奮不顧身乃猶覩顏附於大臣之列不肯親冒矢石以巧遂其巽懦偷安之計是誠何心其漸染積習甘於委靡無用全無滿洲勇往誠樸之氣又安望其改悔振作乎卽此一節其心更不可問而其罪更不可追仍著革職發往伊犁自備資斧效力贖罪三十九年五月諭令回京在軍機章京上行走七月授左都御史九月大學士舒赫德剿山東壽張逆匪王倫命偕額駙拉旺多爾濟率健銳火器兩營兵千協剿事平下部優敘尋以拉旺多爾濟赴城北塔灣搜剿逸賊阿思哈未經同往敕部嚴察議奏部議革職詔從寬留任十一月賜紫禁城騎馬四十一年正月署吏部尙書旋署漕運總督四月實授十月卒賜祭葬諡莊恪

清史列傳卷二十二終

清史列傳 卷二十三

大臣畫一傳檔正編二十

明德

明德滿洲正紅旗人姓輝和氏雍正十二年由筆帖式補太常寺博士乾隆元年授寺丞二年遷步軍統領衙門員外郎三年調戶部緞疋庫五年遷山東糧道七年授湖南按察使八年疏言督撫等遇刁民糾衆搶劫之案應查明是否地方官激變嚴拏究辦以示懲創不得藉此輒劾有司徒長刁風防汛弁兵亦宜協力查拏不得推諉觀望諭曰國家愛養斯民惟恐一夫失所偶遇地方歉收未嘗不籌畫接濟而刁頑之民遂乘機搶奪不可不重懲以示儆乃督撫欲自諱其化導不力禁約無方止將州縣推尋別故參劾而於搶奪之案朦混歸結又如汛弁兵丁類皆觀望不前亦豈設兵衛民本意著各督撫提鎮嚴飭所屬一同實力查拏如推諉卽嚴參議處九年四月巡撫蔣溥劾明德剛愎自用於巴陵縣生員方宣點家被盜一案意存諱飾下部議革職七月授盛京禮部郎中九月授山東兗州府

知府十二年調濟南府十三年遷山東鹽運使十四年七月上以川省用兵山西軍務絡繹必得幹練之員以資任使命明德調補雁平道九月調甘肅安西道十六年遷湖北按察使十九年擢四川布政使二十年調甘肅布政使隨總督黃廷桂往肅州辦理軍務二十一年二月授山西巡撫六月奏言陽曲太原榆次大谷祁縣徐溝清源文水交城興縣等十縣四季徵糧貯太原府理事通判倉卽供季支兵餉例不停緩今該廳已徵之數及從前節次買存米豆足敷本年支放現今暫緩俟秋後催徵猶恐下年徵支不繼仍難緩至秋成查晉省溢額穀共五萬餘石各屬現俱平糶於此項穀價內酌撥買米三千石黑豆六千石以備墊支嗣後定於秋收後開徵下年供支則兵精旣屬有備輸將亦得從容矣十二月奏言新疆派調察哈爾吉林等兵奉旨將陝西糧運巴里坤山西歸化城糧運陝西接濟竊計陝西若動撥榆林延綏等處糧由歸化城存貯軍需內運往歸款實屬近便如動撥西安同州等處糧應於聯界之平蒲解澤四府州屬溢額穀內撥補較爲路近省費二十二年五月奏言太平縣史村驛明季因汾水阻隔改設曲沃縣蒙城鎮其人夫仍留史村汾河久西徙無礙而一驛夫馬分設未便應仍併歸史村

驛諸疏俱如所請六月調補陝西巡撫十月前任山西布政使蔣洲虧空勒派爲巡撫塔永寧所劾上以明德前與蔣洲共事毫無覺察並著革職拏問命尙書劉統勳前往鞫實洲正法明德擬絞特免其罪發甘肅交黃廷桂差委二十三年補甘肅涼莊道二十四年正月授甘肅巡撫二月疏言甘省辦理軍需錢價甚昂四川河南錢多懇敕該督撥運三十萬串來甘搭放兵餉餘設廠平賣市價自平從之四月丁母憂諭賞銀千兩辦喪先是明德在山西巡撫任內濫舉屬員楊文龍部議降二級調用又湖北按察使任內盜案遲延補官日降三級調用至是上以其連年承辦軍需尙屬出力命署甘肅按察使二十五年八月授甘肅布政使十一月復任甘肅巡撫二十六年二月奏言嘉峪關左右邊牆舊係土築年久殘缺新疆遣犯逃越稽查未密請用節省運糧銀萬餘兩修固嗣後遣犯由關逃回將遊擊交部嚴加議處又奏獲巴里坤逃犯卽於該地正法上俱從之四月疏言各省發遣巴里坤哈密安西三處之犯甚多安西哈密無屯係賞兵爲奴現兵數裁減巴里坤有屯田而糧少遣犯俱難再發應將續到者發關展烏魯木齊屯所二處上年豐收非但有裨屯務卽各犯亦可得所又疏言甘肅地方遼闊遣犯沿途

投宿坊店難以防範應將各驛閒房修二三間爲監房並責分防文武官弁稽察
疏脫參處俱如所奏行二十七年五月復調山西巡撫九月奏歸化城五廳地方
除托克托城已設倉貯穀外其歸化城和林格爾薩拉齊清水河四通判應請每
處增設常平倉穀三萬石動用司庫耗羨銀買貯又與河東鹽政薩哈岱合疏言
夏縣白沙河居民舊築堰以護田廬並爲城垣保障但土工不堅應改石工恐民
力難勝請動充公銀七千餘兩及修濬姚暹渠存項銀四千兩令運司督州縣修
固嗣後殘缺除北岸仍聽民修外南岸民少應歸河東渠堰歲修案內辦理二十
八年六月奏大同鎮所屬各臺從前因係邊境設兵過重今承平日久城內兵宜
量裁減水泉營地方褊小左有老營右有偏關均設大員重兵相距甚近請裁該
營遊擊並兵百將老營守備移駐管理卽隸老營參將轄又裁靈邱路參將以所
屬渾源營都司改補靈邱路都司歸北樓營參將轄靈邱路守備改補渾源營守
備歸新平路參將轄俱下部議從之是月調補江西巡撫十月奏豫章書院公費
不敷九江贛州兩關平餘銀及各屬城壕地租銀每年共三千餘兩除作巡撫衙
門書役工食一切辦公賞兵外尙餘銀千餘兩請歸書院佐士子膏火得旨允行

十一月復調補陝西巡撫三十年正月調江蘇巡撫未蒞任命署江西巡撫五月奏兇殺多命之案請提至省城承審官扣限兩箇月速結下部議載入例冊十一月赴江蘇任三十一年七月奏言江蘇糧不敷食常仰給於楚蜀蘇州一帶商民每閉糶居奇臣屢加勸諭不使復蹈前轍各屬辦案疲玩成習督催不使堆積佐雜不得擅受民詞私作威福該省襟江帶湖大海界連兩省劫盜尤多臣飭屬查拏立破多案崇明漁船出洋後輒肆強劫今於口岸增兵役嚴察上嘉其留心時南匯山陽兩縣民有傷父兄致死者承審官誤照過失殺問擬明德親提駁改奏革原審各員職並劾按察使李永書不勝任請交部嚴議諭曰向來督撫每於臬司審轉案件往往曲爲徇隱若明德之秉公持正何患讞獄之不平允吏治之不整飭乎明德辦理此事甚屬可嘉著賞荷包六個以示優獎又奏常熟縣福山塘一河爲蘇州等處入海要津支港甚多灌民田數萬頃乾隆二十六年濬後迄今又淤借撥司庫銀九千七百餘兩乘時再濬於所灌民田分兩年徵收歸款從之三十二年二月調補雲南巡撫時大兵討緬甸七月與署總督阿里衮合疏言省城至永昌邊界道險運艱請撥藩庫閒款銀三萬兩分設僱修兩月可竣庶軍糈

不致遲誤又合疏言各隘口俱設兵如奸民私販出口兵丁得財賣放一併正法失察官弁參革治罪能拏獲者重賞八月又合疏言永昌普洱沿邊土司以緬匪滋擾田土多荒有乏籽種牛具者請量借給於明秋交米還項九月又合疏言滇省銅廠三十餘向係糧道專管金銀鉛廠二十九係布政司專管而本地道府無稽查責耳目未周請將各處廠務係州縣管理者責成本府專管道員稽查係廳員管理者責成本道專管統歸布政使總理糧道既不管銅廠事務太簡將驛鹽道所轄之雲南武定二府改歸管理均如所請行三十四年三月擢雲貴總督奏請牧養戰馬分派武職大員管理其棚槽草料等仍令地方官備支上嚴飭其推諉卸責會副將軍阿里袞奏將領等所用馬行至南抵壩地方卽已疲乏詔責明德漠視軍務漫不經心下部議革職從寬留任尋諭曰明德自擢任總督以來辦理諸務皆不及從前實力奮勉於養馬一事尤漫無經理因循誤公豈宜令仍爲總督卽留滇省亦於公事無益念伊從前在江蘇於地方情形尙屬熟悉著卽降補江蘇巡撫時永昌府知府趙佩以病告歸明德爲代請上以趙佩規避革職自備資斧效力明德遽爲代奏交部嚴加議處又以明德不能催辦糧餉再下部嚴

議應革任均得旨寬免註冊七月經略大學士傅恆等奏留明德協辦軍務俟凱旋後再赴新任尋命署雲南巡撫專管臺站事十月諭曰明德辦理軍需糧馬是其專責屢經飭諭始終不能實心出力今經略大學士傅恆奏十月初一日已抵新街會兵剋期深入而後隊繼進之兵尙未到齊前屢諭明德令其設法催償官兵迅赴蠻暮何以至今尙未全抵軍營卽所運糧石亦不能源源接濟辦馬一項亦自安於無能希圖置身事外可見其平日專事空言塞責竟成疲玩痼習著革去翎頂加恩仍署雲南巡撫以觀後效三十五年卒

胡寶瑑

胡寶瑑江蘇青浦人原籍歙縣乾隆二年由舉人授內閣中書軍機處行走八年四月遷侍讀六月遷福建道御史七月疏言直隸自被旱以來遷移覓食者甚衆見蒙恩旨先後運米五十萬石備賑請敕督臣徧行曉諭俾土著之民靜以待賑其各處流民願歸耕而無力還鄉者酌量咨送回籍使趕種春麥不致田畝久荒於來歲民食有益下直隸總督議行九年二月疏言近蒙皇上特命大臣查閱河南等省營伍所以覈訓練而杜廢弛見在器械之堅脆技勇之生熟人數之虛實

糧馬之盈虧自難掩飾惟是積玩之處此時聞風修整買補勢所不免而不肖營員或乘機借端苛派或此後坐扣月糧俱未可定請令各督撫提鎮等嚴飭查參徇隱一併嚴議詔如所請行十年十二月疏言山東兗沂曹等處及江南鳳潁淮徐海一帶被水之區見經消涸應乘時設法疏導並勸諭農民引流赴壑俾田不久浸以便春耕來歲蠲子尤宜加意預防下兩江總督議行十一年轉戶科給事中十三年遷順天府府丞尋遷府尹十五年四月遷宗人府府丞九月遷副都御史命往河南會辦傅毓俊控告張天重謀逆一案審明毓俊誣陷論罪如例十七年三月擢兵部侍郎兼順天府府尹十月命署山西巡撫十八年九月實授十月調湖南巡撫十九年奏言郴桂二州銅鉛各廠因距州治遠不能兼顧委員董理一年更替查廠中弊竇多端一切鉛錫銅斤沙渣淨色抽課收煎支解款目繁多接手之員必數月方講求明白此數月內已受欺蒙侵漏之弊請做臺灣瓊州例令新員與舊員先期協辦數月以收駕輕就熟之益得旨允行二十年二月調江西巡撫七月奏請嚴查鄱陽湖船隻以靖積匪上嘉之二十一年三月奏勘明廣信府所屬銅塘山無可墾之地無可用之材無可煎之礦應請永行封禁二十二

年六月疏言豐城隄工最要除石隄官修外其民修土隄向俱按照圖甲額設里夫行之既久黠者避役貧者誤工乾隆十四年改爲折徵法雖稍變役仍未均今請略爲更定按田均提俾貧民得免派累業戶共樂輸將至各鄉距隄遠近不同一遇衝漲勢難迅集而折銀統歸官辦則工有緩急費有盈絀俱可通局籌度惟向年折徵別增圩長經收弊端百出今擬附漕糧徵收有田始有糧有糧始有夫毫無加累圩長無從侵冒工程乃可永固均如所請行是月調河南巡撫八月疏言河北濟沁等水俱歸黃河之北衛河最大受淇泉湯沚諸水下合漳河匯入直境容納有餘治之之法惟慎隄防而已河之南西則伊洛澗瀍俱入於河南則汝光等屬之水會汝入淮並陳汝開歸所屬惠濟渦河等水亦歸江南之潁亳入淮惟夏邑永城商邱虞城之水獨注宿州由睢河入洪澤湖四縣並無山谷泉源汜濫於平地則見多而歸於睢河僅屬一綫且藉以刷淤睢河壅阻則宿靈以北實被其患四縣之水亦致倒灌其入睢河之界因爲沙礮灘所遏水大則衝激小則停淤前此屢議開鑿應聽江南興工其在豫省境內者連年河底停淤應開濬漫深以廣容受至地畝一片相連並無溝塘是以雨集則田皆積水雨過則田皆寬

水地多旱種久浸輒傷若棄積窪以爲儲蓄之所更廣疏橫直小渠節節引支入幹則宣洩易而水患可除於農田有益諭曰覽奏頗中肯綮詳妥爲之九月疏言臣與欽差侍郎裘曰修等會勘豫省水道計惟有先開幹河繼開支河再開溝洫分別要工次工緩工次第興修十月復偕曰修等疏言豫省大幹河有四一賈魯一惠濟一渦河一巴溝巴溝袤百八十餘里在商邱則名豐樂在夏邑則爲響河在永城則爲巴河今擬豐樂以口寬八丈爲率響河十丈爲率其餘十二丈爲率至巴溝下口本寬十五丈無庸加寬底皆半之其深處高下參差取最窪者爲水平挑深以平爲度計上游寬倍舊河下游加舊河之半河底一律平坦不至倒灌此辦理巴溝之情形也惠濟袤三百九十餘里議挑之始原以分賈魯之勢既開之後坡水匯注愈下則匯入之水愈多必需遞加方可注受河身上游在開封之中祥陳杞四縣下游在歸陳之睢淮柘鹿四州縣今加寬自九丈至十五丈不等底均三丈柘城應鑿沙疆九百餘丈鹿邑之底以六七丈爲率此辦理惠濟之情形也賈魯舟楫往來運濟糧食連年淤墊漸至淺狹彼岸頂衝此岸淤成河嘴更多阻塞中牟以下有惠濟以分其流無庸加寬由朱仙鎮以下應截去河嘴並砌

築決口修理舊隄面寬十二丈底寬四丈此辦理賈魯之情形也渦河發源通許之青岡至太康爲燕城河鹿邑以下河勢深闊但應增建月隄鹿邑岳家莊以下則益加收束應加面寬十六丈底寬八丈並鑿沙堰五百餘丈深如其舊燕城上截乃三邑南境之水藉以宣洩舊河僅寬二丈今加寬至六丈底二丈燕城下截雖寬而淺亦一律挑深俾可貫注此辦理渦河之情形也其支河之應濬者商邱之北沙河發源儀封從考城至商邱直達亳州之渦河又洪溝河發源虞城之惠民溝從夏邑之巴清河老黃河永城之減水溝下入睢河此二河爲支中之幹河其餘應濬大小支河共三十四道至支幹各河所挑之士卽築隄酌加礮夯多設涵洞再開工之始均於河心安釘誌樁並立標記於收工時覈丈尺以除諸弊得旨覽奏俱悉二十三年正月諭曰豫省災區積困已久朕特用胡寶瑑爲巡撫伊不辭勞瘁實能仰體朕痌瘝在抱之意而又能盡力調劑以蘇窮黎甚可嘉也著交部議敘部議加一級七月加太子少傅上獎寶瑑及裘曰修遵旨治河不惜工不愛帑不勞民水用洩土計方上源下游以次就治見御製中州治河碑文二十四年九月疏言衛輝府通判缺經臣奏准改歸河工查該通判尙有兼管鹽務一

項長蘆河東鹽包行運汲縣則係河北地方扼要之區延津則係河南各州縣門戶之地應分歸二縣稽查驗放以專責成從之二十五年八月疏言衛河自雍正四年經前任河臣嵇曾筠會同撫臣田文鏡奏准於汲縣之高廟下馬營淇縣之宋村等三處濬縣之雙鵝頭等七處湯陰之王家窯等四處內黃之韋家村等十二處增建草壩共二十六並奏明因水勢大小分別停辦減辦工料於鹽規項內支銷乾隆七年以後未經修治淤墊實甚臣悉心相度務俾一律深通請自今年疏築後定爲三年一小修五年一大修如當小修大修之年運河水足仍停止俟下次相機辦理上可其奏十二月調江西巡撫二十六年八月諭曰河南見有堵築楊橋隄工經理賑卹之事胡寶瑑撫豫日久情形熟諳著仍補河南巡撫十月奏閩鄉縣革役馬見龍持械拒捕傷差業將首要犯先後拏獲諭曰從來養奸誨盜皆闖穴選愞之吏釀成之朕留心整頓胡寶瑑能體朕意是以此案辦理迅速如此十二月疏言賈魯惠濟二河在中牟境內者均偪近楊橋黃水直下合龍後淤沙甚多查賈魯舊河已淤復修不易黃水初灌時將河身偪而南徙自鄭州界至祥符之時家岡仍入賈魯故道業已抽刷成河通舟祇須將分者截之使合淺

者疏之使深再就兩岸見有衝刷支溝多挑渠港俾民田積潦有歸並寬留河身以資容納增築隄堰以杜旁趨無須大工自成天然河道至惠濟河自兩閘至岡頭橋已淤斷且距賈魯新河頗遠不便強之使通而岡頭橋距十里坡賈魯河不過四五里又有新衝河形可因勢利導由岡頭橋入惠濟舊河挑濬新淤修補舊堰並於十里鋪建滾水壩一則節宣有度可以分賈魯之勢而惠濟亦歸故道得旨事半功倍爲之甚妥二十七年正月上南巡寶瓊迎駕於德州御製詩賜之曰九江遷古汴因地藉賢才資爾就熟路爲予抒幹裁滄川別壅闕田野闢汙萊善後方多務欽哉更勸哉八月奏患痰疾諭曰胡寶瓊辦事素能奮勉今患病將及一月以至形諸奏牘決非偶抱微恙者著傳諭速卽據實奏聞尋請解任諭曰此奏甚非朕之所望惟須安心靜攝以慰廑念賜人蔭一斤並命太醫院慎選良醫馳驛前往診視十一月疏言豫省地勢平衍恃以宣洩者溝渠實與河道表裏臣於二十三年河工告竣敬籌經久事宜卽將民田溝洫宜開並每年加挑路溝及小港廢渠宜復臚列奏蒙聖鑒是年每一州縣中所開溝自十數道至一百數十道不等長自里許至數十里不等寬深自數尺至丈不等皆以足資蓄洩爲度路

溝除驛路加挑外凡商旅通衢亦一律開溝種樹雖絲互而分戶承挑民易爲力自是每歲或於春融或於農隙隨時勤辦是以逐處寬深鮮有水患且各就地頭出夫貧富自均就役亦便皆令渠長地保管理不經胥吏之手一無擾累其民力難以全收之處自應欽遵聖訓酌借口食工多而地畝亦多仍屬衆擎易舉惟工多地少則須酌借但歲修非比特興大工各州縣額設公費動給已足敷用總期爲之以實俾小民蒙利而不致少累諭曰胡寶瑑奏見辦豫省民田道路溝渠一摺經理甚爲妥善國家雖久停力役之征而開挑溝洫實爲農田之利通力合作亦小民之所宜自爲謀者也今豫省每一州縣開溝十數道至一百數十道不等田溝固有業戶路溝亦傍民田民間業佃就地施工用力甚便而其事易集行之已有成效直隸河南地屬接壤著方觀承董率所屬倣而行之實因利利民之道也二十八年卒諭曰河南巡撫胡寶瑑幹練老成恪慎精敏敷歷中外宣力有年昨因舊疾復發遣御醫診視尙冀痊可茲聞溘逝深爲軫惜著加贈太子太保兵部尙書應得卹典仍著該部察例具奏其遺摺內請入籍江蘇青浦縣之處並著照所請行尋賜祭葬如例諡恪靖

高晉

高晉高佳氏滿洲鑲黃旗人大學士高斌從子父述明官涼州總兵雍正十三年九月高晉由監生授山東泗水知縣調任海陽恩縣乾隆四年遷陝西邠州直隸州知州八年遷榆林府知府十年遷榆葭道十一年調江南淮徐道十二年丁憂十三年授山東運河道十四年三月遷按察使四月署兩淮鹽政十五年遷安徽布政使兼管江寧織造二十年擢安徽巡撫二十二年春上南巡親蒞河工相度命高晉會同張師誠等協辦徐州黃河兩岸隄工十月奏言宿州靈虹等處浚河夫多鳳潁一帶災區諸工並舉米價日昂臣動工程銀三萬兩購米運工尙虞不敷潁屬河道將次興修更須多方接濟皇上念淮徐海道工作截漕二十萬石平糶懇酌撥五萬分濟上江各工從之十一月會奏浚安河淤淺以通尾閘分林子河入鮑家河使安河進水之地有所分更免壅遏上嘉之詳裘曰修傳二十三年三月協理江南河工四月上江河工告竣下部議敘七月加太子少傅二十五年奏言興修水利用存銀十三萬餘兩貯廬鳳道庫備續辦工程又水利善後章程案內歲撥司庫匣費銀三千兩交道庫備歲修之用查府州縣倉庫錢糧交代例

由道府加結咨部嗣後廬鳳道到任請照府州縣例限兩月交代藩司按限移催任員具冊由司加結轉詳咨部如逾限及交代不清照例參處並責成藩司每年將廬鳳道庫委員盤查結報如所議行二十六年三月遷江南河道總督五月奏高寶興泰積年被水恩允將高郵之南關車邏等壩封土三尺於金灣壩下挑新河洩水歸江洪湖運河之水不致漫壩東注高寶興泰可免西來水患惟是下河州縣支河汊港及田間積水俱匯入串場河北至鹽城縣石碓天妃等閘歸海驟難銷涸是下游被淹應杜其來源而本地積滂亦當籌其去路查范公隄綿亙六百餘里串場河自南而北向建石閘十八均有引河洩水歸海嗣因洪湖水由高郵各壩東注下河形如釜底水未到閘地亦被淹是以不暇計及閘下之引河今南關等壩既已封土金灣又開引河經始既有成規善後必歸全局見在鹽城之石碓天妃閘引河由新洋港歸海洩水甚暢興化之白駒青龍八社大團等閘引河由鬪龍港歸海頗資宣洩迤南之丁溪小梅迤北之上岡北草堰陳家衝等五閘未及挑浚請將丁溪小梅二閘引河浚通再開一引河匯入王家港歸海上岡北草堰陳家衝三閘引河浚深再開一引河匯入射陽湖歸海俾散漫之水裁灣

取直匯歸海口數州縣積水節節流通小民見水消涸必合力挑溝築圩蓄洩兼資沮洳漸成沃壤詔妥協辦理二十七年二月授內大臣三月疏言湖河之水以五壩爲來源以江海爲去路運河歸江自邵伯以下向設灣頭閘壁虎橋鳳凰橋西灣壩東灣壩金灣六閘宣洩湖水由鹽河歸廖家溝董家溝石羊溝芒稻閘分流下注查金灣壩引河緊接六閘地居上游山董家溝下注最捷惟滾壩寬五十丈河身寬十五丈河底八丈未能暢達金灣六閘舊有鹽河由芒稻閘匯金灣壩水入江去路甚暢今金灣滾壩既挑新河六閘金門應量爲展寬又東灣滾壩於乾隆二十二年落低三尺西壩應一體落低挑深河頭以導水勢六閘鹽河舊爲歸江水道設南北中各二閘河頭築隄分三路匯歸一處應留北二閘以濟鹽運南中二閘之底稍高滾壩過水遲滯應添建石壩三十丈接長閘下土隄酌挑引河則高寶湖水歸江宣洩益暢上是之十月疏言山陽海州沿海設葦蕩左右二營歲徵蕩柴二百二十五萬束參將一守備二船務守備一督弁兵採運各廳濟工法誠善也秋冬開採新正裝運額設採割兵千四百名浚柳石船五百七十船兵千三百餘名五六兩月載左右營蕩柴陸續交工該管武弁於額料款項冊不

能稽查細密兵日沿途盜賣淮陽淮徐二道各經管黃運湖河工程未能兼顧河庫道駐清江與葦營柴運之河相近請就近改歸兼管如所議行二十八年加太子太傅二十九年四月疏言清口以上桃宿等廳專受黃水清口東壩以下淮黃合流至雲梯關迤東歸海仰遵聖訓將清口東西壩展寬俾湖水暢注不致由五壩旁洩惟山安海防二廳北岸之五套南岸之陳家浦溜勢坐灣將成頂衝入溜之勢廳營請幫築舊隄接添魚鱗越隄臣查雲梯關外近海與其築隄束水致添新工不若於舊隄上首作斜長子堰約漫灘水匯正河入海尾閘寬闊於就下之勢益暢諭曰高晉奏籌辦雲梯關黃河下游情形一摺所見甚是雲梯關一帶爲黃河入海尾閘平沙漫衍原不應設立隄岸與水爭地而無識者好徇浮言或以清口洩水分數較多遇海潮盛時或不免意存顧慮因有子埝隄防之議殊不知清口暢洩其收利下河州縣者不可數計至雲梯關附近不過阜寧安東二邑所轄地面以此衡彼其輕重大小不待智者而知卽令一時偶值盛漲所漫溢者不過百分之一二耳高晉當守其定見旣知下游之制防一切毋庸置議益可信清口之展放無難永遠力持於水利民生大有裨益三十年遷兩江總督仍統理南

河事務三十一年正月奏審蘇州府同知段成功縱容滋擾案諭曰高晉具題審擬段成功縱容家人書役詐索累民一本內稱該員因患瘧昏迷不能檢點案牘家人龔玉等婪贓各款該員均未知覺等語所辦甚屬錯謬明係承審之員有意開脫冀圖從輕完結耳高晉自擢任總督以來甫經審辦參案卽意存瞻徇巧爲嘗試此等伎倆豈能逃朕洞鑒江南吏治廢弛已久見在正當督撫更換之時高晉尤宜加意整頓力矯積習何竟敢於姑息蒙混若此看來必出自朱奎揚之意朕知朱奎揚素非善類高晉遂墮其術中漫無覺察耳本應將該督交部嚴加議處第念高晉新任總督初次獲咎且在總河任內尙能實心任事姑從寬宥此後若再不知改悔必不能爲之曲貸也高晉此事實屬昏愒糊塗負朕恩矣著傳旨嚴行申飭此本已交內閣擲還該督另委賢員秉公確審務得實情以成信讞若尙迴護希圖了事朕必有另辦之法可惜朕造就高晉之恩矣命侍郎四達會同審訊尋訊出成功實有染指弊上以高晉初審辦時聽屬員袒庇開脫交部嚴加議處成功復以前任陽曲縣虧帑案上司代爲彌補鞫實抵罪十月奏督撫文移請俱紫花印將布政使舊用紫花印之例停止得旨俞允三十三年正月奏言江

南武鄉試上下江巡撫輪赴江寧主考但駐劄較遠請歸總督就近考試從之十月奏河工未備事宜一河庫錢糧應盤查並不保題請每年四月奏銷後及新舊道員交代河臣赴庫盤查督臣覈實保題一洪澤湖救生椿銀宜覈減湖遇風濤致虞覆溺歲支上下江耗羨銀各五百兩購椿簽釘湖邊以廣救濟近年全湖歸清口湖濱多淺灘汶港如裴家場太平河皆可泊請查勘停修其必須存留者覈估詳辦詔如所議行十二月署湖廣總督兼攝荊州將軍事三十四年二月仍回兩江總督任三月兼署江蘇巡撫十月疏陳採辦滇銅上以江南通洋甚便敕籌辦洋銅鼓鑄尋奏言臣遵旨折中定價收買小錢改鑄制錢請卽以應發洋商銅本銀收買查寶蘇局歲用銅鉛點錫共九十二萬一千六百斤今收買廢錢既多應卽以抵補額用銅鉛之數小錢質粗性脆以銅鉛點錫均勻搭配黑鉛試鑄卽可一律光潤除銅鉛錫入鑪鎔化准折耗統計廢錢百萬斤較專用洋銅節省盈餘錢萬一千餘串再查蘇局每年應鑄二十八卯額需用銅四十六萬八百斤見在商人應交銅斤收存廢錢及在途滇銅三十萬斤共銅一百四十萬斤每年配用二十餘萬斤足供七年之用民間未盡小錢又展限三月微特滇銅可停卽所

辦洋銅亦可緩上嘉之三十五年兼署漕運總督三十六年五月晉文華殿大學士兼禮部尙書仍留兩江任八月上以高晉明練河防詔會同侍郎裘曰修總督楊廷璋籌勘永定河歲事後詣闕恭祝孝聖憲皇后萬壽十一月賜毒狐端罩命紫禁城騎馬是月回總督任四十年七月河東河道總督姚立德奏請蜀山湖收蓄伏秋汛水工部以向例於十月煞壩收蓄汝河清水議駁上以十一月水落歸漕汝水漸微不足備來年濟運命高晉會同立德山東巡撫楊景素確勘議奏九月會奏蜀山湖周六十五里在汝河南運河東素名水櫃濟南北運臨汝有永定永安永泰三斗門臨運有金綫利運二草閘用資蓄洩乾隆二十八年運河道李清時詳請酌定秋伏汛內收水以尺八寸爲度緣東湖北祇馬莊一泉入湖全賴收蓄汝水始敷全漕應用此歷年籌辦濟漕之章程也必俟十一月始收清水誠如聖諭不足存瀦濟運查蜀山湖爲第一水櫃向定九尺七八寸不無過拘請以一丈一尺爲率從之四十一年總河吳嗣爵奏黃河兩顛淤高中間溝窄挾洪湖運河淤墊見在清口開挑引河帶水撈空恐於事無濟命高晉同薩載籌酌復奏言康熙初年黃河海口積沙橫亘二十餘里黃河從東北紆迴入海河臣董安國

剏築攔黃大壩另闢馬家港口去路不暢轉致上游易潰康熙三十八年拆攔黃大壩仍由故道入海卽今之大通口是也查該處海水黃水交接西岸接生淤灘南岸遂有新淤尖尖頭洋之名北岸有二泓三泓四泓之名見今海口逾遠近年黃水倒灌致通湖引河淤墊清水不能暢出清江淮安一帶運道停沙清口以外黃河兩頭墊高上年秋間豐碭南岸丁家集外灘民堰刷塌溜向南趨黃水趨毛城鋪滾壩旁流徐州以下銅沛邳睢宿虹桃源黃河水緩沙停惟有浚清口以內通湖引河停淤使清水暢出與黃河匯流東注並力別沙則黃河不濬自深海以不疏自治查向年通湖引河五道暢注禦黃鮮有倒灌今年湖水未能暢出遇黃水盛漲力不相抵必致倒灌一經倒灌引河復淤非特不能刷沙黃運兩河仍不免淤墊須於冬春湖水銷時依傍各引河寬長丈尺兩頭煞壩挑深並將清口東西壩址移下一百六十丈在平城臺建築使清水源遠流長山口之勢有力於陶莊迤上積土之北開引河一道使黃水繞北下注清水暢行至周家莊會黃東注不獨可免倒灌而二潰並流攻刷黃河兩頭浮淤及海口積沙均可漸次刷深下游深通則黃河上流可免停淤且洪湖無壅堰圩輒石工程常資穩固惠濟祠埽

工更可化險爲平得旨此奏皆合機宜形勢是治淮黃一大關鍵屆時妥爲之是年冬入覲以高晉年七十御書鈞節延禧額賜之四十二年八月奏豐陽廳屬唐家灣倒勾引河洩黃河盛漲由毛城鋪石壩下注睢河匯歸洪澤湖每年伏秋大汛徐城水誌長至一丈一尺五寸始開放減洩查倒勾引河居徐城上游距二百里徐城水誌長至一丈一尺五寸上游水已逾誌迨輾轉開放徐城水誌已不止一丈一尺五寸矣奔騰下注以致洪睢二河壅遏臨河之蕭縣宿州靈璧每致被淹與其減於旣漲之後莫若洩於未漲之先應請嗣後水誌以唐家灣爲準俟長至九尺五寸卽將倒勾引河草壩啟放殺其盛漲由毛城鋪及時分洩上善之四十二年四月赴浙會同巡撫王亶望相度海塘詳亶望傳七月命赴豫堵築儀封漫口高晉籌於漫水口門分東西壩堵築就舊有順隄河於十八堡外灘起至翟家莊開引溝透入舊河並浚舊河淤以暢水勢堵築十八堡缺口攔順隄河水歸新開引河切去十六堡口門對岸灘嘴奏入報聞九月時和驛漫口風暴刷深全河溜注口門高晉請交部議處得旨寬免十月以徇隱高樸盜賣官玉部議革任詔免之十二月時和驛八堡漫口合龍後儀封新修埽工蟄陷請交部嚴加議處

諭曰時和驛儀封兩處本應同時合龍前此高晉等因時和驛水深沙活施工稍艱而儀封溜勢平緩辦理較易卽先將儀封堵閉亦屬乘便巧辦先完一工之意如果經理得宜俾無後患未爲不可今新修埽工復因溜掣湍激致有蟄場之事則工作原未穩固可知高晉等督辦何事責無可辭著交部嚴加議處部議革任詔仍免之尋會奏儀封漫水由順隄河奪溜直達考城其儀封十五堡以上隄外尙有淤灘至十六堡漫口逼近河身土性鬆浮口門上下刷深河身北高南下引河在北非將河水涌高不能掣溜北趨注正河但河水一經涌高壩工難免蟄裂須將引河再深三四尺正河底接挖深溝六百餘丈將壩進埽築實金門兩旁邊埽加寬三四丈口門收至二三丈時多壓厚土俟涌河挑深水勢涌高開放掣溜後再將壩工堵築則合龍時水勢平穩可期鞏固得旨宜妥速爲之是月卒四十四年正月諭曰大學士管兩江總督高晉品行端醇材猷練達老成敦樸體用兼優由州縣洊陟封疆宣勤奉職敷歷多年自簡畀綸扉仍管兩江總督秉公持正董率有方其兼管南河事務亦能經理得宜深資倚任昨以豫省漫口工程緊要特令馳赴工次督辦堵築事宜近據袁守侗等奏其染患痰咯之證不能眠食卽

派乾清門侍衛布彥達賚帶同太醫院堂官陳世倌馳往診視並諭安心調養以冀速痊茲聞溘逝深爲軫惜著仍派乾清門侍衛布彥達賚馳驛前往奠醑並加恩入祀賢良祠其任內革職降級註冊之案俱著開復所有應得卹典仍著該部察例具奏賜祭葬諡文端三月上製懷舊詩列五督臣中詩曰從來擢督撫德才量並重以此下僚中百不一二中自知縣起者臻斯必超衆晉也實其人故悉下情洞更兼習河務要任重倚重乃以治河決來豫屢稽功憤懣因致疾不起誠堪痛歷歷懷舊臣中外資經綜而予未歇肩籲俊期與共子書麟官至湖廣總督協辦大學士廣厚官至湖南巡撫廣興刑部侍郎

李侍堯

李侍堯漢軍鑲黃旗人高祖李永芳天命六年以明撫順所游擊投誠屢立戰功授一等伯世襲自有傳曾祖釋迦保祖祈天保皆襲爵父元亮累官至戶部尙書諡勤恪入賢良祠侍堯於乾隆元年授六品廕生八年補印務章京九年授副參領十三年十月遷參領十一月調印務參領十四年擢正藍旗漢軍副都統十七年六月授公中佐領十二月調熱河副都統二十五年擢工部右侍郎兼管鑲白

旗漢軍副都統六月調戶部右侍郎十一月署廣州將軍二十一年三月劾前將軍錫特庫等廢弛馬政空額五百餘得旨錫特庫交部嚴議廣州駐防漢軍甲兵三千諭以千五百出旗轉補綠營兵缺實以在京滿兵千五百侍堯奏綠營未建兵房請將從前水師營空房給出旗兵住諭如所請六月奏滿洲漢軍駐防各半官制兵額事宜一滿洲漢軍各設協領一原設漢軍參領八請改爲漢軍佐領應添設滿洲佐領八其防禦驍騎校各裁八員卽將所裁俸支給新添佐領一水師旗營甲兵應於壯丁內各半挑補水師營協領請作爲滿缺佐領防禦驍騎校等官缺亦應各半挑補一漢軍筆帖式三請裁一以一作滿缺一漢軍清字員外郎八請裁四留四缺挑補滿洲一漢軍原設領催三百二十請裁八十漢軍滿洲各設百二十並請設前鋒百五十委署前鋒校十二應支銀米將議裁官兵俸餉抵給一額設礮手三十名請裁六與弓鐵匠均各半補一綠營步糧八百分請酌留四百分補留旗壯丁餘四百分俟缺出扣歸綠營部議從之七月署兩廣總督二十二年十月奏廣東各州縣買補倉穀將上中下三等穀兼買充數開上價報銷至借糶則於應碾米者用上穀借糶用中下穀諭曰所奏甚悉情弊上中下三穀

碾米多寡迥殊若聽其將中下穀石混開上穀價值而以借糶爲銷穀地是僕役之獲利益多而窮民受虧益甚廣東既有此弊他省諒亦不能盡無著傳諭各督撫嗣後買補倉穀當嚴飭州縣親自碾試務得上穀其該管官盤查並當一體碾試不得徒以額貯數符遽行出結儻有徇隱卽令分賠又奏廣東制錢有攙和古錢並吳逆僞號錢請查禁諭曰前代廢錢流傳至今已屬無幾該省攙和行使相沿已久若盡行查禁轉使吏役得以借端滋擾如唐宋元明之舊錢不妨仍聽民便至僞號錢文仍當嚴行禁革著該督撫等出示曉諭所有利用僞號錢文准民間檢出官爲收換如係小錢則兩文換制錢一文小民自當踊躍從事所換僞錢卽供鼓鑄之用十二月疏言廣州駐防更換滿兵其出旗漢軍兵曠米及扣缺官俸米共截存萬四千餘石可平糶以便民諭如所議行二十三年奏守備張彬佐禁村民演劇被民人聚衆毆傷見飭審是否村民違禁演劇恃衆逞兇抑或該守備尋釁滋事諭曰據所奏似欲以官民計較曲直殊未得懲創惡習之意地方莠民恃衆逞兇不畏官兵至公然肆行毆辱刁悍已極無論該弁巡查禁諭本係職守當爲而刁民輒行抗拒固當痛加懲治卽或有滋事情弊召侮有由自當不論

曲直先治匪棍然後徐議劣弁以飭官方庶刁悍之徒稍知畏懼二十四年正月實授兩廣總督五月劾碣石鎮總兵書德侵挪公帑玩視巡洋諭嚴鞫論罪如律九月奏外洋諸船到粵請禁帶絲出洋從之十二月奏防範外商規條五一洋船銷貨後應飭依期回國禁止住冬一洋商館毋許漢奸私行交易一內地行商毋許借洋商貲本一洋商毋許雇內地廝役一洋船泊處守備一員督同弁兵防範下部議行二十五年正月奏粵海關外洋商船出入向於正稅鉛鈔外另有官吏家人通事巡役等規禮以及分頭擔頭等項銀從前私收入已後經奏報歸公則例內仍臚列前項名色請刪除統列歸公銀若干省城大關及海洋各口向有書役家人等飯食舟車等費勢難裁汰亦備列則例內請於歸公造報外另刊應支條款送部按年覈銷下部議行四月疏言粵東左翼總兵既改外洋水師應照碣石南澳二鎮例一體巡洋諭如所請行廣西貴縣獍民韋志剛滋事不法先經巡撫鄂寶請褫知縣石崇光職上以事係知縣查出命暫停革職侍堯尋奏先經面諭該縣體勘始行查報得旨將崇光逮問旋審明志剛實無陰謀不法事崇光妄事猜疑率行混稟應照溺職例革職諭曰石崇光既非避重就輕如鄂寶原奏亦

並未姑息養奸如李侍堯所云也在石崇光不過以韋志剛恃符武斷情似謀逆不及詳悉體究遽行通稟誠不免冒昧而鄂寶惟恐李侍堯先行入告至落人後故飛章參審李侍堯復以鄂寶已經奏聞又故甚其詞爲面諭體勘之語今水落石出不能科韋志剛以謀逆之罪乃反坐該縣以率報之愆而督撫如不預焉者屬員皆有人心何以使之折服耶卽此一事觀之則該督撫二人之不能和衷共濟已可概見此特其一事耳設兩省地方公務俱如此各懷意見豈足以鼓勵人才振肅綱紀將朕所憂於二臣者又不僅在於此事之虛實矣在韋志剛雖無謀逆情事其恃強豪橫惡蹟纍纍擬以發遣自所應得知縣石崇光革職之處俟該部議覆時另降諭旨著將此旨傳諭李侍堯鄂寶嗣後務宜痛加省改固不可一味和同亦不可各挾私意總以一秉虛公破除習氣副朕委畀封疆至意十一月請加徵粵海關補平銀經戶部議駁諭曰所駁甚是此項銀兩如果埽數起解自足敷該部兌收是以向來從未有短少挂批案件何至近日遽有不敷部收之處看來該關起解縱未必短少而解員中途滋弊諒所不免著李侍堯嗣後起解稅銀應慎選謹飭之員管解仍留心查察勿令滋弊儻有侵蝕卽行嚴參示懲二十

六年正月授戶部尙書十月承襲勳舊佐領十一月授正紅旗漢軍都統二十七年京察加一級二十八年五月授湖廣總督七月奏湖北承倅佐雜各員遇委署差遣本任不另委員署理見飭藩司凡有委署出差者另委接任以專責成恐他省亦有此積習請敕部通行查禁從之又奏已革武昌府知府錫占任內有未買倉穀一萬石將穀價交存江夏縣庫及查奏銷冊錫占原報實貯並無未買字樣且其中缺數頗多尙有發各屬代買未經交足者並有屬員事故穀竟無著者司道俱以實貯無缺結轉見委員查錫占缺穀實數勒限清交並飭司將通省倉穀澈底盤查上嘉之八月奏湖廣鹽價過昂已查出擡價病民商人依律懲治請酌中定價作爲限制諭兩淮鹽政高恆赴楚會議尋奏請按淮南成本酌加餘息定制諭曰所奏允協如所議行從前湖廣鹽行之弊總由不按淮南成本折衷定價是以漢口各商從中意爲低昂甚至擡價餘欠侵吞種種作奸而揚商窻遠阻礙不得受其挾制今高恆遵旨前往李侍堯與之協力清釐將成本覈定加以餘息明定限制清理皆得其平鹺政可以永行無弊十月加太子太保十一月疏言兩湖各營如宜昌鎮洞庭協漢陽荊州常德岳州等營原設水師戰船巡哨未定

章程見分飭各鎮協營分定管轄水道里數責各將備督率巡防中有地方遼遠兵船較少者酌量抽撥上可其奏二十九年六月奏湖南各營千總外委請歸督臣考驗拔補七月奏湖南辰州府屬乾州同知及鳳凰營通判分駐苗疆前因紅苗滋事每廳撥給標兵百把總一又寶慶府同知亦議給標兵百把總一今苗民向化所撥弁兵請裁均下部議行八月疏言州縣造報詞訟僅止開列事由巡道往查亦照所報呈送餘皆隱匿以致無從查驗請嗣後責道府詳查報冊如有未經造報之案提卷察覈果無枉斷延擱仍照造冊遺漏請參道府扶同徇隱者並處上嘉其奏交部議行又請仍復楚省驛站赴口買馬例從之是月調兩廣總督三十年三月奏督撫同城者如遇水旱偏災及勘收城工事撫臣前往查辦解審案件歸督臣審辦從之又請改瓊州水師副將爲海口營參將左營都司改守備又左翼碣石二鎮標右營游擊改都司仍照舊巡洋雷州協副將改雷州營參將並裁中軍都司以左營守備兼管欽州土瑤錯雜幅員較廣所設游擊請改參將下部議行五月廣西右江鎮總兵李星垣婪索土田州知州岑宜棟諭侍堯嚴鞫尋鞫實定擬具奏諭曰李侍堯審擬李星垣婪索土田州岑宜棟銀兩一摺定罪

甚屬失當李星垣始向岑宜棟索借銀二千兩因一時難以措應輒將營中見存買補穀價一千五百兩令其預領俟秋間買穀交倉旋令家人張同收取入已侵用以庫貯買穀官項假冒預發之名巧爲騰挪私充欲壑非監守自盜而何李侍堯並不按應得之罪定擬乃引索借所部財物律擬以絞候轉似於本案加重科斷錯謬已極卽其家人張同等承李星垣意指兩次向岑宜棟勒索六百餘金情均可惡亦不應僅以杖責完結已交部另行覈擬矣李星垣係該督保舉堪勝總兵之任今其贓罪敗露猶欲爲人迴護意從輕減李侍堯著傳旨申飭尋奏請交部嚴加議處部議革職侍堯於六月下鞫卸任奉旨補官日降三級調用九月命署工部尙書所降之級帶於新任三十一年正月署刑部尙書七月因兩廣總督任內失察糧道張曾受賕部議革任得旨著於見任內降二級從寬留任三十二年三月上以侍堯服制將滿命回兩廣總督任三十三年正月奏請各標協營伍守糧缺出必將兵丁有無子弟確查考補不得以外來無籍人入伍報聞七月劾潮州鎮總兵明達倡勒守備甘廷亮墊發齎摺路費不准領項歸款致廷亮自縊命褫明達職交侍堯嚴審旋奏明達審無倡勒致死情事查該員任內曾侵用馬

價擬罪如律八月戶部奏驗兌粵海關稅銀短少命侍堯詳查覆奏尋奏請嗣後稅銀照依解部兌收法馬收足卽以原封批解毋許鞘外另備添平部議如所請十二月襲二等昭信伯三十四年大軍征緬甸命侍堯傳檄暹羅如緬酋竄入一體截擒旋奏暹羅見爲甘恩救竊據其人係彼國亂臣不宜傳檄移會暹日莫士麟素恭順臣作爲己意檄令移會暹羅各夷日密偵緬匪竄入境內擒拏具報上可其奏三十五年二月奏粵東民多偷渡臺灣請於出口處發循環印簿責成地方官逐日盤驗登記按月呈繳報聞五月奏守備楊春榜至參將王希曾署稟事忽自戕請將希曾解任訊究上以案內疑竇頗多侍堯並不親提研鞫飭之尋奏查王希曾於楊春榜冒銷工程銀不行糾舉反侵收工料銀入己致釀人命擬戍十一月奏審擬豐順縣奸民朱阿姜潛謀不軌請革知縣吳蘭穀職並自請交部嚴議上以該犯等糾黨結盟事經兩月知縣不能先期訪獲革職未足示儆命將蘭穀拏交刑部治罪侍堯督拏首夥要犯安速從寬免議三十七年三月奏運庫公費充裕請撥十萬兩解交藩庫充餉下部議行十一月廣州將軍秦璜副都統恆泰彼此訐奏命褫秦璜等職發侍堯查審尋奏恆泰病故據秦璜劾稱以馬價

餘銀私抵倒斃馬匹訊無染指情弊恆泰參秦璜加收房租及受賄挑補額缺等款屬實擬罪如律三十八年晉武英殿大學士仍留總督任三十九年六月奏安南內訌見飭粵西鎮道嚴防夷兵竄入得旨褒嘉十二月入覲命紫禁城騎馬賜黑狐端罩四十年十月奏審辦廣西高明縣民潛赴安南滋事案查取失察職名按其日月將前署明江同知嵇璇開參左江道秦廷基忽赴粵東謁見先爲游說希欲通融前據太平府知府程大治寧明州知州康坦嶽倒提日月開送前任同知鄒錫彤職名及指駁行提復令役甘華頂冒串供種種舞弊請將廷基等革職嵇璇解任審訊諭嘉其秉公交部議敘十二月兵部咨粵東糾黨結盟案不數月多至五起應照例加重議處武職雖協拏從前究屬寬縱未便卽予免議侍堯奏員弁既經協拏若因案多不准免議必致暗爲消弭兇徒轉多漏網請將協拏員弁照例寬免諭曰所奏是已於摺內批示矣地方武弁平時不能約束稽查致匪徒糾黨結盟屢經犯案自應示以重懲如果實力查拏有犯必懲則藏奸自少卽所屬地方犯案較多若知上緊緝拏功過原可相抵設仍予以議處轉致各員弁自顧考成暗爲消弭於懲治奸匪整飭吏治均屬無益李侍堯此摺爲輓回積習

起見所奏甚是然亦惟該督向來董察屬僚不事姑息朕所深信始可爲此言若他人未可輕爲倣效也此案著照李侍堯所請行四十一年二月奏嘉應州斬犯蔡老三臨刑未經殺死帶傷脫逃奉委監刑之長樂縣知縣薛閔等未親往遽報斬訖次日獲犯正法請將薛閔等革職拏問諭曰此事殊堪駭異實爲從來未有處決重犯奉委之知縣及該營遊擊並不親往監刑委之吏目千總微末員弁黑夜行刑並不親驗首級致重囚臨刑脫逃復敢捏報斬訖實出情理之外其行刑之兵丁黃仕榮顯有賄囑情弊不可不嚴訊重懲卽鎮道等所報次日尋獲正法之處亦恐難以憑信並當嚴密訪查勿使兇惡要犯得以潛蹤漏網所有知縣薛閔署遊擊劉永惠吏目鄭兆驥千總劉駿俱著革職拏交該督撫同行刑之兵丁黃仕榮一併嚴審明確從重定擬具奏總督李侍堯巡撫德保及該管提鎮道府著一併交部嚴加議處尋奏飭委護惠潮嘉道康基田赴嘉應查驗該犯屍首處斬屬實並究出兵丁黃仕榮於行刑時受賄全屍情節仕榮擬斬請旨卽行正法擬薛閔等罪如律部議革侍堯任得旨寬免四十二年正月因緬酋悔罪投誠籲請還人納貢命大學士阿桂往滇董其事調侍堯爲雲貴總督諭曰雲貴總督見

在辦理此事爲最要之缺各省總督老成有識能辦大事實無出李侍堯之右者是以將伊調補李侍堯到滇將諸事妥爲經理至開關通市以後所有內地民人出口及嚴禁沿邊百姓不許前往茂隆廠生事諸事已詳悉面諭阿桂李侍堯晤阿桂時即可問明一切悉商爲之既定章程阿桂即可回京而實力永久查辦則惟李侍堯是賴三月京察議敘加一級因緬目孟幹入關稟稱象衆未到還人納貢請暫緩四月偕阿桂等奏孟幹等言詞反覆見檄諭緬酋以蘇爾相楊重英在內地不足輕重送還與否無關緊要以折其居奇之心上嘉其深合機宜又奏請禁止土人出關偵探並得旨褒嘉是月命阿桂回京緬甸尋送出蘇爾相訊供解京仍檄送還楊重英六月奏緬匪綻拉機稟請釋回孟幹等並未提還人進貢嚴諭來差傳知綻拉機俟送還楊重英奉表貢象不但遣回孟幹並准開市嘉其所辦尤合機宜又奏三十三年征緬甸在木邦殉難之原任永北同知胡邦佐廣南府經歷許景淹因輾轉行查迄今十年未具題請賜旌卹上可其奏下部議行四十二年正月奏把總李有貴在蠻墩盤獲進關奸民潘起騰越州人潛赴緬地今進口爲賊探信訊供解京上褒獎之尋諭曰緬地水土惡劣實非可用武之地卽

或該處有可乘之隙亦不肯兵出無名興師涉遠朕自有定見李侍堯在滇一載已熟悉緬地情形且其平日閱歷年久遇事亦知慎重自不肯稍涉喜事輕舉妄動若緬甸內訌已成上下瓦解其頭目紛紛投出能深悉其底裏實在唾手可取則又機不可失李侍堯當酌量爲之六月奏永昌普洱等府界連緬甸每歲派兵五千五百在張鳳街三臺山九龍江等處防守揆度邊情實不值如此辦理請於杉木隴設一大汛撥騰越鎮標兵五百千崖設一小汛撥南甸左營兵二百令各本營員弁輪駐巡防又虎踞銅壁等關卽於杉木千崖兩汛分兵駐守毋庸多派官兵滋費下廷臣議行時滇撫裴宗錫以滇銅不敷額運奏請調劑命侍堯悉心籌畫具奏十一月請裁鑪座並查明鑪欠分別暫賠諭曰所奏仍未能善體朕意如將有著無著之項概令攤賠仍不脫從前陋習著傳諭李侍堯等將舊有廠欠之項詳細覈查其有著者若干卽將鑪戶勒追如逾限不交查明家產抵補未完之項卽於經手原放之員名下著追無論見任在籍亦俱勒限追繳如不能完卽將家貲田產查封抵補庶不敢遲迴觀望其從前實係無著之項查明若干卽據實開單奏明候朕覈定豁免降旨朕此次清釐專在剔除積弊卽或應免無著之

項稍多亦所不惜李侍堯不得存帑項爲重之心畏首畏尾復涉含糊致負朕諄切訓諭之意四十四年奏滇省墮欠鹽款由於鹽斤無著因勒限於本歲奏銷前不准絲毫短缺見任各員向井竈收買餘漙趕煎趨補半年內鹽已足數諭曰滇省墮欠鹽款情弊相仍歷久未能釐剔今李侍堯知致弊之由勒限趕辦不及半年而應存鹽數業已顆粒無虧可見事在人爲果能實心查辦積弊自卽肅清四十五年三月原任雲南糧儲道海寧向軍機大臣訴侍堯貪縱營私狀奏聞命尙書和珅侍郎喀寧阿查辦和珅等尋奏查訊侍堯供認收受道府等官餽賂各款不諱諭曰李侍堯身爲大學士歷任總督乃負恩婪索盈千累萬甚至向屬員變賣珠子贓私狼籍如此不堪實朕夢想不到不特朕用人顏面攸關卽各督撫聞之無不慙愧痛恨矣李侍堯著革職拏問交和珅等嚴審定擬具奏命褫所襲伯爵以侍堯弟江西提督李奉堯襲五月擬侍堯斬監候下大學士九卿議改斬決復下各直省督撫議十月諭曰各省督撫擬李侍堯一案業已到齊李侍堯以大學士兼管總督受恩最深乃敢營私敗檢驕縱妄行實出意料之外覈其情罪非僅如彰寶之因病任性縱家人勒索供應者可比較之從前恆文良卿貪婪斃

法致罹刑憲情節實約略相等惟恆文甫任督撫卽肆意婪贓平日又無出力辦事之處李侍堯則身任總督二十餘年如辦理暹羅頗合機宜緝拏盜案等事亦尙認真出力且其先世李永芳於定鼎之初歸誠宣力載在旗檔尤非他人所可援比是以前於尙書和珅等照例定擬斬候大學士九卿請改立決朕復降旨令各督撫等各抒己見確議具題原欲以準情法之平茲各督撫大率以身在局外多請照大學士九卿所議而閔鶚元則以李侍堯歷任封疆幹力有爲爲中外所推服請援議勤議能之文稍寬一綫具奏是李侍堯一身之功罪原爲衆所共知諸臣中既有仍請從寬者則罪疑惟輕朕亦不肯爲已甚之事李侍堯著卽定爲應斬監候秋後處決餘著照大學士九卿原擬行四十六年三月甘肅撒拉爾逆回蘇四十三滋事特旨賞侍堯三品頂帶並戴花翎赴甘肅總辦軍務四月陝甘總督勒爾謹獲罪命侍堯管理總督事時大學士公阿桂奉旨剿辦逆回閏五月侍堯奏見調滿漢屯土兵臣抵省後查覈軍糈頗裕尙有陸續報運者計算足敷儲備之數報聞又偕阿桂奏賊於華林山築卡我兵奮擊克之得旨嘉賚先是上以甘肅私收監糧折色明係捏災冒賑命阿桂會同侍堯詳查具奏六月奏甘肅

捐監歸蘭州總辦自開例卽收折色並未買糧歸倉盤查出賑俱屬虛文捏冒侵吞屬實請旨將前任藩司王亶等任內假捏結報之歷任道府直隸州革審命將前任蘭州府知府蔣全迪皋蘭縣知縣程棟革職拏解蘭州審訊此外各員交吏部查明曾任蘭州道及首府首縣者一體革職拏問其餘各道府州縣加恩免其提訊是月殲斃賊首蘇四十三七月逆回平尋偕阿桂奏冒賑舞弊之司道以下各官見據蘭州府知府陸緯等將浮冒銀數及餽送上司各款逐一供認八月諭曰甘省私收折色一案骫法營私弊端百出已將首先倡議侵冒分肥之勒爾謹王亶望王廷贊蔣全迪分別明正典刑矣至此案大小各員通同侵蝕自應按律問擬以彰國憲而警貪婪但人數較多若概予駢誅朕心有所不忍著傳諭阿桂等將各該犯所有侵冒銀數其有二萬兩以上者俱當問擬斬決二萬兩以下者入於情實其一萬兩各犯亦應問擬斬候請旨定奪所有應行定擬案犯俱著趕本年旬到以前具奏毋致延緩是月阿桂赴豫督辦河工九月侍堯奏請將冒賑二萬兩以上之程棟等二十員正法餘分別定罪有差又奏蘭州城西南兩面均山高於城逆回在華林山憑高下擊城守兵無可遮蔽且該處人煙輳集屋宇直

接城垣易於攀攻請自西外城安定門起由拱蘭門迤至風神廟止又自通遠門東南角起由迎恩門至廣武門北角止添建城垣西南兩關廂居民勸諭遷移撤屋以留火道華林山應築營堡移督標右營官兵駐筭得旨如所議行四十七年三月奏舉蘭等三十四廳州縣虧缺庫項八十八萬八千餘兩倉糧七十四萬一百餘石覈冊檔自雍正年間至乾隆二十年以前卽有虧欠銀自數十兩至千餘兩糧自數十石至四百石二十年後虧缺日甚多者至萬餘石上司捏結報題致州縣毫無忌憚見今查出二十年至四十年虧項積至四十二萬俱係挪新掩舊今四十年後自總督以至州縣俱治罪產鈔無可追賠其四十年溯自二十年之累任各官應照任內虧空之四十二萬擬定成數加倍賠補有無力完繳者入通案各員名下分賠其尙有八十二萬餘請於臣及司道府廳州縣養廉內攤賠諭曰倉庫正項銀兩竟敢任意侵欺卽令加倍賠補亦所應得但念歷年已久各州縣輾轉接收較之折捐冒賑味良舞弊者尙復有間其濫行出結保題之各上司咎止失察著加恩將虧空四十二萬之數照依原單按其在任久暫照股分賠毋庸加倍賠補至該督所稱其餘尙有八十二萬餘兩未便竟歸無著請於見任

總督及司道府廳州縣各員養廉攤扣三成陸續歸補等語甘省積弊相仍爲從來未有之奇事此等劣員既經冒賑殃民又復侵虧正帑實屬罪無可逭昨已將閔鶚元等交軍機大臣會同英廉等詳加覈奏降旨分別辦理至李侍堯福崧等辦理此案澈底清查尙屬實心卽見在道府州縣各員多係新任若令攤扣養廉辦公未免竭蹶且恐將來轉有藉詞賠累復致虧缺之弊並著一體加恩免其分賠此次寬免後若再有虧缺查出斷不能爲之曲貸也四月奏虧空案內查有節年民欠未完籽種口糧銀一項除節次邀恩豁免外尙有應徵積欠倉糧二百萬石有餘折銀三十萬兩有餘請分年帶徵諭曰甘省地瘠民貧朕前節年加恩出借緩徵用紓民力在小民感激朕恩自無不踴躍輸將但念該省每遇偏災動項賑卹多爲劣員等侵蝕冒銷閭閻未得普霑實惠甚非朕惠養黎元之意今該省積弊已除所有此項積欠銀兩著加恩全行豁免五月命給予見任品級頂帶八月加太子太保四十八年三月請增甘肅衝途州縣養廉下部議行四月因奏參洮河廳同知李天植承修築工折收料物一案未將失察之知府附參部議降二級調用得旨寬免留任六月奏河州改協爲鎮鞏秦二營向隸固原提標請改歸

洮岷協專轄下部議行四十九年閏三月廣東監生譚達元控總商沈冀州斂派公費餽送前督臣李侍堯經欽差尙書福康安審訊照因公科斂所屬財物例定擬諭曰李侍堯久任封疆素能辦事是以加恩復用自簡任陝甘總督以來於剿捕逆回查辦監糧二事尤能認真出力而地方諸務亦俱實心整頓其令總商科斂公費購買物件與枉法受財者有間所用公費銀兩議令按數賠繳亦足蔽辜李侍堯著加恩免其治罪從寬改爲革職留任四月奏肅州安西等處雇車出口向例每百里給價一兩六錢經烏魯木齊都統海祿查奏止給一兩續經覈奏每百里給六錢應查歷任報銷浮冒各員一體查辦但此項車價原係照例給價其咎在明知例價有餘不行呈出尙與舞弊有間可否罰令加倍賠繳免革職治罪上可其奏是月甘肅鹽茶廳小山逆回田五等聚衆滋事諭侍堯會同固原提督剛塔迅速剿捕尋奏帶同臬司陳步瀛前往籌辦諭侍堯應以速以嚴尋奏田五竄回小山慮旬結各處新教見密飭附近州縣及河州西寧回族較多地方留心防範諭曰此案田五等復敢倡設新教糾衆滋事究係從前李侍堯未能殲絕根株以致復萌餘孽自難辭辦理不善之咎而此時緊要關鍵以安撫舊教爲主侍

堯旋奏拏獲田五等家屬並夥賊多名解鹽茶廳收禁臣卽馳往審辦諭曰據奏田五等家口已被拏獲李侍堯親往審訊所有田五蹤跡及起事緣由均無難澈底跟究著李侍堯於審明後卽將見獲各犯分別凌遲斬梟一面奏聞一面正法五月奏賊匪至打喇赤復回撲鹽茶恐劫家屬調固原兵彈壓命侍堯速遵前旨將所獲賊夥犯屬審明尋奏田五中槍傷在馬營自戕餘匪竄徐家溝添派官兵痛剿又據賊供意欲回搶鹽茶約人內應已將供出各犯密拏收禁隨將田五等家屬正法諭曰李侍堯辦理此案甚屬妥速且鹽茶廳拏禁賊犯及犯屬甚多昨經降旨該督等先行審明卽將各該犯正法以絕賊人窺伺搶救之心今李侍堯於未奉諭之前業已籌慮及此將各要犯四十九名卽行正法與朕所降諭旨符合足見其能辦事本應卽予優敘但此案究係李侍堯前此查辦新教未能淨盡平日又疏於防範所致功過兩不相掩李侍堯著交部議敘侍堯奏賊匪撲靖遠城經官兵擊退臣見已馳抵靖遠賊竄窩石山梁因大雨軍裝火藥潮溼俟天晴進兵諭曰此時李侍堯在靖遠駐劄不過籌辦糧草事務可以委道員等代辦李侍堯當前往馬家堡督率調度較之剛塔一人在彼呼應更爲得力況鹽茶監禁

賊回家屬俱已正法其靖遠內應回民亦經按名拘獲正法賊匪見退入山內自不能復至靖遠滋擾卽或拚命回撲官兵正可就其出時半路截殺更易爲力見在賊所據馬家堡前左右三面俱係深溝大河官兵嚴密圍攻已如釜底遊魂困守空山食盡計窮自不能長久占據惟堡後靠山踞險防其別尋路徑或由山後逸出該督等不可專意在前攻圍後路致賊人或乘閒竄逸李侍堯旋奏馬家堡賊翻後山遁上以侍堯安坐靖遠並不親往調度嚴飭之諭部停其議敘時賊匪竄西鞏上虞驛路梗塞令設法安置郵傳賊又遁馬營街侍堯親赴軍營由安定一帶賊蹤較近處駐劄諭曰李侍堯旣知親往辦理卽當星赴馬營街打仗處所與剛塔等面商妥辦乃僅於賊蹤較近之處逗遛駐劄是何言耶著再傳旨嚴行申飭時通渭縣之石峯堡先有賊接應上以侍堯屢失機宜命大學士公阿桂尙書福康安馳往督師侍堯尋奏賊自馬家堡竄後剛塔徒事尾追及至西鞏賊復遁馬營街恐與石峯堡賊會合臣兼程赴安定堵禦諭曰摺內措詞皆隱隱參奏剛塔總督與提督平日雖屬平行至行軍之時一切皆應聽總督調度如李侍堯親往打仗處所督辦剛塔仍然怯懦不前原不妨據實參奏乃該督惟知安坐觀

望逗遛靖遠及賊已遠颺惟知以落在賊後歸咎剛塔試思伊不又落剛塔之後乎尋奏通渭城陷西安副都統明善陣亡上以侍堯辦理不善致各路賊蔓延旬結嚴飭之侍堯奏賊據石峯堡飛札領隊大臣五岱派兵堵截諭曰李侍堯既慮及賊人侵擾後路卽應星赴打仗處所與五岱等面商辦理且賊已南竄安定一帶驛遞往來均無阻礙有何必須該督親身在彼料理之事乃仍於該縣安然遙駐惟以札致了事其故實不可解又奏盤獲賊探徐璠成究出通賊之萬數十隨拏到京據供欲往蘭州河州句合新教上以蘭州省會重地河州尤係回民巢穴飭侍堯嚴防時因奉節次飭詢諭旨逐款覆奏諭曰從前甘省蘇四十三因新舊爭教地方官辦理不善致釀事端小醜跳梁立時撲滅經朕節次降旨令李侍堯將通省新教回民當不動聲色密行查辦遠遣斷絕根株以靖邊疆而安良善查辦新教係李侍堯分內專責經數年間該督祇查拏一二人奏明辦理乃爲時無幾遂有固原所屬小山回民田五等聚衆謀逆之事攻城掠堡傷害官兵因令李侍堯查明賊人起事根由據奏靖遠城內回民於本年三月十五日衆新教回人齊集禮拜寺將田五糾衆謀逆情節告知約令臨期內應等語是賊人多係新教

久蓄逆謀公然於縣城中齊集糾約李侍堯安坐省城毫無聞見其從前查拏一二回匪不過藉以塞責而其並不實心查辦已屬顯然迨賊首田五就斃餘黨竄入馬家堡剛塔等帶兵追趕李侍堯惟知株守靖遠城審辦賊犯家屬而於一切攻剿機宜竟視爲非伊總督應辦之事祇委之提督以致軍營統攝無人賊匪乘間翻山而遁經朕再四訓飭李侍堯始行移駐安定仍與剛塔等軍營相距遙遠彼此信息祇憑文劄往來行軍之道有如此之玩延怯懦者乎且各處從逆賊匪一經拏獲卽當審明立時正法乃據奏鹽茶靖遠安定地方尙有未審未辦之犯此等回匪爲逆有何疑難耽擱李侍堯無非藉以遷延觀望遠避賊鋒巧爲卸過地步是其避重就輕豫存文飾之見豈能逃朕洞鑒眞所謂欲蓋彌彰也此事李侍堯旣玩愒於平時又畏葸於臨事遂致賊匪蔓延猖獗到處勾通李侍堯之罪實無可道李侍堯著革職暫留甘省帶罪效力辦理軍需事務俟剿賊事竣後再降諭旨時西安將軍傅玉奏石峯堡地本險要上年五月新教回人重加修葺約期起事諭福康安抵甘省速將傅玉所奏情節詳細查明具奏如果有心隱匿卽將李侍堯拏解熱河六月伏羌告警侍堯帶兵親往剿捕得旨李侍堯此時竟宜

專力剿辦伏羌之賊牽綴其勢勿使句結則福康安在東路剿辦石峯堡賊匪尤易爲力福康安奏侍堯玩愒貽誤諸罪狀遵旨拏解熱河訊問諭曰李侍堯久任封疆歷練地方事務數十年受朕恩眷最深迨調任雲貴總督後有受廠銀等事一經發覺卽將伊革職拏問治罪覈其情節雖非近年王亶望陳輝祖國泰郝碩等之貪贖敗檢營私者可比但其簠簋不飭已隳名節而損廉隅其時彙內外臣工之奏將李侍堯加恩暫緩典刑適因甘省有蘇四十三之事需人辦理善後事宜一時總督驟不得人李侍堯究屬明白能事是以復將伊補授陝甘總督朕於李侍堯破格加恩原欲其倍加策勵查辦邪教安靖地方以贖前愆李侍堯稍有人心宜何如感激奮勉仰答朕恩乃本年回民田五於小山起事李侍堯並不親帶兵丁設法剿捕彼時尙得以審辦賊黨籌畫軍餉爲名迨賊於馬家堡翻山逃遁伊仍逗遛靖遠軍營統攝無人肆行竄逸句結經朕於五月十二三十四等日屢次飭諭始行駐劄安定仍距賊衆遙遠以致賊黨蔓延到處煽誘攻城掠堡擾害良民是李侍堯之畏蕙遷延實爲失機債事賊人於四十六年卽已修理石峯堡上年五月又加葺治整固且田五陰謀不軌公然糾衆聚集禮拜寺商同謀

逆一切旗幟號衣帳房器械種種齊備足見逆謀已有三四年之久李侍堯安坐省城竟同聾聵是其參賊養癰釀成事變李侍堯之罪百喙難辭此事辦理始終貽誤使李侍堯平日如勒爾謹之庸懦昏聩尙不能曲宥其罪況李侍堯在各省總督中素稱明白能事人所共知朕之棄瑕錄用亦因其尙有才能冀其感恩出力乃竟於地方大事貽誤若此朕更不能曲爲之解抑深自引咎愧恨也所有福康安參奏李侍堯之處俱係實在情節諒伊亦無從諉卸著將原摺交留京王大臣會同大學士九卿科道覈議定擬具奏七月留京王大臣定擬斬決命隨從之王大臣等覆覈請照原議諭曰李侍堯本應依擬卽行正法但念本省因有不逞之徒滋事擾害致本省總督卽罹典刑轉恐啟刁風而滋厲階非所以遏寇虐靖邊疆也從前蘇四十三滋事時將勒爾謹革職拏問交廷臣覈擬斬決彼時亦曾加恩改爲監候後因該省折收監糧案發是以賜令自盡原不因蘇四十三之事今李侍堯玩誤因循其罪雖浮於勒爾謹但念其歷任總督多年於地方事務尙屬諳練通曉至軍旅本非其所嫻著從寬改爲應斬監候秋後處決五十年十月諭加恩釋放十二月命署正黃旗漢軍都統賜紫禁城騎馬五十一年三月署戶

部尙書五月湖北江陵縣民蔣魯玉控知縣孔毓檀侵蝕賑銀命侍堯前往查辦尋審明毓檀無侵蝕情弊但上年領到銀穀先放附近各處其較遠處所至本年正月始放致災民情急呈控請革職發往軍臺效力諭革毓檀職免治罪是月命署湖廣總督十月參奏前署孝感縣知縣秦樸任內有縣民劉金立等向族姓借貸不遂糾衆搶劫旋有並未被搶之革生梅調元因慮被累邀同居民楊維智等毆斃金立捉獲幫搶之劉大么等二十三人活埋於查家山地方官諱匿不報請旨革職嚴審得旨褫秦樸職拏交刑部治罪前總督特成額等並逮問旋命實授湖廣總督是月寅調元等於法又查奏黃安縣知縣陳玉興國州參革知州溫有光辦賑多侵漁諭革陳玉職同已革知州溫有光一併嚴審定擬尋審明論罪如律五十二年正月入覲時臺灣居民林爽文事起命侍堯爲閩浙總督抵閩後駐劄蚶江前總督常青赴臺灣督辦軍務二月奏馳抵泉州飭屬碾米解貯廈門等處接應並防範內地各隘口上嘉之三月奏籌辦軍糧器械在廈門澎湖者徑解臺灣府城在泉州者由蚶江解鹿仔港再匪徒私立天地會既久若將內地從教民人澈底究辦恐致驚擾見豫爲訪察存記俟逆匪辦竣與緣坐家屬之在內地

者一同辦理又奏南路官兵克復鳳山北路賊自聞風震懾如鳳山無須重兵彈壓儘可專注北路均報聞又疏劾提督黃仕簡任承恩分剿南北兩路各有牽制諭常青渡臺將黃仕簡撤回廈門候旨逮問任承恩侍堯旋奏軍營各提鎮彼此觀望南路黃仕簡見請添兵常青欲向北路會剿已無兵可帶若俟咨會到日恐調集遲誤見飛咨粵省令派將弁兵丁剋日起程得旨籌辦甚爲周到動合機宜又奏臺灣自亂民滋事以來大兵僅屬困守黃仕簡等皆以兵單難於遠捕爲辭命俟仕簡抵廈門飭粵省官兵趲程前進並備船隨到隨渡四月奏林爽文在大里杙築堡拒守難民附船入口者兵役藉稽查勒索得旨事竣後當嚴查處治以示懲儆時常青咨調征兵七千侍堯以海疆存兵未便再撥請調浙兵上違其言又奏粵省二起兵自海澄縣水路赴廈門行至嶼仔尾被盜行劫請將海澄縣知縣侯謹度等革職留於地方協緝總兵羅英岌等一併交部議得旨均革去頂帶暫行留任督緝侍堯奏臣由廈門回泉州向蚶江料理配渡據臺灣道府請發銀米各十萬各路接濟鄉勇並賑恤難民經臣駁飭命將該道府請發銀米速行照數運往以備接濟並以所見錯謬飭之又奏漳浦平和一帶有械鬪案已咨提臣

藍元枚暫留漳浦辦理得旨藍元枚已授爲參贊其漳浦匪徒卽著李侍堯前赴該處督辦時鹿仔港難民亟須撫恤侍堯籌買番薯並撥米委員解往諭曰李侍堯以鹿仔港難民嗷嗷待哺酌籌賑濟事宜是李侍堯知過能改並不稍存迴護惟不及朕先見之速所奏採買番薯一萬斤並撥米二千石爲數恐不敷用著該督酌量情形多爲豫備陸續採運以資口食五月奏閩省內地各營存兵無多請將浙兵配渡進剿諭曰見在臺灣額兵征兵臨陣傷亡者不少所有缺額何不趁此時卽在內地召募充補使兵數足額巡捕旣資充裕而該處游手好閒之徒亦可收歸卒伍更爲一舉兩得時漳浦械鬪案應往審諭侍堯察看情形如不必親往查辦卽在廈門蚶江一帶往來照料接濟軍需又諭曰李侍堯駐劄廈門一帶照料官兵配渡迅速辦理軍需糧餉均能先事豫籌源源接濟著交部議敘六月奏漳泉會匪甚多風聞逆首遣人勾結須豫防範擬再調浙兵二千到泉州廈門駐劄諭曰所慮甚是自當如此辦理至漳泉一帶會匪甚多爲首林爽文遣人勾結之說雖得自風聞不可不留心防範總以靜鎮爲要至該督擬調浙兵二千名到泉州廈門駐劄一節浙兵向來怯懦無用卽調駐漳泉亦不得力徒勞跋涉更

致虛糜且需時日朕聞閩人素稱獷悍且游手無藉者更多不若卽在閩省就近
召募俾食錢糧以充營伍伊等自必樂從可以一呼而集較之浙兵旣屬勇健可
恃且游手無藉之徒亦可收以爲用不致爲匪實屬兩有裨益又奏賊據笨港解
往糧餉火藥恐被邀截見撥繪船二令營員帶領水師槍兵分駐鹿耳門鹿仔港
彈壓防護諭曰此事最關緊要朕未及降諭旨令該督加意防範而李侍堯一聞
笨港有失卽能慮及於此若能沿海一帶要隘保守無虞將及大功告成時此亦
李侍堯之一功也七月奏前派繪船尙單薄見飭海壇金門二鎮調繪船各一撥
沿海槍兵防範至內地營伍未查明缺額實數應先約略募補命侍堯廣行添募
毋庸拘定原額八月奏洋盜行劫官運米船有不搶米石止搶軍器者請照從前
辦海澄縣劫案例將該地方文武革去頂帶留本任勒限緝拏諭曰李侍堯督飭
所屬員弁務須上緊設法勒限查拏務獲並拏獲盜犯時親行提訊是否係海洋
劫盜抑係賊人夥黨之處嚴切根究務得實情時藍元枚奉旨帶兵往鹽水港剿
賊侍堯奏鹽水港距鹿仔港較遠恐元枚帶兵南行賊潛至鹿仔港滋擾見移咨
令從陸路進攻大里杙等處諭獎其所籌實合機宜尋以臺灣剿捕事未竣命福

康安爲將軍代常青督師諭侍堯將應用軍需妥爲覈算俾十餘萬官兵無致乏用九月奏內地臺灣轉運夫價請照金川口內口外例增給價值其海運船隻事前守候事後回空亦請暫給口糧得旨摺內所奏各款姑照所請行李侍堯當明諭朕意安心籌辦軍務要件其尋常細事無庸豫爲將來地步也尋奏藍元枚卒於軍飛檄總兵李化龍留鹿仔港駐守總兵普保由西螺進攻斗六門十一月加太子太保奏接奉發交常青諭旨恐常青宣露致府城人心惶惑擬節錄發寄得旨深合機宜殊得大臣之體著賞戴雙眼花翎以示優眷十二月總兵羅英岌督率兵役在金門洋面拏獲前在海澄縣嶼仔尾地方行劫粵省兵船之黃突等十二犯又獲累劫軍米拒傷兵丁之何片等三十七犯均審明恭請王命正法命賞還英岌頂帶時福康安劾提督柴大紀又侍郎德成自浙回京而奏大紀貪贖狀上以侍堯有心徇隱申飭之命據實查參五十三年正月奏大紀貪劣各款並自請交部治罪諭曰李侍堯此次辦理照料渡兵撥運糧餉火藥等事尙爲出力原欲俟蔽功之日給還伊原襲伯爵乃於柴大紀貪縱不職之處經朕節次降旨詢問李侍堯知難隱飾始行具摺陳奏似此有心徇隱更忍辜負重恩李侍堯不應

出此前已晉加宮銜賞戴雙眼花翎已爲僥倖豈可復膺懋賞並著交部嚴加議處部議降三級調用得旨從寬留任二月林爽文就擒奏上年各營新募兵原係暫備差遣今爲首就擒福康安移師南路搜捕莊大田軍務剋期告蕝征兵卽可歸伍若將新兵全裁辦理未免太驟見通飭各營以新兵補舊額至各營募兵多寡不同並飭新兵較少營分遇缺出卽於新兵較多之相近各營移補報聞旋獲莊大田臺灣平上以待堯照料過兵運送糧餉妥速交部照例議敘又奏軍務告竣各省撥運米未入境者應行截留停運從之三月命查明臺灣被害各官平日居官及死事情節具奏尋奏彰化縣知縣俞俊到任未兩月聞賊警親往查拏遇害又理番同知長庚署同知王鼎鳳山縣知縣湯大奎居官並無劣蹟均死事應請議卹至臺灣府知府孫景臺防同知劉亨基臺灣縣知縣程竣署諸羅縣事董啟埏唐鎰在任雖久暫不同俱以貪黷釀變雖被害不應給予卹典疏入上嘉其公當四月挑撥臺灣換班戍兵命侍堯於興化延平建寧邵武各營均勻撥派毋專派漳泉兩郡兵是月賞還原襲伯爵八月諭建福康安等生祠於臺灣侍堯居福康安海蘭察之次復命圖形紫光閣列前二十功臣御製贊曰以恆入覲命往

閩疆戰固老已謀猷允長渡兵濟餉井井有方不誤軍儲其績孔臧十月疾命侍
堯子侍衛毓秀前往省視是月卒賜祭葬諡恭毅子毓秀仍襲伯爵六十年正月
因侍堯前在雲貴總督任內與廠員通同偷減錢法梏毓秀襲職以奉堯子三等
侍衛毓文襲毓秀爵

周學健

周學健江西新建人雍正元年進士改庶吉士三年授編修充一統志纂修七年
丁父憂十三年五月充四川鄉試副考官九月提督福建學政乾隆元年遷侍講
二年遷右庶子四年正月充三禮館纂修三月遷侍講學士六月轉侍讀學士五
年二月充日講起居注官六月遷少詹寺十二月遷內閣大學士充三禮館副總
裁六年二月署刑部侍郎充明史綱目副總裁三月補刑部右侍郎仍兼署刑部
侍郎事七月命往山東查辦御史瑪昇參私票鹽價一案尋奏東省私收票價實
無其事卽票商亦無立窩價名色惟是票鹽地方充革無定遂啟攘奪之端現在
商湖淄川票地係濟東道張體仁子姪冒充居官牟利不可不戒又查奏給事中
馬宏琦劾兗州府知府沈斯原挾嫌誣揭滕縣知縣李鱣諱盜並向屬員借銀有

據俱下部論罪如律時衍聖公孔廣燾參曲阜令孔毓琚營私枉法學健遵旨鞠問尋鞠實毓琚多收稅銀及扣禁卒民壯工食二款擬杖徒從之十月調刑部右侍郎十二月陳奏捕治瓜賊各條一賊所居本籍該地方官獲一名者議敘其夥黨有曾同行竊案並跟隨學習尙未同行者必逐名搜捕分別辦理究處拏獲將本地方官議處隣佑地保治罪一窩家必盡究無使漏網承問官草率結案照盜案刪去窩家例議處一瓜賊均係謀財害命較隨行夥盜並未傷人者情罪已重無論曾否下手加工但係知情同行皆立決一塘兵自日入至二更自五更至天明上下汛輪番傳旗沿途巡查遇行客護送前行如停臥卽責革汛弁并參一凡道路無主屍身係瓜賊謀害者文武官俱照盜案勒限緝拏或避重就輕混以是讐非盜立案者照諱盜例議處仍於發覺時通行嚴捕無使疏脫下部議行七年三月命往上下江會同督撫查辦災賑水利事務三月合疏言銅市有石林黃村二口黃水衝刷灌淹民田應堅築土壩砌石幫護沛縣縷水隄決口應自華山起至斜隄止堵築堅實再於金陵鎮迤下尾閭疏濬深通湯山縣小神湖上流有隄河一受河南虞城潦水由朱家窪歸湖又大溝一由紀家窪歸湖湖尾全藉馬家

溝宜洩俱急宜修濬邳州沂水河隄衝決六處應補築山陽縣西民田濱白馬湖應築隄捍禦建涵洞阜寧敦墅湖南通射陽湖爲洩水要道宜去積淤以上六州縣工程應先興舉至海州薔薇河洩沈陽上游山水及青伊湖積潦年久淤塞散漫爲害河尾舊閘頽廢不能啟閉均應濬修下部議行四月疏言鳳潁泗三屬賑後又借給兩月口糧固可寬一時之急但積歉之區元氣未復秋成徵完難免追呼請將所借改爲加賑免徵從之八月上下江復被災命偕直隸總督高斌往同督撫辦理尋合疏言向來樂善好施人等定有議敘之例祇就本有職銜量予敘用並加級紀錄等款今請倣其例量爲擴充准各省急公人員出資備賑原有職銜者酌予卽用議敘無職銜者量出貲多寡京職自中行評博以下外職自同知以下分別議敘予以卽用俾得邀榮仕宦自必踴躍捐輸而窮黎均沾惠澤於賑卹大有裨益下部議行八年四月署福建巡撫十二月疏言閩省督撫將軍標兵每各會標一次需賞銀一千兩又駐防八旗兵每冬演放火礮需彩紅銀八十兩向於耗羨存公項內支給後總督郝玉麟以耗羨應支養廉入不敷出將此項裁減操演爲國家鉅典海疆要務查現有寺租歸公銀懇撥給應用得旨允行九年

署浙閩總督十一年加太子少保十二年正月疏言採買臺郡餘粟民運便於官運凡商民由內地赴臺買穀者呈明漳泉地方官取結赴廈門同知領照由臺運穀赴廈門者呈明臺郡地方官取結赴臺防同知給照出口進口均行盤驗聽赴漳泉府屬公平糶賣其地民食可倍寬裕從之九月授江南河道總督十三年閏七月緣事獲罪命往直隸城工效力贖罪八月江西巡撫開泰奏於學健原籍查出兗沂曹道吳同仁賄囑學健薦舉書扎翰實擬斬奉旨賜自盡

鄂昌

鄂昌滿洲鑲黃旗人姓西林覺羅氏父鄂善任筆帖式雍正六年鄂昌由舉人授戶部主事七年擢陝西寧夏道十年遷甘肅布政使十一年三月署陝西巡撫十一月疏言前准部咨令西鳳二府邠乾二州屬撥米運肅州軍營而不及同華耀三州官民勞逸不均請三州及各屬縣一體碾運分遠近定起運日期庶分任無難得旨俞允十二月授四川巡撫十二年五月奏言西陽宣慰土司冉元齡老病以庶子廣烜捏報嫡長請襲土民以廣烜加派貪暴籲請改歸內地查西陽與楚黔接壤風俗無異內地應改土歸流以順民情廷議如所請行十一月條奏改隸

道府州縣各事宜一川東道屬之順慶府改隸川北道川北道屬之綿州改隸松茂道松茂道屬之資州改隸永寧道夔州府屬之新寧縣改隸達州一川東道原管榆關稅務就近歸重慶府管理一嘉定潼川二直隸州俱升爲府治設知府通判經歷各一附郭各增置一縣設知縣典史各一並原屬各縣俱歸府轄改州學正爲新縣教諭州訓導爲新縣訓導下部議如所請尋定嘉定附郭縣曰榮山潼川附郭縣曰三臺十三年正月四川總督黃廷桂列款糾劾鄂昌不職諸款上命刑部侍郎申珠渾會同新任四川巡撫楊必蕃審訊嗣申珠渾等以鄂昌枷斃人犯容隱旗人並審案寬縱受屬員銀幣等物俱屬實情革鄂昌職諭曰朕覽申珠渾等查審鄂昌二案其中多有避重就輕瞻徇隱漏之處鄂昌以戶部司員簡用監司之職不次超擢用爲四川巡撫乃負朕擢用之恩又玷伊叔鄂爾泰顏面論情理均屬可惡著革職拏解來京交部將摺內查審不到處另行嚴審定擬具奏刑部逐款駁訊鄂昌認罪不諱擬杖徒遇赦免乾隆元年上命查八旗降革大員特旨令鄂昌在批本處行走二年授直隸口北道四年調通水道六年遷甘肅按察使八年疏言西安布政帥念祖奏准藩臬三年陛見藩司行者以臬司署篆臬

司行者以藩司署篆藩臬爲錢糧刑名總滙一人兼辦恐多叢脞且兩司多會審會議事件一人意見不周無從參酌難免徇私誤公之弊請嗣後不必互署督撫臨時酌委道員署理以昭職守部議道員有堪委署之員卽令署理倘道員內不得人而該司尙能兼攝亦卽委攝辦上允之時山西客民梁玘等在肅州屬高臺縣被劫殺知縣伍升堂妄拏張林等六人鍛煉定案擬斬絞肅州知州陳世芳率轉鄂昌翰知張林等被誣立剖其寃並勒限緝獲正兇單四王進才置之法甘肅巡撫黃廷桂以鄂昌平反得宜緝兇實力入奏得旨嘉獎九年九月遷廣西布政使十月疏言定例承審案件如印官奉調入闈及會審會勘俱准限內扣除公出日期承緝承追承查俱不准扣除嗣奉部咨查造交代照承查之例臣思交代之案本官不能在外辦理實與承審之案相符如公出概不准扣恐相距遙遠處往返耽延兩月正限已迫出結則倉庫盈虛未知稍遲則上司結報又不容緩請嗣後交代案件如奉調入闈及檄委會審會勘等事公出准照承審展限部議奉調入闈准扣公出日期餘仍舊例行十一年五月署廣西巡撫時直省地丁錢糧奉恩旨輪年蠲免是年輪免廣西鄂昌以桂梧等府州屬官田銀米及桂平等府州

學租銀米查照湖南城步綏寧入官田租之例請免十分之三使農民均沾恩澤得旨俞允八月奏請以原任大學士鄂爾泰入祀廣西名宦上以鄂爾泰係鄂昌之叔題請入祠明係私心且稱贊太過降旨切責十二年四月遵例自陳並奏廣西布政使李錫泰久任廣西堪膺封疆之寄諭曰上年廣西巡撫託庸參劾布政使唐綏祖原屬過刻經兩廣總督策楞審明革託庸職因一時不得其人卽令鄂昌署理巡撫而用李錫泰爲布政使適李錫泰在京朕召見時伊痛貶託庸之劣而極稱鄂昌之優今鄂昌卽舉李錫泰自代其能免黨同朋比之嫌乎嗣後督撫不得舉本省藩臬著爲例廣西向設爐十鑄錢配放兵餉鄂昌以廠銅不敷奏請購滇銅百萬斤每年領運十五萬斤爲鼓鑄之資又請增爐二同原爐開鑄補從前缺卯以資兵餉奏入上嘉獎之十三年三月疏言廣西各廠銅前奏准照舊二八抽課餘銅每百斤給價銀十三兩收買一半餘應商售部議俟試行一年後將各廠採銅有無旺盛題明辦理今期滿出銅未旺實有不能核減之勢請仍給價收買部議不准特旨照所請行閏七月調江蘇巡撫九月調四川巡撫十一月調甘肅巡撫十四年四月疏言寧夏寧翔靈州肅州等州縣地處邊陲積貯宜充應

增建倉廩請動帑興修下部議行五月署甘肅提督十五年署陝甘總督十六年八月調江西巡撫先是雲南總督碩色奏滇省傳播僞撰尙書孫嘉淦本肆行誣謗逆犯未獲請敕各省通行嚴緝十七年正月鄂昌以廣饒九南道施廷翰之子施奕度傳鈔僞稿請解廷翰任審究詔革職令鄂昌審訊具奏鄂昌偕按察使丁廷讓查審未實竟以施奕度等附會成獄上以鄂昌於辦理之始不能實力根查致各犯串供狡飾輾轉株連實在根源毫無著落特命軍機大臣等將施奕度等犯解京覆訊經軍機大臣詳細研鞫立爲申雪其案內彭祖立等犯分別提解省釋十一月命鄂昌解任來京候旨十八年正月諭曰各省傳鈔僞稿一案關係風俗人心者甚大不可不力爲整飭乃各省督撫惟任屬員取供以致輾轉蔓延久迷正綫而江西尤甚卽如施廷翰案內施奕度江西承審各官草率錯謬及到江南總督尹繼善亦不能審出實情幾認爲捏造正犯經朕命軍機大臣審明昭雪而千總盧魯生在江西兩次到案俱被狡飾脫漏經軍機大臣細加窮詰始將千總盧魯生及守備劉時達傳稿情節逐層究出旣不能推卸傳稿實情又不能供得稿來歷情竭詞窮始將其會商捏造種種奸僞情節並將會稿條款逐一默寫

及其造謀起意於破案後商同借線掩飾情由一一吐露著大學士九卿等會同軍機大臣再行詳細研鞫定議具奏此案查辦之始若竭力根究自可早得正犯乃粗率苟且江西舛謬於前江南迷誤於後均難辭咎江西近在同城幾於網漏吞舟厥罪較重鄂昌及丁廷讓俱著革職拏問交刑部治罪尹繼善著交部嚴加議處嗣經廷議按律擬鄂昌廷讓杖徒得旨從寬免罪著發往軍臺效力十九年閏四月上以甘肅存貯官茶擬運北路軍營備用命鄂昌前往辦理五月授甘肅巡撫時大軍議征準噶爾命鄂昌辦理軍需七月疏言官兵自嘉峪關前赴哈密沿途多戈壁缺水草已檄弁兵相度開井並飭安西道文綏督衛弁及哈密糧員多備草束運貯各站官兵到卽造行上嘉之十一月疏言臣自嘉峪關至西安查詢米價日增肅州輓運出關車戶衆多口食拮据本地兵民亦購買維艱冬末春初價必更昂貴請安西一廳五衛各倉存貯小麥出糶萬五千石以平市價又請於甘涼肅三府常平倉內籌撥倉糧六萬石酌量各處情形分別平糶民食軍需均有裨益俱如所請行二十年三月上以逆犯胡中藻所作堅磨生集詩詞悖逆治罪鄂昌於廣西巡撫任內與胡中藻唱和命革職拏解來京經大學士九卿嚴

審按律定罪五月諭曰鄂昌身係滿洲乃在巡撫任內與逆犯胡中藻唱和見其大逆不道之辭不但不知憤恨且引爲同調喪心已極是以將伊拏解來京廷翰之下伊亦俯首無辭惟稱萬死而已至伊從前身獲重罪但令坐臺已屬寬典而於伊署中查出詩稿書札其所作塞上吟一編則種種怨望不一而足但未至如胡中藻之大肆訕謗耳而於鄂容安之差往軍營則云奈何奈何舊俗遇有行師必踴躍爭先以不預爲恥不謂竟有此等敗類也又與大學士史貽直札稿內有玉成佳器之語不知所指召問史貽直則據奏曾經致書通候並未有所請託今訊之鄂昌則供稱史貽直致書與伊有河道之缺已補甘藩之任尙縣望鼎力玉成等語史貽直爲伊子請託於前又不據實陳奏以圖掩飾本應重治其罪念其邇年尙屬勤慎從寬以原品休致勒令回籍閉戶家居鄂昌負恩黨逆核其情罪必應肆市方足蔽辜但伊尙能自知罪狀一一供認而於史貽直囑託書詞毫無隱諱致朕得明正官常著從寬賜令自盡

吳士功

吳士功河南光州人雍正十一年進士改庶吉士乾隆元年散館改吏部主事洊

遷郎中四年遷監察御史巡視南漕五年五月疏劾漕標遊擊田三省貪婪得旨交總督郝玉麟鞠實擬罪如律十二月巡視南城奏言各省督撫奏請帶往人員雍正六年諭令俱著回京請旨另用近部院大臣簡用督撫有奏請將所屬司員帶往以道府等官題補若爲地方起見未到任之先於該省地方情形尙未深悉何由知道府等缺必伊帶往之人方克勝任若爲人才起見果係廉幹可勝任道府之員無難據實保奏不拘省分皆可量才酌用何必以伊所奏之人帶往伊該管省分自行題補督撫縱公正無私而於隨帶人員託爲心腹寄以耳目恐滋偏聽之弊安知到省屬員不私相交結希爲先容以取悅上官請嗣後仍照舊例概行停止下部議行六年御史觀音保奏參士功等徇庇南城指揮郭從儀敕都察院會同吏部查奏尋奏郭從儀違制用刑士功等卽行指參並無徇庇得旨觀音保降二級調用三月御史仲永檀奏向來密奏留中事多洩漏上敕王大臣詢問永檀舉出土功奏參尙書史貽直諭曰留中密摺宣洩於外伊旣舉出吳士功奏參史貽直一件查上年吳士功果有此奏見交王大臣查詢翌日又諭曰朕諭旨一道御史吳士功奏參尙書史貽直一摺目今姑且不究著與二人閱看後封貯

內閣若伊等將來不知悛改再有過犯將此取出一併從重處分七年授山東濟東泰武道八年九月丁繼母憂十二年服闋補直隸大名道十二月調山東兗沂曹道十三年正月調湖南糧道山東巡撫阿里衮奏留辦理賑務尋復以士功端方練達熟悉民情奏留山東閏七月詔調山東糧道十四年遷山東鹽運使十九年遷陝西按察使十月以辦理軍務臺站議加一級二十一年調湖北按察使二十二年三月以前在陝西辦理馬匹議敘加一級七月上以豫省災賑平糶需米勅下江西湖北巡撫在該省相近河南各州縣倉貯內酌撥運交豫省收貯其動撥穀數卽將本年應運漕糧截留歸款士功時護理湖北巡撫奏湖北本年額徵應運漕米十五萬一千一百餘石遵旨截留歸款楚地潮溼米難久貯請以一米改收二穀還倉本年既經截漕所有隨漕徵解銀除應給減歇丁船等項米折銀兩並折色月糧外其餘無需支解各款及節省漕糧水腳共銀四萬一千九百餘兩請卽爲撥運豫米之用豫米見卽開運先借支司庫公項俟各屬解到截漕銀照數歸款疏入報聞是月遷陝西布政使十月護理陝西巡撫十一月奏宜君榆林葭州懷遠府谷神木靖邊寧遠各州縣先旱後潦督臣黃廷桂奏撥寧夏米麥

五萬石分賑懷遠靖邊等縣自寧赴陝中阻黃河沿邊早寒河冰卽難輓運臣先期飭催早運抵陝其奏撥綏德米脂清澗吳堡四州縣米二萬石協濟榆林葭州山路崎嶇冰雪載塗更難馱運蒼黎待哺孔亟臣飭添雇騾駝趕運俾早霑實惠諭令竭力妥爲之是月調直隸布政使奏藩庫銀錢交代新任接收出結督撫盤查保題定例綦嚴但日久視爲具文請嗣後撫藩離任奏請陛見之日卽將在任庫項曾否挪借有無虧空之處另摺附奏其或在任不久調補遠省資斧不足欲借庫項者一併據實陳奏新任撫藩接印後亦於交代限內另摺奏聞仍照例出結保題則挪借積弊可除上以所奏簡而易行著爲例二十三年三月仍調任陝西護理巡撫印未幾擢福建巡撫諭俟新撫鍾音到陝後再赴福建新任四月奏延安府兵精向例各縣民運交府倉分防弁兵赴府支領山高路遠往返五六百里民運赴府費倍正供兵領回縣耗費過半查甘泉宜川延川延安俱駐弁兵請將四縣民糧各在本縣徵收支給本縣汛兵從之六月奏隴州汧陽縣跬步皆山歲徵屯豆五百四十九石零鄉民赴城完納往返需費不貲見今積豆萬餘石本地營汛旣不動用鄰封難資協濟商賈不願販糴與其坐視霉爛莫若改徵折色

請於二十三年爲始每石改徵銀六錢五分解司充餉舊存豆石糴銀報部從之
八月莅福建任二十四年四月奏私鑄錢文質有銅鉛之別宜按錢數多寡定罪
乾隆九年刑部議准福建按察使王廷諍條奏私鑄鉛錢不及十千之犯照例聲
明請旨發遣二十二年九卿定議私鑄銅錢不及十千者照情有可原免罪減等
例改發巴里坤等處種地蒙恩兪允查閩省有私鑄鉛錢不及十千之犯從前未
與末減概擬絞監候伏思鉛錢非銅錢可比不久卽成無用其中已停復鑄者情
罪較重仍擬絞候其偶然私鑄鉛錢不及十千較私鑄銅錢不及十千之犯情罪
更輕請照例發遣給官兵爲奴俾墾田效力如議行六月奏緝獲南洲巨盜劉良
福等十八人附近竊匪七十餘人諭曰閩省地屬海疆民風素悍南洲濱水向有
積匪恃爲淵藪正當力爲懲創以除稔惡而衛商民該撫等能董率屬員設法緝
捕積盜不能漏網深屬可嘉下部議敘加一級八月與總督楊廷璋奏請酌改南
洲塘汛及巡哨章程詳見廷璋傳十一月奏閩屬械鬪皆由地方官遇有民詞不
早審結釀成命案臣發給冊式令各州縣將審結讞語挨日填註按月冊報臣隨
時駁正記其優劣一載以來羣知奮勉案件隨到隨結可免拖累滋事上嘉之十

二月奏閩省九府二州積年平糶常平缺額穀三十一萬八千六百餘石已買足還倉臺灣府屬積年平糶未買穀十五萬二千一百石令如數買補又收捐監穀積貯加多而浙西歉收來春需糶濟民食臣酌撥臺灣十萬石聽浙江招商運販因風汛不便先以內地沿海府縣穀撥給俟臺灣穀運到還倉一轉移間無妨於聞有益於浙諭曰此汝認真妥辦所致可嘉也二十五年二月奏寄居臺灣皆閩粵海濱民人前任巡撫鄂彌達奏請有立業臺灣願入籍者准其呈明給照搬眷入臺嗣經督臣郝玉麟以流寓民眷均已搬取奏請於乾隆五年停止十二年督臣喀爾吉善復奏請定限一年後不准給照迄今十有餘年禁絕往來愚民多冒險偷渡臣於一年中盤獲偷渡民人二十五案男婦九百九十名口分別遞回原籍已經發覺者如此其偷渡在洋被害者更不知凡幾伏思內外民人均朝廷赤子向之在臺爲匪者悉隻身無賴若既報墾立業必顧惜身家各思保聚請嗣後在臺立業良民有的屬在內地者許先在臺灣該管廳縣冊報眷口姓名年歲移原籍查覆到日該管道府給路照回籍搬接過臺其內地的屬有欲過臺完聚先由內地該管州縣造冊移明臺地確查覆到詳請給照過臺責成廈門同知及汛

員遇過臺眷口驗明人照相符放行如人照不符濫行給照汛員文武官失察徇
隱者參處庶良民不敢僥倖行險地方官自顧考成防範嚴明海防民生均有裨
益下部議行三月奏偕督提鎮臣率文武官緝獲行劫馬頭山盜犯林成功等及
夥犯五千餘人諡曰汝等文武如此和衷協力何愁地方不安靖也甚屬可嘉五
月條奏稽查濱海漁船事宜一漁船應取船主澳保甲結也嗣後漁船赴縣領照
先取族鄰澳保甲結令船主開具年貌籍貫出具不敢爲匪甘結覈明入照並取
十船連環互結存案查驗放行一漁船出口逾期不還應責澳甲船主查報也查
漁船例於三月中旬四月下旬出口至五七等月回棹九月十月出口年底回棹
向多逗遛滋事應責令澳甲船主先向進口漁船查明未回漁船見泊何處因何
未回稟地方官移營押回澳甲船主不稟分別治罪一漁船帶貨應行稽查也漁
船捕魚爲業非比商賈貿易卽偶有攜帶應令赴置貨地方汛口驗明給單如單
外攜帶多貨沿海汛員查出移縣查明來歷一商漁船隻應於帆檣大書名號也
嗣後應令各船於帆檣照原編字號書福建某府某縣某號船戶某人或商船戶
某人大書深刻令遠望瞭然便於稽查如無帆檣字號或與船照不符者報究擒

捕庶匪舟無從溷跡諭曰立法可謂詳明行之尤宜實力又奏泉州府屬惠安縣西北環山東南面海所轄良興梅峯仙塘竹溪等十二鋪延袤四十里去縣治遠請移仙遊縣白嶺司巡檢駐良興鋪之前塗部議允行尋以閩俗械鬪多大族欺凌小族疏請敕部定議如兩造各恃人衆致傷多命者照例入情實其族小戶丁少被大姓欺凌兇毆情急抵禦者照尋常鬪毆擬緩決其恃強糾衆欺凌小戶復斃多命仍擬情實部議駁諭曰刑部議駁吳士功條奏械鬪案件請分別戶族強弱辦理一摺部臣所見甚是閩省地處海濱民風刁悍聚衆械鬪最爲向來惡俗該撫身任封疆正宜執法鋤奸務在安善良而移風俗乃欲將族大族小分立科條使械鬪者得以趨避其詞而司讞者因而高下其手是欲博莠頑之浮譽而不知守弼教之常經法司所指伊尙能置喙乎吳士功自任巡撫以來辦理事件時露沾名習氣非明切訓示恐日久竟成痼疾悔之已晚試思朕慎持國憲臣工內有能條奏敷陳巧爲嘗試者乎卽著傳諭該撫令其刻自提撕慎勿故智復萌自貽伊戚二十六年正月總督楊廷璋劾提督馬龍圖挪用存營公項銀命解龍圖任交廷璋會同士功嚴審定擬五月會奏嚴鞫龍圖借用公項銀已於委員盤查

時歸補應照知人欲告而自首例減罪二等擬杖徒諭曰此案馬龍圖於未經查參之前預爲彌補據實檢舉謂之自首尙屬有因今聞敗露始多方攢湊抵項且將登記數簿扯毀焚燒另造私冊掩飾則於先侵後吐之外又增一舞文之弊矣此而謂之自首凡前此所辦侵貪重案歷歷可數誰非於發覺後冀圖挪補卸罪者何不皆以自首貸之有如此失出之理乎方朕御極之初此種技倆尙不肯爲其所愚今臨御二十六年辦理案件一切情僞知之熟矣乃欲以三尺之童不能售其欺者竟敢於朕前嘗試將視朕爲何如主乎從來外省參案例稱督參撫審此案立意必且出自吳士功而該督楊廷璋遂因而附和之耳獨不思博虛名而弛法紀朕豈能置之不問者吳士功縱不自惜楊廷璋又何爲自以身命殉之乎此案斷無兩人同聲之理究係先出何人之意著該督撫據實明白回奏尋覆奏定案係楊廷璋主藁而督參撫審吳士功實爲主政有往來商榷原札可覈諭曰吳士功身爲巡撫以提督大員營私舞弊此何等重案乃敢妄逞技倆欲從中高下其手且明目張膽冀於朕前直售其欺居心尙可問乎卽據札內所稱幕友援引例文云云欲楊廷璋酌定之處尤堪駭異楊廷璋吳士功爲封疆大臣卽馬龍

圖亦提督大臣豈有一人胸中竟無定見悉借幕友主張此語豈可靦顏告之同官奏之君父者其曲意幹旋不問可知況原審內有事前彌補之說朕覈參將姚應夢供內該犯定媳送聘借銀五百兩曾於養廉項下扣清此項銀兩於未經奏參之前預爲彌補尙可自稱事前至買辦燕窩等銀一千餘兩俱係盤查時攢湊抵項且扯毀數簿以私冊掩飾其爲事敗假捏更何待言如此而猶欲以自首脫罪有是理乎朕臨御二十六年歷事不少人之情僞素所洞悉吳士功本係張廷玉用人其生平貌爲直慤而城府甚深亦衆所共曉第以其人尙小有才且歷外任年久巡撫缺出一時不得其人因而擢用乃伊一得志又以閩省去京稍遠卽肆無忌憚卽如伊向因與張廷玉甚厚未免有得罪史貽直之處今又與史奕昂修好以冀解釋前恨則其人之居心邪正亦從可知矣朕本欲爲之隱惡揚善而伊乃敢顯爲此攬權嘗試之計此而付之不問朕又將何以用人吳士功著革職發往巴里坤自備資斧效力贖罪二十七年四月諭曰據楊廷璋德福奏查閩縣民楊魁等假控僞寶敕書承襲世職一案先經呈投撫標效力原任巡撫吳士功身爲撫臣敕書旣經目驗何懵然不省撫署內又豈無檔案可以查覈一任惡犯

玩弄若此其所司果何事耶著傳諭巴里坤辦事大臣永寧等而詰吳士功令其據實奏覆並令自揣應得處分卽行贖罪自效五月永寧等覆奏士功稱罪無可道年已就衰情願捐銀贖罪交直隸藩庫修理城工諭曰吳士功歷任大員身罹罪譴若於斥退之後卽得優遊事外則虛糜廩祿不思奮勉者轉自以爲得計且此輩歷任所得養廉無非國帑民膏捐資贖罪情法亦屬允協豫省見有應修城工卽係伊桑梓之地此項贖罪銀兩卽交與河南巡撫胡寶瑤收存藩庫以爲辦理城工費用吳士功著加恩准其回籍三十年九月故子玉綸官至兵部右侍郎以曾任福建學政聲名平常降授檢討

劉藻

劉藻山東荷澤人初名玉麟由舉人任觀城教諭乾隆元年薦舉博學鴻詞授檢討改今名四年遷右中允累遷侍讀命在尙書房行走五年四月授太常寺少卿五月遷右通政六月遷左僉都御史十月疏言今歲圓明園工作未息此不遇少加補葺且徭役不出於民力取資無損於府庫視前代飾臺榭之觀者度越何啻萬萬但臣愚以爲浮靡之漸不可稍開乞皇上慎始慮終爲天地惜物力爲國家

培元氣來歲諸工酌量停減用以持盈保泰綿億萬年無疆之福疏入上嘉納之下部議敘十一月遷通政使六年四月擢內閣學士八月充順天鄉試正考官十二月提督江蘇學政七年條奏現行三事一訓導年老者勒休一府州縣考試童生廩保出結認識一禁止迎神賽會報聞八年二月因淮安高郵生員鬧賑部議降三級調用三月特授宗人府府丞先是藻被議在揚州候代候選運判吳家龍之孫之黼以文求教及藻行饋筆墨及糟鱗魚受之中途發視得銀四百兩藻交兩淮運使朱續暉發還事聞諭曰如此方不愧四知也四月請終養回籍十五年五月諭曰原任宗人府府丞劉藻因聞皇長子定安親王之喪來京而請朕安并請赴喪次卽謁劉藻係奏明在籍終養之員離京千有餘里卽具摺差人請安未爲失禮而伊於孝賢皇后大喪及此番皇長子喪事俱親赴闕廷深知君臣一體休戚相關之大義伊在尙書房行走纔及數年尙有不忍愀然之誼以視張廷玉之身爲第一大臣自朕在書房卽侍講讀繼入爲長子師傅行走至三十年之久而漠然無情惟知自便者與之並較其相去何如也劉藻曾任內閣學士緣事降調著仍給予內閣學士原銜伊母年老在堂需人侍奉天氣亦漸炎熱著賞人參

二斤劉藻卽行回籍終養二十一年服闋來京授陝西布政使二十二年三月擢雲南巡撫十二月疏言滇省各屬應徵之麥向俱折米惟永北鶴慶二府徵麥請卽以麥造報不必仍稱折米上是之二十四年疏言維西協不敷兵米於麗江鶴慶劍川三府州額糧內輪年運借查麗江府屬巨甸石鼓等五村距府四五站不
等由府至維又八站勞民費帑各村俱有通維路較近請開徵時委員赴該處徵收就近徑運維西腳費旣省編氓亦免遠累二十五年又言省臨二局加卯鼓鑄請以餘息補銅價不致多費帑金以錢文濟廠民復可早歸鼓鑄公私兩便均如所請行二十六年暫署雲南總督二十八年六月署貴州巡撫十月加太子太保疏言貴州按察司司獄署距司監里許而司監側卽貴陽府經歷署請兩易居之十二月又請停買川銅照舊在滇採辦從之二十九年二月奏言貴州大計應本年三月補行若不先期趕辦新任巡撫圖爾炳阿到任勢必又請展限未免稽延臣已咨會總督吳達善秉公註考具題諭曰貴州大計該撫劉藻於圖爾炳阿未到之先卽將補行大計先期趕辦於激揚大典不致稽延封疆大臣能如此實力奉行官事何難整頓所奏甚可嘉尙著交部議敘以示獎勵六月授雲貴總督三

十年疏言永昌順寧二府地處極邊年來木梳野匪與緬甸所屬木邦構釁木邦又與耿馬土司毗連由木邦至滾靈江一帶隘口應設卡防守共需練兵四百五十名請於各土司就近派撥詔如所請又言州縣平糶倉穀遇價貴不能買補例准以所收監糧抵額但附近州縣不准通融辦理滇南跬步皆山通都大邑米多不敷必須減價多糶至秋成價不能平又無監糧可抵而偏僻州縣糧價本平監糧或陳陳相因臣等會籌與其拘泥成例不若令價貴不能買補之處據實詳報查附近州縣有餘監糧撥運抵補庶倉儲不匱而紅朽無虞詔可是時莽酋不法侵擾猛捧諸土司邊境諭嚴搜剿毋姑息三十一年正月調湖廣總督是月奏報飭副將趙宏榜參將蘇國富赴孟連耿馬剿逐莽匪偵木匪踪跡鎮臣烏登額赴滾靈江口相機撲滅臣遵旨於普洱思茅各隘往來調度又奏言由小猛崙進攻九龍江橄欖壩諸寨多斬獲惟參將何瓊詔遊擊明浩派赴整控江防禦冒昧渡江遇賊敗歿尋奏瓊詔等未死現已回營請治貪功輕進之罪諭曰該督辦理此案情節甚屬含糊紕繆何瓊詔明浩等委赴整控防堵莽匪前至猛往遇賊敗逃又復謊報身死此其法所難宥處該督乃奏稱冒昧前進致失事機是伊等反覺

可嘉何罪之有夫伊等所謂貪功輕進並非實情不過綠營虛誑欺飾故智耳況該督所訊供詞於緊要情節全未問及卽如該督初報何瓊詔等俱歿於賊及伊家人呈繳關防時卽應詳究其是否打仗陣亡抑係窘迫畢命或回營後畏罪自戕以定功罪乃惟任弁兵張皇謊報信爲實事一切概置不究及何瓊詔等陸續逃歸又不究從前謊報情由治以畏葸退縮之律尙信其一面虛詞謂係輕進失事其何以申軍律而懲欺罔乎又如何瓊詔等所供架著籐籐撲殺并稱莽子刀戳其馬連馬滾跌入江之語試思馬上豈能使用籐籐此等支吾欺飾難以欺三尺之童者而劉藻竟坐受其朦混而不覺不更可笑乎且前摺稱明浩等因兵器皆馱載行裝猝遇賊人不及措手以致敗衄而此次摺內稱兩相對敵因火藥已盡勢不能支前後自相矛盾該督於此等喫緊關鍵處全不悉心根究何憤憤乃爾劉藻本屬書生軍行機密非所嫻習故朕不肯責以伊所不能至於調度賞罰諸事尙可力爲籌辦乃於審訊此案情節竟舛謬若此豈堪復勝總督之任劉藻著降補巡撫交部嚴加議處現今楊應琚前往接辦軍務楊應琚未到之先劉藻須實力經理若稍存五日京兆之見以致貽誤事機必更重治其罪尋議革職留

滇效力三月巡撫常鈞奏劉藻自刎氣息僅存諭曰此事實屬大奇劉藻辦理莽匪一案種種錯謬不可勝舉朕因其本係書生不嫻軍旅所以加恩保全者倍至始而調補總督繼而降爲巡撫及至審理何瓊詔一案以失律脫逃之人反以冒昧輕進定罪乖舛已極且進兵忽調忽撤全無紀律始降旨革職留於軍營效力以示懲儆然所辦亦止於此並未有將伊治罪之意前後所降諭旨中外共所聞知原不屑以軍務大事於伊過爲吹求劉藻自當倍加感激於楊應琚未到之先督率將弁益加奮勉以期軍務速竣方不負朕始終矜全恩意乃正當進兵決勝之際竟無端忽爾自戕實出情理之外劉藻身任封疆現在統兵進剿逆匪所屬將弁俱視其指揮乃無故輕生軍行要務將欲委之於誰若非朕豫令楊應琚前往接辦則軍務兵弁竟無統屬或因而軍心惶懼偶失機宜豈不貽誤國家大事劉藻旣統官兵卽與主將無異如前者兆惠明瑞於喀喇烏蘇被圍時勢懸呼吸若伊等彼時略無主見畏葸捐軀則全軍將不可問又安望其成大功乎設使劉藻因調度未協軍行或有失利遂致抱慚畢命情尙可恕現在猛籠等處俱已克復猛歇猛混諸路亦俱攻破正宜乘勝剿滅賊巢之時有何窘迫竟至於此無論

屢次降旨傳諭並未有加伊重譴之語即使果欲將伊治罪則國憲所在爲大臣者亦當靜俟成命以伏刑誅又豈可效匹夫之見預辦一死以逃法網劉藻尙係讀書明理之人豈於君臣大義全未講明卽從前朕於劉藻曲從寬典實係格外矜全今伊無故自刎罪愆實由自取不可不加以嚴懲現據奏劉藻尙未氣絕楊應琚到普洱時可撥醫速爲調治傷痕平復卽傳旨拏問將因何自刎之故詳悉嚴訊奏聞明正其罪常鈞尋奏劉藻身故諭曰劉藻前在雲南總督任內辦理莽匪一案張皇失措種種錯謬繼復畏葸自戕是伊係已經革職應行治罪之員將來旅櫬回籍止可如常人歸葬不得聽其家覲顏建立墓碑書刻原任總督及歷官事實欺誑鄉愚著傳諭山東巡撫崔應階知之三十二年巡撫鄂寧奏言緬甸本莽瑞體之後乾隆十八年木梳頭日甕籍牙逐其酋莽打喇而自立夷人遂呼緬甸爲木梳或呼緬子或呼莽子本非二種御製緬莽詩有劉藻畏事惡稱兵之句

彰寶

彰寶滿洲鑲黃旗人姓鄂謨托氏乾隆十三年由繙譯舉人授內閣中書十八年

十月授江蘇淮安府海防同知二十一年遷徐州府知府二十二年署直隸口北道二十三年調甘肅平慶道尋詔留口北道任二十四年遷貴州按察使二十五年七月遷湖南布政使十月調江蘇二十六年調江寧兼管織造關稅三十年正月擢山西巡撫時蘇州府同知段成功詐贓事發上聞成功在山西陽曲縣任內虧帑上司代爲彌補諭彰寶詳查三十一年二月彰寶以成功虧空離任時徐溝等三十二州縣代交萬六千七百有奇巡撫和其衷給五百兩布政使文綬等俱知情覆奏命革和其衷文綬及按察使藍欽奎前任冀寧道富勒渾前任太原府知府劉墉職命侍郎四達會同彰寶嚴審鞫實和其衷段成功論斬文綬劉墉免死發往軍臺效力代交州縣分別降革藍欽奎富勒渾已革職應毋庸議四月疏言州縣倉庫筭鑰自操平糶穀價採買盈餘及寄貯暫發等項不入正項盤查易啟挪動情事不若提入司庫使州縣有徵解錢糧之責無久貯錢糧之弊俞旨報聞十二月歸化城同知珠隆阿推陞員外郎彰寶咨部請留大學士傅恆等劾奏上責彰寶徇庇下部議革職詔留任初察哈爾右翼牧廠有餘地屬山西豐鎮廳彰寶同直隸總督方觀承察哈爾都統色爾品會勘可墾者二萬三千餘頃三十

一年六月彰寶言游牧舊廠東西廣二百餘里南毗連民地北至海牧界廣十數里至四十五里不等平蕪廣衍土厚地肥卽山坡澗側亦可節取耕種迤東尤肥澤五頃劃爲一分分給五人百畝現認墾萬九千五百六十頃零臣擬就佃民聚居設村莊八十餘俾就近安耕豐鎮廳屬高廟子原巡檢轄迤東一帶增設巡檢一轄迤西其北界毗連蒙古游牧處築埂鑿塹以別經界新設村莊十餘里建汛房一撥戍兵五適中駐守備一總轄操防疏入報聞三十二年三月疏劾太原鎮標中軍遊擊盧武略於新鎮臣台布莅任前假修署札派各營銀署總兵敬善欲退之始退還又於台布閱城兩次備八轎台布亦卽乘坐詔革武略職台布撤還員缺卽以敬善補授先是安邑知縣馮兆觀揭河東鹽政達色派累商人及受贄禮門包三十三年正月命侍郎四達會彰寶審實併得運使吳雲從因被四達糾參嗾馮兆觀揭稟狀達色論死雲從兆觀治罪如律是月彰寶調山東巡撫二月調江蘇六月兩淮鹽政尤拔世奏繳本年提引徵銀論曰此項銀兩歷來鹽政並未奏明顯有朦混侵蝕情弊且自乾隆十一年提引之後每年二十萬至四十萬不等以每引三兩計應有千餘萬兩著彰寶會同尤拔世詳查尋查得前任鹽

政高恆普福運使盧見曾藉端侵肥狀俱伏法又得前任監掣同知楊重英勒詐商銀事論如律十二月兼署兩江總督三十四年正月奏言前撫臣明德奏將松江糧道移蘇州該道向駐常熟距不百里海疆門戶用資彈壓應毋庸移詔可三月丁母憂六月命馳驛往雲南署理巡撫時大兵進剿緬匪九月署雲貴總督明德奏彰寶抵永昌督運軍糧增數倍詔議敘加一級十月諭曰彰寶簡用巡撫甫經到滇卽赴永昌騰越一帶催督軍儲甚爲奮勉卽著署理雲貴總督尋命駐劄老官屯籌辦軍務三十五年正月諭曰彰寶甫到滇省辦糧馬諸務俱能安速經理及擢用總督以來亦頗實心任事著加太子太保以示優獎四月疏言永昌沿邊綿亘千餘里山深徑僻在在可通應於土司內曩宋關緬箐山隴川龍陵姚關及順寧府之篋笆橋諸阨要處設總卡撥千把總各一兵三十駐劄巡查現留土司之漢奸飭查勒回籍併行十家連環互保法詔實力督率五月奏貴州調撥兵間有老弱現加甄汰諭曰此事殊爲駭聽前以滇省綠營恇怯不堪難期振作黔兵較爲得力因諭令募選赴滇卽挑補額缺可資訓練乃其中仍有老弱無用之人是與滇兵何異彰寶身爲總督兩省皆係所轄既見有此充數之兵卽應一面

奏聞一面將原辦大員據實附參乃僅視同尋常以甄別汰除爲詞並無一言劾奏甚屬因循姑息彰寶著交部議處尋部議革任詔免十二月疏言沿邊永昌順寧二府生齒日繁米價踊貴常平倉貯無多不能因時平糶倘遇急需勢必遠購更多糜費請於保山騰越二州縣加貯穀二萬石龍陵廳六千石永平縣八千石順寧府萬石雲龍州六千石緬寧廳三千四百石詔如所請三十六年再請保山縣增貯穀三萬石騰越州二萬石龍陵廳萬石報聞三十七年奏雲南巡撫諾木親才識不能展拓兵制營伍皆未校閱上召諾木親還三十八年三月奏獲逃兵楊先榮審係頂冒咨部請示部覆照例辦上曰隨征兵丁借名頂冒已犯欺公之罪至中途又棄械潛遁較之正身脫逃則尤罪上加罪一經拏獲自應速正典刑揆之情法更無疑義乃彰寶轉以非係正犯游移其詞咨請部示該督係專辦督緝之人且屢經諭令上緊偵探毋任久稽顯戮今於已獲重犯心存寬縱若此無怪滇省逃兵歷年未獲者尙多至一百五十餘名皆此等姑息之惡習有以釀成之也該督向來尙能辦事何以近來憤憤至此令其自行議罪尋彰寶自請罰銀萬兩命寬免四月奏車里宣慰土司刁維屏逃匿請裁土缺設專營諭曰所見甚

是車里土司設立之初原因其率土投誠授以宣慰之職遞傳四輩前此莽匪之擾該土司刁紹文懦弱無能躲避獲罪雖經革退仍令其子承襲已屬格外施恩今刁維屏無故棄地潛逃實係自行滅絕斷不應令其再襲並據該督查十三猛各土司職俱非頒給印信號紙土司若於此內選擇一人陞襲未必遽肯受其鈐制自應將車里宣慰土司卽行裁汰改設專營移駐都司等官帶兵鎮守兼轄十三土弁於邊境夷情更爲得要至該土司所屬夷民或有仿照川省屯兵之例量給口糧令其一體當差伊等自必共知感奮出力應行事宜著彰寶詳悉妥議具奏七月彰寶議於九龍江立專營設都司一中軍守備一馬步兵五百分左右哨哨設千總一把總二經制外委千總一外委把總二歸普洱鎮轄裁景蒙元江二營兵補新營裁景蒙營守備一爲新設都司裁元江營守備一爲新設守備再裁兩營千總一把總四外委千把總五補兩哨仍增設千總一外委千總一土司舊屬夷民內選土練五百爲屯兵土司私莊八改屯田設百戶五於叭日內擇充皆議行欽定營名曰普安十一月實授雲貴總督三十九年三月彰寶奏患病溫旨慰問並遣侍衛隆安帶太醫馳往診視五月請解任允之十一月署總督圖思德

劾彰寶勒索保山知縣王錫供應銀四萬餘兩致虧空兵糧上命侍郎袁守侗馳驛往查併敕雲南巡撫李湖回奏得實詔革彰寶職拏交刑部擬斬監候四十二年故

裘曰修

裘曰修江西新建人乾隆四年進士庶吉士散館授編修八年擢侍讀學士充日講起居注官九年遷少詹事十二月充湖北鄉試正考官十三年遷詹事十四年四月命祭告南鎮會稽山十一月命南書房行走十五年六月充浙江鄉試正考官十月遷內閣學士十六年八月遷兵部右侍郎十二月充江南鄉試正考官十七年署吏部侍郎十八年六月充浙江鄉試正考官九月調吏部右侍郎十月署戶部侍郎十一月充經筵講官尋充會典館副總裁十九年三月以察議侍郎張泰開保舉瞻徇事不實部議革職奉旨從寬留任十月調戶部右侍郎先是胡中藻逆詩案發供天津道張紹渠之弟紹衡曾述曰修言堅磨生集已有人進呈上面詢曰修並無此語命提拏張紹衡質訊嗣紹衡供此語得自裘曰修屬實曰修執奏如前二十一年五月諭曰此事而面質對其言出自裘曰修已無疑義若謂裘

曰修有意通信何難密札胡中藻令其并行銷燬滅跡而乃假諸張紹衡之口此固不然但從前查辦胡中藻詩集朕原特交蔣溥密辦事閱數年裘曰修同事內廷偶爾閒談亦情理所有而張紹衡向胡中藻說及原在未經發覺之前俱出無心於胡中藻本案初無關涉自可無庸辦理乃裘曰修而承詢問堅執以爲並無此言是以將張紹衡提拏質對俾此事水落石出而裘曰修以業經諱飾於前因卽遂非於後今旣供證確鑿則裘曰修面欺之罪實無可遁著交部嚴察議奏六月議革職尋命授右中允十一月遷侍講十二月授吏部右侍郎二十一年二月充經筵講官四月軍機處行走七月以宣化莊頭吳士望控生員孫禮等墾荒斷渠命曰修偕總管內務府大臣德保往勘所墾地與渠水並無礙飭令分墾毋牽混九月恩賞分戶部飯銀每年五百兩命赴巴里坤辦理軍務十二月奏言肅州備用之馬多多益善此次解送五千匹若不敷用西安滿洲營可得千餘綠營可得三千臣已屬巡撫盧焯預備俟臣抵肅商之督臣黃廷桂如有撥調卽行文令續解可應時無誤又西安現運米送巴里坤若令晉省解肅之駝帶運亦可稍減腳費得旨允行二十二年正月奏言西陲地廣回民不下數十部落而厄魯特人

介處其中當策妄阿喇布坦時恣殺掠回民切齒已久是以從前我師所至輒爭先效順此次進剿厄魯特必竄逸或闌人回地臣聞伯克額敏和卓爲回部知名之人受恩最重請頒敕令彼宣諭諸回部以我兵所誅惟厄魯特且爲回部除害若有竄入境者能擒而殺之一體賞賚勿被煽生疑懼諭曰大凡此等外夷我力勝則彼不招而自來若我力竭雖詳諭百端彼之觀望自若卿所言雖亦一策徐徐度之可耳五月裘曰修還京命往山東河南上江會勘水道疏濬事宜諭曰朕此次南巡親莅河工相度險要指授在工諸臣並特派侍郎夢麟會同總河白鍾山疏荆山橋一帶總河張師載巡撫高晉協辦徐州府黃河兩岸隄工其徐州護城石工則委之副都御史德爾敏下河諸工則委之副總河嵇璜六塘河以下各工復委之侍郎夢麟分任責成各有專屬凡以爲積歲被災羣黎籌疏洩之方捍禦之策者宵旰靡寧冀收實濟業經屢頒明旨矣近據山東巡撫鶴年奏報山東之金鄉魚臺等州縣未涸地畝尙有一千餘莊因思此方積潦再經伏雨秋霖將益苦汎濫而上江之宿虹靈璧等處河南之永城夏邑等處在在皆有積水計漫溢地界不下數百里此其受病非一朝一夕驟至蔓延蓋其始皆由於地方官漫

不經心偶遇水災不急爲籌度日復一日因循釀害積水日益增淹地日益廣以至高下田廬盡成巨浸及至受害既深自非大動帑項厚資工力不能奏效而大小各官又莫能深悉受害之由確得祛患之術惟恐議疏議築虧帑賠累遂爾噤口束手坐視其民爲魚而莫展一籌現今水患已不可勝言若不及時澈底籌辦將來其何所底止耶此亦朕南巡未了之事著侍郎裘曰修馳驛前往山東河南上江現在積水各州縣往來周視寬以時日熟察情形咨詢輿論勿憚再三其在山東者與鶴年會商在河南者與圖爾炳阿會商在上江者與高晉會商其地方官有熟習水道之員聽其酌量差委務在通盤籌畫無分疆域凡可以登民衽席計安全而謀樂利者果歸實用毋惜多費帑金朕痾瘵一體南顧疇咨輟轉憂勤之意皆諸臣所共悉其深體而共勉之以副委任六月日修由山東查勘至河南七月由河南至上江八月偕安徽巡撫高晉奏籌宿州靈璧虹縣疏濬事言宿靈璧虹等處每年所以被水之由緣豫省虞夏商永四邑之水畢匯宿州所恃以宣洩者惟睢河之一道上游毛城鋪等處減洩之黃水累年浸灌水過沙停積漸成淤至上年天然閘峯山四閘陸續開放而毛城鋪至本年底始行堵閉黃河

直流已經一載是以徐溪口一帶竟成平陸睢河上段之在宿州者現已全行淤墊睢河既淤豫省諸水及宿州四境山水散流漫衍達於徐溪靈璧則有斗溝拖尾河沱河虹縣則有荀家溝岳家河須一律疏濬虹縣又有潼河受水極大向由林子河經歸仁聞以東之涵洞入安河今林子河淤已久亦宜舍舊圖新從潘家山南之徐家衝開通以達董家溝歸安河入洪澤湖較爲徑捷凡此皆宿靈璧虹三州縣積水情形就臣等所見酌擬之辦法也至烏雀嶺董家溝安河係虹縣泗州宿遷桃源四州縣錯壤須會同辦理董家溝在宿遷境內已全淤安河則界桃源宿遷泗州三州縣亦間淺阻金鎖鎮劉李埂田家集陡門等處上下八十里爲入洪澤之咽喉尤爲緊要皆須逐段開濬必此處較上游深通而後睢河一帶之水順流直下於洪澤施工次第當由此起現行文下江督撫諸臣確勘詳估及時辦理惟是下游之下復有下游洪澤一湖以清口爲出路前蒙皇上指示河臣將草壩拆卸以暢其流江南官民皆仰頌聖明照燭於數千里之外但每歲係應期開放俾上游之水隨來隨去則來者雖多而去者能速不致壅闕於一時諭曰裘曰修等奏會勘宿靈璧虹三州縣積水情形於該處水勢之來源去路頗爲明晰

所言歷年受病之由及目前利導之法已具得其要領前曾降旨令在事諸臣將勘明工程及時辦理現奏宿靈壁虹等處疏濬各工應興舉者卽行興舉不必會商往返致稽時日朕爲百姓生計並不惜費惟期用之於實永遠消患而已總之侍郎裘曰修夢麟河臣白鍾山嵇璜張師載並各該督撫受命同事祇如一人原無分此疆彼界所見旣確卽應一力擔承務期歲前竣事始於河工有裨而不誤明春耕種爲要至毛城鋪爲睢河上游欲睢河之無淤墊計惟有堅閉毛城鋪苟非盛漲不得開放設不得已如今歲之自行漫溢卽當於斷流之後將淤沙盡力挑濬若少因循則今年淤一尺明年卽淤二尺河身墊高節節阻礙年復一年其淤更甚故逐年挑濬深通是爲要務河臣當永久奉行其睢河下游皆達於洪澤湖而洪澤以清口爲出路前經指授河臣於汛前將草壩拆卸俾得暢流已有成效嗣後卽以此爲成法不待盛漲一遇水勢漲發隨時酌量拆卸草壩預爲洩水之地從前惟恐運河水少故須蓄以濟運今則惟恐其多情形迥異此所當因時審度不可執一而論者也向來河員習氣欲保隄工則以開毛城鋪爲長策至於下游之清口則又墨守舊規憚於拆卸草壩以至出水不暢啟閉兩失河工日就

敗壞而沿河州縣歲受其災河臣能如此等言緊處恪遵所示機宜以時蓄洩當無後艱所有現議應開支河趕辦竣工去累年淤阻汎濫之積不特宿靈璧虹等州縣漸有起色上游豫東諸積水皆有所歸民生利賴所關甚鉅諸臣其共勉之九月日修由潁亳一路復至河南偕巡撫胡寶瑤奏籌豫省疏濬事言黃河以南之水鞏縣以上俱入於黃至滎澤以下北阻大隄南則連山橫亘諸水所經惟以正東及東南兩面爲去路正東則上江宿州之沮睢河也向因沙灘徐溪口等處梗塞致省城之巴河響河豐樂河皆無出路下阻則上淤並此諸河在在淤墊幹河旣淤一切溝渠又無出路此商虞夏永四邑頻年水患之由也東南一面則以江南潁州府之阜陽太和亳州等州縣爲出路淮水之大本能宣洩而兩省犬牙相錯之處淺阻亦多豫省之水濡滯而不下則豫省先受其患極漲而潰奔流四溢其患又且及於上江此開封陳州迤下及於歸德之柘城鹿邑汝寧迤下及於西平上蔡頻年被水之由也今睢河砂礪一帶業奉旨興挑潁亳一帶臣日修前與高晉會勘東面東南面去路無阻然後中州諸水可得而治臣等博採輿論謂宜先開幹河繼開支河繼開溝洫分要工次工緩工次第興修東面之幹河在商

邱爲豐樂河在夏邑爲響河在永城爲巴河實係一河而旁受惠民溝睦隣溝毛家河虬龍溝歧河民便溝諸水河身旣狹加以日久沙淤深不過四五尺宜大加挑濬東南面之幹河大沙河爲最卽古潁水隄岸殘缺應補築次則開封之賈魯河卽古汴水自尉氏以下周家口以上宜一律挑濬又惠濟河自杞縣以下尤淤阻渦河自鹿邑以上漫口甚多並幹河之當挑濬者此外如永城之漕溝夏邑之毛家河小引溝觀音閣引河白河三岔河虞城之惠民溝商邱之北沙河大澗溝鹿邑之清水河汝寧府之洪河汝河宜徧加挑濬一律通流所挑工卽以加幫兩岸之隄但一經漫水汕刷便成決口擬於河身最狹及沙鬆溜急處普加礮夯臣等通盤籌畫由引河以達於支河由支河以達於幹河其不能歸河者於田間多作溝渠導引或窪地聽爲澤藪以資停蓄總使源源之水旣下注無虞而潢汙野潦亦有所約束而不至於散漫得旨如議速行是月日修復至山東偕總河張師載於濟寧上下查勘尋偕巡撫鶴年奏言館陶臨清等州縣濱運河兩岸向有民埝以禦漲水而衛田廬因係民築民修僅堆填浮土不及礮夯堅實今年兩河驟漲直注東省致旁決甚多雖經堵築水落後殘損坍塌處亟應增培高厚若仍責

之民修不免虛應故事懇恩准照直隸永定河隄工之例每夫日給米一升仍責成地方官督令實力修補詔如所請十月偕新任巡撫蔣洲奏言山東水道應疏濬處兗州爲要曹州次之皆緣微山湖積水不消致宣洩無路臣曰修與前撫臣鶴年於六月間相度地形奏開伊家河今臣到工復將原估十丈河頭再展寬數丈使湖水建瓴而下則濟寧魚臺滕縣嶧縣以及江南之豐沛二縣地畝可普行涸出至水消後更有應辦者就兗州言之魚臺縣有舊運河一道界微山湖西面上接濟寧之牛頭河金鄉之涑河柳林河應一併挑濬使下游直接江南茶陵十字河頭而脈絡貫通上游則濟寧金鄉以下各州縣匯注之水皆有去路而水患可除又泗河自濟寧姚安莊以下河身愈下愈狹至今泛溢未消白馬河則中段之董家口與泗河相接狹不能容致淤阻應將二河之尾挑濬俾兩河分流消納亦易府河係泗水分支向有金口閘建涵洞二今淤塞入河底來路旣壅去路亦斷若將涵洞改建水閘楊家壩亦改建石閘用板啟閉則上下通流節宣有制洸河合流入馬場湖每多旁溢查濟寧之興文鎮以下舊有河形年久淤塞亦應行挑濬就曹州言之則應分二道其西南自豫省之延津滑縣封邱直隸之長垣東

明等處坡水漫溢而來是以明代築太行隄時卽沿隄開河一道名順隄河順軌東流自微山湖水漲此河不能下達致多淤墊應疏濬其東北則曹范壽張陽穀等處上承濮州定陶各坡河之水從沙河趙王河入運今歲水勢異漲運河爲其頂阻倒漾而上遂多淹漫現於八里廟增建滾壩此處正當沙趙二河之衝於地勢最爲得宜總使平槽之水濟運有餘而泛漲之時消減亦易再查沂沭二水皆爲幹河流河至江南沭陽縣入海尙屬安流沂河入江南之駱馬湖多淤阻應一併疏通以除水患諭曰覽奏俱悉朕正慮及沂州府屬每被水災奏內有疏通駱馬湖語宜速相度妥辦又奏山東運河情形言南陽以下至韓莊閘水勢未消臣等亟思措置之方於來源去路並加講求查南旺舊制原係三分南行七分北上今則北少南多現於分水口兩岸接長南壩收短北壩俾順勢北行再將何家壩減低二尺放入北運則南下之來源已少於糧艘回空後嚴閉南閘盡放北閘暫使汶水全往北流俟伊家河放水運河下段隄岸盡出凡不能施工之處可次第興修庶明歲重運遄行不致遲誤至南旺以上水勢已消各工段及時修築諭曰恐汝等分身不及今又遣劉統勳前往專司運河一切工程此奏可與之妥酌爲

之是月曰修復至上江偕高晉奏言潁州府屬地勢平衍北高南下各河道均以淮河爲歸宿達洪澤湖祇以積年上下淤阻遂多漫溢今豫省既將上游疏濬安省應一體籌辦其在豫省連界應濬者亳州之兩河口及三道河淝河太和之茨河明河商邱之大沙河均照豫省寬深丈尺興工本境應濬者亳州之宋陽河霍邱之高塘河及茨河淝河下流其隄岸均一律修整諭曰接連豫省之河應較豫省加寬方可容受也又言宿州上承豫省及下江蕭碭諸水又洪湖受毛城鋪減洩之黃水來源甚多查睢河衝出之南北二段既經估挑其上段正身地居中夾若併加開濬三河並行以中段接洪湖減洩之黃水以南段接豫省永夏諸水以北段接下江蕭碭諸水均順其自然之勢使分途下暢至毛城鋪爲睢河上游仍恪守聖訓堅閉毛城鋪非盛漲不得開放其橫壩引河悉心籌辦務於河道民田兩無妨礙又宿州舊有運糧溝二道大半淤阻若將此二溝挑治並澮河下游淤淺處一律疏濬增建石閘以時啟閉既可分新衝南段之水以通澮河而由澮入淮糧船從此直達宿城既增上游洩水之區又資往來運送之便兩岸民田積澇均可分洩諭曰所奏皆善可妥協辦理尋調戶部右侍郎十一月奏言全淮俱入

洪湖而去路又以清口爲咽喉疊奉諭旨令來歲及早多拆東西草壩以暢其流今值初冬束壩蓄水之期向來口門祇留十八丈至二十丈不等收束太緊今擬酌留三十丈則湖水暢出且今歲多出一分來年可多受一分於宣洩有益諭曰甚合機宜欣慰覽之又奏言上江諸水開通後歸安河以達洪湖自歸仁集下至陡門出口之路蘆葦叢生淤墊較甚上游數百里東下之水至此皆爲所格連年患由於此惟是水面瀾漫無從紮壩若概用甬工不但天寒艱於入水亦且蘆根糾結甬具難施查沿湖一帶漁船頗多募四五百隻掘取蘆根兼撈淤土爲力較易尾閘疏通則壅遏之患可減至安河河頭亦有應爲籌計者查歸仁集外奎河潼河柏家湖林子河羅家河水俱入安河來水旣衆咽喉尙屬狹隘宜開董家溝一路又勘得歸仁隄迤下舊有涵洞年久湮塞擬再開通又分林子河一支由此經行則安河進水之地亦有所分而壅遏無患詔如所請十二月日修復至河南偕胡寶琮奏言開歸陳三府之豐樂河響河巴河渦河惠濟河賈魯河爲諸河之幹現已陸續工竣其支河三十餘處有應續議挑濬者臣等再加履勘如商邱之兩沙河虞城之苑家隄遂平縣之石洋河上蔡縣之柳堰河泥河小茅洞新蔡之

三岔河各相機疏築中州全省水患可冀無虞上嘉允二十三年四月上江河工告竣曰修與協理河工安徽巡撫高晉俱蒙恩議敘御製詩有爾晉惟方伯曰修汝亮工之句六月奏言偏災地方慮糧食短少例免米豆稅以招商但既經免稅必設法稽查始則定地給票販米繼則沿途照票放行既售又須回票註銷胥役在在需索較照例所納之稅增倍且票中填明往售之地中途雖有善價不得隨便他售商販卻顧不前致災地米糧稀少是欲通商而商反以爲累欲便民而民轉受其不便請照舊收稅商免守驗需索米豆自然流通詔九卿議奏允行七月京師米貴命發官米減價平糶以曰修等董其事奏言今歲市價較往年倍增若減價太多恐奸徒乘機居積適滋弊端臣等酌議每石減百文先行試糶數日後市價稍平糶價以次遞減并將平糶錢交庫爲搭放兵餉用不必發五城易銀庶吏胥不得高下其手從之十月充方略館副總裁十二月以天津民人潘濬控鹽商牛兆泰案詞連曰修與兆泰寄書事諭曰裘曰修與鹽商牛兆泰係屬姻親寄書可也而使鹽道之壻持書寄鹽商雖無囑託之言明有囑託之意軍機行走之人尤當慎密防閑爲要此何爲者耶裘曰修不必在軍機處行走二十四年六月

江南飛蝗延及山東命偕內閣學士海明往勘尋奏蝗起自海州其撲捕不力之
地方官治罪如律閏六月充江西鄉試正考官十一月賜曰修繼母郝氏八旬衍
慶生母王氏七秩連祺額二十五年二月命偕侍郎伊祿順赴甘肅清查軍需九
月授倉場侍郎十月奏言每年漕艘抵通必至石壩換剝船由五閘轉運入京此
一帶河道自大通橋以下至通州之東水關長四十餘里淤積既久河身愈高遇
雨大則衝潰隄岸閘水盡洩雨水微弱之年則又淺阻膠舟漕運阻滯查每年修
隄挑淺名爲歲修與其逐年勞費不若爲一勞永逸之計大加挑濬嗣後可節省
過半允之二十六年七月河決楊橋命赴河南同巡撫常鈞查勘災賑並疏洩事
宜曰修奏言豫省河水漫溢當先求堵禦次籌疏洩黃水歸槽溝渠始能料理至
災區宜先行撫卹但有司拘於成例以查明申報上司委員監放然後給發飢民
迫不及待致填溝壑應請一面查點一面給放無俟彙齊造冊所全實多又粥廠
爲惠最溥有司恐聚集貧人生事往往阻格不行不知各縣俱設粥廠則彼境之
人不入此境又於一縣中分東西南北四鄉則自然散布不致叢擠在官費不甚
鉅而飢民實賴全活上可其奏八月奏言南北兩岸漫口雖有二十餘處辦料尙

易惟楊橋決口寬數百丈必料物雲集方可葺事查河工定例每料百斤價銀九分仍自運到工此次決口大工請酌增價一倍使附近料物源源而來遠者亦不致聞風退阻大工可速就諭曰所見得要如所議速行是月欽差大臣劉統勳兆惠駐楊橋督工曰修查勘下淤至潁亳一帶九月奏言黃河既斷正流由賈魯惠濟二河下灌倘下游不能容納又生旁潰則爲患滋大臣查賈魯惠濟二河所受黃水多有通連之處其斷續隄埝缺口爲出水之路者則留資宣洩其爲河水灌入者則概行堵禦俾順勢而下導之中流不致復生決裂又言豫省決口上流未斷江南潁亳一帶種麥無期此時糧價尙平冬春恐致騰涌請一概賑恤給與折色其潁屬所貯倉糧俱留爲來春糶借之用此數州縣糧價不昂則河南光州固始等出米之鄉俱可盡留本省於災黎有益上報可曰修尋返楊橋勘南北兩岸各工奏言曹縣漫口關係東省運河今大河正流直衝北岸將來汎水一發仍慮新隄難保臣閱視河心老灘已成崖岸河形爲其所逼是以偏趨必當挑濬挽留俾河行中道應於楊橋決口工畢詳加估辦報聞十月奏言沁水出五龍口沿河而下較黃水濁色減而性之湍悍過之加以丹水從北來其力更甚今歲異漲隄

不能制大幹東流至懷慶府城從北門灌入復繞城至尋村衝開決口奪溜南趨不由故道致武陟一帶被浸決口大小不等亟應補築高厚以防來歲汎水查沁水隄埵惟武陟縣境之木欒店係官工餘皆民修此次工大費鉅請借帑興工以紓民力又言被水最重之州縣民人有避赴鄰境者聞賑來歸請查明戶口居址一體賑恤得旨嘉允諭曰裘曰修辦理豫省災賑將竣且聞伊子裘麟病故伊母年高未免轉增倚閭之望著令其回京任事十二月豫省河工告竣交部議敘御製中州治河碑又有嘉其不惜工不愛帑不勞民水用洩土計方上源下游以次就治之語是月丁憂回籍二十八年二月諭曰直隸連年積水未消現雖多方宣洩終不如豫省之妥善從前河南疏濬河工皆係侍郎裘曰修協同辦理此時裘曰修服制將闋著卽馳驛來京督辦直隸水道溝渠事務賜詩曰水由地中行南北勢殊異南土勤溝洫鮮害而多利北方盡平衍利少害常致率旱澇偶逢畎澮總棄置比年夏秋澇乃見洪波積蒿日乏良方屢命疏消試覆稱海不受是誠無別計嗟嗟我災黎視爾頻受沴相與待天時益用增慙愧發帑與截漕十求一二濟廉知天津壩洩潦實遲滯重臣令馳巡情吏亟抵罪導宣入海河涸壞已耕暨

水大釜底形難較津南倍卽今此愁旱而彼仍望霽然盡一分力庶獲一分惠繡衣分督濬漸有可耕勢此均治標策未爲探本義豫省及上江往年侵每逮夢麟與汝修承旨克奏績馳驛召來京斯實爲民基投艱非奪情寧宜顧浮議輕車汝其慶宣防汝其志集思見毋執周視陳毋避委輸必源尋下醜求高自功要在人爲守株兔安企孰急宜先圖孰緩宜後治孰壅宜剔鬻孰澤宜讓棄代賑防中飽舉事懷抑埴勉汝永逸謀副予勤求意四月署吏部侍郎六月上又以直隸山東界生蝗命偕尙書阿桂董辦撲捕事宜尋奏言吳橋寧津樂陵南皮鹽山慶雲海豐等縣濱河近海窪處甫經涸出溼熱所蒸蝗蝻蠕動現飭各州縣分路撲捕又直隸之有運河猶南省之有長江各水皆由此入海每有宣洩不及之患務將減河廓清並多求出路以益暢達報聞七月奏督捕滄州靜海霸州文安等處飛蝗復諭竭力毋忽九月日修奏查辦直隸河渠事竣請假回籍迎養諭曰睢河久未疏濬應豫爲籌畫著裘日修於歸途之便卽會同高晉等查勘辦理十月日修奏言勘辦睢河必厚蓄清水以刷淤泥方爲挈要各閘隨宜啟閉遇應開黃疇閘則堵南服河頭應開西流閘則堵北服河頭使水滙入睢河力足衝刷庶無淤積之

患上嘉納之十二月奏言睢河原係沙積淤不過黃水之時但值清水盛漲兩岸亦不無坍塌是以兩旁淤沙停積河底淺滯應查明段落擇其淺狹者疏令寬深再南北二河口於秋冬水弱時築壩堵截俾兩河清水全歸睢河至四月水長仍啟壩分洩於蓄洩似屬合宜詔如所議行二十九年三月福建提督黃仕簡據參將溫泰言總督每年受廈門洋行陋規一萬圓巡撫受八千圓具疏劾奏命曰修偕尙書舒赫德往查四月會奏起獲洋行底簿查出道府廳員與總督墊買物件等款請革職並將巡撫定長解任質訊是月舒赫德傳旨命曰修暫署福建巡撫事務諭曰道府等既有收受陋規之事自應如此辦理定長卽有應得處分不過失察及保舉非人何必遽行解任著傳諭舒赫德等就案悉心分別妥辦毋事張皇急遽轉致畸重畸輕五月曰修以汀州府知府高霑於長汀縣鍾惟啟私鑄之案未親審奏請革職諭曰高霑讞牘未及躬親雖有不合按例處分其罪尙不至竟行褫職況該員正在俸滿引見何難於給咨送部隨摺聲明候朕臨期甄別不必汲汲糾劾若此裘曰修攝篆伊始未免意存風力而不知其事實不值如此一辦也高霑仍著送部引見曰修等尋奏黃仕簡所劾受一萬八千之數屬虛洋行

年例督撫衙門實有八千圓領辦燕窩呢羽貼費其各參員代總督楊廷璋墊買價銀俱係各員名下陋規屬實奉旨黃仕簡率臆具奏本應議處但所奏尙屬有因從寬免其交部楊廷璋交部嚴加議處著卽解任回京候旨七月諭曰前黃仕簡參奏廈門洋行陋規朕以此案關係督撫婪索多贓實堪駭異非澈底跟究無以肅法紀而昭懲創因命舒赫德等前往查辦舒赫德等自應向溫泰究詰原單所開總督一萬巡撫八千之數實在有無收受確據如彼毫無指證然後逐層研究遞及道府廳員勒索陋規墊買物件各情由方合讞案重輕先後乃舒赫德等初至閩省置原參一萬八千之陋規虛實於不問僅從起獲底簿將屬員代買物件支節推尋所辦未得窾要竟似朕差伊等赴閩專爲查訪督撫過失毋怪乎楊廷璋前此之不能允服轉疑舒赫德等有意吹求也節經朕降旨示以端緒伊等詳悉研訊黃仕簡據溫泰所開督撫收受陋規數目全屬子虛惟究出屬員等代購物件一節自應分別辦理朕前命舒赫德赴閩時曾面諭以此案如果督撫婪贓屬實必當重治其罪定長或有應行質訊之處卽可傳旨將伊解任聽審其巡撫印務令裘日修暫行署理原以封疆大臣受恩深重設罔顧國憲貪黷公行則

其身家性命尙不能保更何有於一官若黃仕簡所參既無確據定長惟發價購買燕窩呢羽等物亦係沿習舊例初無不可輕貸之處則從前舒赫德之遽令解任尤爲誤會朕意矣此案舒赫德等查辦入手未得關鍵節經訓示更正及審明定讞則楊廷璋之罷斥總督解退閣務及定長之從寬仍留原任皆視其所自取恐中外之人未能深悉此中就裏特將案情原委明白宣諭知之十二月署倉場侍郎三十年正月遷戶部左侍郎五月兼管順天府尹事六月充經筵講官三十一年二月充會試副考官十月諭曰江南淮徐支河一帶所有官修河隄前經特派裘曰修等查辦距今爲時已久且韓家堂現辦漫口其下游支河汶港不無淤墊亦應酌量疏濬著派裘曰修高恆前往會同高晉悉心查勘至淮徐河道或有毗連山東河南地方並著一併閱看十一月奏言豫省各河自乾隆二十二年開挑後每歲照善後章程於農隙時查勘疏濬隄岸亦隨時培補現無淤墊殘缺至歸德一帶渦河上游並各支河大局均與初辦相符且有加深之處兩岸隄工亦皆完固報聞三十二年七月遷禮部尙書仍管順天府尹事閏七月奏言京師因雨路濘通州交倉餘米商販等艱於輓運是以上月米價稍昂請將八月甲米移

前數日支放上從其言八月調工部尙書三十三年八月調刑部尙書尋丁憂回籍三十四年諭曰裘曰修丁憂回籍已一年有餘著補授刑部尙書俟伊葬事完竣來京供職三十五年四月仍兼管順天府尹事五月刑部改擬賄縱參犯一案佐領額爾圖驍騎校孟忒初擬發遣枷杖得旨令按律改正再擬絞立決諭曰此案前因該將軍傅亮定罪過嚴漫無區別是以降旨交刑部另辦乃該堂官意存寬縱概以發遣枷杖完結經朕面加訓飭令其按律改正今又於定律絞候之外加以立決則所謂過猶不及均非情理之平也閏五月命督捕武清東安一帶飛蝗諭曰裘曰修等奏在永定河武清東安連界撲捕蝗蝻忽見飛蝗南來漸往西北周元理卽帶領員役尾追視其所落之處撲打自應如此辦理至摺內又稱府尹竇光鼐前往迤南一帶照飛蝗往來方向尋覓所辦甚屬錯謬裘曰修平日尙屬曉事如卽親往查勘當不至爲人朦蔽今旣目擊情形自應迅赴蝗起處所查明貽誤之地方官參奏治罪而留竇光鼐在彼督捕方合事理乃竟安坐武清等處僅聽竇光鼐前往一查塞責全不知實心任事已屬非是至摺內稱將來或於隱僻無人之河淀等處查得一語尤爲取巧其意不過以隱僻河淀尋覓難於周

到隱爲玩誤劣員預留地步此等伎倆豈能於朕前嘗試耶著交部嚴加議處仍著卽往迤南一帶切實根究倘於起蝗處所之諱匿不報州縣復爲徇庇開脫裘曰修能任其咎乎尋命降補順天府府尹部議照溺職例革職奉旨帶於新任十二月調工部左侍郎仍管順天府尹事三十六年二月命赴滄州一帶會同直隸總督楊廷璋查勘運河情形奏言現今閘座高出河面數尺口不甚寬兼有閘牆間隔水勢不免壅滯應改用減水石壩並將壩底龍骨石拆低一尺則河水不待平槽卽可預殺其勢並疏下流引河至岐口歸海處一律深挑至捷地閘形勢兜灣將來改壩應移近河邊裁曲就直以順水性至減河每年遇水後往往受淤必須節節疏通使水得順流達海方無旁溢之患上從之是月補工部尙書六月命南書房行走七月充經筵講官八月倉場侍郎瓦爾達等奏河道淤積久請挑濬以利漕命曰修等會同辦理九月諭曰直隸被水之處順天所屬者居多裘曰修於近京水利情形較爲諳悉著往來調度查勘總司其事三十七年正月諭曰永定河北運河等處督辦工程著裘曰修協同直隸總督周元理董率各員妥協辦理二月奏言直隸河工需用僱夫錢請照京城發兌官錢例許辦工各員一體交

銀領買從之四月奏言治河之道挑濬爲要汎水未發之先旣發之後逐段詳勘一有新淤卽當乘時急辦惟水中嫩淤人夫不能站立難以施工請設立濬船給之器具人夫可於船上用力而所挑之土卽以入船運至兩岸實爲事半功倍詔如所議行又言直隸諸水千支萬派總由三汭河爲入海之路運河西岸則大清河會永定而出子牙河會三支黑龍港而出全資西岸豐道諸橋穿連而東彙入海河今東岸自南倉以下改爲豐道俾盛漲時可徑達堤場河淀不專恃海河一道爲出路但西岸向祇十一橋今陸續增建九處多其出路上游不致受害至格定一隄原爲隔別清渾而設查子牙運河自莊兒頭以下漸清其來路甚遠而出口祇有大紅橋一實爲太偏是以向來於格淀之尾閘王家河俞家河各建一橋與清河通流然兩橋口面過水有限兩面衝激隄工不能經久每歲徒費增修莫若自當城以下改爲豐道水大聽其自漫水小仍於行人便利並酌增涵洞數座不專恃王家河俞家河兩橋則出水暢順而子牙下流澄清之水亦不致受淤得旨諸凡皆妥尋以審擬雄縣知縣胡錫瑛盜賣倉穀及科斂一案意涉寬縱部議銷加一級免其降級六月奏言向來河官祇講築隄不言濬河不知治河不外疏

築二字而築不如疏其理甚明直省之弊近水居民與水爭地如兩河之外所有淀泊本以瀦水乃水退一尺則佔耕一尺既報陞科卽呈請築埝有司見不及遠以爲糧地自當防護隄埝直插水中水從決口而入被淹更甚請敕所司於一切淀泊毋許報墾陞科並不得橫加隄埝則凡水皆有所歸不致壅遏爲害上是其言降敕嚴禁尋兼管倉場侍郎事十一月命偕瓦爾達往盛京查勘民典旗地奏言此項地畝奉旨動帑回贖俾出典旗人不失舊業受典民人照舊出得價聖恩至爲優渥臣等酌議自回贖後原業旗人果能自種准其撤回原佃民有欠地租者地方官代催抗不給者撤地另行招佃如旗人不能自種原佃民並未欠租不能遽行撤回致佃民失生計詔如所議行三十八年二月充永樂大典總裁閏三月充四庫全書館總裁四月日修患噎症遣醫診視尋請解任調理上以錢陳羣昔患此症因年老尤其告歸今日修甫逾六旬不當如陳羣之引退賜詩以慰之詩曰腹因廢食減便便何事投醫未霍然欲乞冰衡權解職可忘芸席共研篇卿云效力正長日我則憐材未老年不忍養疴 香樹還希香樹例全痊是月命加太子少傅五月卒諭曰工部尙書裘日修品學端醇才猷練達入直內廷屢膺使

命宣力年久倚任方深今春偶患噎隔特遣太醫院堂官診治復常遣御前侍衛前往看視比因病體加劇奏請解職未允所請並賜詩示慰昨又降旨晉加宮銜俾其舒心攝養以冀速痊茲聞溘逝深爲悼惜著加恩派散秩大臣一員帶侍衛十員往奠茶酒所有在任革職降級之案俱著開復應得卹典仍著該部察例具奏尋賜祭葬如例諡文達四十年恩授其子行簡爲內閣中書准其一體會試

錢維城

錢維城江蘇武進人乾隆十年一甲一名進士授修撰十三年五月散館列清書三等諭曰歷科進士殿試一甲第一名卽授爲修撰二名三名授爲編修至散館時並無所更易伊等因已授職遂自甘怠忽學業轉荒卽如今年散館修撰錢維城考列清書三等編修莊存與考列漢書二等之末其不留心學問已可概見但錢維城係派習清書或尙非其所素習著再試以漢書候朕閱定莊存與不授爲編修則此後一甲之人皆有所警而專心學問若有仍考列三等者其例視此越日諭曰昨因錢維城考列清書三等後試以漢書惟詩句有疵賦尙通順著仍留修撰之任八月遷右中允入直南書房充日講起居注官十五年二月擢侍講學

士九月轉侍讀學士十六年擢內閣學士十七年疏言勾到大典一筆之下事關死生不容偶誤勾到時刑部堂官及內閣學士俱有手摺請於遵旨論定後大學士執筆卽各將手摺內所開本名裂紙寸許爲記勾畢外出持摺互校庶查核有憑卽偶有遺誤不難立請更正報聞十九年三月充會試副考官五月教習庶吉士二十年八月給假回籍省親二十二年正月授工部侍郎九月充武會試正考官二十三年奉旨分理五城平糶事宜疏言東中南三城木廠距倉近西北兩城木廠距倉遠向來車價俱同車戶每憚遠就近請酌廠地遠近定車價之多寡卽以東中南三城之多補西北兩城之少庶運費無增而輓輸踴躍詔如所請速行二十四年充江西鄉試正考官二十六年調刑部左侍郎二十七年九月疏請申明律例二事一律載殘毀他人死屍及棄屍水中者杖一百流三千里其棄而不失者減一等此係發冢本條註云屍設在家在野未殯葬者若已殯葬者則以開棺見屍論以殘毀常人未埋之屍與發掘墳墓者有間故以次遞減罪止流徒皆蒙上文發塚見屍而言乃各省謀故鬪殺命案遇有棄屍滅跡之事輒援此律聲明棄屍輕罪勿論一語據爲成例遂有臨時殺死竊劫之盜賊在律本應勿論或

愚民累累將屍移棄問刑有司因其本罪勿論轉專治其移埋棄屍之罪臣思此
事人犯所殺者原係罪人故寬其擅殺之罪乃殺死罪人例得勿論卽移棄勿論
之屍反至流徒是爲本小末大引用牽混請嗣後移棄律得勿論盜賊之屍及姦
所登時殺死姦夫並一切格殺持杖拒捕之罪人等案凡有棄屍者不得援引此
例其非律得勿論者仍照本律定擬一例載本夫有服親屬皆許捉姦如登時殺
死姦夫姦婦者並依夜無故入人家已就拘執而擅殺科罪若非登時以鬪殺論
例於親屬殺姦分別登時非登時皆照本夫加一等定罪此各指姦夫未曾格鬪
拒捕者而言若一有拒捕格鬪則無論本夫與親屬皆當依罪人拒捕論然則律
所云親屬捉姦非登時殺死以鬪殺論者正引罪人不拒捕而擅殺以鬪殺論之
律文所載甚明乃各省問擬有援擅殺論者有直以鬪殺論者雖鬪殺之與不拒
捕而殺同一擬抵而情罪判然甚至持杖拒捕之姦夫反以謀故鬪殺分別擬議
是殺拒捕之姦夫反重於不拒捕之姦夫尤爲舛錯請將親屬殺姦非係登時者
悉擬罪人不拒捕而擅殺之律以鬪殺論定擬其有拒捕一依罪人拒捕之律科
斷下部議行尋授浙江學政三十四年四月疏言本年考取內閣中書部議於會

試薦卷及朝考未用人員內挑取但薦卷一項挑取字畫須憑墨卷其省分坐號榜發後不難查知恐易滋弊請於揭曉日主考房官出闈知貢舉及內監試等將薦卷查出墨卷逐一彌封用印即日奏派大臣閱取若干卷候朝考後挑選帶領引見欽定名數以次錄用詔如所請行五月因覆擬廣東民何長子姦汚幼女致母服毒身死一案率擬絞候部議降一級調用奉旨從寬留任十月命赴貴州同湖廣總督吳達善查審威靈州知州劉標虧帑一案巡撫良卿明知故縱授意彌補並與按察使高集交通散法又前任貴州巡撫方世儒糧道永泰曾婪索劉標賄賂各論罪如律三十五年閏五月維城將旋京復命適古州黨堆寨逆苗香要脅衆肆劫復偕吳達善及巡撫宮兆麟等往剿戮賊甚衆六月香要就擒諭部議敘三十七年丁父憂回籍維城工繪事所進畫冊多蒙御題是年維城卒諭曰原任刑部侍郎錢維城學問素裕才具亦優侍直內廷勤勞夙著今春以父憂回籍因宿疾未痊遽聞溘逝深爲軫惜著施恩加贈尙書銜應得卹典該部仍察例具奏尋賜祭葬如例諡文敏四十年恩授其子中銑爲內閣中書准其一體會試

清史列傳卷二十三終

清史列傳 卷二十四

大臣畫一傳檔正編二十一

任舉子承恩

任舉山西大同人雍正二年武進士六年揀發陝西以守備用七年署延綏鎮伯林堡守備尋調赴巴里坤軍營駐防應援有功十一年補寧夏鎮安定堡守備乾隆元年調寧夏鎮標營守備追敘前功紀錄二次三年署城守營都司六年實授七年遷固原提標左營遊擊十一年十一月署城守營參將十二月十八日中營卒童文耀賈世忠等借名索糧糾左右前中各營卒夜劫提督許仕盛右營卒張文才等內應奪南門入毀轅門柵攻署門未破舉聞譁卽單騎赴鼓樓掌號站隊賊懼退掠市舉馳追擊手刃賊十餘擒四十餘時所領僅五十人餘黨竄出南門分攻東西兩門舉急登東城奮擊西門亦經右營遊擊鐵保放槍驚散事定總督慶復以聞諭曰固原提標兵丁不法糾衆搶劫事起倉猝遊擊任舉單騎直前奮勇救護擒獲多人方得解散甚屬可嘉中軍參將馮天祿現在糾參所遺員缺卽

著任舉補授以旌勤勞十二年十月奉命馳驛赴金川軍營聽總督張廣泗調遣尋擢西鳳協副將舉至軍前卽同總兵許應虎副將高宗瑾參將買國良於十二月初九初十日設伏用礮攻色底賊碉連中二百餘礮圮一角守備孔如鱗斃賊番數十因礮力小不能毀碉將撤兵賊百餘突出遇伏敗匿二十三日五更撤營賊又蜂擁至遇伏殺二百餘始潰十三年正月廣泗以賊徑歧險分路進兵檄調固原提標兵二千令舉馳往帶領二月諭曰金川軍營諸將多係辦理瞻對之人庸懦欺蒙已成夙習今另用任舉等皆未從征瞻對無所掣肘自能鼓勵勇往廣泗亦奏言在川鎮將忠誠勇幹無出任舉右者現在令率漢土官兵三千四百餘徑登昔嶺奪賊碉卡據要害尋奏署重慶鎮總兵五月初七日舉同候補參將王愷自牛廠啟行至素可呢山大雪初八日開路過撤烏山駐昔嶺之東楚地遣兵五百據山梁奪碉十二日舉直抵昔嶺山梁據之山北二里許木岡孤峯壁立爲昔嶺一帶賊碉及納喇溝二處總路賊於隘口連數大卡並砌石城直官兵壘十三日晚舉潛發土兵八百順溝下督攻木岡卡賊登山救護舉於山梁連發十餘礮穿卡賊悉竄十五日黎明遙見昔嶺山下及卡撤右梁溝內煙起則前發土兵

已燬石達喇第四碉擒番衆二十餘擊斃十餘十五日密派官兵由山溝抄截山梁中腰卡是夜雨如注槍礮聲不絕我兵已登中峯奪山梁襲取木岡迤西中腰卡凡五擒斬無算又乘勝奪卡二舉隨遣兵千直抵昔嶺中峯據守十七日督攻木岡寨較中峯倍高峻我兵用鈎鏹槍矛刺斃賊番十餘烏槍斃賊甚衆時總兵哈攀龍一路兵馬被松林所阻不得進廣泗令攻納喇溝抄出昔嶺中峯之右與舉兵合攻昔嶺北攀龍與副將劉忠等至舉先於嶺上及嶺南對賊卡筭營既定隨用礮擊圮木岡大石城賊乘夜補葺我兵亦夜施槍礮不絕二十三日潛發土兵百五十攻卡漢兵百伏截石梁卡路令東峯官兵遙作撲攻勢至夜用礮上擊土兵蛇行躡木城用挨牌遮護多帶乾柴備焚適大雨火繩盡溼伏兵無援爲亂石所傷未克二十六日舉親抵昔嶺閱視營盤之左有得思東木達溝乃卡撒昔嶺兩路軍營糧路攸關爲碉阻同卡撒總統冶大雄於二十八日五更焚木達溝一帶賊碉舉至中峯調度圍得思東大碉三斷其水道用斧進斫賊滾巖遁得大碉一小碉二乘勢奪路踞木達碉六月初九日攻克昔嶺溝底石城水卡十三日同攀龍及副將唐開中參將買國良斫木步步爲營十四日分兵三路攀龍由石

面架梁堵禦開中國良由左溝穿林登攻木城舉等由中直撲石城十五日舉與開中攻石城東攀龍攻其南十六日黎明齊進石城堅甚我兵奮攻多斬獲忽賊三百餘自西南林內突出舉揮兵禦被創戰益力復爲槍中要害而卒攀龍入林捕賊斬三十餘收舉尸還經略大學士訥親疏奏時已奉旨實授舉重慶總兵諭曰署總兵任舉統兵進攻昔嶺石城身自督戰奮勇直前多所斬獲乘勝追殺致被槍傷陣亡伊前在參將任內值固原兵變以單騎手刃亂兵解散賊黨捍禦全城安撫百姓勞績已爲懋著故特擢用副將命往金川軍營領兵攻剿所向克敵現已補授總兵官深望凱旋之日錄功優敘以旌殊勳孰知伊感朕知遇奮勇捐軀深堪憫惻考之典禮以死勤事者祀之本朝特建昭忠祠用享疆場效命之臣任舉著入祠從祀所有卹典照提督例給予伊子亦照提督例給與廕襲又諭曰朕聞訥親另摺所奏任舉捐軀報國畢命疆場不禁爲之泣下在伊等忠憤激發固已甘之如飴而朕以小醜跳梁用良臣於危地思之殊堪憫惻雖經交部從優賜卹以慰忠魂而事後之慮彌切現在凡有進止更宜因時度勢鄭重籌辦不宜徒事奮往以厯朕懷閏七月兵部議卹加贈舉都督同知賜祭葬入祀昭忠祠諡

勇烈伊子二長承恩廕都司次承緒恩賞京營千總累遷巡捕營遊擊救中西市火被傷卒承恩於二十四年授三等待衛二十九年授福建陸路提標遊擊三十五年遷江南六安營參將四十年遷河標左營副將尋調漕標中軍四十四年遷山東兗州總兵四十八年調江南壽春鎮四十九年二月擢江南提督賜帶孔雀翎四月調福建陸路提督五十二年三月臺灣逆匪林爽文糾衆滋事承恩自請往剿與水師提督海澄公黃仕簡互相觀望不進命革職拏問來京治罪四月諭曰此次臺灣逆匪林爽文等糾衆滋事朕命黃仕簡帶兵剿捕任承恩亦奏請前往朕意卽以任承恩不應同赴臺灣亦恐水師非其所轄呼應不靈未免掣肘轉於剿捕無益但因任承恩業已登舟配渡多一人或可得一人之益是以未令轉回詎意二人抵臺灣後並不親臨行陣定期會攻一南一北互相觀望果不出朕所料以致賊匪蔓延迄今未能撲滅其玩延貽誤厥罪維均卽或黃仕簡因年老患病不能親身帶兵及任承恩到彼後不能零星堵禦抑或賊匪衆多兵力實不敷剿捕之處伊二人早應隨時據實直陳候朕指示籌辦乃伊等並無一字奏及是其種種貽誤實無可置喙而黃仕簡係水師提督臺灣乃其專轄現在剿捕

事宜又經朕特交督辦乃安坐郡城漫無籌畫伊尙如此畏蕙因循更無怪任承恩之意存推諉其罪視任承恩尤重任承恩既經革職拏問黃仕簡亦難寬宥昨已降旨將黃仕簡撤回內地伊到廈門時著李侍堯卽傳旨將伊一併革職拏交刑部治罪若論黃仕簡任承恩貽誤緊要軍務之罪均應按律卽行正法朕辦理軍務賞罰必信而於畏蕙退縮者尤必重加懲治故能紀律嚴明將士用命所向克捷底績成功今黃仕簡任承恩誑怯貽誤若在他入必當正法但念黃仕簡年老又係病後且伊從前辦事尙屬黽勉受恩最久所有公爵係伊祖所立功績自應承襲卽照黃仕簡從前原奏令伊長孫黃嘉謨承襲至任承恩係任舉之子任舉前在金川出兵時打仗受傷陣亡其次子又以巡捕營遊擊因救火受傷身故亦無子承恩現無子嗣若將承恩正法是任舉臨陣捐軀竟至絕嗣朕心實有所不忍黃仕簡任承恩到部時自當照定擬具奏然均可加恩貸其一死嗣承恩到部擬罪如律十一月特恩免其勾決五十二年二月諭曰前年臺灣逆匪滋事任承恩年力強壯非黃仕簡可比且伊自行陳請前往臺灣剿捕逆匪更當加倍奮勉力圖自效乃亦安坐鹿仔港與黃仕簡互相觀望並不臨陣奮勇殺賊律以逗

遛之罪應按律正法但念任承恩之父任舉前在金川出兵陣亡伊弟承緒又因在京營供職救火傷斃無子皆屬歿於王事任承恩又現無子嗣若卽行正法使捐軀效命之臣竟至絕嗣朕心亦有不忍設使任承恩尙有子孫承祀斷不寬貸上年朝審勾到並經格外加恩免其一死但若仍令永禁囹圄則伊父任舉終不能後殊非朕軫念勞臣之意現在臺灣已屆歲事著加恩釋放但伊身獲重罪經朕曲加恩宥全其軀命若仍靦顏安居輦轂之地有何面目對人著勒回原籍閉戶思過以示法外施仁至意五十五年十月因恭祝經壇兵部帶領引見奉旨以巡捕營參將用

温福

温福費莫氏滿洲鑲紅旗人繙譯舉人雍正六年補兵部筆帖式九年派往北路軍營辦事十二月撤兵回京乾隆五年遷兵部主事八年遷員外郎在軍機處行走十年遷吏部郎中十一年六月調戶部銀庫郎中十二月擢湖南布政使十四年調貴州布政使十九年辦理平遠州民陳新序鬩堂案草率完結奉旨革職自備資斧於烏里雅蘇臺辦理糧餉效力贖罪二十三年三月命署內閣侍讀學士

赴定邊將軍營辦事四月實授時將軍兆惠統兵至庫隴葵山有宰桑恩克圖等率二百餘戶據山險我兵乘霧夜擊之溫福同副將高天喜攜大礮登山奮擊賊俱斃十月隨大兵剿賊葉爾羌二十四年奉諭據將軍兆惠等奏稱侍讀學士溫福打仗手受槍傷顴骨受鳥槍擦傷且於諸處奮勉效力溫福著加恩補授內閣學士是年回部平奉旨議敘軍功加六級二十五年回京授鑲紅旗漢軍副都統二十六年授倉場侍郎二十七年特賞給世襲雲騎尉三十四年授福建巡撫三十五年五月授吏部侍郎在軍機處行走七月授理藩院尙書尋署工部尙書八月兼正黃旗蒙古都統三十六年八月奉旨授副將軍統兵剿金川時大兵分三路進溫福率兵二千餘由瓦寺之巴朗拉提督董天弼由甲金達援達木巴宗總督阿爾泰由約咱攻僧格桑十一月奏言阿爾泰董天弼於六月間一聞金川據革布什咱小金川圍鄂克什之信卽分西南兩路夾擊尙非失計而董天弼忽改由木坪是以明正侵地雖經克復而賊酋得悉衆固守約咱以拒我兵且西路兵經董天弼帶往木坪之外見在福昌處祇留千餘分守各隘餘兵無幾以致不能進攻臣思此事辦理之始所以兼從南路進者原因金川據革布什咱是以就已

到官兵於此進剿然道遠本非正路當以西路爲正兵且此路原係從前剿金川之地其小金川巢穴卽各營駐兵之所今南路自章谷進攻而西路自北直進取其中堅前後夾攻使賊腹背受敵不難殄滅以臣愚見南路見集兵八九千名已不爲少木坪一路雖再添兵亦屬無益查西路由汶川出口除山神溝巴朗拉之外自必尙有可進之路奮力夾攻似可得力奏入諭獎所見已得要領竚候捷音尋諭軍機大臣曰辦理小金川一事溫福以西路與賊巢最近欲於西路進攻自爲扼要之見但形勢亦不可不爲審度賊匪所以拒守巴朗拉者原因攻圍鄂克什遂於要隘設築碉卡扼我援兵賊旣倚爲負隅之勢卽幸藉大礮力攻破一碉賊卽乘其殘壘復築勢豈能層層攻擊若於用礮之外令士卒輕冒矢石儻稍有挫損更不成事體此時南路旣有重兵西路復添兵力僧格桑自必守西路不暇他計朕意總以爲攻取要策必當避其碉卡越道而進使賊人失其憑恃官兵得以乘間擣虛方爲制勝之道著溫福悉心籌辦是月授武英殿大學士復諭曰溫福見已馳至巴朗拉扼其要害但其地山嶺險峻並與賊巢相近碉卡又多該處所有川兵不及二千且漢兵士練遇事俱不足仗萬一稍有退阻僅存溫福所帶

之滿兵二百名其勢未免單弱溫福前奏至彼察看事機如刻難少待卽就見有之兵奮力前進但亦不可不詳審形勢明於彼此進退之機方可進攻若銳意深入兵力不充賊人旣無所畏懼且恐約咱甲金達兩路同時會剿更不足以壯聲援溫福務當善體朕心加意慎重董天弼兩路惟恐其懈於急攻溫福一路則惟恐銳於輕進屢念相同而於溫福尤甚十二月奏攻巴朗拉賊抗拒情形得旨溫福等帶領官兵攻打巴朗拉礮卡殺賊頗多殊屬實心任事情其時兵數無多而綠營士卒又皆懦弱不克成功溫福何罪之有仍著交部議敘又偕參贊伍岱等攻巴朗拉三晝夜殲賊數百生擒十二破大礮六小礮二得旨溫福等以滿洲官兵在前綠營官兵在後晝夜攻打甚屬奮勉實堪嘉予以此聲勢賊人自必膽落不日卽可集勦溫福著賞給小荷包二對三十七年正月取達木巴宗撥兵分據南北山最高處所得石礮悉焚之復分兵由別斯滿瑪爾瓦爾濟兩路夾擊大軍由中路進攻至斯底葉安賊寨獲礮卡百餘殲賊二三百上嘉之三月奏攻克資哩賊寨阿克木雅六月奏克東瑪賊寨七月奏攻得固卜濟山梁礮卡十月奏攻得路頂宗及喀木色爾大小卡寨五十餘礮房三百餘十一月奏據博爾根山梁

並攻得瑪覺烏寨落上以簇拉角克那拉覺等處賊碉林立與我兵後路相通者甚多溫福等宜善爲防範又奏攻得達克蘇山寨碉卡並附近明郭宗一帶山梁山溝及沿路碉卡移駐大營偵道以圖直攻美諾十二月奏攻得公雅山皆有旨議敘是月授定邊將軍旋奏攻得明郭宗諭曰溫福督兵進剿攻克賊巢緊要門戶從此直擣美諾自可迅奏膚功溫福著交部議敘又以由帛噶爾角克攻得布朗郭宗復進克底木達擒僧格桑之父澤旺解京得旨交部從優議敘三十七年二月劾額駙色布騰巴勒珠爾徇參贊伍岱等款詔革伍岱職遣戍伊犁色布騰巴勒珠爾坐削爵三十八年二月奏攻得功噶爾拉等處三月奏攻得昔嶺碉卡嗣因冰雪深厚屢攻未能前進移營木果木分兵守隘口賊占大營後路劫礮局六月溫福率衆禦之中槍陣亡先是溫福奏參侍衛烏什哈達等私離汛地上慮其輕躁僨事諭曰伊等不遵將軍號令固不得謂之無罪但溫福卽劾烏什哈達亦覺過當烏什哈達理應看守所占之地遣兵寄信溫福不應將信帶回此其罪也但烏什哈達亦曾攻碉奪卡今棄山岡而能復行占據亦可以抵罪溫福平時口吃在朕前奏事尙不達其意性又頗露急躁官兵不知其如此必謂將軍性

躁兵衆難堪又因不能卽克地方心中煩躁不論地險雪深一味催迫官兵如此辦理恐失軍心不可不戒也至是果失事奉旨溫福倉猝遇變臨陣捐軀著賞一等伯爵世襲罔替入祀昭忠祠並賞銀二千兩治喪其應得卹典仍著該部察例具奏伊子永保著卽承襲伯爵七月復諭曰前聞溫福在木果木軍營遇變捐軀賞給一等伯爵嗣據劉秉恬奏初九日未時忽有客民二三千並匠役人等奔赴登春詢稱木果木礮局已被賊人搶劫大營四門關閉客民無所依倚因各散回初十日賊番悉衆擁至斷絕大營四門水道緣營兵潰散遂至失事等語是溫福軍營民散在前兵潰在後實係溫福不能先事豫防所致營中礮火係三軍之命若聞賊繞布朗郭宗之信早派精兵嚴守後路防護礮局何至爲賊搶劫而客民匠役數千亦當收之營內爲彼護持卽備人數以壯軍威亦無不可斷無堅閉營門聽其散去之理旣示賊番以弱且至搖惑軍心則溫福之倉皇失算其死皆由自取今復據海蘭察富勒渾等查奏溫福軍營陣亡文武大小各員多至數十而將弁兵丁之未出者三千餘人此皆溫福乖方失事以致折將損兵使其身尙在卽當立正典刑以申軍紀豈可復膺五等之封所有賞給伯爵著銷去但念其究

係陣亡仍著交部照例議卹其應得何世職卽令伊子永保承襲旋部議給騎都尉兼一雲騎尉與原有之雲騎尉應歸併爲三等輕車都尉四十一年三月撤銷子勒保歷官至大學士以功封威勤伯永保官至兩廣總督

董天弼

董天弼順天大興人由武進士授四川提標前營守備乾隆十三年遷馬邊營都司隨征瞻對金川有功十七年遷峩邊營游擊二十二年遷提標中軍參將二十四年授維州副將三十年金川土舍郎卡與丹壩構兵天弼偕游擊宋元俊往勸郎卡乞還所掠人口退卡角圻毀穆爾津岡碉卡事平十月遷松潘鎮總兵三十年擢提督三十四年郭羅克賊番阿玉楚扣等途劫喇嘛諾彥綽爾濟槍傷三人上命天弼查辦尋以未獲要犯苟且息事申諭之三十五年四月小金川土司澤旺逆子僧格桑乘隙攻鄂克什土司色達克拉圍官寨八月天弼赴達木巴宗飭小金川與鄂克什息兵僧格桑退墨穆爾吉日古魯地方色達克拉以官寨糧盡求徙達木巴宗天弼與總督阿爾泰議留把總一兵二十及土練四百分駐之三十六年六月逆賊僧格桑復圍鄂克什之達木巴宗木耳宗資糧並據瓦寺巴

朗拉天弼由打箭鑪馳赴西路調省標及松維等營官兵備剿七月天弼抵眠龍岡賊已據巴朗拉築碉卡爲久守計且斷我兵進剿路上以天弼遷延坐待意存推諉申諭之八月阿爾泰造皮船渡河天弼議襲山神溝以解鄂克什圍且言木坪之甲金達雜谷之曾頭溝可分兵進尋由山神溝至德爾密克石碉七斬賊數十餘赴嶺竄並據畢旺拉天弼遣土練四百駐畢旺拉賊乘霧雨來犯守碉土兵驚潰失所得碉卡天弼疏請治罪諭曰董天弼所請交部治罪之處且可不必得失乃行兵之常董天弼前此進兵尙屬勇往此時帶兵本少不敷調撥阿爾泰又不早爲籌撥接應以至於此且看如何奮勉以定功罪再不努力則獲罪滋重矣董天弼於番地情形稍爲諳悉著馳往阿爾泰軍營會商進剿時天弼以德爾密畢旺拉已失達木巴宗被困久帶兵五百由木坪之堯磧順山而下並咨阿爾泰派漢土官兵二千隨剿諭曰此行頗勇往看汝如何以功抵罪十一月攻甲金達對面山梁克碉卡二天弼以鄂克什牛廠爲賊來路分兵殲守廠賊二十餘遂據之乘勝上下攻擊賊潰遁木坪鄂克什及三土司交界要隘皆爲官兵所獲未幾賊復襲奪牛廠上以天弼深染綠營惡習諭曰董天弼在甲金達山梁逗遛不進

牛廠得而復失前在德爾密時得卡不能固守及由山神溝木坪堯磧紆繞程途致賊酋得以處處預爲準備是小金川之事始終由阿爾泰董天弼貽誤所致今阿爾泰已經革職董天弼厥罪維均董天弼調度乖方終無可辭已有旨將董天弼革去提督留於軍營常兵如再退縮玩誤卽在軍營正法尋命拏解成都監禁十二月天弼改由蒲松岡小路進攻抵達木巴宗賊由對河南山突犯我兵擊敗之鄂克什土司得出遂克木耳宗諭曰董天弼自辦小金川以來屢次失機且敢捏詞諱飾其罪實無可道是以前有旨將伊革去提督以兵丁留於軍營效力贖罪如尙不知悛改卽拏解成都監禁請旨辦理今伊於十五日攻解達木巴宗之圍並收復鄂克什各寨克木耳宗等語此次官兵奮勉必係常保住帶領滿洲兵丁鼓勇直前因而緣營知所觀法是以稍有起色但董天弼究係在事出力朕不肯竟置之不論已傳諭溫福等宥其一死仍留軍營效力贖罪尋提督阿桂奏天弼於軍營事務尙屬經練請代總兵和邦額管理火藥軍械三十七年二月將軍溫福偕阿桂克資哩飭天弼率兵五百駐舊營四月起補副將五月總辦資哩臥龍岡防範督催事尋擢總兵命統兵赴曾頭溝天弼由曾頭溝至梭磨官寨梭磨

土婦請以兵一千援剿八月賞戴孔雀翎九月天弼領兵至堪卓溝上命鄂寶催
饋糧運天弼遂由納雲達入賊境五十餘里賊築石卡拒官兵奮勇剿殺遂據登
格山梁復由郭噶爾抵咱嗎山梁攻穆陽岡木丫山梁克石卡三十餘木城三殺
賊百餘上以天弼奮勇攻剿甚屬可嘉下部議敘十二月奏報攻克大板昭木丫
寨獲卡十六大礮三十六因言如意壩北曰喀爾薩爾應分兵防範疏入諭曰董
天弼奏攻克大板昭木丫寨等處情形若於溫福至布朗郭宗之前督兵攻破賊
寨自當優敘勞績乃溫福於初十日晚攻克布朗郭宗十一日早攻克底木達擒
獲澤旺而董天弼所奏攻克大板昭等寨則係十一十二兩日此乃賊衆聞知大
兵已得布朗郭宗等處勢難復拒因而畏罪逃竄董天弼不過得其空寨而摺內
尙鋪張派兵剿擊欲居克獲之功總由沾染綠營惡習務爲粉飾言之能無汗顏
朕於軍營功過悉皆核實豈爲此等虛詞所惑惟所稱誘賊出卡土兵堵截卡門
賊不能退驚惶被戮等語此等土兵尙屬出力著溫福等查明量加獎賞又據奏
如意壩北地名喀爾薩爾亦爲通金川要路且係我兵後路現在分據布置防範
等語此事甚有關係昨溫福奏董天弼駐守布朗郭宗已如所請並諭劉秉恬駐

美諾率同經理著溫福傳諭董天弼務須實心妥辦勿再稍萌虛僞故智以致貽誤干咎尋授領隊大臣三十八年正月仍命爲四川提督二月諭天弼帶兵七百駐丹壩天弼偕總督劉秉恬合疏言布朗郭宗一帶美隊溝曾頭溝瑪爾璫大板昭喀爾薩爾路通金川西南簇拉角克溝尤爲接壤除將溫福所留官兵分駐各隘外梭磨至丹壩七八站丹壩至綽斯甲布軍營又五六站賊匪潛行請添調川兵一千六百以一千赴美諾分撥布朗郭宗等處以六百赴丹壩分派要地防護糧餉上從之三月上以總兵五福赴丹壩命天弼駐布朗郭宗六月天弼退居美諾小營賊乘虛夜襲底木達布朗郭宗等處皆失守諭曰昨據阿桂奏劉秉恬初二日來札稱昨夜三更賊襲底木達等處董提督現往官寨未知下落可見董天弼毫無準備遂爾乘勢滋擾今復據劉秉恬奏該處被賊竟由董天弼不在官寨駐守嚴防另立小營以致賊人窺覘空虛乘夜肆其搶占董天弼之怯懦玩誤實爲罪不容誅昨已降旨將伊革職拏問據報現在不知下落卽或事急自戕或竟爲賊所害亦屬死有餘辜其子並應查拏交部治罪所有原籍及任所資財從前曾加恩賞還者仍著嚴行查抄以示懲儆八月劉秉恬疏報天弼失事時夜由小

營馳守底木達礮寨途遇賊右脅中槍死下部知之子聯毅乾隆三十五年舉人以天弼駐守貽誤發往伊犁效力年滿四十六年恩賞內閣中書五十五年任淮安府同知卒

哈國興

哈國興直隸河間人父攀龍官貴州提督國興由乾隆十七年武進士授三等侍衛二十年發往雲南以遊擊用二十三年補督標右營遊擊二十八年遷東川營參將三十一年緬甸匪目召散等據孟良肆擾國興由大猛養分剿尋會擊賊於楞木進攻猛卯身督戰被槍傷齒及右臂總督楊應琚以聞賜戴孔雀翎三十二年正月署騰越營副將時副將趙宏榜以偏師失利於新街四月國興率兵抵蠻暮偵新街賊無備馳擊之賊望風遁十一月隨將軍公明瑞攻克木邦復偕侍衛莽克察等擊斬守隘賊六十餘十二月擢楚姚鎮總兵三十三年五月陞見命在乾清門行走賚銀幣九月還軍營調普洱鎮總兵十月擢貴州提督留軍營三十四年四月赴銅壁關外野人山督造戰船十二月諭曰哈國興自進剿緬匪以來甚屬勇往出力今在老官屯辦理軍營諸事尤爲妥協且伊於邊務夷情素所熟

悉令其整理滇省營務於地方更覺有益著調補雲南提督並加太子少保銜以示獎勵三十五年四月諭來京陛見先是大軍之圍老官屯也緬甸頭人諾爾塔以其酋懜駁命遣人叩軍營乞降經略傅恆副將軍伊勒圖阿桂令國興出見諭遵三事一奉表貢一不敢再犯邊一送還內地人緬甸誓如約乃請旨撤兵至是我兵既撤緬甸貢表弗至且留我持檄往諭之都司蘇爾相而諾爾塔復詭言國興曾許給還木邦猛拱蠻暮三土司六月國興至京命不必在乾清門行走諭曰哈國興昨歲在老官屯於緬匪遣人投誠時自不免存遷就完事之見至諾爾塔所稱哈國興許給土司一節詢之哈國興堅稱並無其語在賊匪一面狡詞固難執以坐哈國興之罪而哈國興所稱並未許其給還處現在無可質對亦難深信其有無伊於綠營粉飾積習未能悛改若仍令回滇辦事於邊防要務無益但念其屢次領兵打仗頗屬奮勉尙不至竟予罷斥現在貴州古州鎮總兵余天佐尙未到任其員缺卽著哈國興降補以觀後效九月副將軍阿桂奏請冬間派兵襲擊緬甸上念國興在滇年久熟悉邊情命仍赴雲南軍營三十六年五月諭曰哈國興之弟國泰現任雲南千總著加恩令其來京以巡捕三營千總用俾得就近

養親尋調國興雲南臨元鎮總兵三十七年五月諭曰哈國興在滇現無緊要事
件此時官兵進討小金川正需大員統率著哈國興馳赴溫福軍營六月授西安
提督轄陝甘從征兵尋命偕總兵董天弼由曾頭溝一路徑取底木達布朗郭宗
溫福等奏言國興熟於帶兵請令別由策卜丹徑取美諾其曾頭溝一路專委天
弼七月又奏國興由阿喀木雅山溝遠出瑪爾迪克山寨詳察形勢以策卜丹林
深徑狹不便取道臣等已令率兵二千往助海蘭察攻瑪爾迪克詔可會貢噶山
左有賊千餘謀劫糧國興等馳往擊賊敗匿甫旋瑪爾迪克林內賊突出復擊敗
之諭獎其歷練戎行隨機救應賞荷包四八月設伏於貢噶山梁斬賊百餘並搜
箐奪其碉卡九月賊叩國興營請降且獻鄂克什地國興飭令將南北兩山美美
卡木蘭壩及瑪爾迪克並獻出始許其降越日賊果盡撤各柵國興以兵入鄂克
什舊寨賊退守路頂宗十月金川逆酋索諾木稟送前隨參將薛琮進剿被留之
外委臧儒等至國興營且言勸僧格桑出降溫福以聞諭曰索諾木所投哈國興
稟帖尙欲貌託恭順陰逞奸狡不宜竟付之不答竟當作哈國興之意給與回檄
諭以索諾木與僧格桑狼狽爲奸拒守要隘抗拒官兵迹已顯著何得佯爲恭順

冀圖朦惑況墨壘溝未出官兵甚多豈容以一外委遂謂送出官人妄思寬宥大兵聲罪致討必須先擒僧格桑次擒索諾木以申國憲而靖邊庭僧格桑即逃至金川自可剋日就擒無藉索諾木之獻出且索諾木即爲法所必誅又何能代人施此詭譎本提督奉命隨征惟知奮勇殺賊力縛凶渠斷不能爲賊誑言所惑俾賊酋知狡惡罪狀不能掩飾尋諭將薛琮等前在甲爾木山梁撲礮被金川截斷後路各罪增入檄文時國興同海蘭察等以兵五千駐貢噶山謀攻策卜丹因冰雪未進命撤還路頂宗協剿路頂宗山麓有巨溝溝之源爲南山於是海蘭察繞出山後侍衛額森特由小路徑接應而國興直越溝攻礮大軍繼進遂克路頂宗及喀木色爾寨先後破卡五十餘座礮三百餘間俘獲甚衆諭獎國興等奮勉出力下部議敘十一月由喀木色爾北山攻穆拉斯郭大寨進據兜烏山巔與總兵馬彪等合兵進奪附近礮卡尋克額爾莽木柵又率兵千渡河由南山鄂爾濟仰攻奪各寨隨大軍進剿明郭宗別以兵襲擊公雅山克之復克木爾古魯賊寨並奪據嘉巴山麓下部議敘十二月廷議於平定小金川後分兵三路討金川諭曰哈國興雖係綠營漢員於領兵進剿之事曾經練習且原在乾清門侍衛上行走

與滿洲大臣無異副將軍豐昇額一路卽著哈國興爲參贊大臣將來或止須兩路則豐昇額哈國興等卽隨將軍溫福軍營以備臨時分兵之用是月隨大軍克明郭宗焚其念經樓整兵進取日果爾烏谷山麓直壓美諾賊巢諭部優敘又諭曰哈國興之子哈文虎兵部帶領引見現已加恩用爲守備發往四川可傳諭哈國興著其益加感奮國興尋隨大軍攻克布朗郭宗僧格桑遁金川我軍直抵底木達僧格桑之父策旺出降小金川底定國興病卒諭曰哈國興自前歲征剿緬匪以來頗屬勇壯上年調遣四川西路軍營擢任提督帶兵攻剿疊著勞績是以加恩授爲參贊大臣並將伊子用爲守備現在小金川蕩平正值進剿金川需人之際倚任方殷遽聞溘逝深爲軫惜著賞銀一千兩存卹其家並加贈太子太保以示憫勞飾終至意應得卹典該部仍察例具奏尋賜祭葬如例諡壯武入祀昭忠祠命圖形紫光閣御製贊曰中土回人性多拳勇哈其大族每出將種向略趨拉屢舉險要中道病殂成功未告子文虎由父廕恩授守備赴四川軍營補陝西提標右營守備三十八年木果木陣亡入祀昭忠祠恩賜其弟文彪爲千總

莊存與

莊存與江蘇武進人乾隆十年一甲二名進士授編修十三年五月散館考列二等諭曰歷科進士殿試一甲第一名卽授爲修撰二名三名卽授爲編修至散館時並無所更易伊等恃已授職遂自甘怠忽學業轉荒卽如今年散館修撰錢維城考列清書三等編修莊存與考列漢書二等之末其不留心學問已可槩見但錢維城係派習清書或尙非其所素習著再試以漢書候朕閱定莊存與不准授爲編修俟引見時朕酌量其人才或以部屬或以知縣或歸班選用則此後一甲之人皆有所警惕而專心學問矣若有仍考列三等者其例視此十六年五月引見仍授編修是年恭逢孝聖憲皇后六旬聖壽慶典特開鄉會恩科命於次年春舉行鄉試十二月充湖北鄉試副考官十七年六月大考二等升侍講尋入直南書房十八年六月擢翰林院侍讀學士充湖北鄉試正考官九月提督湖南學政二十年四月遷少詹事六月擢內閣學士兼禮部侍郎二十一年充浙江鄉試正考官九月提督直隸學政二十二年奏直隸冒籍生員自首改正每學多至五六名少者十五六名尙有未經查出者恐此後有將本身入學姓名令兄弟子姪頂替甚或竇與各省童生頂名呈首或本人自首於北而他人頂替於南若但據

自首改回弊恐不少請將冒籍各生暫停南北歲科兩試定限一年著落本身自首卽據所首姓名三代籍貫一面咨禮部存案一面行該省取具父師親族鄰里切實甘結地方官加具印結方准咨回該省學政入冊如查有假冒頂替照例辦理首明雖限一年咨查需日己卯鄉試應停收考錄送下部議行二十三年二月存與考試滿洲蒙古童生因不能傳遞各童生擁擠鬧堂經御史湯世昌奏參命革存與職尋諭曰莊存與於考試童生鬧場一案既不能奏參於前及朕面召詢問又不據實陳奏是以將伊革職但各童生喧鬧究因該學政辦理尙屬嚴密不能傳遞之故今旣審明情節而該學政竟因此罷黜殊非懲創惡習之意莊存與著帶革職仍留內閣學士之任又諭曰朕以滿洲蒙古童生皆世受參養之人乃不知遵奉教約恣效外省惡習此於八旗風俗大有關係不可不嚴行根究乃派出查審之大臣等於案內情事並未嚴行窮究而議罪之處又不允當所審皆旗人故不能不掣肘而朕豈肯一任其意存瞻徇而顛預了事耶當經親臨覆試隨獲挾帶如許之多因復親加鞠訊務得實情而童生海成係包攬傳遞首先倡議鬧場之犯一聞覆試輒將鬧場時帶出之卷倩人補作捏飾投遞希圖狡脫已屬

刁頑至在場放鴿傳遞包攬受賄各情業經羅保等供證確鑿乃於朕前又復挾
讎誣陷和安肆其狡獪抗不吐實及加嚴訊而狂悖無禮竟有何不殺之之語滿
洲世僕中有如此敗類斷不可留矣因降旨將伊正法其附和鬧場之羅保和安
卽得奚訥並搜出懷挾又復強辯之訥拉善俱發往拉林種地至隨從鬧場及夾
帶草藁字片之烏爾希蘇等四十人本應如議發遣但既經訓責示懲俱從寬令
其在旗披甲永遠不准考試滿學教授旺衍係專管伊等之人臨時已不能約束
而大臣等詢問伊尙模稜含糊不肯吐實著發往熱河披甲此次莊存與所錄尙
屬秉公而交卷之人非鬧場之人可知著加恩仍准作生員尋奏請酌減各直省
鄉試官卷中額諭曰前據莊存與條奏各直省鄉試官卷應酌減中額一摺隨經
蔣溥奏請將官卷裁去一併歸入民卷均交大學士九卿議奏矣朕昨敬閱聖祖
仁皇帝實錄內載上諭令大臣子弟另編字號考試取中旣已肅清弊端又不致
有妨孤寒進取恭覽之下仰見皇祖慎重科名嘉惠士子立法之始本爲防弊而
彼時諸臣奉行不無偏袒子姓親族之見含糊具奏分定中額未便過多遂使
以憐卹寒峻之意轉成僥倖摺紳之路揆之情理實未允協此議減議裁者所由

來也朕思中額貴有限制而立法務在均平嗣後各直省鄉試官卷於見在中額斟酌公當大省二十名取中一名中省十五名取中一名如此辦理則官卷既免濫取之弊亦不致有妨孤寒不必去官卷之名而於制科取士兼收並採之道庶爲平允其如何酌量妥辦無致偏枯並著大學士九卿詳議具奏旋議定直隸江南浙江江西福建湖廣等大省官生二十名取中一名三十一名取中二名山東河南山西廣東等中省十五名取中一名二十三名取中二名廣西雲南貴州等小省十名取中一名十六名取中二名順天鄉試滿洲蒙古漢軍照小省取中南北貢監照中省取中不及額者歸民卷從之又奏磨勘舊例內筆誤二三字停會試一科與字句偶疵不妨寬貸一條前後互異請嗣後字句疵謬罰停會試一科筆誤無關弊竇者免議又奏場內經題向例同考官先擬考官書籤掣用請嗣後令考官自擬以杜同考官代士子豫擬經題之弊均如所議行四月擢禮部右侍郎二十四年四月奏各省優生赴京朝考請照考試續後拔貢不拘人數之例一體辦理從之閏六月丁父憂二十七年正月服闋補內閣學士三十三年命在上書房行走三十六年三月充會試副考官六月充浙江鄉試正考官三十七年命

教習庶吉士三十八年仍補禮部右侍郎三十九年提督山東學政尋調河南學政四十一年丁母憂四十三年服闋四十四年六月署禮部左侍郎十月補禮部右侍郎四十九年二月轉禮部左侍郎五十年八月命偕禮部尙書德保重輯律呂正義五十一年正月上以存與年力就衰予原品休致五十三年十月卒

張泰開

張泰開江蘇金匱人乾隆五年授內閣中書七年進士改庶吉士九年命在尙書房行走十年散館授編修十一月遷中允十二月遷侍讀十一年充日講起居注官十二年正月遷都察院左僉都御史十一月授內閣學士十四年授禮部侍郎十五年提督順天學政十六年調工部侍郎仍留學政任十八年九月調禮部侍郎十月在尙書房行走十九年二月國子監學錄缺員吏部九卿所保舉人引見上以泰開所保之鄒志伊係同部侍郎鄒一桂之子顯有瞻徇同官情弊交部嚴議革職四月特旨給編修銜在尙書房行走二十年三月上閱胡中藻堅磨生詩鈔悖逆泰開重師門罔顧大義爲之作序出貲刊刻命革職部議罪如律諭曰張泰開本一庸懦無能之人其出貲刊刻由被勒索序文又係胡中藻自搆張泰開

著從寬免其治罪卽行釋放仍在尙書房行走效力贖罪九月授編修二十一年十月詔免泰開從前罰俸二十二年七月充日講起居注官十月授通政使命爲尙書房總師傅二十三年十二月授左副都御史二十五年三月充會試副考官二十六年五月提督順天學政十一月授刑部侍郎二十七年四月調禮部侍郎十一月奏言宣化府向係科歲並試邊方文風樸陋士子試後卽各營別業三年再考始理舊業文理荒疏學臣歲試甫竣復接科試竭力搜羅難於足額請二年兩次分考勤加訓勵文風士習均有裨益下部議行二十八年授左都御史二十九年十二月充經筵講官三十一年正月擢禮部尙書命在紫禁城內騎馬三十二年四月命以禮部尙書專管左都御史事五月實授左都御史三十三年六月以老病乞休諭曰張泰開在尙書房行走有年頗著勤慎茲年踰八秩因病乞休著加恩賞給太子少傅禮部尙書銜准其休致回籍御製詩餞之曰年過懸車又一旬南旋嘉與錫恩綸飄蕭白髮三千丈啓迪青宮二十春安得蘇仙授梅橘眞成疏傅理歸輪梁溪水是還鄉水愈疾應知速倍神三十九年九月以疾卒賜祭葬如例諡文恪

德保

德保索綽絡氏內務府滿洲正白旗人曾祖都圖任六庫郎中署總管內務府大臣聖祖仁皇帝賜姓石德保乾隆二年進士改庶吉士散館授檢討九年十月充順天鄉試副考官十一月充日講起居注官十年五月入直南書房三月充會試同考官十一年擢侍講十二年充山東鄉試正考官提督山西學政十三年轉侍讀十四年條奏學政事宜一永濟鳳臺俱大學祁縣交城清源浮山黎城陵川萬泉餘社武鄉樂平俱中學均訓導一員潞城寧鄉懷仁山陰靈邱廣靈馬邑俱小學皆訓導教諭二員請永濟鳳臺添設教諭一員祁縣交城清源浮山黎城陵川萬泉餘社武鄉樂平訓導俱改爲教諭一員潞城寧鄉懷仁山陰靈邱廣靈馬邑祇留訓導一員其教諭七員裁一士子最重經學請於歲科正考日除誦習御纂諸經者另期摘條發問外仍摘本經一段開明起止令各生童默寫卷末錯落多者生員不准前列童生不准入泮一四等生員錄遺與五等青生一例對讀下部議行十五年六月遷右庶子八月調山東學政十一月擢翰林院侍講學士尋升內閣學士十七年遷工部侍郎兼總管內務府大臣仍直南書房十八年九月上

以德保射箭生疏命革去侍郎專在內務府總管行走十月諭不必在南書房行走二十六年授正黃旗漢軍副都統十月充經筵講官十一月授吏部侍郎二十七年奏從前旗人崇尚樸實不事奢靡遇奉差隨圍爭先恐後衣服食用皆知撙節今凡有派差隨圍出兵人員俱蒙賞給官馬幫貼銀兩仍不免窘迫者皆因不顧生計鮮衣美食妄行糜費訪得八旗當差人等前往正陽門外戲園酒館以數月之用度供一時之糜費於風俗人心大有關係昔世宗憲皇帝因八旗漸改舊習不守本分曾經嚴加懲創皇上軫念旗員不令在前三門外居住實恐習染奢靡先事防閑至意但因循日久不免仍蹈故轍請嗣後仍照舊例交八旗大臣步軍統領衙門不時稽察違者官員參處兵丁責革再查八旗官兵服式前經世宗憲皇帝定有章程今罔知舊制服飾越分請交禮部將前定章程刷印傳示俾各按品級服用得旨如所請行二十八年三月充會試副考官五月教習庶吉士三十年管理國子監事充江西鄉試正考官提督順天學政十月奏江西大省向分十四房易四書三詩五春秋禮記各一除書春秋禮記卷數不甚相遠毋庸更改外惟易一千七百餘卷而詩經五房每房分校九百餘卷多寡懸殊請易經裁去

一房添入詩經則多寡適均校閱較易從之三十二年丁母憂百日期滿補吏部侍郎仍兼管內務府大臣正黃旗漢軍副都統三十四年調鑲黃旗滿洲副都統三月充會試副考官十一月兼翰林院掌院學士管理盛京官學生事十二月授廣東巡撫三十六年二月兼署兩廣總督九月奏軍械必須堅利適用未便任滋朽壞查粵東西兩省鎮協刀皆純鐵無鋼槍杆用沙木圍圓不過一寸卽通飭另製各營軍裝册內另有盈餘一項零星破壞存留日久竟同棄置甚至移抵作新希圖侵冒見令將冗設朽壞者分別銷燬變價儻清理後混請另製卽參處著賠上嘉之三十七年二月奏各州縣徵收田房契稅統限奏銷前解司遲延將各州縣罰俸一年府州罰俸六個月勒限解足侵虧照例治罪追賠直隸州應解契稅逾限不解照州縣例參處道員照知府例查參下部議行五月奏同知直隸州推升知府因不勝府缺仍留原任同知有督捕水利之責分防要地者與州縣無異至直隸州知州身膺民社兼轄屬員設怠惰自甘公務必曠請嗣後三年限滿遞加考察曠職者勒令休致上是其言三十八年二月奏原設槳船十粵東內河營汛次已極周密兼有左翼鎮屬槳船不時巡緝撫標槳船例止每季輪派守備一

員千總三員分巡各帶兵三十名坐駕槳船與鎮營各船互相聲應四隻儘足敷用餘皆有名無實應裁下部議行九月奏本年湖廣督臣陳輝祖咨會撥解川餉於七月十六日限行六百里發遞八月二十四日始到遲至三十餘日緣向來接遞公文逾限不分緊緩均照遲延公文議處例止罰俸各員遂不經心請嗣後照管驛州縣接遞各省限行六百里公文若不依限馳遞查明逾限最多者照扣閱公文遲延例一律參處議行四十一年正月丁父艱百日期滿署吏部侍郎十月署福建巡撫尋奉命暫署漕運總督是月諭曰姚立德奏各省重運漕船向係冬兌冬開次年得及早過淮五月全入臺莊回空於九月初亦得全入臨清開行總無遲逾之事近年以來兌開既遲長途不能儻趕年復一年回空亦未能依限歸次不無阻淺守凍之虞前與阿思哈面商意見相同茲阿思哈病故恐冬兌冬開之例仍不能實力奉行請敕諭有漕各撫臣責成各糧道妥協辦理等語所奏甚是各省漕糧冬兌冬開自屬正辦迨後開兌遲緩實係歷年因循所致雖催趨尙無貽誤不若照例於冬月開幫之爲暇豫目下正屆收兌漕糧之期若能於今歲冬間辦定章程嗣後卽無難遞年遵辦著卽傳諭有漕之各督撫一體實力妥辦

其江蘇安徽浙江各省糧艘務令歲內全數開行其江西湖廣各幫亦須將回空之船迎催歸次必於正月內埽幫前進毋至遲延至德保業已起程著傳諭令前赴濟寧與姚立德面商熟悉實力妥辦十一月奏本年各省回空糧艘於十月二十八日全出臺莊開河爲時稍遲見在分途催趲江蘇安徽浙江各省糧艘務令歲內開行其江西湖廣各幫檄行各糧道迎催歸次受兌亦於正月埽幫前進報聞十二月奏漕船開兌日期向由州縣自定每致稽緩見檄行各糧道州縣收漕一有成數卽定期開兌各遵定限埽幫前進並嚴禁運丁攬裝客貨逾違參處再幫船行走向藉等候同幫爲詞見通檄隨帶隨行不得等候稽延至漕糧首重米色漕運全書內開到淮查驗米色潮雜不純及虧折之米有結者旗丁賠補未出結者縣幫各半均賠例意未免兩歧請嗣後到淮米色查係原兌平常將徵兌州縣無論已未出結嚴參議處著賠補運道府及監領各員弁一併參處中途攙和及不能勤加風晾過淮後米色微暗仍照定例辦理報聞四十二年三月奏德州衛左幫濟寧衛任城幫軍船承兌豫糧本無軍田又無津貼每船止贍軍銀十兩且水次在河南造船在山東完工赴豫受兌抵通回空守候諸多拮据若將左任

城二幫照例改爲自備旗丁毋庸押空守候可省長途費用亦可免大遭賠累下部議行又奏漕標試用衛千總多至百餘員例押空滿運留標千總遇缺間補查通漕千總繁缺共六十一每年限次輪補不過數員餘皆需次候補應照吏部覆准廣東省分發佐雜人員無論年限准回原籍之例准其告假回籍如情願往來亦照部議由原籍督撫給咨赴淮下部議行七月諭曰據巡漕御史敦岱奏臨清守備萬世通同東昌衛守備王祖夔統率丁舵衙役人等至臨清開喝令衆人將閘板拉起放進回空船八隻致重運糧艘頂阻八時等語實屬不法運河設閘蓄水以濟重運其回空船隻例應俟重運糧船全行出口方准進閘乃該守備萬世通欲將赴次改造之空船強行進閘因閘官阻止輒同守備王祖夔率領丁舵人役將閘板拉起放進空船八隻任意妄行不可不嚴加懲儆著傳諭德保會同姚立德卽速查明據實參革究審定擬具奏敦岱摺並鈔寄閱看尋奏見督全漕過德州不日卽抵天津俟趨叩闕廷後回至臨清會同河臣姚立德嚴審定擬具奏諭曰昨據德保奏稱督催全漕不日卽抵天津俟趨叩闕廷後回至臨清審擬守備萬世通擅起閘板一案已於摺內批示令其不必來京卽回臨清速審此案矣

計德保回至臨清審擬搶開一案事畢卽應催償回空抵次籌辦明年漕務見在鄂寶所辦川省軍需奏銷諸事未能卽竣其赴總漕新任尙早一切漕務仍係德保專責德保於上年冬間甫經出京又何必襲押運舊例卽請陛見耶著傳諭德保卽遵照此旨妥辦仍將萬世通擅起閘板一案速行會審明確定擬具奏又諭曰前因守備萬世通搶開滋事一案已諭令德保速赴臨清會同姚立德國泰嚴審定擬矣此案萬世通押帶回空漕船過閘膽敢不候重運北上輒行擅起閘板放下空船致稽重運情罪固重其閘官崔體淵庸懦無能擅離閘所以致閘夫散去咎亦難辭德保等審明時自當卽行按律定擬以示懲儆至各閘雖設有閘官專管必有道廳等官兼司統轄當漕務緊要之時各該員不應駐宿河干往來稽察彈壓乎此次萬世通搶開之事德保原參有據上河通判洪世儀詳報等語是該通判卽係該閘兼管之員定案時自當予以處分卽統轄之道員亦當有應得之咎著傳諭德保等查明定例一併參處並此後何以嚴定章程令其稽察不致生事亦當一併議奏旋奏請將萬世通等論罪如律又奏東省北自臨清南至臺莊共四十九座閘臨清閘板爲自北往南進閘之始各省漕船應行打造者俱係

隨開搭放但未明定章程以致爭搶越幫令糧道先查每幫確數飭於臨清板閘塘內乘空分塘每起進閘不得過五隻船尾粉書赴廠打造字樣各閘驗放時遇船連檣行走令於河面稍寬處停讓不得礙絳爭行致阻重運嗣後如仍有搶閘等事將兼管廳員照約束不嚴例降一級調用統轄道員照失察例議處閘官故意留難措勒照例參辦下部議行九月奏近年糧船每報失風江河水勢浩瀚閘河水性急溜猝遇風浪人力難施內河遇有風暴原可隨時防範定例糧船失風運弁罰俸一年押運廳員罰俸六個月船隻多寡並無區別請嗣後江浙幫船在鎮江口以內江西幫船在鄱陽湖以內河南山東湖南湖北至臨清閘以北失風一二隻及船米無虧者仍照例議處三隻以上運弁降一級調用押運廳員罰俸一年五隻以上運弁革職押運廳員降一級留任旗丁各予滿杖枷號一月其進瓜洲儀徵口以至淮安均係內河俱照北河例辦理十月奏漕標下左營都司右營遊擊向來止用鈐記該二營經管軍馬錢糧隔省駐劄文稟均關緊要請一體頒給關防均如所請十一月奏入秋以來天氣久晴直隸山東河道淺滯臨清至韓莊閘回空漕船行走未能迅速江西九江後吉安二幫於十一月初一二日渡

黃初三日東北風過大河水陡落楊家莊頭水僅深一尺五寸連日風雪雙金閘
迤上俱已冰凍邳宿一帶亦間斷凍阻臣馳赴河口撥派兵夫設法疏通天氣正
寒隨敲隨合至初九日風色略轉水勢稍增冰凍盡力敲通十一二三四等日加
緊渡黃其邳宿一帶飛咨各州縣照料見在未渡黃者尙有九幫共船三百六十
八隻得旨嘉獎又奏邳宿桃源境內凍阻各船一律開通安福撫州二幫於二十
四日渡黃至二十七日尾幫全渡二十九日均過淮南下本年江西回空漕船較
往年遲至十餘日該省糧船居通漕之尾約歲前抵次仍可跟接湖廣幫船前進
無誤新漕諭曰德保奏十一月初間雙金閘一帶天寒冰凍回空漕船稽阻南下
當飭文武員弁上緊敲打一律開通等語所辦尙好但據稱未渡黃河之回空漕
船尙有江西船九幫雖云今歲河凍較早而回空漕船至十一月初間未渡黃者
三百餘隻已較往年稍遲其適值凍阻究係行遲非盡關寒早也且見在正屆冬
月開兌之期而江西回空漕船阻次黃河以北者尙有如許不致有誤開兌否著
傳諭德保卽速查明江西幫船是否在路稽延遂致回空較晚及此等船隻回抵
江西水次是否不誤今冬開兌之處據實覆奏仍飭押運員弁將回空各船迅速

催儻前進毋再稽遲仍將各船於何日全行渡黃趨進之處一並覆奏十二月奏本年漕船自通回空南下實因直隸山東河道水勢淺弱每日僅過一二幫出山東境適天寒冰凍渡黃較遲尙無稽延情事報聞四十三年二月奏請江南揚州衛三浙江杭嚴頭杭嚴二三幫千總改爲繁缺在外揀調長淮衛宿州頭蘇松鎮海衛前浙江台州衛後三幫千總改爲簡缺歸部銓選下部議行四月赴福建巡撫任六月署浙閩總督八月奏漳州府知府姚棻調補福州府汀州府知府景昌調補漳州府遺缺以臺灣海防同知鄔維肅補用諭曰前因福州府知府缺出曾降旨令該督撫於通省知府內揀員調補遺缺將鄔維肅補授今據德保奏請將漳州府知府姚棻調補福州府而以汀州府知府景昌調補漳州府所辦非是福州府雖閩省首郡事務較繁但督撫皆駐省會又有兩司各道同城卽或有要務首府就近稟承易於辦理至漳郡濱臨海疆民俗刁悍最爲難治其繁要數倍於福州朕因素知姚棻能事前次漳州缺出特從湖北調任該郡實係因地擇人豈可輕於更調雖據稱漳州近年以來風氣漸純究亦未足深恃萬一地方有事又豈德保之所能料乎今德保請以姚棻調補首郡而以景昌調任漳州何不卽將

伊調補福州乎著傳諭德保如姚棻等尙未調定卽將景昌調補福州府其汀州府員缺卽著卹維肅補授如彼此業經更調自難復行改易著德保留心試看如景昌到漳州不能如姚棻經理得宜卽一面將姚棻調回漳州景昌調回福州不得稍有迴護九月擢禮部尙書十二月賞戴花翎四十四年正月兼署吏部尙書三月署翰林院掌院學士教習庶吉士十二月命纂音韻述微四十五年三月充會試正考官四月奏會闈分卷請照舊例祇令房官迴避本省試卷至公堂分十八束送內簾籤掣不必將至字公字區分兩項下部議行十一月兼署都察院左都御史四十六年正月兼管太常寺事三月充會試正考官五月充纂辦日下舊聞考總裁旋充上書房總師傅揀選贊禮郎與例不符議革四十七年正月諭曰嗣後壇內補種樹株著御前侍衛德保幫同禮部尙書德保於靜明園清漪園培養之樹內移往一律補栽四月諭曰常雩大典朕親詣行禮凡在壇執事諸臣胥應共矢恪恭壇內一切禮器於朕未經齋宿之先禮部工部太常寺等官豫行派員周視均宜敬謹安設誠以敬天大典小心昭事之忱大小臣工所當共慎乃本日朕行禮時見壇內懸挂天鐙僅止二盞又更衣幄次所設坐褥亦不整齊郊壇

大典朕親詣行禮尙如此草率不敬若遣官恭代更不可問矣其罪甚大非尋常錯誤交部議處者可比德保著革去頂帶花翎仍帶革職從寬留任十年無過方准開復五月上御殿受朝西班牙官一員由甬道走入東班監禮御史等並未查參德保係都察院堂官亦未奏參部議罰俸一年又以社稷壇內樹株未經芟修交部議處鐫一級九月暫署兵部尙書十月諭曰前經降旨派皇子同總師傅等編輯明臣奏議一書原因明季朝多秕政廷臣讜言直諫者亦不乏人特令廣爲蒐採裒集成編自應考訂朝代前後按次編錄方於時事得失原委瞭然今閱書內體制乖舛總師傅等不能詳加釐正著交部嚴加議處十一月諭德保不勝總師傅之任著回原衙門辦事十二月得旨賞還頂帶花翎仍革職留任四十八年二月總司營建辟雍四十九年充會試正考官五月兼署都察院左都御史五十年與千叟宴三月諭經理修葺直隸昌平州明代陵寢八月總辦樂律全書諭曰古樂以宮商角徵羽爲五音合諸變宮變徵則爲七音今之樂猶古之樂何以樂部所奏樂章僅以五六工尺上等字爲音而問之宮商角徵羽則茫然不知爲何事近偶閱張照所奏論樂筭子辨晰頗詳其所謂五六工尺上卽宮商角徵羽甚合

古意因復取律呂正義再加參覈本屬相合因思今之五六工尺上古之宮商角徵羽名雖異而實則同聲音之道原欲避俗趨雅今反援雅而歸於俗甚非道也況郊廟樂章格天歆祖正朝御殿敷政臨民鐘虞元音自應用古制爲節奏今樂部所定樂章俱取便注工尺揆之名義殊乖莊雅但相沿已久若猝令樂工等改習宮商角徵羽則心手俱所未嫻其勢亦有所難朕意俗用工尺與宮商角徵羽變宮變徵字樣皆令兼之則不但郊廟朝廷倍彰莊雅而以此潛移默化漸復古音未始非返樸還淳之一道再古樂中琴瑟與金石並重近來樂部奏樂琴或閒能操縵而瑟則竟屬虛陳卽業儒之人雖偶有學琴者已非古調至於瑟則未有能鼓者是瑟之爲道久已失傳夫八音迭奏琴瑟相宣豈容偏廢向來樂部奏樂俱因笙笛聲壯琴瑟聲細爲其所掩絲不如竹古已有其語是以樂工等罕有嫻習者殊非八音咸備之意從前勵宗萬爲太常寺少卿時寺丞張樂盛編輯壇廟樂章勵宗萬爲之作序維時已有律呂正義一書而張樂盛所編書內樂章並不倣照兼注宮商輒專注工尺勵宗萬又不爲定正所謂不學無術不可與言樂亦安能窺律呂正義之博洽賅備耶然律呂正義一書卷帙旣繁剖析又極精微樂

工未易領會德保係禮部尙書太常寺樂部皆所總理莊存與則禮部侍郎而兼管樂部著德保莊存與向武英殿咨取律呂正義刻本一部將律呂正義書內每字下駢注宮商角徵羽及五六工尺上字樣著摘出令樂工按書演習精熟並著將琴瑟二樂飭令樂舞生一體用心嫻習蓋黃鐘爲萬事根本五音十二律還相爲宮而所謂三分損一隔八相生之說其義原可貫乎今之工尺蓋黃鐘生大呂至半大呂而又生黃鐘夫黃鐘宮也以宮商角徵羽變宮變徵之位言之則爲七以其相生之數言之則爲九此隔八之說所由來也如歲時有八節遞嬗而歲時成矣今之五六工尺上四合合字音之終也而卽以生五生生不窮自爲循環所謂貞下起元聲音之道與政通也著德保莊存與悉心講求檢閱於律呂正義一書取要節繁輯爲簡要一編會同軍機大臣酌定繕寫進呈刊發再律呂正義中原有御製補笙詩六首駢注工尺宮商字樣著一併入編頒發學宮肄習以示作樂崇德協律同和之至意五十一年十一月命紫禁城騎馬十二月諭曰朕披閱朱載堉樂律全書所論音律算法稱引繁賾但其中較律呂正義一書疏漏歧誤之處正復不少蓋樂律算法義本相通必須講求貫串以期畫一卽如樂律以黃

鐘爲本而尺度之長短視黍黍爲準但黍有縱橫亦有大小顆粒若用縱黍則較長若用橫黍則較短其大小顆粒亦如之原難定以爲準也是書橫黍百粒當縱黍八十一粒之說尙爲牽強又書中所載樂譜內填注五六工尺上等字並未兼注宮商角徵羽字樣未免援古入俗自應做照律呂正義逐細添注方爲賅備蓋古樂皆主一字一音如關關雎鳩文王在上等詩詠歌時自應以一字一音庶合聲依永律和聲之義若如朱載堉所注歌詩章譜每一字下輒用五六工等字試以五音分注未免一字下而有數音是將援雅正而入於繁靡也卽以琴瑟而論上古操縵亦係一字一音後世古樂失傳而製譜者多用鈎擘埽拂等法以悅聽者之耳遂使一字而有數音幾與時曲俗劇相似更失古人審音知樂能使人人聲入心通之意且如殿陛所奏中和韶樂從前未免沿明季陋習多有一字而曼引數音者聽之殊與俗樂相近經朕特加釐正俾一字各還一音日今朝會大典鐘虞鏗鏜備極莊雅業經載入律呂正義彰彰可考不可洽融貫通乎著交管理樂部算法館之皇六子及德保鄒奕孝喜常會同精覈朱載堉所載此書分門別類務將樂律全書較律呂正義疏漏歧誤之處分別各條公同詳晰訂證如書中

凡例體裁逐加詳評載於從要之後以垂永久以昭釐定五十三年八月充順天鄉試正考官五十四年正月諭曰朕於元旦臨御太和殿受賀見東邊第三四班內有越至甬道上行禮者本日據鴻臚寺堂官奏請將排班之引贊官阿勒精阿交部議處並自請交部而糾儀之御史百慶范衷參摺內則稱係蒙古台吉等行禮錯誤請敕交理藩院查明議處等語朝賀大典鴻臚寺設有引贊官員御史復有糾儀之責理應敬謹排定以肅朝班乃行禮各官內竟至有越上甬道者該管官員所司何事而御史百慶等尙復覲顏委之蒙古台吉等以卸其不能稽察之咎尤屬非是百慶范衷阿勒精阿俱著革職尙書德保係管理鴻臚寺大臣咎實難辭著革去翎頂其餘鴻臚寺堂官俱著交部嚴加議處是月卒諭曰德保因元旦朝賀官員行禮越至甬道未能先事督飭是以革去翎頂但念其宣力年久茲聞溘逝著加恩賞還翎頂嘉慶四年五月諭曰禮部尙書德保在上書房行走有年學問優長著加恩追諡並予祭一壇諭祭文有如松柏之後凋藹如春日無薦蘿之肯施介比秋霜碑文有茫乎莫知其岸度本懷清狷者有所不爲操惟履正之句蓋褒其實也賜諡文莊子英和見官協辦大學士戶部尙書孫奎照見官刑

部右侍郎奎耀見官通政使司通政使

周煌

周煌四川涪州人乾隆二年進士改庶吉士散館授編修六年充山東鄉試副考官七年充會試同考官十二年充雲南鄉試正考官二十年十二月詔偕侍講全魁册封琉球中山王尙穆尋遷右中允二十一年遷侍講二十二年復命奏渡海泊舟姑米山遇風禱天妃靈應事請加天妃封號別頒諭祭文與海神並祀下部議行以隨往兵丁在琉球滋事失約束部議革職上念其出使外洋遭遇風險從寬留任纂輯琉球國志略呈覽嗣命武英殿排印頒行二十三年三月大考二等准其開復十二月遷左庶子命在尙書房行走二十四年遷侍講學士二十五年充福建鄉試正考官疏言閩闈舊設十二房因易經卷少議裁一房今查詩經卷及四千同考四員未能分校裕如請增一員以復舊額十二房之數部議從之二十六年擢內閣學士提督江西學政三十一年擢刑部侍郎三十二年調兵部侍郎三十三年提督浙江學政三十八年五月命偕侍郎永德往四川會訊璧山縣民控武生鄧貴榜勒派侵冒案十月復命會審蓬溪縣生員黃定獻控知縣借軍

需勒派案俱鞫虛議罪如律四十四年二月充四庫全書館總裁十二月擢工部
尙書四十五年三月充會試副考官以中式前列試卷語意蟲雜磨勘大臣奏請
應議部議罰俸九月調兵部尙書四十六年八月煌赴熱河行在帶領武職引見
時川省查辦噶匪上召煌詢之煌據所見聞奏對諭曰文綬辦理噶匪一案平日
不能督率文武屬員緝捕以致竄入楚黔鄰境已屢經降旨嚴飭並降爲三品頂
戴從寬留任令其督緝茲據周煌奏川省噶匪近年每邑俱多至百十餘人常川
騷擾並有朋頭名號戴頂坐轎乘馬白晝搶奪如入無人之境通省官吏罔聞兵
民不問甚至州縣吏役身充噶匪如大竹縣衙役之子號稱一隻虎等語可見噶
匪肆行不法已非一日文綬身爲總督乃竟漫不經心以致養癰貽患甚至白晝
搶奪拒捕傷差公然無忌若不及早嚴辦將來黨羽日多安知不釀成蘇四十三
之事此時務須痛加懲創盡絕根株以戢凶暴而靖地方並諭新任四川總督福
康安防護煌原籍村莊四十七年二月命在尙書房爲總師傅十月以辦理名臣
奏議草率交部議處尋免之十一月諭曰周煌不勝總師傅之任著回原衙門辦
事十二月命在紫禁城內騎馬四十九年調左都御史五十年正月以病乞休上

念其奉職有年小心勤慎詔以兵部尙書致仕加太子少傅銜四月卒諭曰原任左都御史周煌由翰林洊擢正卿在尙書房行走有年老成端謹奉職克勤今春遭疾陳請解任曾晉秩太子少傅加兵部尙書銜准其回籍調理前兩次祇迎道左特親加詢問諭令加意調攝以冀痊可茲聞溘逝深爲軫惜著加恩晉太子太傅派散秩大臣帶領侍衛十員往奠所有任內降革處分俱予開復應得卹典該部察例具奏尋賜祭葬如例諡文恭子興岱現官內閣學士

竇光鼐

竇光鼐山東諸城人乾隆七年進士改庶吉士散館授編修十三年正月充會試同考官六月大考四等罰俸一年八年擢左中允十五年充山西鄉試副考官十六年遷翰林院侍讀十七年二月擢侍讀學士六月大考一等擢內閣學士入直南書房充湖北鄉試正考官旋提督河南學政十八年丁母憂二十年服闋授左副都御史尋提督浙江學政二十二年上南巡有臨海縣訓導章知鄴以光鼐不准進獻詩冊欲圖訐告經光鼐訪聞奏參諭傳赴宮門考試旋以該訓導詩詞鄙俚且檢閱呈內有西陲用兵久稽成功情願從軍等因命革知鄴職派侍衛伊德

解往巴里坤軍營效力賜光鼐詩曰兩浙山川常毓秀諸生月旦汝司文從來士習民成俗勸彼行知尊所聞見外發中務清正涵今茹古去纖棼曰公似矣曰明要籲俊紓予一念殷二十六年八月九卿秋讞會議光鼐以廣西省犯追賊毆斃之陳父悔不宜入情實貴州省犯逞兇斃命之羅阿扛不宜入緩決兩議具請刑部奏入諭曰昨刑部奏九卿會審將廣西陳希統案內之陳父悔改入情實而竇光鼐立意兩議之處具摺奏聞已有旨傳諭該堂官等令其虛心持正定議不必彼此徒事爭執今覆據奏稱竇光鼐將本案故殺之陳希統並欲改入緩決並將貴州省羅阿扛一案牽引比擬並鈔錄原簽附摺具奏會讞大典理應虛公覈定果有擬議未協不妨平心商榷務歸明允即使意見不能強同原可兩議具請候朕酌奪今見竇光鼐議帖因己見參差竟至以筆舌忿爭曉曉不已此等習氣在前明弊政時視爲固然以致各立門戶大壞朝政今當紀綱肅清之日一切案牘朕無不折衷裁處竇光鼐豈得逞臆侈滕口說致乖政體但簽內稱刑部刪去黃父防赴村探聽一節則係本案是否竊賊要據招冊何以不入又羅阿扛一案何以定議緩決與前案輕重不符以竊賊殺人而議緩何以服乎未殺賊而改實者

朕觀竇光鼐雖不無氣質用事口舌紛爭之失而刑部先後兩奏跡似豫爲張本其中情節曲直亦或有不足服竇光鼐之心者著將此摺交與大學士來保史貽直協辦大學士梁詩正將兩案審擬各原稟詳悉確覈秉公定議具奏來保等議以陳父悔係隨衆加毆應改入情實而陳希統之有心斃命與羅阿扛之無心鬪殺均應悉如部議且刑部稱此二案竇光鼐業已畫題何得又請改擬奏上上命光鼐明白回奏尋奏陳希統羅阿扛兩案異議處本係簽商並非固執因會議時言詞過激致牴牾刑臣遽將簽出未定之稟先行密奏臣未能降心抑氣與刑臣婉言咎實難辭請將臣交部嚴加議處諭曰此事在刑部以兩議未奏之案節次具奏誠未免有先發制人之意但國家會獻大典竇光鼐竟氣質自用甚至紛呶謾罵而不自知設將來豫議者尤而效之於國憲朝章尙可爲訓耶是刑部有所不合究不若竇光鼐之甚竇光鼐著交部嚴察議奏刑部堂官著交部察議竇光鼐摺並發部議降三級調用命銷去降二級仍降一級留任十月奏事主擅殺竊盜律止杖徒近來各省問刑衙門多以竊盜拒捕而被殺比罪人不拒捕而擅殺皆以鬪論遂於律應斬決斬候之賊犯致有輕縱而例得勿論及罪止杖徒之事

主並擬絞抵殊非禁暴之意應請各遵律例及新准御史蔣嘉年條奏賊犯持杖拒捕捕者格殺之不論事主鄰佑俱照律勿論例畫一辦理下部議行十二月諭曰朕前此南巡有浙江臨海縣訓導章知鄴以學政竇光鼐不准進獻詩冊妄欲捏詞叩闈經學政等訪聞奏參當令革職命侍衛伊德帶往關展效力俾伊悉知軍營情形果如所言否比因軍務久竣此等無知之人別無可效用之處因傳諭安泰查伊在彼果能痛加懲警安分悔過卽傳旨加恩令回籍如有違犯字蹟卽一面看守一面奏聞另降旨定奪乃據查到章知鄴筆札記載叢雜乖張如妄引關帝文昌鬼神夢嚙之談已足爲人心風俗之累然其詞不過止於荒誕至所著討奸邪竇光鼐一篇則竟捏造悖逆之言一皆託諸竇光鼐之口伊轉爲之加以駁詰是其居心奸險計圖栽害此等如鬼如蜮伎倆豈能逃朕洞鑒乎竇光鼐不過一庸懦之人且見在居官斷不敢爲此卽使竇光鼐果有此言亦初未必筆之於書也而章知鄴則已明目張膽公然列之於著錄實惡逆之尤著將該犯章知鄴卽於關展地方正法示衆以儆奸頑並將此通行傳諭知之二十七年三月奉旨竇光鼐識見迂拙不克勝副都御史之任著以對品另用十一月命署內閣學

士告祭南海二十八年充殿試讀卷官二十九年授順天府府尹三十二年丁父憂三十五年三月服闋補原官五月奏童生冒籍必交通廩生廩生之優劣惟憑教官申送易滋弊竇查府丞一官承辦事件無多應責成實心查覈其入籍滿二十年者令族親鄰佑各具甘結如查察不實將具結人一併治罪再審問時例派滿漢御史遇可疑者飭該縣確查詳覆不實例處該縣如未經駁查事後發覺將該御史一併議處冒籍既清應試者少其有事故不及與縣試者應照鄉試錄遺之例於按臨之先府丞移會御史彙齊補考不符取額寧闕毋濫下部議行閏五月因武清東安二縣飛蝗蔓延不能率屬搜捕奉旨降爲四品京堂仍交部嚴加議處部議上命於補官日降三級從寬留任六月奏武清等處蝗蝻業經查捕淨盡新授府尹裘曰修見赴天津捕蝗謹差官齎送印信適聞三河懷柔二縣俱有飛蝗擬卽日往捕得旨准其前往復奏近京州縣旗地多於民地請嗣後捕蝗令民人佃種旗地者一體撥夫應用硃批所奏是著照所請速行尋諭曰前據寶光鼐奏民人佃種旗地之戶請一體撥夫撲捕蝗蝻一摺因其所奏近理卽批交部照所請行並諭地方偶遇捕蝗不獨旗佃與民田通力合作卽大糧莊頭亦應一

體派撥其直隸地向來作何辦理著楊廷璋查明具奏及派往捕蝗之侍衛索諾木策凌等回京詢其實在情形據稱所到之處不獨旗佃出夫辦公卽王公所屬旗人亦悉協力捕蝗等語旋據該督覆奏自方觀承任內設立護田夫一項不拘旗民均令出夫見仍照舊辦理因節次令寶光鼐明白回奏寶光鼐堅執意見謂詢之三河順義兩縣及東路同知皆云旗莊並不出夫卽周元理亦有旗莊不肯借用口袋之語曉曉置辯因復降旨楊廷璋令將所奏情節再行覆查今寶光鼐到京回奏則以前次所奏護田夫未經奏明不能一體遵照爲詞其說支離更甚試問總督舊定章程通行闔省順屬官民豈獨不遵條教府尹亦豈得諉爲不知況寶光鼐所指三河順義二縣卽係府尹所轄如有司陽奉陰違自當隨時參劾卽無此例而府尹奉差捕蝗亦理應派夫護田其有佃戶人等倚恃旗業聲勢不受約束寶光鼐日擊其情無難詢明何人莊業列名指參卽如大學士傅恆尹繼善外如總督楊廷璋推而上之以至親王等皆無可畏忌寶光鼐若早據實舉出朕必且深爲嘉予並將袒庇莊佃之王大臣嚴加議處乃並不能指實一人而徒硜硜膠執不已於事何當其意不過欲借題發揮逞弄筆墨妄以強項自命冀見

許於無識之徒且以總督楊廷璋既不無瞻徇旗莊卽承旨之軍機大臣有旗產者亦未免意存袒護以此曲爲解嘲自文其過此等伎倆豈能於朕前嘗試乎因令寶光稟隨軍機大臣進見面爲詢問伊亦自稱在三河順義不行指名具奏實屬無能難以再爲支飾近京旗民交涉事件在國家初定鼎時或有旗人強占民地及將各項差派專委民承辦者今閱百數十餘年屢經整飭政紀肅清無論旗莊各戶不敢不安分守法卽王公大臣亦不敢怙勢庇佃欺壓平民自圖詭避差役而國家法在必行又豈肯聽其縱放禮法稍爲曲徇乎朕辦理庶務一秉大公至正中外臣民宜無不共見共聞卽此事之是非曲直適就前後事理爲衡斷並未嘗豫設成見而寶光稟偏執邀名之隱微亦不能逃朕洞鑒特爲明白宣示將此通諭知之七月奏護田夫之法有不可行者查原議三家出一夫免其門差臣按冊計之大宛二縣約出夫七千五六百名此數千人巡捕半年荒廢本業衣食無資造冊免差胥吏必緣以爲奸且捕蝗宜衆而時速若按三家一人之例必至緩不及事臣謹上捕蝗事宜數條一人夫不必預設但查清保甲臨時酌撥一必用村莊近地之人方得實用一本牌頭按村之大小酌設每縣不過數十人一各

村田野令鄉地牌頭勸率田戶自行巡查一蝗蝻生發一面報官牌頭卽率居人齊集往捕撲滅者賞隱匿者治罪一器莫善於條拍宜豫製以便應用一蝻子宜開溝圍偪用土掩埋一收買之法止宜用之老幼婦女若強壯之人總以直前追捕爲得力諭曰據竇光鼎回奏派撥旗莊人夫一事請將順義縣知縣王述曾三河縣知縣周世云解任並傳東路同知劉峩北路同知張在赴軍機處質問等語所奏膠執支離尤屬不曉事理此次直屬撥夫捕蝗無論地方官原係循照舊規旗莊民田均勻周派卽如竇光鼎所云旗莊之夫或不到場難而較遲據此已足爲均派之明驗更何事嘵嘵置喙雖該督楊廷璋查詢之該同知知縣等稍爲遷就其詞亦屬情理所有於事本無關緊要若因語言傳述參差小節遽令兩縣兩廳同時解任徒致曠廢公務殊屬無謂設因此歸案赴質之故併將竇光鼎褫職對簿又復成何政體且亦不值如此張大其事至竇光鼎另摺所稱護田夫一項以若輩盡力巡查且致荒廢本業彼爲總總過計以衣食無由取給爲虞所見更爲迂鄙護田夫之設不過令於蝻子萌生時各隨本處田地搜查或遇蝗蝻長發會力撲捕並非使之長年株守田畔於三時農業概行拋荒也卽如設兵防守汛

地亦第於汎內輪番偵邏稽查又豈責其終日登高瞭望方爲斥埃若如竇光鼐之論直是跬步難行有不聞而失笑者乎竇光鼐前此覆奏惟知因事借題造作塵腐空文自爲解嘲地步今又將派夫一節連篇累牘鋪張條奏而於事體之可行不可行全無理會其拘墟膠轕之處正復不勝指摘猶且始終堅執臆說牢不可破向固知其僅一硜硜之小人毫無能爲乃不意執迷紕繆若此且以空言折辨互相指斥漸成門戶乃前明陋習此風斷不可長竇光鼐著交部嚴加議處八月革職十二月諭曰竇光鼐前因捕蝗一事照部議革職但究係拘鈍無能尙無大過所有通政司副使員缺著加恩令其補授三十八年四月擢光祿寺卿六月遷宗人府府丞八月稽查右翼宗學三十九年命告祭吉林等處四十五年充福建鄉試正考官四十七年五月授浙江學政四十九年上南巡賜詩曰士習民端首風方繫厥司况茲文盛處所重行修時熟路輕車試迪人克己爲前車應鑒已自力尙勤思五十一年正月擢吏部右侍郎是年查辦浙江虧空四月光鼐奏浙江各州縣倉庫虧缺未補者多蓋因從前督撫陳輝祖王亶望貪墨敗露時督臣富勒渾並未澈底查辦祇據司道結報之數渾同立限遇有升調事故輒令接任

之員出結辦理顛預臣聞嘉興府屬之嘉興海鹽二縣温州府屬之平陽縣虧數皆逾十萬當查何員虧缺分別定擬去歲杭嘉湖三府歉收倉內有穀可糶者無幾浙東八府歲行採買惟折收銀兩以便挪移奏入上嘉其公正命尙書曹文植侍郎姜晟前往會同巡撫伊齡阿澈底清查嚴參辦理又命光稟會同查辦五月奏仙居黃巖等七縣前任知縣虧空數目多至累萬全未彌補以致後任不敢接收交代永嘉縣知縣席世維借生監穀輸倉備查平陽縣知縣黃梅借虧空名色科斂累民丁憂演戲殊非人類仙居縣知縣徐延翰監斃臨海縣生員馬寘殊干法紀再藩司盛住上年進京攜貲過豐外間頗有煩言又督臣過往嘉興嚴衢上下各地方供應浩繁門包或至千百奏入上命大學士阿桂由南河馳驛赴浙江督辦尋覆奏查辦過海鹽桐鄉嘉興等六州縣倉穀有缺數百石至百餘石者惟桐鄉縣倉內實無儲穀所有之穀借自社倉又將米三千石開報平糶掩飾一時再查范公塘隄工向派各州縣承修請嗣後責成海塘大員督率海防同知承修再於沙灘地多栽蘆葦三年以葦易柴取用甚便上命阿桂曹文植等逐一覈辦諭曰據阿桂奏查詢倉庫情形及寶光稟所稱盛住上年進京攜帶過豐各節已

於摺內詳晰批示如竇光鼐原奏永嘉平陽二縣借穀勒派之事阿桂面詢該學政係何人告知該學政不能記憶姓名是竇光鼐既欲於朕前見長又恐得罪衆人實屬進退無據至所稱盛住進京攜帶銀兩及總督收受屬員門包各節詢之該學政亦不能指實阿桂等傳詢盛住則因上年進京時有應解漕價銀三萬九千餘兩盛住自行裝匣攜帶到京後卽赴廣儲司兌交有案是盛住攜帶銀兩係屬官物豈可指爲贓私之證而竇光鼐因見所帶銀匣數多遂疑盛住私貲若如此疑人天下無一清廉之官矣尤爲可笑至總督藩司收受屬員門包餽送事關大員婪索若無確據何得率行陳奏乃詢問該學政毫無指實是竟係信口誣人若竇光鼐欲誣人謀反不論其實有無將人治罪有是理乎此案若非朕特派阿桂前往查辦則竇光鼐與曹文植等爭執攀引卽經年之久辦理亦不能完結更復成何事體今阿桂與曹文植等公同面詢逐層駁詰俱確有可據竇光鼐竟不能復置一詞見復檄調嘉興府屬州縣質詢自可無難得實至富勒渾家人在粵招搖滋事及在浙省有無勒索門包之處阿桂見在提集富勒渾進京時經過之嘉興嚴衢各地方官到省剴切開導令其據實供出該州縣知事難掩飾自必和

盤託出所辦尤爲得其要領七月阿桂等奏查明永嘉平陽等縣實無挪移勒派之事平陽縣知縣黃梅丁憂演戲一節查係該縣爲伊母慶九十生辰於演戲之夜痰壅猝故諭曰據阿桂等奏查明黃梅爲伊母演戲慶壽伊母於是夜痰壅身故是其演戲在未丁憂之前況伊母年已九旬風燭無常猝然身故亦屬情理所有此事關係名節竇光鼐輒行入告並不確細訪查若此事果實則真如原奏所稱行同禽獸不齒於人類矣該學政不顧污人名節以無根之談冒昧陳奏實屬荒唐竇光鼐著飭行閏七月復奏前任仙居縣知縣徐延翰監斃生員馬寘各上司展轉情庇並未審出實情諭曰朕詳閱此案情節馬寘身爲生員夥合匪徒陳天河邵能文等向各僧寺弔紙圖謝又嫌謝錢數少誣首賭博復與僧人鬪毆實屬膠庠之敗類其罪亦應滿徒該縣徐延翰將馬寘掌責收禁並無不合至馬寘在監病故屢經驗明確實係死於病非死於傷其徐延翰倒填詳報日月又不關傳屍親眼同相驗收殮規避諱飾之咎實所難辭將來議處尙不止於革職亦足以服屍親之心乃竇光鼐必欲加該縣徐延翰重罪將奏摺與曹文植閱看聲言汝辦理此案若不將徐延翰照故勘濫禁治以重罪我必將汝奏參並令告知阿

桂伊齡阿等語是其袒護劣衿偏執已見不自知其言之狂妄若此設如所言將來劣生必致武斷鄉曲日無官長適足以成惡習而長刁風尙復成何政體耶又竇光鼐覆奏平陽縣知縣黃梅母喪演戲係闔邑生童所言及平陽縣虧空自黃梅始該員以虧空之多久居美缺縱令伊子借名派索濫用而抗不彌補且指阿桂等於議處虧空一案輕重失平夫阿桂等業將乾隆四十三年以前歷任各員擬以革職暫行留任按照在任月日分賠勒限一年不完照虛出通關律治罪黃梅之罪亦與他州縣相倣若獨予從重不特無以服其心天下有此辦事之法乎至所奏母喪演戲一節前經查明係本年正月黃梅爲伊母慶九十生辰演戲伊母一時痰壅適於是夜猝故而竇光鼐尙固執前言夫人子卽忤逆不孝母喪不知悲哀亦斷無迫不及待於母死之日演戲爲樂者況黃梅之母年已九旬風燭無常於演戲之時猝然身故亦屬情理所有此事關係名節古云善善欲其長惡惡欲其短竇光鼐係讀書之人亦何必污人名節致禽獸之不若耶據稱派往之司員海成爲地方官所蒙今伊竟親自赴平陽縣訪查如果能明白當另辦若至生事陵夷地方官是伊自取咎耳且阿桂曹文植伊齡阿屢蒙任使皆係素能辦

事之人朕之信寶光稟自不如信阿桂等卽令寶光稟反躬自問亦必不敢自以爲在阿桂等上也今寶光稟之固執已見曉曉不休者以爲盡孝乎以爲效忠乎且寶光稟身任學政校士是其專責見當賓興大典多士守候錄科平陽去省往返二千餘里該學政必欲親往訪查而置分內之事於不辦殊屬輕重失當且其固執辨論意在必伸其說勢必蹈明季科道盈廷爭執各挾私見而不顧國是之陋習不可不防其漸寶光稟著交部議處並將此通諭知之又諭曰前據寶光稟奏平陽縣知縣黃梅丁憂演戲一事該府范思敬曾面稟前撫福崧以接任之員不受交代俟查明嚴參又該員虧空之數甚多抗不彌補調任温州府方林亦嘗赴省揭參等語當卽降旨詢問福崧茲據福崧奏稱在浙時並未聞有黃梅丁憂時演戲之事該府范思敬亦未面稟至虧缺之案時刻嚴催僅據該府方林等以催迫太甚誠恐有累閭閻稟請展限亦未據揭報等語是此事范思敬等從前並未具稟福崧何以寶光稟稱曾稟福崧竟似福崧亦知其事寶光稟惟以先入之言爲是不加詳查率行誣攀瀆奏其意何居著將福崧原摺發與寶光稟閱看令其據實明白回奏勿再仍前固執自干咎戾也部議以光稟袒庇劣生擅離職守

例應革職撫臣伊齡阿奏參光鼐於未到平陽之先差人招告既到則招集生童發怒咆哮用言恐嚇並勒寫親供鎖拏書役用刑逼喝諭曰生監把持唆訟學政方爲約束之不暇而竇光鼐乃招告於未到之先逼嚇於已到之後咆哮發怒紛紛若狂實屬大辜厥職若生監等因此挾制官長顛倒是非適足以長惡習而助刁風而竇光鼐執意妄行竟是以生監筆據爲驗是其舉動乖張督亂朕亦不能爲之曲庇矣竇光鼐科分較深學問亦佳從前未經升用卽因其性情偏執遇事輒挾私見是以遲遲耳近念其學問尙優歷俸最深仍用侍郎留學政之任理宜安分守職承受朕恩乃於浙省一案執辨不休無故陷人於悖逆名節有虧之事今復招集生監徧令指實而置目前錄科之事於不辦徒令闔省生監守候多時幾誤場期如此若再姑容則何以爲曠職生事者戒竇光鼐著交部議部議革職伊齡阿復奏光鼐在平陽縣城隍廟多備刑具追究書吏生監平民一概命坐及由平陽回省攜帶多人嘵嘵執辨諭曰此事之始朕因竇光鼐爲該省學政適該省有虧空之事因令就所見聞陳奏此朕明日達聰兼聽並觀之意耳卽使所言不實亦祇係風聞入奏斷不以此遽加之罪今伊所稱黃梅丁憂演戲各款皆節

外生枝况業經阿桂等審係竇光鼐誤聽虛誣朕亦未加之譴責竇光鼐當知感激朕恩安靜供職乃見屈賓興大典多士在省城守候錄科伊竟親赴平陽咆哮生事而置目前錄科之事於不辨是以將伊革職此竇光鼐自貽伊戚其罪並不在於言事不實也茲復據伊齡阿奏竇光鼐回省攜帶丁憂典史及生監等多人以爲證佐且言不欲作官不要性命等語看來竇光鼐竟係瘋病是以舉動顛狂若此伊於黃梅下憂演戲一節始則誤聽人言欲以忤逆不孝之事污人名節今赴平陽訪係此事屬虛復言黃梅任內另有別項款蹟以實其說如此乖張督亂不但有乖大臣之體且恐煽惑人心以致啟生監平民人等訐告官長效尤滋事之風不可不嚴行懲儆僅予革職不足蔽辜竇光鼐著拏交刑部治罪光鼐尋奏臣親赴平陽縣紳士民人呈送五十年派捐田單二百餘張供稱知縣以彌補虧空爲名計畝派捐每田一畝捐大錢五十文給官印田票一紙與徵收錢糧無異又呈送供票九張共計大錢二千一百千文四十四年四十七年兩次勒捐富戶自一百餘千至三十五千不等每歲採買倉穀並不給價有頭票穀領帖各名色該縣在任八年所侵吞穀價與勒捐之錢計贓不下二十萬且於頒賞老民錢

及廩生廩餼亦未給發至其母喪演戲緣欲緩報丁憂借演戲以便催糧家人竊物外逃事遂漏洩邑人皆知今將田單印票飛頭穀領帖催帖借票各揀一紙進呈諭曰前據伊齡阿奏寶光稟回省攜帶生監多人以爲質證舉動顛狂且恐煽惑人心啟訐告抗官之漸是以降旨將寶光稟拏交刑部治罪今觀寶光稟所奏又似黃梅實有勒派侵漁之事且有田單印票借票收帖各紙確鑿可據豈可以人廢言前因浙省勒限彌補虧空恐該州縣中有不肖之員藉端勒派擾累閭閻屢降旨飭禁今黃梅借彌補勒令輸捐旣已勒捐仍不彌補以小民之脂膏肥其慾壑婪索不下二十餘萬似此貪官污吏而不嚴加懲治俾得網漏吞舟不肖之徒轉相效尤於吏治大有關係若寶光稟果有賄買招告及刑逼取供各情節一經質訊得實則其獲戾更重今觀其呈出各紙此事不爲無因又有原告吳榮烈等隨伊到杭願與黃梅對質若朕惟阿桂曹文植伊齡阿之言是聽而置此疑案不明白辦理不但不足以服寶光稟之心且浙省見值鄉試生監雲集衆口籍籍將何以服天下輿論此事關係重大不可不澈底根究以服衆懲貪阿桂見已起程在途接奉此旨仍著回至浙江秉公審辦此時寶光稟業已由浙起解阿桂於

途次遇見卽將伊帶回浙省以便質對此案若止派阿桂伊受朕深恩爲大學士自不肯心存回護但究係原審之人著添派閔鶚元會同審辦閔鶚元係科目出身久任巡撫辦事認真且籍隸浙江見聞更爲真切自當秉公無所回護該撫見在江寧監臨鄉試著布政使長齡馳驛前往代辦監臨事宜閔鶚元卽回至蘇州候阿桂經過時一同馳往務將寶光鼎摺內所奏勒派貪贖各款逐一根究其稱黃梅緩報丁憂借演戲以便催糧似非人情所有且此案內緊要關鍵亦不止此阿桂閱鶚元總須將黃梅勒捐派累實在情形審訊明確且寶光鼎進呈田單印票飛頭穀領收帖借票各件俱係黃梅勒派勒借及採買倉穀不發價值虛填收領確實憑據寶光鼎進呈者不過每樣各檢一紙其存留浙省者甚多以此觀之則伊齡阿不免爲屬員所欺矣此事卻有關係欺伊齡阿尙可朕與阿桂可受其欺乎必應審明朕不回護惟有大公至正而已閔鶚元亦應如此阿桂等到彼先須就此各項字帖並調齊控案逐款根究卽無難水落石出況票內一半鈐有官印及伊私用圖印斷非捏飾黃梅如果有種種劣蹟卽應審明定罪以儆奸貪不可顛預完結致滋物議也九月諭曰前因浙省倉庫虧缺不能依限彌補特派大

臣前往查辦並因竇光鼐爲該省學政見聞較切因令就所見聞據實陳奏此朕兼聽並觀之意嗣據竇光鼐覆奏浙屬之嘉興海鹽等縣倉庫虧缺浮於報明之數並以平陽縣知縣黃梅丁憂演戲列款入奏朕以其不避嫌怨曾褒其公正迨阿桂等查明該省虧缺較原報之數有減無增所參黃梅款蹟謂係竇光鼐誤聽人言實無其事而竇光鼐執辨不休且據伊齡阿兩參竇光鼐自赴平陽招集生監逼寫親供咆哮生事其時朕以此案業經阿桂等審明竇光鼐固執已見聚集生童招告恐煽惑人心致啟訐訟之風竇光鼐不得爲無罪是以將伊革職拏問此政體國法必當如此辦理非朕之憎竇光鼐也嗣復據竇光鼐將黃梅貪贖款蹟逐一查出並將借票捐單呈覽臧款確鑿是其言並非無據而阿桂等前此在浙查辦竟爲地方官瞞過伊齡阿又復聽信屬員一面之詞受其慫恿遂爾冒昧奏參不可不澈底根究因卽降旨將竇光鼐寬釋令阿桂帶同黃梅回至浙江並派閱鶚元會同前往查辦茲據阿桂等將黃梅在任婪索各款嚴切審訊黃梅勒借吳榮烈等錢二千一百千文又侵用田單公費錢暨朋帖採買錢一萬四千餘千文而於原報虧缺穀價僅彌補四千餘兩仍未依限補足是竇光鼐所奏惟

黃梅匿喪演戲及侵用廩生餼糧並短發老民銀兩三款屬虛餘三款已爲確實是伊從前冒昧固執之咎尙屬可寬見在陸錫熊已出學差所有光祿寺卿著加恩令寶光稟署理卽行來京供職至黃梅於乾隆四十三年調任平陽縣在任八年種種貪黷營私歷任上司漫無覺察實難辭咎但四十三年以後浙省督撫如王亶望陳輝祖俱已另案治罪法無可加惟福崧在巡撫任已歷數年乃於此等劣員散法侵貪並不據實奏參豈可復膺封疆之任前任藩司盛住所屬州縣錢糧是其專責伊在浙較之福崧尤爲最久亦復置若罔聞姑容闕冗是盛住亦不應仍任織造伊等見交部嚴議自係革任革職難逃寬宥福崧著先革去翎頂盛住亦著革去翎頂俱著來京候旨至伊齡阿於黃梅婪索一案雖非其任內之事但輕聽屬員之言兩次將寶光稟冒昧奏參是其錯謬已自請交部嚴加議處著在任聽候部議其餘失察之各上司俱著交部查取職名分別嚴加議處朕辦理庶務一秉大公至正總期案情覈實從不稍存成見諸臣功過惟視其人之自取除將阿桂等審擬一摺交軍機大臣會同行在該部覈議具奏外將此通諭知之尋諭阿桂曹文植姜晟伊齡阿俱著交部嚴加議處十月授宗人府府丞仍署光

祿寺卿事務十二月部議光祿寺供奶餅缺額降一級留任五十四年四月充殿試讀卷官六月擢禮部侍郎奏安徽學政編修徐立綱人品聲名平常詢督臣書麟撫臣陳用敷有據降立綱以司務博士等官用是月充浙江鄉試正考官八月提督浙江學政五十五年奏近年文體漸靡皆由肄習講章讀坊刻時文所致臣通飭各學講求傳注及身心體驗聖賢立言之旨以前輩文爲楷式以易詩書三禮春秋左傳史記前後漢書五代史及昭明文選唐宋大家古文彙爲月課分月注册考課功過上嘉之五十七年五月擢左都御史十一月命在上書房總師傅上行走五十八年四月充殿試讀卷官五十九年八月充順天鄉試正考官十二月充經筵講官六十年三月充會試正考官四月諭曰朕辦理庶務往往天牖朕衷幾先洞燭本年會試榜發第二名王以銜亦係浙江人朕批閱之下以各直省應試舉子不下數千人豈無真才足拔王以銜王以銜同籍聯名儼然兄弟恰居前列殊覺可疑茲據欽派大臣將覆試各卷分別等第進呈第二名王以銜覆試列在二等次第高下尙不相懸其王以銜竟列在三等七十一名朕親加批閱疵類甚多派出大臣校閱甚爲公當且據磨勘大臣奏稱王以銜會試中式之卷第

二藝參也魯比內用一日萬幾一夜四事等字樣於先賢身分尤爲引用不切似此膚泛失當之卷何以拔置第一且所擬策題紕繆處甚多該考官等於掄才大典漫不經心殊非慎重衡文之道竇光鼐人本迂拘不曉事體朕風聞其於文藝一道尙能留心講習是以派爲正考官不意其糊塗錯謬一至於此且初九日主考出闈復命召見時竇光鼐不特奏對不明跪起兼至傾跌是其年老昏聩豈可復膺風憲之任除副考官劉躍雲瑚圖禮及薦卷不當之同考官等卽照和坤等所請交部嚴加議處餘著照所擬分別辦理外竇光鼐著卽解任聽候部議尋予四品銜休致九月卒

常青

常青佟佳氏滿洲正藍旗人江西巡撫安圖子乾隆六年由寧良郡王府親軍充三等護衛十年遷頭等護衛十四年擢長史十八年授德州城守尉二十一年授鑲紅旗蒙古副都統調盛京熊岳副都統二十四年調西安副都統二十六年調察哈爾副都統以審辦護軍朋楚克札布斃妻案遲延未結部議降二級留任三十一年調歸化城副都統三十四年正月將隱匿盜馬賊犯之驍騎校三濟題補

佐領部議降二級調用得旨改爲革職留任尋以失察庫銀被竊部議革任諭寬免仍註冊十二月授正藍旗滿洲副都統三十年調察哈爾都統三十九年誤拏王啟雲爲山東逆犯王倫黨奉旨嚴飭四十七年授杭州將軍四十九年調福州將軍五十一年六月署閩浙總督七月奏查究泉州府知府鄭一桂供前督臣富勒渾調任兩廣過泉曾備金葉交富勒渾家人殷士俊餽送諭曰鄭一桂餽送富勒渾金葉時富勒渾已離閩浙總督之任乃猶如此逢迎餽送則在任時必有通同交結納賄營私不止鄭一桂一人餽送之事不可不澈底查辦以成信讞此時常青見署總督當以雅德爲戒屬員有無似此餽送款蹟卽據實嚴查覆奏毋得少涉瞻徇致有不實不盡閏七月奏查出富勒渾家人李世榮需索站規諭欽差大學士公阿桂歸案辦理八月奏諸羅縣捐貢楊光勳與弟監生楊功寬因爭家產啟釁糾黨立會欲圖械鬪洩忿經知縣董啟埏會營訪拏復率衆持械奪回就獲匪犯張烈見據臺灣道永福拏獲首犯楊光勳等並餘犯五十三名飭臬司李永祺前往會辦諭曰臺地遠隔重洋非內地可比此等匪犯尤屬不可輕縱必須按名拏獲速正刑誅勿使蔓延疏脫方爲妥善十月實授閩浙總督十二月奏龍

溪南靖二縣界之獅頭山有匪徒陳薦糾黨潛匿不時出山搶劫經漳州鎮道督兵役搜捕盡獲之解省嚴究寘法得旨褒嘉是月彰化縣居民林爽文滋事常青奏據署淡防廳程峻等稟報彰化城陷知縣俞峻死之臣飛咨水師提臣黃仕簡領兵由鹿耳門進派副將丁雄朝等帶兵聽海壇鎮總兵郝壯猷調遣由閩安出口至淡水進都司馬元勳領陸路提標兵赴鹿仔港堵禦臣往駐泉州會陸路提臣任承恩居中調度委金門總兵羅英笈赴廈門彈壓諭曰臺灣地隔重洋民刁俗悍屢次滋事今有彰化縣居民林爽文等糾衆騷擾殺害官長攻陷城池尤爲罪大惡極不可不痛加殲戮以示懲創若輩么膺烏合黃仕簡到彼督率該鎮道盡力堵剿無難立就撲滅但恐餘黨四散竄逸或偷越內渡常青任承恩見駐蚶江一帶著嚴飭沿海口岸地方文武員弁實力巡防最爲緊要常青徐嗣曾等總須不動聲色妥協辦理若因外洋遇有此等案件該督撫紛紛調遣跡涉張皇致內地民人心生疑駭殊有關係該督撫務宜處以鎮定也又奏據偵探守備林雲登稟若輩已到竹塹地方北路一帶悉被占踞郡城急須保護見在任承恩統兵由鹿耳門進諭曰此等奸民糾衆滋事一經黃仕簡到彼自必望風潰散任承恩

本不應前往今既已渡臺亦不須拘泥回任常青仍祇須駐筍蚶江廈門一帶調度策應此時總以靜鎮爲要五十二年正月奏林昭諸羅經臺灣鎮總兵柴大紀堵剿林爽文係漳州人羽黨率隸漳籍難保無內外勾連情事臣惟豫設機宜倍加嚴重並與漳州毘連之廣東潮州等境移會兩廣督臣防範一面督催渡臺官兵協力進剿諭曰常青此次所奏派兵剿捕各事宜較前稍有主見略知鎮定但摺內稱爲首林爽文係漳州人其附從之人率皆籍隸漳屬其中難保無內外勾連情事等語此等居民糾衆滋事無論何處人民附和者卽係夥黨自應按名駢戮若漳泉民人鄉勇果能應募拒敵出力堵禦防守卽係良民自應加以獎賞不應豫存歧視稍露形跡轉致漳民心生惶惑恐別滋事端又奏鹿耳門爲臺地咽喉須厚集兵力庶可近護郡城遠赴攻剿見添派督撫二標兵千檄原任閩安協副將徐鼎士帶領又調福寧鎮各營兵千檄遊擊延山帶領由鹿耳門進交黃仕簡調度上以其過於張皇飭之尋諭曰臺灣居民林爽文等糾衆滋事一案該督常青於剿捕宣撫一切調度堵禦機宜辦理尙屬鎮靜見在水陸兩提督業經渡臺會剿若輩自無難立時撲滅惟是海疆重地將來善後事宜均須妥協籌辦常

青係初任總督恐未能料理裕如李侍堯著調補閩浙總督常青著調補湖廣總督俟李侍堯到閩接印後常青卽來京請訓再行赴任常青奏臺灣守備陳邦光帶領義民由鹿仔港抵漳彼等抵禦邦光擊敗之擒僞帥楊振國等殲衆百餘隨入城護衛受困兵民同回鹿仔港固守並將楊振國解泉聽審報聞旋奏訊明楊振國等情節解京審辦諭曰所獲匪犯朕意本欲令其解京今該督於獲犯審明後卽請解京審辦並鎮靜辦理各事宜皆與朕意適合不意常青竟能如此實屬可嘉此時該督惟應督率弁兵悉心調度以期迅速蕝事朕必加恩嘉獎更不必以調任縈心稍存疑畏轉致剿捕無益時黃仕簡任承恩先後渡臺分南北兩路進剿常青督飭內地各海口嚴查以防竄逸諭曰常青於辦理善後事宜自不如李侍堯之諳練而督率搜捕則常青爲優著李侍堯抵閩後卽駐劄蚶江常青卽親自渡臺督同黃仕簡統領官弁將竄入山內羽黨盡數搜捕務盡根株仍不得因追捕彼等或致擾動生番方爲妥善又諭曰常青已調任湖廣總督今以欽差前往督辦一切題陞調補若專候本省總督李侍堯辦理則所統將弁等見常青不能專主或心中以爲卽奮勉出力亦不能卽邀拔擢未免稍生懈怠著傳諭常

青見在臺灣將弁如有陣亡而有懸缺未補者常青到彼卽應於統率弁兵內覈其實在出力者官則酌予陞擢兵則拔補千把一面具奏一面知會李侍堯俾有事權以便策勵將士是日柴大紀等奏請添兵諭曰常青到臺灣後務須察看情形如果必須增添兵力卽一面具奏一面咨會李侍堯於附近各營再撥二三千名速渡臺灣俾資策應時侍堯奏調粵兵四千一由廈門赴鹿耳門一由蚶江赴鹿仔港諭曰常青處所有之兵尙未免單薄著傳諭李侍堯如粵兵尙未分路配渡卽檄令全赴鹿耳門直抵臺灣府城俾常青處兵力壯盛足資調遣如業經分路配渡前進著常青於粵兵將抵鹿仔港者亦卽調來合爲一處常青親帶勇往將弁徑赴大里杙圍堵鼓勵弁兵務將爲首林爽文一鼓擒獲其餘羽衆不難撲滅淨盡四月抵臺劾黃仕簡任承恩遷延觀望擁兵自衛郝壯猷守鳳山敵至棄城走請分別治罪諭逮任承恩撤回黃仕簡寘郝壯猷於法授常青爲將軍旋奏林攻府城率兵勇擊退諭曰若輩竟敢攻犯府城常青親率官兵鄉勇臨陣多有斬獲此時粵東兵丁陸續到彼常青得此自可鼓其精銳迅速進攻所有該道府請發銀十萬兩米十萬石卽著李侍堯速行照數運往以備接濟並著常青就近

先行酌量如有多餘兵糈或米或穀賞給貧民務使不致逃散方爲妥協又奏府城外之桶盤棧草店尾柴頭港三處地最衝要偵知賊匪將犯府城豫派遊擊蔡攀龍等帶兵紮營賊連次進撲率兵勇出城殲戮無算賊目莊錫舍悔罪投誠諭曰此次賊匪有攻犯府城之信常青豫先設法防堵於桶盤棧等衝要地方豫派遊擊蔡攀龍等各帶兵分紮營盤相機堵剿籌畫調度俱合機宜逮賊匪分路攻犯府城常青率官兵鄉勇迎捕截殺斬獲甚多常青年逾七旬尙能如此勇往督戰朕心深爲嘉獎伊係年老之人宣力海疆無親子在旁侍奉殊堪繫念著伊子刑部筆帖式喜明賞給三等侍衛馳驛前往臺灣省視並將賞給常青之玉扳指等件卽著伊子帶往以示優眷常青感激朕恩益思奮勉勇往迅能剿除餘黨永靖海疆朕必格外加恩五月奏林爽文潛回大里杙臣應直攻北路但南路羽黨莊大田等衆不下萬餘若遽統兵北向不惟鳳山等處被擾亦恐乘虛來犯郡城須剿盡南路然後乘勝北趨上躡之諭部優敘部議加三級六月奏圍堵南潭殲六百餘投誠之莊錫舍擒僞軍師番婦金娘請解京審辦留錫舍軍營效用命賞給錫舍守備又奏各路征兵雲集見派副將丁朝雄等守府城統兵往鳳山南路

搜剿諭曰據常青等奏統領官兵起程進剿一摺據稱先往鳳山南路一帶餘黨分踞之處堵截圍拏但摺內又稱莊大田等恃衆鴟張仍敢於離城二三十里之外大穆降等處聚衆等語若輩敢於附近府城各處聚衆占踞儻窺伺大兵已出乘虛滋擾雖常青等派有副將丁朝雄等帶領官兵足資堵禦究不免有後顧之虞常青先應將城外羽黨搜捕圍拏將爲首莊大田設法擒獲肅清肘腋方可乘銳前驅尋奏進剿鳳山出城未十里若輩三路兜圍官兵擊退之又連夜糾集抗拒見在其勢蔓延前調官兵不敷進剿請厚集兵力命大員前來督辦上以派大員前往跡涉張皇諭添兵會剿又諭曰常青本由都統將軍甫經簡授總督更事未多今自到臺灣後一切調度尙能妥協已出人意料之外但伊究竟年逾七旬精神未能周到昨奏請派一大員到臺灣督辦其意未必非自揣難以勝任欲朕另簡大臣前往督辦軍務不可不豫爲籌及命陝甘總督福康安前往督師諭曰常青見在臺灣督辦軍務其湖廣總督之任雖經舒常署理而常青係正任自有應得廉俸等項但閩省既不支給而湖廣又不便專差齎送該將軍在臺灣一切用度何所仰給著李侍堯將常青應得湖廣總督分例廉俸卽在閩省庫內按數

給支常青奏餘黨犯府城經丁朝雄等擊退又撲桶盤棧官兵齊赴接應殲其數十乘勝追捕殺傷甚衆莊大田在南潭遣羽黨千餘焚劫蔦松等處官兵馳剿又槍斃二百餘見在大營距府城未遠勢將犄角無後顧之虞得旨嘉獎賞雙眼花翎命直趨南潭會剿七月若輩冒雨撲大營復攻桶盤棧官兵禦之殲百餘諭曰常青等奏到情形是伊等尙紮營駐守因賊匪僅一百餘人不及十分之一未能乘機進剿此次添調各兵計粵省先行調兵二千及李侍堯挑備兵二千此時均可前抵臺灣此外添調兵丁尙須時日常青等斷無坐待株守之理前曾諭令該將軍等統領侍衛章京將備徑往南潭擒拏爲首莊大田設餘黨奔救即可聚而殲戮該將軍是否卽行派撥直趨南潭若察看情形可以如此辦理業已前住固屬甚善但若輩出沒無定甚爲狡猾若因常青等統兵前往南潭彼等卽糾合夥黨繞截後路亦不可不慮該將軍等務須加意防範或派奮勉將弁斷後使我兵首尾相應不致被其抄襲方好常青奏鹽水港笨港均被彼搶占以絕糧餉諸羅勢甚危急添派總兵魏大斌等率師堵禦仍照料郡城南北兩面以及鹿耳門要口諭曰賊人狡計係因大兵俱在府城諸羅一帶兵勢單弱故作窺伺府城以牽

綴官兵使常青等不能遠離該處營盤而其意實欲斷我糧道攻偪諸羅常青此時竟宜先往北路或於總兵副將內擇其奮勇可恃酌撥一員令其固守營盤而常青等竟揀選精銳親自帶領直趨北路前至諸羅會同柴大紀併力擒渠擣穴或再分派勁旅將鹽水港屯占羽黨悉力殲除打通糧道此爲上策常青奏被擾鹽水等處當派魏大斌等帶兵應援詎南路羽黨聞郡城北面有警糾衆七八千圍大營三面又犯桶盤棧官兵分路奮擊敗之諭曰南路餘黨將官兵牽綴狡黠顯然是常青等在府城結營株守無益竟當遵照前旨直趨北路會合攻剿爲是時魏大斌剿擊失利派游擊田藍玉赴援上以零星派撥無濟於事飭之旋諭曰本日詢問常青齎摺差弁饒成龍據稱將軍紮營在小南門外十里之桶盤棧地方自五月二十四日以後與若輩打仗數次因彼等四路抵禦未能前進羽黨莊大田所踞南潭距桶盤棧營盤只有五里等語常青等自駐筭臺灣已經數月其桶盤棧營盤相距南潭不過五里該將軍等早應統領大兵將羽黨莊大田先行剿除乃惟知結營自守似此肘腋之間任其偪處竟不思乘勢攻剿實不可解前以爲南潭離大營尙遠故屢次諭令該將軍等酌留官兵固守營盤親統大軍舍

南趨北與柴大紀藍元枚會同進剿此時如尙未啟行該將軍等卽行帶領官兵速將五里外南潭屯聚之莊大田痛加剿洗以清肘腋八月命福康安爲將軍諭曰朕特命福康安前往更換常青並非因常青辦理軍務大有貽誤實因常青年逾七旬軍旅之事本非素練恐日久因循不能辦理完結是以特命福康安前往接辦以期迅速歲功福康安未到之前常青接奉此旨不必心懷疑懼轉致遇事茫無主見遇有可進之機仍當督率將弁相機進剿儻此時能將爲首林爽文擒獲固屬甚善卽爲首尙在稽誅而羽黨莊大田若能擒獲官兵已操勝勢卽著該將軍由六百里馳奏尋奏南潭餘黨侵擾派侍衛烏什哈達等擊敗之因雨後路滑收兵旋又督兵由少岡嵌腳北勢三路進剿南潭沿路斫伐密箐使不能藏伏悉出抵禦槍斃者甚衆三路軍合剿直至南潭燬草藜數百間始竄因天晚山徑偪仄不便深入上以莊大田旣在南潭卽應奮力追獲乃屢以遇雨收兵傳旨嚴飭又奏軍中染患暑溼莊大田探知消息仍復屯聚若舍南趨北恐附郡羽夥竊發安業各莊不無惶惑上以亂民探知軍中染患係常青機事不密之咎又不統兵北向不免蹈黃仕簡覆轍申飭之常青奏督率總兵梁朝桂等剿于南勢莊多

斬獲並奏據新授陸路提督柴大紀咨報諸羅圍急糧餉鉛藥俱罄卽派副將蔡攀龍等領兵救援諭曰常青若能先將南路羽衆悉力殲除羽黨莊大田拏獲固可稍贖前愆否則速統大兵乘其新到銳氣直趨北路前抵諸羅亦尙可補過卽屬常青之福若惟知株守郡城坐視柴大紀被彼圍困致有疏虞則是常青罪上加罪恐不能當此重戾也九月奏大兵赴援諸羅行至三坎店遭遇抗拒擊敗之旋據留守郡城之總兵梁朝桂報賊從南潭中洲一帶來犯郡城臣折回夾擊勢稍卻旋又四路攔截道梗不能北向諭曰常青且將南路屯占餘黨剿殺以清後路十月又犯大營東南率梁朝桂等迎擊轉戰至大河溪邊殲其二百餘諭曰常青在府城駐守雖未能前進但一切調度尙俱妥協又聞知諸羅鹽水港兩處被其滋擾先後派兵接應且伊在府城亦經屢次與彼打仗是常青雖屬年老尙能料理軍務且福康安到鹿仔港後由北路統兵進剿其南路及府城一帶亦須有大員駐劄督辦應令留駐府城督率剿捕十一月奏附近府城餘黨漸次剿盡近日南路民人隨營效力者衆擬廣招義勇數千廓清南路以便往救諸羅上以常青帶兵南路不如先救柴大紀爲是諭與福康安會合進攻又奏同江寧將軍永

慶等三路進攻在竹篙厝等處殲彼甚衆山豬毛社義民尤趨捷獲礮一生擒羽黨張招得旨嘉獎又奏總兵普吉保已攻開月眉莊等處離諸羅五里飭令與柴大紀并力固守俟福康安到鹿仔港協同埭穴擒渠並分飭弁兵嚴防海口毋使彼搶船遠遁又多備札諭令熟識番情之諸羅生員劉宗榮等密往大武隴後山結番社通事土目防其竄匿上嘉其所辦妥協時福康安統兵渡臺授常青福州將軍留辦善後事宜十二月奏派侍衛雅爾彊阿等剿之府城小南門大北門外並堵禦府城沿山要隘又令永慶等稽查海口並飭臺灣道永福曉諭遠近莊民概許輸誠復業卽令踪跡莊大田共相擒獻諭飭防海口截莊大田竄逸爲要五十三年正月奏莊大田藏匿南子坑該處係鳳山縣屬見派丁朝雄相機前進開通鳳山道路設法擒拏上責其敷衍陳奏傳旨嚴飭又諭曰前因常青初至郡城調度一切尙爲妥協且伊年老尙能親自帶兵打仗是以賞戴雙眼花翎以示獎勵今半載以來株守郡城毫未出力念其尙無大過業經補用福州將軍伊自當照將軍職分戴用單眼花翎時福康安劾柴大紀貪劣狀諭曰常青在閩年久擢用總督亦有年餘柴大紀平日飭法侵漁廢弛營務常青豈無所聞乃竟無一字

奏及殊屬味良辜恩有心徇隱常青著革職交與福康安一併嚴審據實具奏是月爽文就擒福康安移師南路擒獲莊大田臺灣平諭常青見已革職所有善後事宜毋庸交辦五月福康安奏柴大紀貪贖不法訊之常青自認徇隱不諱請交部治罪諭曰常青於柴大紀貪贖不法一案徇隱不奏前曾降旨將伊革職交福康安審訊經福康安奏請交部治罪固屬咎由自取但念常青由將軍簡用總督在任未久卽值臺灣居民滋事非富勒渾雅德歷任年久因循貽誤諱飾袒庇者可比其到臺灣後於柴大紀種種劣蹟固易訪查但彼時正值辦理軍務其不卽查參亦屬可原且伊年逾七旬帶兵駐守郡城保護無虞功過尙可相抵常青著加恩免其交部治罪俟到京後候朕酌量加恩另降諭旨七月命署鑲紅旗蒙古都統五十四年正月授禮部尙書五月上幸避暑山莊命留京辦事兼署吏部尙書七月授鑲藍旗漢軍都統八月賜紫禁城騎馬十二月充經筵講官五十八年卒諭曰常青見在病故所有伊名下應交未完官項著加恩免其賠繳以示軫卹賜祭葬諡恭簡子喜明官至烏里雅蘇臺將軍

袁守侗

袁守侗山東長山人乾隆十四年由舉人授內閣中書十八年在軍機司員上行走二十年遷侍讀二十一年遷吏部文選司郎中二十六年遷監察御史旋授浙江鹽驛道二十八年遷廣西按察使二十九年奏議章程一軍遣重犯宜一體酌撥也桂林太平柳州慶遠潯州思南鬱林等府州安置江西湖北湖南河南廣東四川福建雲南貴州九省軍流新例將直隸各省積匪改發雲南兩廣煙瘴充軍人皆兇悍聚多滋事請將發廣西煙瘴軍犯分撥泗城鎮安二府寧明東蘭二州庶桂林等處軍犯減少易於約束一疏脫重犯之長解宜監候充發也定例押解斬絞重犯兵役審係依法管押偶致疏脫照例減等問徒但長解等專差管押較短解更重請嗣後重犯脫逃百日限滿不獲短解仍照律問徒長解羈禁另選幹役同長解親屬偵緝一年內獲者審無賄縱情弊照律擬徒限滿無獲問擬滿流一書役幫夥宜立法稽查也各衙門書役原有定數近惟典史捕役充革上司有冊可稽其餘貼寫幫差任意濫收招搖勒索請通飭各省量公事繁簡定貼寫幫役多寡將見有書役分別汰留冊報上司存案違者參處九月又奏言卓異官員向由府司道保薦督撫具題如藩臬道府甫經蒞任適逢計典皆照例出結非慎

重舉覈之道請嗣後司道府到任已三月者照例出結否卽概行停止如前官已覈定卽將冊結列銜交接任官用印代詳題本內聲明庶保薦益昭慎重均下部議行三十一年丁父憂三十四年服闋詔留京以三品京堂用仍在軍機司員上行走七月補太僕寺卿十二月擢吏部左侍郎三十七年二月調刑部侍郎命往雲南會同巡撫李湖查辦宜良縣知縣朱一深揭布政使錢度貪婪案鞫實抵法三十八年五月兼署禮部右侍郎九月詔在軍機大臣上學習行走尋充方略館總裁官三十九年七月兼管順天府事十月命往雲南鞫保山縣知縣王錫因供給原任總督彰寶虧空兵糧案擬罪如律十二月調吏部侍郎四十年八月敕偕侍郎阿揚阿往查貴州鎮遠府知府蘇橋揭督撫藩臬袒庇同知席纘案暫署貴州巡撫尋奏橋聞被劾信圖先發制人總督圖思德參橋浮徵婪索屬實應卽行正法閏十月赴四川審松岡站員冀谷勳侵蝕軍需銀米案鞫實抵罪四十一年二月以辦理金川議敘三月擢戶部尙書命往四川審辦富德多用賞號銀案卽押解來京富德家人在途滋事上以守伺係專差承審大員交部嚴加議處部議革職詔留任十月命紫禁城騎馬十一月賞黑狐端罩四十二年調刑部尙書四

十三年三月命同侍郎阿揚阿赴甘省盤驗州縣捐貯監糧實數結報無虧七月
詔同兩廣總督高晉赴豫籌堵儀封漫口四十四年正月守侗奏言遵兜袖法築
兩壩頭以期迴溜分入引河尋會籌漫水口門分東西兩壩堵禦就舊有順隄河
於十八堡外灘起至瞿家莊開引河達入舊河浚舊河淤以暢水勢築十八堡缺
口攔順隄河水歸新開引河切去十六堡口門對岸灘嘴諭實力爲之復以引河
頭去口門稍遠奏開引溝三百餘丈直達引河上嘉其辦理便捷以圖內擬開引
河向南恐紆溜不能得勢硃筆向北改直標識尋覆奏儀封壩工墊場因將屆堵
合時以數丈口門容受全河入袖之水隄根刷深成槽勢難輓令北趨今用遵兜
袖法讓出口門由外越向東北鑲築偪開溜勢壩頭不致著重從前將西壩頭趕
鑲平整原有邊埽五丈一律鑲高又於邊埽外占出三丈舊壩臺十丈復外築成
新斜壩臺八丈臺後俱幫寬加厚新築壩之埽漸次鑲出兩面兜收溜處自挑向
北趨至新開引溝原因引河距口門太遠迤西舊有溝槽與新斜壩挑溜處相對
卽於此興工挑挖嗣因西首露有灘嘴復切去三十二丈稍向東南誠如聖諭仍
恐溜未能得勢今遵圖內標示陰將西首淤灘切去四十七丈俾溝口愈向西北

開寬溜勢到此更可吸水下注疏入報聞四月授河東河道總督十二月調直隸
總督賜詩曰督軍兼理撫民事責器重資特簡諸中外久經勤敷歷淀河並賴善
防疏葺修行館猶餘事保障京畿慎匪舒幕府一年凡兩易掄材宅牧益愁予四
十五年十月奏言北運河筐兒港修築減水石壩已逾八載迎水出水各水工年
久衝壞請撥通水道庫銀三萬兩購料鳩工務於汛前修竣下部知之四十六年
二月守侗母呂氏年七十賜御書扁額並大緞五月以永定河北岸頭工隄長險
要奏請移原防南隄九工之武清縣丞駐北岸防護從之八月諭曰袁守侗從前
差往甘肅盤查監糧稱屬實貯今據阿桂等查奏情節已屬失實著交部嚴加議
處部議革職詔從寬留任十一月丁母憂四十七年九月諭勘浚伊家河以疏山
東積水十月奏勘伊家河自微山湖口起至江南梁旺城入運河止計六十餘里
乾隆二十二年挑曳湖水河頭河尾俱寬深惟中間自善橋以至北花山橋迤南
楊家樓止長七千二百四十五丈因王家河口及萬年橋一帶河底多沙礮伏秋
水發淤積沙停河距運河八閘近必挑深方資分消應浚深至八尺爲率其兩岸
過狹處一律展至六丈得水橋座應拆改東西岸缺口應堵築諭速行辦理尋擢

直隸總督四十八年五月卒諭曰直隸總督袁守侗端重篤實才守兼優敷歷中外宣力有年簡任畿封正資倚畀近聞其病後痰喘未止屢經諭令加意醫治昨據奏請解任因命御前侍衛豐紳濟倫前往看視諭其安心調理以冀速痊今聞溘逝深爲軫惜著加恩晉贈太子太保入祀賢良祠任內降革處分俱予開復應得卹典該部察例具奏賜祭葬諡清愨

陸燿

陸燿江蘇吳江人乾隆十七年舉人十九年考授內閣中書二十八年遷戶部主事三十一年遷員外郎三十三年遷郎中三十五年八月選雲南大理府知府以親老改補近省十二月調山東登州府知府三十六年調濟南府知府三十七年二月以新選山西老營堡巡檢鉅野縣吏員趙義之子汝棟頂父名投驗領憑經盤詰訊供在監畏罪自縊該管官防範不嚴奉旨交部嚴加議處部議降一級抵銷八月擢甘肅西寧道九月諭曰據徐績奏新授西寧道陸燿稟稱蒙恩逾格擢用不敢以親老道遠爲詞懇請給假一月送母至京居住卽行赴任陸燿旣因母老不能遠涉長途該員在東省已歷年餘於地方諸務較爲諳練著卽留於東省

補用誠屬兩便陸燿著調補山東運河道四十年擢按察使四十一年以平陰縣捕役誣良毆斃縣民事部議降一級調用奉旨從寬改爲革職留任四十二年上東巡恩旨開復降革處分四十三年閏六月擢山東布政使十二月奏親母陳氏年老多病請解任回籍終養諭曰據陸燿奏親母陳氏見年七十九歲久患痰症入冬以來病勢轉劇非臣親身調護則晝夜不寧而以此牽懷必致公私兩負懇恩解任侍養等語所奏自屬實情伊母生長南方水土相習若回籍調治或可就痊陸燿著准其解任俾侍母南歸以遂其依母奉養之情四十六年十一月丁母憂四十七年九月以前在山東藩司任內失察倉庫虧空部議革任奉旨陸燿著於補官日免其革任仍註冊十二月以興修山東運河隄工諭曰前任山東布政使陸燿曾任連河道數年熟悉河務見在將屆服闋著卽前往山東會同沈啟震將應行修理各事宜妥協照料實心籌辦四十八年命署理山東布政使四十九年四月服闋實授七月擢湖南巡撫五十年正月奏湖南省嶽麓城南兩書院肄業者多額設膏火有限請將從前積存息銀三千兩交商行息以充膏火報聞尋奏定例官員父母年七十以上家無次丁或年至八十以上雖有次丁俱准呈請

終養蓋朝廷用人首重於孝孝於家而後可望其忠於國人子出仕有年其父母先已迎養在署自可朝夕承歡公私兼盡若父母初未隨任在外者不肯言歸轉出求仕致使垂白倚門或明知桑榆已迫強令跋涉相隨於名教大有關係懇祈敕下各直省督撫不論見任及試用人員凡親年八十以上及獨子之親年七十以上者通飭呈明終養上是之下部議行三月奏岳州府屬之臨湘縣向定爲衝繁難要缺在外揀選調補今查該縣幅員不廣軍民交涉事件自清釐屯田後各知遵守章程部選之員堪以勝任請改簡歸選部議如所請行四月以山東藩司任內秋讞會審失入一案失出十案以內部議銷加一級再降一級留任是月奏邵陽縣知縣魯大治於縣民田貢告因姦致卜陳氏自縊身死案不悉心研鞫輒將無辜之田文勝擬罪致田文勝之弟田學勝憂忿自盡請褫大治職寶慶府知府永柱於所屬偏聽枉斷不能覺察平反致田學勝自盡屍屬呈報時復批縣詳查致屍身發變請將永柱交部嚴議並聲明永柱見在告病上以該府於所屬命案瞻徇玩忽見在審辦未經完結自應歸於議處案內辦理何得准其告病著將陸燿交部議處部議降一級留任六月奏湖南社倉本息穀及前撫臣劉墉奏令

湘陰等四十五州縣勸捐穀十二萬節經前撫臣李世傑等催繳臣到任後復勒限嚴催僅據耒陽等一十五州縣照數收齊其餘未足數者一十七處並有全未交收者十三處如湘陰巴陵武陵等縣濱臨江湖地多磽瘠桂陽瀘溪辰谿等縣介在山僻家鮮蓋藏若執前捐數目責令全完則民間未霑借貸之益轉受追呼之擾請以見在上倉穀數造報未收者停止催繳上可其奏是月因病奏請解任報允旋卒

鄂寧

鄂寧滿洲鑲藍旗人姓西林覺羅大學士鄂爾泰第四子乾隆十二年舉人十八年補戶部筆帖式二十二年遷戶部主事二十三年遷員外郎二十四年調銀庫員外郎二十八年九月署正紅旗漢軍副都統十二月署鑲紅旗滿洲副都統二十九年三月補戶部郎中十一月擢禮部侍郎三十年三月補正紅旗漢軍副都統七月管理欽天監事務九月署理藩院侍郎十月潘家口監督赫達色五岱違例征收多倫諾爾木植稅銀濛混報部上命鄂寧偕楞勒木濟往訊得實赫達色擬斬五岱革職鄂寧等隨奏請潘家口稅務歸張家口監督管理每年春秋二次

監督親赴河口稽查又潘家口所屬小口六處均在永平府屬距張家口較遠應歸通永道徵收部議從之三十一年二月授湖北巡撫七月奏言湖北寶武庫每年額辦湖南銅十萬斤今准部議停見供鑄不敷請買漢口商銅下所司知之十二年二月調湖南巡撫三十二年二月調雲南巡撫三月至普洱辦理軍務賞戴花翎四月奏言滇省產銅凡可開礦廠不限遠近俱准開採三十一年督臣楊應琚奏請止許距廠四十里內開挖遵行在案今舊廠年久礦稀限地勢有難行請仍舊例無論遠近均聽開採詔如所議行是時大兵剿緬甸雲南總督楊應琚奏報多不實命回京以明瑞補授雲南總督并諭鄂寧查明楊應琚欺飾錯謬之處具奏鄂寧疏言去年普洱事竣賊匪退回若綏輯得宜必不敢跳梁窺伺楊應琚輕聽人言以爲機有可乘遣副將趙宏榜等涉兵夷境賊勢蔓延始調兵堵禦迨榜勒木合剿失機致賊從萬仞關突入楊應琚並不據實奏報請罪又緬匪突入隴川設計詐降緩兵楊應琚輒行入奏未幾卽有猛浪之擾至所奏節次殺賊幾及萬人等語榜勒木之戰賊未退去及萬仞關失守我軍防禦不暇安有殺賊甚多之事前後檄調官兵朝令暮更忽調忽撤虛糜廩餉得旨鄂寧所奏皆實楊應琚債

事失機著革職交刑部治罪明瑞未到之先總督印務鄂寧暫行署理見在一切軍營應辦之事悉心籌辦務期妥協鄂寧旋奏言緬匪由整賣景綫一帶竄入孟艮打樂勢將占據猛遮猛浪官兵退守九龍江恐賊分路滋擾請於貴州南籠威寧等鎮調兵三四千接應諭曰此說無益且恐衆人聞之轉生驚疑鄂寧此時惟當按兵不動示以鎮靜不可稍涉張皇況邊外瘴癘已盛亦不必復令將士冒觸前進俟明瑞到彼相度時勢剋期進剿五月緬甸攻木邦截奪軍糧官兵退至龍陵鄂寧請將提督楊寧總兵索柱治罪得旨伊等到軍營甫半月暫行寬免以觀後效六月奏言九龍江外附近之猛浪猛籠等要隘分兵防禦餘駐茨通接應其戶老坡孟連龍陵等處缺乏籽種之戶分別撫恤量給籽種並勸土民廣爲播種見在運到米石卽貯茨通備用并於思茅多貯陸續轉運上嘉納之七月緬匪潛渡小猛崙竄入龍江鄂寧奏劾總兵德保畏葸退縮撤兵退回思茅命拏解德保來京問罪十月諭明瑞見在統兵進剿緬匪鄂寧駐劄永昌滇省營務皆須該撫代辦所有各鎮協營一應公事俱聽其節制十二月奏言見於杉木籠防兵及永順鎮標在城兵內挑馬步兵六百駐劄虎踞關專遞文報並可爲大兵聲援又官

軍沿路齎糧未敷請將永昌所屬土司採買之米運六千石至虎踞關存貯諭曰
猛密進兵所過程途須安放軍臺以資運給應照木邦一路安臺之法沿途派兵
分置鄂寧奏言大兵進至老官屯攻取賊人木城馬膊子地方爲咽喉要區應派
兵駐劄令就於虎踞關見駐兵內撥三百杉木籠駐劄土練內撥二百留虎踞關
聽用自老官屯前進沿途安臺於附近永昌之提標大理城守營調兵一千撥往
安置附近騰越之緬箐原駐防兵三百餘黃林岡駐防兵四百餘亦酌撥爲安臺
之用三十三年正月參贊大臣額勒登額等由老官屯撤出旱塔賊尾襲我後至
輒橋又由猛密衝出我兵擊敗之賊逃新市街鄂寧奏新市街路通鐵壁關防守
宜嚴見自員果樹至虎踞關擇扼要處分兵駐守至虎踞關鐵壁關亦應分兵專
駐並飭杉木籠黃林岡緬箐等處管領防兵守備勤加哨探實力嚴防奏入諭曰
今明瑞已懸軍深入額勒登額等祇以守地爲詞並不繼進其罪已不可問汝不
將額勒登額譚五格之逗遛無能查參而反處處添兵防守亦可謂不知事體矣
鄂寧奏賊由小路繞過木邦據錫箔橋官兵撤回木邦已調滇兵三千赴援復分
旱塔兵數千接應并調貴州兵二千備撥上是之二月奏木邦道路不通明瑞大

兵駐大山臣屢催額勒登額前赴宛頂接應時額勒登額頓兵不進明瑞以無援戰歿旋奏劾額勒登額譴五格爲猛密一路官兵統領乃於老官屯久駐旣不能攻克賊柵退回旱塔後令前赴軍營應援飛催七次尙未往抵木邦坐失事機實爲罪不容誅額勒登額等尋治罪詳明瑞傳諭曰鄂寧自調任滇撫以來一切籌畫軍營具見實心經理實不愧爲大學士鄂爾泰之子朕心深爲嘉悅著加恩賞給內大臣銜並賞荷包四個以示優眷時續辦進剿緬甸事宜尙書舒赫德授參贊大臣赴雲南鄂寧旋擢雲貴總督四月舒赫德鄂寧奏滇省非四達之區馬匹米石購辦實難且道路險窄夫馬缺乏臣等悉心計議賊匪雖屢抗我顏行皆自救其死未敢稍犯內地必有留爲求作天朝僕隸地步之心臣等密訪得實或可仰邀恩赦得旨此奏甚屬乖張鄂寧自簡任滇撫以來諸事尙知奮勉今籌議此事何以前後如出兩人招致緬匪一事實係何人起議據實覆奏五月鄂寧奏臣由永昌回省時聞緬夷有赴明瑞軍營乞降之語詢問提督哈國興據稱緬匪狡詐不可信舒赫德復語臣云進剿緬匪猝難成功若緬匪投降或是機會臣實誤聽舒赫德之言妄行入告諭曰舒赫德鄂寧二人所見乖謬相等並交部嚴加議

處鄂寧著革去內大臣銜亦不必戴翎尋議革職諭曰鄂寧此事尙由聽信舒赫德之言不能力爲主持所致而鄂寧之最難辭咎者則在檄額勒登額進援不應而不身赴軍營督辦在額勒登額乖張決裂其事本非意料所及但鄂寧以滿洲總督且係鄂爾泰之子目擊大軍深入而援師又任催罔應卽親趕赴旱塔一路相機策應朕方嘉其能知緩急機宜深得大臣之體豈有轉責以擅專之理乃鄂寧不知出此而惟以難離永昌藉口試問鄂寧果能統衆直進則身當前路賊人何由繞道窺伺永昌設云賊衆甚張其勢竟可偪近內境則鄂寧雖株守永昌於事亦復何益此事理所易曉非委畀封疆重寄者所當力圖報效者乎今雖事屬既往而其原委不可不明白宣示以訓將來之封疆大臣也鄂寧旣於籌畫軍務不能確有所見所有雲貴總督事務亦難望其勝任第念伊前在湖北等省於地方內巡撫事務尙能黽敏辦理鄂寧著降補福建巡撫革職之案帶於新任十年無過方准開復三十四年正月疏言閩海關稅乾隆三十一年三十二年因稅額短缺將軍明福將次年洋稅提補又三十二年至三十三年將屆報滿時新將軍常在亦提取下屆洋稅充額明福實始作俑而常在竟敢踵行請派大臣審理得

旨卽交鄂寧審訊明福常在俱著解任所有將軍印務鄂寧卽行暫署二月以失察奸匪降一級留任四月諭曰鄂寧前在雲貴總督任內辦理軍務俱未妥協是以降補福建巡撫以勵其後昨聞戶臘撤地方去年有被緬匪滋擾之事令副將軍阿里袞等查奏今據奏到則上年二月因額勒登額退兵繞道潛行致賊尾隨之竄入戶臘撤地方搶掠滋事經副將王振元稟報鄂寧將此等情形竟敢匿不奏聞顛預了事其獲罪甚重豈可復任封疆鄂寧著革職賞給三等待衛往雲南軍營自備資斧效力贖罪此係朕格外加恩鄂寧若不感悔實力奮勉報效必當重治其罪并諭曰鄂寧查辦閩關一案經久不見審結意其必有遇事吹求之處著崔應階秉公查奏鄂寧尙未審明卽著崔應階審擬完結閩浙總督崔應階鞠明福等得實奏言鄂寧辦理此案不敢稍爲寬縱亦不過於苛求尙屬秉公據實辦理得旨鄂寧以內地民人被緬匪擄去欺飾不奏其罪不在此矣尋以雲南巡撫任內失察呈貢縣知縣楊家駒科派累民部議降二級留任十二月諭曰督撫藩臬係統轄大員與專司稽查者尙屬有間可稍從寬貸所有前任巡撫鄂寧著仍降三級賞給二等待衛職銜三十五年三月降藍翎侍衛七月卒

宗室莽古賚

宗室莽古賚正藍旗人不入八分鎮國公揚福之子雍正五年授三等待衛十三年十一月授宗室侍衛什長十二月授協辦班領事務章京乾隆三年二月授侍衛正班領五月晉頭等待衛七月授鑲白旗漢軍副都統十月調正藍旗滿洲副都統五年正月命往西寧辦理青海事務五月奏青海二十九旗各札薩克例於每年六七月齊集察漠陀羅海查審事件設宴會盟從前奉旨準噶爾夷使進藏將青海沿途經過駐紮之蒙古酌量搬移今查察漠陀羅海乃由東科爾進藏必經要路未便使二十九旗與之齊集一處見今夷使尙無進藏確音俟六七月間如無信息仍循例傳集會盟儻夷使於是月內已到則須俟彼從東科爾起身計程可渡木魯烏蘇後再行傳調六年四月奏青海蒙古貿易定例由西寧鎮屬之東科爾如赴西寧稟報公事亦由彼行走是東科爾乃青海蒙古往來聚會要區惟準噶爾夷使往藏熬茶亦在此地住歇貿易若仍聽青海蒙古往來則與夷使居住咫尺事恐未便儻因夷使在彼暫停青海蒙古往來伊等多資易貨養生且遇稟報緊要外事亦難禁止更兼西寧一府民間食鹽向無引商通運全資青海

鹽接濟貿易未便暫停查西寧邊口東科爾外尙有南川黑林二口原係蒙古往來大道相距東科爾八九十里及百餘里不等見飭各札薩克轉傳所屬凡遇貿易稟事徑進南川等口俟夷使起程後仍在東科爾貿易上嘉之八年二月青海多羅郡王額勒德尼等具呈理藩院稱莽古賚在任三年辦理青海事務衆心悅服懇轉再留三年得旨允行尋莽古賚奏稱換班辦理西邊夷務不止青海一處儻屆更換之期盡行呈請留任殊屬非理設辦理稍有未協以爲留任可求去任亦河求甚有關於邊防國制請仍扣期更換以杜將來之弊奏入諭曰此奏非矣彼之所奏亦出於情願耳又奏番人米拉等三十五人被郭羅克番賊搶奪牛馬牲畜餬口無資請將應納貢馬暫免二三年從之十年調正白旗滿洲副都統旋授鑲紅旗護軍統領二十二年六月授正藍旗滿洲副都統十月命赴伊犁北路軍營在參贊大臣上行走二十三年五月隨定邊將軍成袞札布領兵赴布延圖追剿舍楞賊衆二十四年因追捕瑪哈沁塞布騰等辦理遲延致塞布騰投入鄂羅斯命往西藏辦事三十五年四月奏請將呼畢勒罕伊什達木巴拉布賚邱記仍行賞給達爾汗號三十六年二月奏西藏所屬阿克蘇地方三十九部落應交

貢馬銀三百餘兩請照四川例蠲免均如所請行三十七年奏兵丁徐明如僱覓唐古特婦人致伊夫杜華服毒身死諭曰徐明如係駐藏兵丁膽敢將唐古特婦人僱覓來家經年共處與宿娼無異該管大臣並不嚴行禁止疏懈之極著交部嚴加議處嗣後兵丁僱覓婦女永行禁止三十九年回京授正白旗滿洲副都統旋賞戴花翎四十年九月調盛京副都統十二月襲奉國將軍四十四年授陝西寧夏將軍四十六年三月陛見上詢以操演事務莽古賚面奏將軍任所每月操演六日均派章京等閱看諭曰各省將軍副都統除管理兵丁外有何承辦事件每月但操六日已屬曠職何至六次仍不親臨閱看嗣後操演兵丁均宜親往閱看若仍派章京朕必從重治罪著通行曉諭知之是月撒拉爾回匪蘇四十三等犯河州命莽古賚選兵一千名預備調用莽古賚奏請酌給兵丁治裝銀兩上以其於此等細事過於留心則緊要事件必致貽誤飭之時大學士阿桂督師進剿令莽古賚守龍岡梁接應六月蘇四十三伏誅捷聞交部議敘四十七年八月涼州副都統圖桑阿奏請涼州添兵一千莊浪添兵五百上命莽古賚議奏旋奏涼州原額兵不過一千莊浪不過五百若加倍添補未免過多涼州酌添兵五百

名莊浪酌添兵三百名並請涼州酌添佐領防禦驍騎校各二員並莊浪酌添佐領防禦驍騎校各一員從之四十九年四月固原新教回人田五等聚衆滋事莽古賚帶兵駐隆德請俟總督李侍堯到時再行進剿諭曰莽古賚身為將軍既帶兵前至隆德該處見有賊匪滋擾伊卽當相機剿捕何得復稱與李侍堯商辦其年邁無能於此可見著傳旨嚴行申飭看來該將軍在彼甚不得力旺沁班巴爾係寧夏副都統見帶同阿拉善蒙古兵赴彼協剿莽古賚俟旺沁班巴爾到時卽將所帶寧夏滿兵交伊帶領速回鎮守時陝甘總督福康安率兵從底店進剿命莽古賚催趲乾糧火藥鉛彈五月石峯堡逆回平得旨交部議敘旋調杭州將軍五十年卒子來靈襲奉恩將軍緣事革退以孫新瑞襲

海祿

海祿蒙古正藍旗人姓齊普齊特由前鋒於乾隆二十年隨領隊大臣莽阿納出師伊犁二十一年隨定邊右副將軍兆惠駐濟爾哈朗二十四年委署筆帖式六月隨副將軍富德攻葉爾羌七月攻伊西洱庫爾淖爾均在事有功八月奉旨賞給噶卜什海巴圖魯名號並賞戴花翎二十七年擢三等待衛三十年經參贊大

臣尙書永貴奏請派往烏什辦事六月隨領隊大臣鄂津在烏什剿賊得頭等功奉旨擢二等侍衛三十四年隨永貴往伊犁辦事九月隨鄂津差哈薩克三十五年隨征緬甸三十六年調赴金川帶兵四百攻斑爛山及斯當安俱有功三十七年三月攻日耳寨六月攻固北濟山梁九月補鑲黃旗前鋒參領十月克路頂宗喀木色爾等寨十一月攻明郭宗溝內碉卡十二月副都統海蘭察由布喇克取明郭宗海祿帶兵接應三十八年正月諭曰陝西固原鎮總兵員缺著海祿署理六月木果木師潰海祿從美諾赴巴朗拉固守八月定西將軍阿桂奏美諾失守請褫海祿職得旨從寬留任十月由資哩南山進攻奪獲阿喀木雅山上碉一十一月進抵路頂宗山陡峻夜半潛入賊巢殲賊三十餘滾崖死者相枕藉遂拔路頂宗督兵進攻明郭宗克之直抵美諾寨賊驚潰獲大礮十餘米糧百餘石諭曰署總兵海祿攻剿明郭宗奮勉出力著加恩實授固原鎮總兵又奉諭革職留任之案准其開復其各任養廉照舊支給三十九年正月隨阿桂由薩爾赤鄂羅山進剿又偕署興漢鎮總兵保寧攻克登石碉卡二月從喇穆喇穆迤西進獲石卡一三月攻得斯東寨賊巢六月攻色溯普山梁拔之得旨議敘加功一等紀錄二

次又加功三等七月攻喇穆喇穆山梁占據日則丫口要路又攻該布達什諾木城連克碉寨議敘加功三等十月攻遜克爾宗賊出伏兵衝擊之賊潰旋偕副都統富興進至達爾沙朗攻克大碉五並克伊格爾瑪迪等碉卡十一月偕副都統烏什哈達奪羅卜克鄂博溝內碉寨十二月攻克格魯克古山梁議敘加功三等四十年正月攻康薩爾督兵躍鹿角濠進直抵碉根賊竄二月攻克勒吉爾博山梁三月乘勝剿沿河羣泥等處大破之四月大兵攻木思工噶爾丫口海祿以兵接應殲賊甚衆五月攻克邁過爾山梁議敘加功一等紀錄二次復同烏什哈達攻丫口左木城石碉拔之七月從舍圖枉卡分攻巴占各寨官兵攀林援石從山腰斜上遂奪據毘色爾進攻章噶大碉克之並奪木城一閏十月同襄陽鎮總兵官達色攻黃草坪賊奔潰占其地十二月調補直隸天津鎮總兵旋領土兵搶獲兜窩碉卡復將莎羅奔甲爾瓦沃雜爾所居之拉布咱占奪取又同副都統書麟等攻則朗噶克聞克爾噶木勒烏果木得克聶烏等賊寨四十一年金川平凱旋入紫光閣筵宴賞銀五百兩大緞十二匹四月策功海祿加功三等奉旨列入功臣畫像御製贊曰資哩美諾皆樹奇績奪毘色爾攀林援壁固資衆力率先以親

自定酬庸命鎮天津六月給騎都尉世職十月擢雲南提督四十六年入覲抵湖南聞薩拉爾回蘇四十三叛奏請前往協剿六月賊占華林山領侍衛內大臣海蘭察等在卡外設伏令海祿帶兵策應七月同海蘭察等攻華林山正面多斬獲旋進至華林寺燬賊巢賊竄濠內官兵殲之逆回平仍回原任四十八年六月諭曰烏魯木齊都統事務著海祿由雲南馳驛前往署理四十九年正月奏參鎮西府兼攝宜禾縣祥泰採買兵糧浮開價銀並擅動庫項借給當商取利各款奉旨革審議祥泰罪又奏瑚圖斯地方私開金廠恐聚衆滋事請禁止諭曰古城迤北瑚圖斯地方逼近土爾扈特遊牧與內地不同豈容聚集多人在彼私開金廠海祿能留心訪察委員前往將該犯等按名拏獲辦理認真實屬可嘉海祿著交部議敘加三級又奏參迪化州知州觀成將經費銀動用一千三百餘兩私助甘省派往出口聽差人員鎮迪道保年率行咨請交部分別議處其挪移之項應著觀成賠補奉旨著照所請行三月奏烏魯木齊各屬運送餉鞘茶封遣犯及撥運糧石等項歷任各員於運價每多浮銷請分別著追又奏管屯都司朱緯於播種麥地及屯地畝數含糊不報顯爲秋收時交兌糧石朦混地步請革朱緯職查從前

議定屯田章程收成十二分以上功過相抵十五分以上官員議敘兵丁給賞新疆地本膏腴若督率有方每歲均可得二十分以上緣累任提臣辦理漫不經心是以提標中左右營節年俱祇報十五分以上似宜酌量加增每兵收穫細糧十五石以上功過相抵二十石以上者議敘賞給二十四石以上者從優議敘賞給報聞閏三月奏烏魯木齊所屬交收糧石應照數歸公將外加斛面及淋尖跌斛等弊嚴行禁止從前各廳州縣並守備以上管屯大員剝下營私互相通融請交部議處領隊大臣圖思德提督彭棟等降調有差又奏吐魯番廳供支滿營兵糧不敷應採買查從前採買弊竇多端必須確覈時估不使毫絲浮買請嗣後一體奏聞辦理上是之四月奏籌畫裁汰經費一摺查巴里坤總兵檔房雜費應行裁減者歲省銀九千六百餘兩一過往官兵鹽菜等項宜總歸哈密駐劄大臣隨時據實支領由臺車運送無須開銷運腳一奇臺濟木薩解交迪化州買補倉糧一項見在倉糧足敷備貯毋庸買補每年約扣糧價銀七千五百餘兩各廳州縣房租地課牲稅每年約收銀二萬八千餘兩二項共三萬五千五百餘兩解交迪道庫足敷該處辦事大臣司員筆帖式養廉鹽菜紅白賞項及軍臺驛站修補農器

車輛一切支領所有內地撥解經費銀二十萬餘兩應停止一各屬採買冒銷侵虧及私開金廠案內查抄變價共雜項銀七萬二千六百餘兩亦請解道庫備用其節年所賸經費銀四十餘萬兩應解交伊犁作爲正項下軍機大臣議行又奏烏魯木齊宜照內地編保甲加意盤詰再各屬官廠空金民人並馱販口糧貨物等客民應令地方官給照票以防奸匪議行又奏奇臺縣知縣陽桑阿冒銷運腳侵蝕租稅共銀八千五百餘兩並革任迪化州知州觀成挪移庫項虧短二萬七千餘兩俱審明抵罪又奏臺灣人犯向例撥入烏魯木齊鐵廠效力此等械鬪案犯賦性獷悍聚集易於滋事請撥巴里坤等處給兵丁爲奴上嘉其言是月調補烏什參贊大臣授鑲黃旗漢軍都統十月調鑲藍旗漢軍都統先是海祿在烏魯木齊都統任內奏哈密至精河等站酌設臺車一百五十輛又奏從前雇用商車一輛每百里價銀一兩六錢請減去銀一兩照六錢覈算並將從前報銷車價各員按每兩六錢例勒限追賠至是諭曰雇用出口車輛從前給價稍優俾小民運費之外略得盈餘以資餬口相沿日久視爲固然海祿請減去銀一兩並將歷任經手各員一體革職治罪之處所奏未免過當前已據烏什辦事大臣綽克托奏

喀喇沙爾以西戈壁頗多車輛甚少若照新定六錢之例實難雇覓請照從前一兩六錢銀數支給而塔爾巴哈臺辦事大臣惠齡亦復咨請到部是新定車價省減過多各該處勢屬難行紛紛咨奏自係實在情形理應通盤籌畫覈實酌中定價方可行之永久陝西總督福康安奏新疆辦事大臣均稱口外雇車若照六錢咨給實有不敷且設立官車抽撥兵馬輓運必致兵丁技藝生疏營馬瘦乏運送各項銀鞘必致稽遲不若雇車便易上命軍機大臣議定雇車價值嘉峪關以北一兩二錢以南一兩四錢其造車工料銀著海祿賠交十二月福康安又奏新疆各處屯田頻年增加收成分數致兵丁竭蹶究於邊政無裨諭曰新疆屯田日闢歲穫豐登原定賞罰章程伊犁每兵收穫細糧至十八石烏魯木齊每兵收穫細糧至十五石官員議敘兵丁加賞嗣經海祿奏准古城吉布庫二處須報至二十四分滿木薩須報至二十分如再能加增方准從優敘賞其意雖爲裨益倉儲多收糧石急於見長但地方土有肥瘠水泉亦有盈絀在地肥水足之處或可豐收而地瘠水少之區鮮能及額以致屯員顧慮處分虛報分數兵丁懼于責處賠累多端殊非朕體卹兵丁之至意著交伊犁將軍及新疆辦事大臣各按該處實在

情形酌定屯田收成分數另行妥議具奏至本年烏魯木齊所屬屯田收成有不及分數者屯員兵丁均毋庸照新增之例議處懲責將軍伊勒圖等奏准仍照舊定屯田章程辦理又奏停海祿所奏遣犯派入鐵廠捐貲效力例仍遵向例辦理五十年九月諭降補副都統伊犁額魯特領隊大臣五十一年授伊犁參贊大臣五十二年十月劾將軍奎林任性乖張毀棄佛像辱罵職官非刑致斃罪人及聽情得受遣犯高姓銀兩縱令回籍又於哈薩克市易羊隻採買布匹濫受餘價銀三千兩各款上命烏魯木齊都統永鐸查覈據實陳奏十一月諭曰據海祿奏參奎林各款見在查訊已有證據數款奎林著卽革職拏解來京審訊五十三年二月諭曰朕以奎林受恩深重身爲將軍大員乃率意妄行甚至聽情受賄侵蝕價銀殊堪駭異而海祿所奏各款詢之伊犁回京人員已有數款指實遂深惡奎林曾面諭軍機大臣等若審明奎林賊款屬實必將奎林卽行正法斷不肯因其係孝賢皇后之姪稍爲寬宥因降旨將奎林革職拏問並諭令永鐸海祿等訪查奎林有無別項款蹟續行奏參嗣據永鐸查奏奎林爲人倨傲嗜酒性情躁急實所不免其原參內毀棄佛像及將罪犯斷折手足拋入河內並用重枷致斃等款奎

林曾有是事俱尙爲整飭地方懲治兇惡起見至於得受遣犯贓銀侵用布匹餘價銀兩及穢言詈罵職官實無其事並據該處領隊大臣等僉稱奎林並無向各營索取銀物之事惟海祿曾向額魯特總管私行換馬一百餘匹而海祿續奏奎林之摺於原參款蹟語涉含糊輓回已自相矛盾見在奎林業經解到海祿率領干證亦已來京特命諸皇子軍機大臣會同刑部將各款逐一研訊並令海祿與奎林當面質對據奎林供認毀棄神像致死有罪遣犯等款屬實其罰出高姓銀兩及將布匹買換羊隻餘價俱屬留充公用修補城署添買馬匹等項皆有經手官員冊案可憑質之干證各員確鑿有據卽詢之海祿亦不能指出奎林絲毫入己款項其爲挾嫌誣捏情節顯然茲軍機大臣會同該部定擬具奏將奎林照擅殺罪人例問擬滿杖海祿照誣告人死罪未決律問擬杖流固屬按律辦理但海祿係原奏之人今所擬罪較奎林爲重恐外間無識之徒以朕於孝賢皇后之姪有所偏倚而承審之大臣等又多與奎林熟識且不無心存迎合將奎林曲爲寬縱而於海祿有意從嚴或致妄生議論自應將奎林海祿一律定擬以示平允因念伊二人俱曾帶兵出力尙屬有用之才不忍令其終於廢棄但奎林乖張任性

文科

清史列傳

豈可復任將軍海祿著革職免其杖流俱罰令在上虞備用處拜唐阿上效力行
 走以贖前愆而觀後效伊等當差如果勤勉出力將來尙可加恩酌量棄瑕錄用
 或令隨圍約束兵丁可資得力奎林海祿二人當倍加感愧痛改前非無負朕格
 外矜全至意三月本旗奏將海祿軍功議敘騎都尉世職敕書交部銷燬旋奉旨
 補授藍翎侍衛擢山海關副都統五十四年正月諭曰廣東提督員缺著海祿補
 授六月調福建陸路提督五十六年二月卒賜祭葬如例嘉慶四年奉旨海祿子
 希朗阿襲騎都尉六年補授散騎郎

清史列傳卷二十四終

